


# যাযাবর | দৃষ্টিপাত



চি রা য় ত বাং লা গ্রন্থ মা লা

..... আ লো কি ত মা নু ষ চা ই .....

# যাযাবর দৃষ্টিপাত



বিন্সাহিত্য কেন্দ্র

বিশ্বসাহিত্য কেন্দ্র প্রকাশনা ২৪২

গ্রন্থমালা সম্পাদক  
আবদুল্লাহ আবু সায়ীদ

প্রথম বিশ্বসাহিত্য কেন্দ্র সংস্করণ  
মাঘ ১৪১২ ফেব্রুয়ারি ২০০৬

দ্বিতীয় সংস্করণ সপ্তম মুদ্রণ  
কার্তিক ১৪১৭ অক্টোবর ২০১১



প্রকাশক

মোঃ আলাউদ্দিন সরকার  
বিশ্বসাহিত্য কেন্দ্র  
১৪ কাজী নজরুল ইসলাম এভিনিউ  
ঢাকা ১০০০ ফোন ৯৬৬০৮১২ ৮৬১৮৫৬৭

মুদ্রণ

নিজাম প্রিন্টার্স গ্র্যান্ড প্যাকেজেস  
২৪, পুরানা পল্টন লেন, ঢাকা ১০০০

প্রচ্ছদ

ধ্রুব এষ

মূল্য

একশত পঞ্চাশ টাকা মাত্র

ISBN-984-18-0241-4

## ভূমিকা

দৃষ্টিপাত এমন একটি বিরল বই যা একই সাথে শিল্পোত্তীর্ণ ও জনপ্রিয়। যাযাবর তাঁর এই প্রথম বইটিতেই বাঙালি পাঠককে একটি অনাস্বাদিত জগৎ ও ভিন্নমাত্রিক গদ্যশৈলী উপহার দিয়েছেন। দৃষ্টিপাত একটি পত্রাবলি সংকলন কিন্তু এটি একটি সার্থক উপন্যাসের মতো মনোরম, চৌকশ রিপোর্টিং-এর মতো আকর্ষক এবং রোমাঞ্চকর, ডিটেকটিভ গল্পের মতো দ্রুত ও সুখপাঠ্য। তীক্ষ্ণ পর্যবেক্ষণ লব্ধ সূচিস্থিত সরস মন্তব্য এই বইটির প্রাণ। বইটির গদ্য মার্জিত ও ধারালো।

দৃষ্টিপাত (১৯৪৭, জানুয়ারি) বইটির সূচনায় যে সংকলয়িতার নিবেদন আছে—তা নাটকীয় এবং অভিনব। এটি কেবল বিক্রয়কৌশলই ছিল না বরং আত্মরক্ষাকৌশলও ছিল। ধারাবাহিকভাবে এই লেখাটি বের হয়েছিল মাসিক বসুমতীতে ১৯৪৬ সাল থেকে। পরাধীন দেশে স্বাধীন মন্তব্যে ভরপুর একটি বইকে রাজরোষ থেকে বাঁচাতে এই কৌশলের প্রয়োজন ছিল। পরে যখন দৃষ্টিপাত দিল্লি বিশ্ববিদ্যালয় থেকে সমকালীন বাংলা সাহিত্যের শ্রেষ্ঠ গ্রন্থ হিসেবে ১৯৫০ সালে সম্মানজনক ‘নরসিংহ দাশ’ পুরস্কারে ভূষিত হয়—তখন ছদ্মনাম ও মৃতব্যক্তির ছদ্মবেশের আড়ালে থাকা লেখক বিনয় মুখোপাধ্যায়-এর আসল পরিচয় প্রকাশিত হয়ে পড়ে।

বিনয় মুখোপাধ্যায় ১৯৪৬-১৯৮৩—এই ৩৮ বছরে লিখেছিলেন ছয়টি বই। সেগুলো হচ্ছে যথাক্রমে দৃষ্টিপাত (পত্রাবলির সংকলন ১৯৪৭), জনান্তিক (উপন্যাস, ১৯৫২), ঝিলম নদীর তীরে (কাশ্মীরের স্বাধীনতা সংগ্রাম, ১৯৫৪), লঘুকরণ (নিবন্ধ সংগ্রহ, ১৯৬৪), হ্রস্ব ও দীর্ঘ (গল্পগ্রন্থ, ১৯৭৩), যখন বৃষ্টি নামল (গল্পগ্রন্থ, ১৯৮৩)।

বইগুলোর বিষয়বৈচিত্র্য ও প্রত্যেকটি বইয়ের প্রকাশকালের ব্যবধান লক্ষ্য করলে বোঝা যায় বিনয় মুখোপাধ্যায় অত্যন্ত পাঠকপ্রিয় লেখক হলেও পাঠকের চাহিদা ও বাজার বিবেচনা করে কখনও লেখেননি। এক্ষেত্রে তিনি ছিলেন প্রচলিত জনপ্রিয় লেখকদের ধারার বাইরের।

১৯৪২-৪৩ সালের দিল্লি জীবন্তভাবে উঠে এসেছে লেখকের বর্ণনায়। দিল্লির রাজনীতি, সমাজ, অবকাঠামো প্রায় সবকিছুইর যথার্থ বিবরণ আছে :

“সাড়ে ন’টা থেকে শুরু হয় আপিস অভিযান। প্রথম চাপরাশি দল। গায়ে খাকি রঙের উর্দি, মাথায় পাগড়ি ও কটিতে লাল সর্পাকৃতি তিন-চার ফেরতা কোমরবন্ধ। চাপরাশিদের পরে যায় কেরানি, গ্র্যাসিট্যান্ট ও সুপারিন্টেন্ডেন্টরা। সাইকেল, সাইকেল, সাইকেলের পর সাইকেল। ঠিক যেন একটা সাইকেলের প্রসেশন।...সাড়ে দশটার

মধ্যে গোটা শহরটার সমস্ত পুরুষ নিষ্ক্রান্ত হল পথে। সব পথেরই একই লক্ষ্য—সেক্রেটারিয়েট। বাবু পালাল, পাড়া জুড়াল, গিল্লি এল পাটে।”

“নয়াদিল্লি শহরটা সৃষ্টি হয়েছে সরকারি প্রয়োজনে, কপালে তার জয়পত্র আঁটা, ‘অন হিজ ম্যাজেস্টিস সার্ভিস’।

“আতিশয্যের দ্বারা অত্যন্ত ভালো জিনিসকেও যে কতখানি হাস্যকর করে তোলা যায় তার দৃষ্টান্ত আছে নয়াদিল্লির নগরপরিকল্পনায়। যুনিফর্মিটির বাতিকে পাওয়া স্থপতিরা শহরটাকে শ্রী দিতে গিয়ে ছাঁচ দিয়েছেন, বাড়ি দিতে গিয়ে ব্যারাক। বৈচিত্র্যের মধ্যে মূলগত ঐক্য প্রকাশ করার নাম সৃষ্টি। গজ, ফুট, বা ইঞ্চি মিলিয়ে সামঞ্জস্য বিধানের নাম নকলনবিশি। প্রথমটা যিনি করেন তাঁকে বলি ব্রহ্মা, দ্বিতীয়টা যিনি করেন তাঁর নাম বিশ্বকর্মা। প্রথমটার মধ্যে আছে আর্ট, পরেরটার মধ্যে আছে ক্র্যাফট।”

দৃষ্টিপাত বইটির ঐতিহাসিক গুরুত্বও রয়েছে। ইতিহাসের এক যুগসন্ধিক্ষণের আভাস পাওয়া যায় এই বইয়ে। দ্বিতীয় মহাযুদ্ধে যখন ব্রিটেনের একের পর এক সামরিক পরাজয় ঘটছিল ও কলোনিগুলো হস্তচ্যুত হচ্ছিল ক্রমান্বয়ে, সে-সময় ভারতবর্ষের স্বাধিকার আন্দোলন আন্তর্জাতিক নেতৃবর্গের সহানুভূতি ও সমর্থন লাভ করে। একপর্যায়ে প্রায় বাধ্য হয়ে স্বাধীনতাকামী ভারতবর্ষের প্রতি কঠোর প্রধানমন্ত্রী চার্চিল ব্রিটেন ও ভারতবর্ষের বিরোধ নিরসন এবং ভারতবর্ষের বর্তমান ও ভবিষ্যৎ সমস্যা সম্পর্কে একটি ন্যায্যসঙ্গত ও চূড়ান্ত মীমাংসা করার লক্ষ্যে ভারতীয় নেতাদের সম্মতি সংগ্রহের জন্য মন্ত্রিসভার একটি প্রস্তাব ভারতে পাঠান। আলোচনায় মধ্যস্থতাকারী ব্যক্তিটি ছিলেন ওয়ার ক্যাবিনেটের সদস্য, ভারতবর্ষের প্রতি বন্ধুভাবাপন্ন স্যার স্ট্যাফোর্ড ক্রিপস। দৃষ্টিপাত-এর ‘সংকলয়িতার নিবেদন’ থেকে আমরা জানতে পারি এ বই-এর লেখক বিলেতে ব্যারিস্টারিতে অধ্যয়নরত একজন বাঙালি ছাত্র। ক্রিপসের আলোচনার প্রাক্কালে বিলেতের একটি প্রাদেশিক পত্রিকার নিজস্ব সংবাদদাতা হিসেবে তিনি দিল্লিতে আসেন। কাজেই দৃষ্টিপাত বইটির প্রধান পটভূমি হচ্ছে এই ক্রিপস-এর মিশন। এর পাশাপাশি অন্যান্য শাখা-কাহিনী, মন্তব্য, বিশ্লেষণ, ভ্রমণবৃত্তান্ত নিয়েই পুরো বইটি লিখিত হয়েছে।

যে কুশলতার সাথে তিনি তখনকার রাজনৈতিক পরিস্থিতি, ব্রিটিশ স্বাধিকার নিয়ে ভারতীয়দের প্রত্যাশা ও দৃষ্টিভঙ্গি, কূটনীতি ও সমসাময়িক ঘটনা-পরম্পরা বর্ণনা করেছেন—তা এককথায় অসাধারণ। এমনকি বর্তমান পাঠকের মনেও যেন সেদিনের ভারতবাসীর মতো ক্রিপস মিশনের ভবিষ্যৎ নিয়ে টেনশন সঞ্চারিত হয়। লেখকের তখনকার মন্তব্য ও পর্যবেক্ষণের যথার্থতা পরবর্তীকালে প্রকাশিত ঐতিহাসিক দলিলপত্র দিয়েও সমর্থিত হয়েছে।

বইটির গুরুত্রে লেখক ক্রিপস সম্পর্কে যতটা আশাবাদী ও উৎফুল্ল ছিলেন, শেষে ততটাই নিরাশ হয়েছেন। এতে অবশ্য বইটির বিশ্বাসযোগ্যতা বেড়েছে। কারণ দৃষ্টিপাতের কাঠামো (form) হচ্ছে পত্রসংগ্রহ। প্রথম চিঠি থেকে পরবর্তী চিঠিগুলোতে পরিবর্তিত পরিস্থিতি ও অনুভূতির ছাপ থাকাই স্বাভাবিক। তিনি যদি

গতানুগতিক রাজনৈতিক কলামিস্টদের মতো গুরু থেকেই নৈরাশ্যবাদী সবজান্তা 'আমি আগেই জানতাম' সুরে কথা বলতেন তবে এই বইয়ের শৈল্পিক কাঠামো ঠিক থাকত না—এটি একটি রাজনৈতিক কলাম সংগ্রহতে পরিণত হত।

চরিত্র-অঙ্কনে লেখক খুব পটু। কখনও একটি দৃশ্যের বর্ণনা, কখনো -বা নির্বাচিত কিছু সংলাপে এ চরিত্রগুলো দৃশ্যমান হয়ে ওঠে।

“গান্ধীজি ক্রিপসের কক্ষ থেকে নিষ্ক্রান্ত হলেন প্রায় তিন ঘণ্টা পরে। তাকে বারান্দার সিঁড়ি অবধি এগিয়ে দিতে সঙ্গে এলেন ক্রিপস। মুহূর্তমধ্যে সাংবাদিকরা চক্রবৃহৎ রচনা করলেন তাঁকে ঘিরে। ক্রিপসের রসবোধ আছে। রহস্য করে বললেন, গান্ধীজির হাসি দেখে সাংবাদিকরা যেন ক্রিপস প্রস্তাবের গুণ বিচার না করেন। ঘর থেকে বেরোবার সময় মুখে হাসি ফুটিয়ে তুলতে তিনি গান্ধীজিকে শিখিয়ে দিয়েছেন। প্রবল হাস্যধ্বনি উঠিত হলো এই কৌতুকালোকে।”

চার্লিস ক্রিপসের হাতে একটি শূন্যগর্ভ প্রস্তাব পাঠিয়ে কীভাবে তাঁর রাজনৈতিক প্রতিদ্বন্দ্বীর কেরিয়ার শেষ করে দেন এবং ভাইসরয় লর্ড লিনলিথগোও কীভাবে পর্দার আড়ালে ক্রিপসের সাফল্যের বিরুদ্ধে কাজ করেন—তার সাবলীল বর্ণনা দিয়েছেন লেখক।

বর্ণনার ক্ষেত্রে যাযাবর অনেকটা সংবাদপত্র প্রতিবেদকের মতোই নির্মোহ ও বাস্তবনিষ্ঠ। দিল্লির প্রাচীন ও আধুনিক স্থাপত্য, অধিবাসীদের চালচিত্র এমন নিখুঁত, অধ্যবসায়ের সঙ্গে লক্ষ করেছেন—যা অনেকসময় ভিনদেশী প্রাচীন পর্যটকদের ভ্রমণকাহিনীর কথা মনে করিয়ে দেয়। লেখকের শৈল্পিক বোধ, ইতিহাসচেতনা সাহিত্যানুরাগ, বিপুল অধ্যয়ন—তাঁর পর্যবেক্ষণ ও বিশ্লেষণকে সমৃদ্ধ ও পরিপূর্ণ করে তুলেছে। আরেকজন স্বনামধন্য ভ্রমণকাহিনী লেখক ও রম্যরচয়িতা সৈয়দ মুজতবা আলীর সাথে এক্ষেত্রে তাঁর সাদৃশ্য টানা যায়।

অতীত-বর্তমানের তুলনা ও প্রতিতুলনা লেখক প্রায়শই করে থাকেন। এক্ষেত্রে অতীতের প্রতিই তাঁর পক্ষপাত বেশি থাকে, যদিও ভাষা ও দৃষ্টিভঙ্গিতে তিনি পুরোপুরি আধুনিক। যাযাবরের লেখার মধ্যে খুঁজে পাওয়া যায় ব্যঙ্গ, ঘেঁষ এবং সমালোচনা-প্রবণতা। ইংরেজ, ইংরেজহিতৈষী ভারতীয়, ইত্যাদি গোত্রকে তিনি তীক্ষ্ণ, চৌকশ বাক্যবাণে লক্ষ্যভেদ করেছেন :

“স্বদেশে ইংরেজকে কখনও দেখিনি এমন মাত্রাজ্ঞানহীন। শনিবার বিকালে পিকাডিলিতে দেখেছি প্রণয়ীযুগলের দল। তাদের আনন্দাশ্বাস ঠিক ভট্টপল্লীর বিধানানুযায়ী নয় বটে।... কিন্তু তবুও অদৃশ্য, অলিখিত একটা রেখা টানা আছে যা লজ্জন করে না কেউ। সে রেখা সুনীতির নয়, সুরুচির। ডিসেসিকে ইংরেজ ভালোবাসে মনেপ্রাণে। ইন্ডিসেন্ট বলার বাড়ি গাল নেই ইংলন্ডে। ছাব্বিশ মাইল জল পার হলেই কন্টিনেন্টে দেখা যায় না এ রুচিবোধ। ...ভারতবর্ষে ইংরেজের এই নির্লজ্জ উচ্ছ্বলতার প্রধান কারণ এই যে, চারপাশের দর্শকদের ওরা মানুষ বলেই গণ্য করে না। ... আরও একটা কারণ আছে, সেটা গভীরতর। এদেশে ইংরেজ তার পরিবার ও সমাজ থেকে একেবারেই বিচ্ছিন্ন। এখানে সে বন্ধাহীন অশ্ব। সে যেন

কলকাতার মেসে থাকা মফঃ্বলের ধনী জমিদারনন্দন। পিছনে অভিভাবকের এতটুকু নেই রাশ। হাতে টাকা আছে রাশি রাশি।”

এরা আই.সি.এস। দেশীয় সংবাদপত্রের ভাষায় যাকে বলে স্বর্গোদ্ভূত চাকরে—হেভেনবর্ন সার্ভিস। সিজার-পত্নীর সতীত্বের মতো এদের যোগ্যতা প্রশ্নের অতীত, ভবিষ্যৎ অব্যাহত এবং ক্ষমতা সীমাহীন।

“আই.সি.এস একটা পেশা নয়; আই.সি.এস একটা জাত। হোলি রোমান এম্পায়ার যেমন না ছিল হোলি, না ছিল রোমান এবং বলা না যায় এম্পায়ার; ইন্ডিয়ান সিভিল সার্ভিস তেমনি ইন্ডিয়ান নয়, সিভিল তো নয়ই এবং সার্ভিসের বাষ্প মাত্র নেই।”

ভারতবর্ষে আমলাতন্ত্রের প্রবর্তন, প্রকৃতি ও প্রবণতা সম্পর্কে ব্যাপক ধারণা দেওয়া হয়েছে বইটিতে। আই.সি.এস অফিসার, সাহেবি কোম্পানির দেশি কর্মকর্তা, উঠতি ব্যবসায়ী এবং তাদের ‘অবসর বিধ্বস্ত’—আধুনিকা গৃহিণীদের নিয়ে করা হয়েছে বিস্তার ব্যঙ্গ।

যুগ পরিবর্তন, নারীশিক্ষার প্রবর্তন, পাশ্চাত্য প্রভাব প্রভৃতি কারণে ভারতবর্ষে বদলে গিয়েছিল নারীদের ভূমিকা—দেখা দিয়েছিল নতুন যুগের আধুনিক নারী। যদিও রবীন্দ্রনাথের কবিতায় আছে ‘আধুনিকা ছিল নাকো হেন কাল ছিল না।’

এইসব নারীদের কেউ কেউ মুক্তি পেয়েছিল শিক্ষায়, চেতনার উৎকর্ষে, আত্মনির্ভরশীলতায়; কেউ-বা মুক্তি খুঁজেছিল পার্টি, ক্লাব ও সভা-সমিতিতে। ধনী গৃহিণীরা খোঁজ রাখতেন বিলেত ও প্যারিসের সাম্প্রতিক প্রসাধন ও ফ্যাশন সামগ্রীর: বসিং-এর সময় লন্ডনে ছিলে বুঝি? সেখানকার অবস্থা কেমন? বাজারে ড্রিন শ্যাম্পু পাওয়া যায়? ট্যাক্সি লিপস্টিক?

দিল্লীতে গ্রীষ্মকাল কাটানো অভব্যতা মনে হত তাদের কাছে : নতুন কমান্ডার-ইন-চিফ নাকি বলেছেন, সিমলা গেলে যুদ্ধজয়ে বিঘ্ন ঘটবে। শোন একবার যত অনাসৃষ্টির কথা। আরো গরম পড়লে কিন্তু তিনি সিমলা না গিয়ে পারবেন না, তা বাপু, তোমরা যাই বল না কেন।

যাযাবর বর্ণিত এইসব চরিত্র ও শ্রেণীর কিছু বৈশিষ্ট্য সমাজে হয়তো এখনও রয়ে গেছে। স্বাধীনতা-পরবর্তীকালে আবদুল গনি হাজারীর ‘কতিপয় আমলার স্ত্রী’ (সূর্যের সিঁড়ি, ১৯৬৫) কবিতায় প্রায় একই ধরনের ছবি ফুটে উঠতে দেখি :

হে প্রভু আমাদের ত্রাণ করো  
বিশ্রামে বিধ্বস্ত আমরা  
কতিপয় আমলার স্ত্রী ...

বালিশের ভাঁজে উদ্ভূত হাত খরচ  
আয়নার দেয়ালে হেলেন কার্টিস  
এনি ফ্রেঞ্চ-মিস্ক  
এক্সট্রিনজেন্ট...



অবশ্য স্বামীদের কাছ থেকেই  
উষ্ণ প্রেমের ঘাটতির  
প্রৌঢ় ক্ষতিপূরণ  
আদালতীর কুর্নিশে গর্বিত  
স্বামীরা অফিসে সর্বক্ষণ  
অন্যের পদোন্নতির বাধা  
দরখাস্ত নাকচ... ।

দিল্লির ঐতিহাসিক স্থান, দর্শনীয় স্থাপত্যের আছে বিস্তারিত বর্ণনা, সেই সূত্রে আলোচিত হয়েছে দিল্লির ইতিহাসের চুম্বক-অংশ, বিখ্যাত চরিত্ররা । ভারতবর্ষ বহু ভাষা, রীতি ও জাতির দেশ । তাদের আহা-বিহার, অতীত-বর্তমান বিশেষ করে বাঙালিদের সাথে তাদের তুলনামূলক আলোচনা নিয়ে বেশ সরস ও তাৎপর্যপূর্ণ মন্তব্য ও তথ্যে *দৃষ্টিপাত* সমৃদ্ধ ।

সাহিত্যকে যদি আকাশ হিশেবে কল্পনা করা হয়, তবে কিছু বইকে তুলনা করা হবে ধ্রুবতারা বা তারকামণ্ডলীর সাথে । কিছু বই হয়তো ঠিক তারকা নয় কিন্তু উৎকর্ষে আকাশছোঁয়া মানের । তবে দেখা যায় সত্যিকারের গভীর জীবনবোধসম্পন্ন, উচ্চমাত্রার মননশীল বই সাধারণত পাঠকপ্রিয় হয় না । সাধারণ পাঠকরা সেসব বইয়ের নাম জানেন, দূর থেকে শ্রদ্ধা করেন কিন্তু মননে কিংবা হৃদয়ে ধারণ করতে পারেন না ।

কিন্তু কিছু কিছু উৎকৃষ্টমানের বই কীভাবে যেন জনপ্রিয়তা পেয়ে যায় । *দৃষ্টিপাত* সাহিত্যআকাশের ধ্রুবতারা না হলেও উচ্চমানের একটি বই । তাই এর জনপ্রিয়তার কারণ সম্পর্কে কৌতূহল জাগে । ধরা যাক এই বইয়ের জনপ্রিয়তার পেছনে রয়েছে এর সর্বভারতীয় শ্রেষ্ঠত্বের স্বীকৃতি প্রাপ্তি, নাটকীয় সংকলনিতার নিবেদন, সুখপাঠ্য ঝরঝরে গদ্য, সমকালীন ঘটনাপ্রবাহ ইত্যাদি । আরেকটি বিশেষ কারণ মনে হয়, প্রগতিশীল মানুষ, বিশেষত তরুণ সম্প্রদায় যাযাবরের মধ্যে ঝুঁজে পেয়েছিল নিজেদের মুখপাত্র । *দৃষ্টিপাতের* মুখ্য চরিত্রটি একজন আধুনিক পেশাজীবী, আন্তর্জাতিকমনস্ক, সংস্কৃতিবান, পাঠ ও ভ্রমণপ্রিয়, সংবেদনশীল, সপ্রতিভ ও মেধাবী মানুষ । এত গুণ সত্ত্বেও তিনি কিন্তু এমন অসাধারণ কেউ নন, যার সাথে পাঠক নিজেকে মেলাতে পারবেন না । সিনেমার নায়ক যেমন তার বাচনভঙ্গি, ব্যক্তিত্বের কারণে রোলমডেল হতে পারেন, তেমনি লেখকসৃষ্ট কোনো চরিত্র তাঁর বৈশিষ্ট্যের কারণেও হতে পারেন প্রিয় বা আদর্শ ।

*শেষের কবিতা* রবীন্দ্রনাথের একটি জনপ্রিয় উপন্যাস । *দৃষ্টিপাত* সম্পূর্ণ ভিন্নধর্মী একটি বই হলেও কিছু কিছু ব্যাপারে সাদৃশ্য টানা যায়—যা উভয়ের জনপ্রিয়তার কারণ দর্শাতে সাহায্য করবে । *শেষের কবিতায়* অনেক বাক্য ও মন্তব্য—সেকালে এবং একালেও উদ্ধৃতিযোগ্য । *দৃষ্টিপাত*-এর অনেক বাক্যও প্রবাদপ্রতিম । কেউ কেউ ডায়েরিতে, কেউ কেউ মনে টুকে রেখেছেন । যেমন : ‘বিজ্ঞান মানুষকে দিয়েছে

বেগ, কেড়ে নিয়েছে আবেগ।' 'প্রেম জীবনকে দেয় ঐশ্বর্য, মৃত্যুকে দেয় মহিমা। কিন্তু প্রবঞ্চিতকে দেয় কী? তাকে দেয় দাহ।'।

যে যুগে মানুষ চিঠিপত্রে, বিশেষত প্রেমপত্রে সাহিত্য থেকে কোটেশন উদ্ধৃত করত, দৃষ্টিপাত সেই যুগের শেষতম বই।

অমিত-লাবণ্যের জুটি বাঙালি পাঠকের প্রিয়। আধারকার-সুনন্দা উপাখ্যানও বাঙালি পড়ুয়াদের হৃদয়ে একসময় উজ্জ্বল স্পর্শ রেখেছিল।

মারাঠি ব্রাহ্মণ আধারকার, যার আষাঢ়ের জলভারানত মেঘের মতো চোখের দৃষ্টি, যিনি বেহালা বাজাতে পারেন এবং বাঙালিকে বাংলা কবিতা পাঠে হার মানান, তার প্রণয়কাহিনী যাযাবর অত্যন্ত স্বল্পপরিসরে হৃদয়গ্রাহী ভাষায় তুলে ধরেছেন।

কেন একটি বাঙালি মেয়ে এই গুণান্বিত, সুদর্শন ও 'চারুবাক' মানুষটিকে প্রথমে গভীর ভালোবেসে পরে বঞ্চনা করেছিল—সে এক রহস্য।

মনস্তত্ত্ববিদ ও দার্শনিক জোহারি মানুষের চেতন ও অবচেতন জগতের কিছু রহস্যময় বৈশিষ্ট্য চার-প্রকোষ্ঠ-বিশিষ্ট একটি চতুর্ভুজ ঐকে দৃশ্যমান করতে চেয়েছিলেন যা 'জোহারি উইন্ডো' নামে পরিচিত। প্রথম প্রকোষ্ঠ হল ব্যক্তিমানুষের এমন গুণাবলি অথবা দোষাবলি যার সম্বন্ধে মানুষ নিজেও সচেতন, অন্যরাও সচেতন। দ্বিতীয় প্রকোষ্ঠ এমন চারিত্রিক বৈশিষ্ট্যের প্রতিনিধিত্ব করে—যা সেই ব্যক্তিমানুষটি জানে কিন্তু অন্যরা জানে না। তৃতীয় প্রকোষ্ঠটি তাৎপর্যময়। এটি এমন গুণ বা দোষকে ধারণ করে যা ঐ ব্যক্তি জানে না, কিন্তু অন্যরা জানে। চতুর্থ প্রকোষ্ঠটি রহস্যময়। এটি এমন অবচেতন দোষ কিংবা গুণ ধারণ করে—যার সম্বন্ধে ঐ ব্যক্তি বা অন্যদের ন্যূনতম ধারণা নেই।

হয়তো আধারকারের চরিত্রে এমন কোনো ব্যর্থতা ছিল—যা সুনন্দাকে দূরে সরিয়ে দিয়েছিল কিন্তু যা ছিল স্বয়ং আধারকারের বুদ্ধির অগম্য। সুনন্দা প্রসঙ্গে এসে আমাদের সংযত লেখক স্বয়ং ক্রিপ্ত হয়ে নারীজাতির হৃদয়হীনতা সম্পর্কে চোখাচোখা মন্তব্য করেছেন, যা বেশ পাঠকপ্রিয়তা বা পুরুষপ্রিয়তা লাভ করেছিল। কিন্তু এ আসলে ব্যক্তির হৃদয়হীনতা কিংবা দুজনের সম্পর্কের রহস্যময়তা—যার জন্য কোনো জাতিকে দায়ী করা ঠিক নয়।

একটি ইউরোপীয় রূপকথাতে বর্ণিত হয়েছিল এক অত্যাশ্চর্য রূপক কাহিনী। এক রাজা মৃগয়াতে বের হবার পর পথে খুব সাধারণ এক তরুণীর দেখা পান এবং রাজা তার প্রেমে পড়েন। তিনি তাকে সঙ্গে করে নিয়ে আসেন রাজপ্রাসাদে, বিয়ে করবেন বলে। তরুণী রাজপ্রাসাদে এসে সম্ভবত ভয়ে ও মানসিক আতঙ্কে মারা যায়। কিন্তু কী আশ্চর্য, রাজা সংকল্পচ্যুত হন না। বিয়ে করে বসেন ঐ মৃত মেয়েটিকেই। সারা রাজ্য ঘৃণা ও দ্বিধারধনিতে ভরে ওঠে। শবদেহের হাতে ছিল একটি আংটি। সেই আংটি হস্তগত করেন রাজার এক সভাসদ। এর পরপরই হঠাৎ করেই রাজা ঘৃণাভরে মৃতদেহের কাছ থেকে দূরে সরে আসেন এবং সেটি সংস্কার করার নির্দেশ দেন। তারপর অনুসরণ করেন আংটি-পরিহিত ঐ সভাসদকে। সভাসদটি মান ও প্রাণভয়ে রাজপ্রাসাদ থেকে পালায়। পালিয়ে এসে পৌছয় এক দিঘির কাছে। রাজাও

তার পিছু নিয়ে পৌছান দিঘির পারে। সভাসদের আংটিটি অসাবধানে দিঘির পানিতে পড়ে যায়। রাজা সভাসদকে উপেক্ষা করে ঐ দিঘির পানিতে নেমে পড়েন—পদ্মফুলের অনিন্দ্য ঝাড় ছিল সেখানে। কলুষিত রাজা শেষপর্যন্ত সৌন্দর্যের পায়ের কাছে এসে সুন্দরের প্রেমে গুদ্র হয়ে আত্মাহুতি দেন।

এখন প্রেম যদি হয় সেই আংটি, তার ধারক বা বাহক এখানে হতে পারে অতি তুচ্ছ, বা অতি উচ্চ—এতে সেই আংটির মূল্যে হেরফের হয় না।

কিন্তু আধারকার শুধু আংটির ধারককে নয়, আংটিটিকেও ঘৃণা করতে শুরু করেন—যার পরিণতিতে তিনি চির-একাকিত্ব বেছে নেন।

যার বর্তমান আছে, অতীত বা ভবিষ্যৎ নাই—তিনি সাম্প্রতিক। যার অতীত আছে, কিন্তু বর্তমানকে যিনি ধারণ করতে পারেন না, তিনি সেকেলে। যিনি অতীত বর্তমান দুটোকেই মূল্য দেন তিনি আধুনিক। যিনি ভবিষ্যৎকালেও আধুনিক তিনি চিরায়ত।

দৃষ্টিপাতে চিরায়ত কালের কণ্ঠস্বর শোনা যায়।

নাহিদ আহসান

## সংকলয়িতার নিবেদন

এই রচনাটির একটু ভূমিকা আবশ্যক।

১৯৩৬ সালে একটি বাঙালি যুবক লন্ডনে ব্যারিস্টারি পড়িতে যায়। যুদ্ধ শুরু হওয়ার পরে গাওয়ার স্ট্রিটের ভারতীয় আবাসটি জার্মান বোমার আঘাতে বিধ্বস্ত হইলে আত্মীয়বর্গের নির্বন্ধাতিশয্যে যুবকটি ভারতবর্ষে ফিরিয়া আসে। স্যার স্ট্যাফোর্ড ক্রিপসের আলোচনার প্রাক্কালে বিলাতের একটি প্রাদেশিক পত্রিকা তাহাকে তাহাদের নিজস্ব সংবাদদাতা নিযুক্ত করিয়া দিল্লিতে পাঠান। লন্ডনে অবস্থানকালে ঐ পত্রিকায় সে মাঝে মাঝে প্রবন্ধ লিখিত।

দিল্লিতে যাইয়া যুবকটি তাহার এক বান্ধবীকে কতগুলি পত্র লেখে। বর্তমান রচনাটি সেই পত্রগুলি হইতে সংকলিত। পত্রলেখক ও পত্রাধিকারিণীর একমাত্র একান্ত ব্যক্তিগত ও পারিবারিক প্রসঙ্গ ব্যতীত পত্রগুলির আর কিছুই বাদ দেওয়া হয় নাই, যদিও পত্রে বর্ণিত পাত্রপাত্রীদের যথার্থ পরিচয় গোপনের উদ্দেশ্যে কোনো কোনো ক্ষেত্রে নাম-ধামের পরিবর্তন অপরিহার্য হইয়াছে।

এই স্বল্পপরিসর পত্ররচনার মধ্যে লেখকের যে সাহিত্যিক প্রতিভার আভাস আছে, হয়তো উত্তরকালে বিস্তৃততর সাহিত্যচর্চার মধ্যে একদা তাহা যথার্থ পরিণতি লাভ করিতে পারিত। গভীর পরিতাপের বিষয়, কিছুকাল পূর্বে এক আকস্মিক দুর্ঘটনায় তাহার অকালমৃত্যু সেই সম্ভাবনার উপরে নিশ্চিত যবনিকা টানিয়া দিয়াছে।

# দৃষ্টিপাত

এক

সাত ঘণ্টা আকাশচারণের পরে উইলিংডন এয়ারপোর্টে ভূমি স্পর্শ করা গেল। বিমানঘাটিটি আকারে বৃহৎ নয়, কিন্তু গুরুত্বে প্রধান। পূর্ব গোলাধর্মে যুদ্ধ শুরু হওয়ার পর থেকে ইঙ্গ মার্কিন ও চৈনিক সমর-বিশারদদের এটা আগমন ও নিষ্ক্রমণের পাদপীঠ। প্রাত্যহিক পত্রিকার সংবাদস্তুঙ্গে এর বহুল উল্লেখ।

আমাদের বাহনটি ডগলাস্ ডাবল এঞ্জিন জাতীয়। খেচর কুলপঞ্জিতে ফ্লাইং ফোর্ট্রেস ও লিবারেটর প্রেনের পরেই এর স্থান। নিকষ না হলেও ভঙ্গকুলীন বলা যেতে পারে। এর আকার বিশাল, গর্জন বিপুল ও গতি বিদ্যুৎপ্রায়।

পুরাণে পুষ্পকরথের কথা আছে। তাতে চেপে স্বর্গে যাওয়া যেত। আধুনিক বিমান-রথের গন্তব্যস্থল মর্তলোক। কিন্তু সারথি নিপুণ না হলে যে-কোনো মুহূর্তে রথীদের স্বর্গপ্রাপ্তি বিচিত্র নয়।

বিমানঘাটির কর্মকর্তা বাঙালি। ভদ্রলোক বয়সে তরুণ এবং ব্যবহারে অমায়িক। ঐর স্ত্রী মণিকা মিত্রের সৌন্দর্য-খ্যাতি নয়াদিগ্লির অনেক বঙ্গললনার মর্মবেদনার কারণ।

কাঠের সিঁড়ি বেয়ে মাটিতে নামতে হয়। বিস্ময়কর এক অনুভূতি। এই তো সকালবেলায় ছিলাম কলকাতায়। দমদমের পথে গ্যাসের আলোগুলি সব তখনও নেভেনি। ফুটপাথে খাটিয়ার উপরে আপাদমস্তক চাদর মুড়ি দিয়ে হিন্দুস্থানি দোকানদারেরা নিদ্রামগ্ন, কর্পোরেশনের উড়ে কুলিরা জলের পাইপ থেকে গঙ্গোদকের দ্বারা রাজধানীর বহুজনমর্দিত পথগুলির ক্রোদযুক্তির আয়োজনে ধাবমান। সাইকেলের হাতলে স্তূপীকৃত খবরের কাগজ চাপিয়ে হকাররা যাচ্ছে এ-দুয়ার থেকে ও-দুয়ার।

সদ্যগত রজনীর সুষুপ্তির রেশ ধরণীর বুক থেকে তখনও নিঃশেষে মুছে যায়নি। আকাশের কৃষ্ণপঙ্কের খণ্ডিত চাঁদ দূরবর্তী তরুশ্রেণীর শীর্ষে রুগুণা রমণীর নিষ্প্রভ মুখের মতো দুটিহীন। মিট মিট করে জ্বলছে গুটিকয়েক মুমূর্ষু তারা। পথের পাশে গাছের ডালে ডালে পাখিদের কাকলি গুরু হয়েছে ধীরে ধীরে। দমদম বিমানঘাটির দূরবর্তী পাটকলের উত্তুঙ্গ চিমনিটা আকাশের পটে আঁকা আবছা ছবির মতো দেখাচ্ছে। বিমান কোম্পানির সাদা ধবধবে যুনিফর্ম পরিহিত স্বেতাঙ্গ কর্মচারীরা টিকিট পরীক্ষা ও মাল গুজন ইত্যাদি নিয়ে ব্যস্তসমস্ত। দূরে বারাসতের রাস্তা দিয়ে চলেছে সারিবন্দি মত্তরগতি গোরুর গাড়ি, বাতাসে ভেসে আসছে তাদের তৈলতৃষিত চাকার ক্ষীণ আর্তনাদ।

দেড়টা বাজতেই নয়াদিল্লি। মাঝে শুধু বামরৌলীতে ঘণ্টাখানেকের বিশ্রাম,— প্রাতরাশের প্রয়োজনে। ব্যবস্থা থাকলে মধ্যাহ্নভোজনের পর পুনরায় দিল্লি থেকে সন্ধ্যানাগাদ কলকাতায় ফিরে মেট্রোতে সিনেমা দেখা যায়। রেলযোগে প্রায় দেড়দিনের পথ। দূরকে নিকট এবং দুর্গমকে সহজাধিগম্য করেছে যে-বিজ্ঞান, তার জয় হোক।

মনে আছে শৈশবের কথা। দুপুরে গৃহকর্তারা কর্মস্থলে। আহালাদির পর প্রাত্যহিক দিবানিদ্রার অব্যর্থ ঔষধ বঙ্কিমের উপন্যাস হাতে মা পাশের ঘরের মেঝেতে আঁচল বিছিয়ে শয়ান। তাঁর সেই স্বপ্নায়ু বিশ্রামক্ষণটি যাতে চপলস্বভাব বালকের সশব্দ দৌরাখো খণ্ডিত না হয় সেজন্য পিতামহী নাতিকে নিয়ে বসেছেন। বৃদ্ধা তাঁর ক্ষীণদৃষ্টি চক্ষুর উপরে নিকেলের চশমাজোড়াটা এঁটে মৃদু স্বরে পড়ছেন কৃষ্ণিবাসী রামায়ণ। খানিকক্ষণ এপাশ, ওপাশ, উসখুস করে মাথার বালিশটা নিয়ে লোফালুফির পরে হঠাৎ এক সময়ে কানে আসত

রাবণ বসিল চড়ি পুষ্পক রথেতে।

বিদ্যুতের সম গতি আকাশ পথেতে ॥

অমনি স্তব্ধ উৎকর্ণ হয়ে উঠতাম। অরণ্য, পর্বত, সাগর, জঙ্গম অতিক্রম করে রথ চলেছে শূন্যপথে মুক্তপক্ষ বিহঙ্গের মতো, দূর হতে দূরে, দেশ থেকে দেশান্তরে। মধ্যাহ্নদিনের কর্মহীন অলস গ্রহরগুলি শিশুমনের নিরঙ্কুশ কল্পনায় উদ্দীপ্ত হয়ে উঠত। দশাননের সৌভাগ্যে ঈর্ষা জন্মাত। এক লক্ষ পুত্র ও ততোধিক পৌত্রসংখ্যার জন্য নয়, তার যদৃচ্ছ আকাশভ্রমণক্ষমতার জন্য।

সেদিনের বৃদ্ধা পিতামহী তাঁর ভক্তি, বিশ্বাস ও সংস্কার নিয়ে দীর্ঘকাল গত হয়েছেন। তাঁরই নাতি-নাতনিরা যে অদূর ভবিষ্যতে লঙ্কাধিপতির সমকক্ষ হয়ে উঠবে সে-কথা কল্পনা করাও তাঁর পক্ষে সম্ভব ছিল না। দম্ভকারণ্য থেকে স্বর্ণলঙ্কা নিকষাতনয় কয় দণ্ডে পৌছেছিলেন তার উল্লেখ কৃষ্ণিবাসে আছে কি না মনে নেই, কিন্তু কলকাতা থেকে দিল্লি—ন শো তিন মাইল পথ আমরা সাত ঘণ্টায় অতিক্রম করেছি। এতে উদ্বেজনা আছে, কিন্তু উপভোগ নেই। কমলালেবুর বদলে ভিটামিন- সি ট্যাবলেট খাওয়ার মতো।

প্রাগবিমান যুগে পথ অতিক্রমণটাই ভ্রমণের একমাত্র উদ্দেশ্য ছিল না; নানাজনের সংস্পর্শে আসবার একটা সুপরিসর অবকাশ তাতে মিলত। মন্দগতি গোরুর গাড়ির কথা থাক; রেলভ্রমণেও মানুষের সঙ্গে মানুষের যে একটা যোগাযোগ ঘটে, বিমানযাত্রায় তার সম্ভাবনামাত্র নেই। যুদ্ধোত্তরকালে ভারতবর্ষেও বিমান চলাচল বহুলতর হবে। রাত ন'টায় শ্বেট ইন্টার্নে ডিনারের পর দমদমে প্লেনে উঠে পরিপাটি নিন্দা দিলে পরদিন সকালে বস্ত্রের তাজে ব্রেকফাস্ট খাওয়া যাবে। সেদিন না থাকবে ঘুম অথবা ঘুসির জোরে টিকিট কেনার হাস্যামা, না থাকবে কুলির কলহ বা সহযাত্রীর কোলাহল। জানালার কাছে 'চা গ্রাম' হৈকে কেউ ঘুম ভাঙাবে না। পানিপাঁড়ে তার বালতি থেকে তৃষ্ণার্ত যাত্রীর অঞ্জলি ভরে দেবে না এবং টিনের চালার ঘুম্টিঘরের ফটক আটকে যে পয়েন্টস্ম্যান সবুজ নিশান দেখিয়ে গাড়ি 'পাশ' করে তারও আর

দর্শন মিলবে না। আধুনিক বিজ্ঞান মানুষকে দিয়েছে বেগ, কিন্তু কেড়ে নিয়েছে আবেগ। তাতে আছে গতির আনন্দ, নেই যতির আয়েশ।

বিমানঘাটির বাইরে এসে দেখা গেল, যানবাহনের চিহ্নমাত্র নেই। বেলা প্রায় দেড়টা। মার্চের রৌদ্রদগ্ধ আকাশ পাণ্ডুর এবং বাতাস প্রচুর ধূলিকীর্ণ। সামনে অ্যাশফালটশের রাস্তা জনবিরল। রুম্ব প্রান্তরের পূর্ব পশ্চিম উত্তর দক্ষিণ উর্ধ্ব অধঃ—যে-দিকে যতদূর দৃষ্টি চলে উত্তপ্ত বাতাসের একটা কম্পমান নিশ্বাস ছাড়া আর কিছুই ইন্দ্রিয়গোচর নয়। রুদ্র বৈশাখ কথটা এতকাল রবি ঠাকুরের কাব্যে পড়া ছিল; কিন্তু ‘লোলুপ চিতাগ্নি শিখা লেহি লেহি বিরাট অম্বর’ বলতে সত্যি যে কী বোঝায় দিল্লির নিদাঘ মধ্যাহ্নে তারই খানিকটা আভাস পাওয়া গেল। সহযাত্রীদের সাতজন বিদেশীয়। তাদের খাকি অঙ্গাবরণে যথাযথ সামরিকগোত্রের নিঃসন্দেহ নির্দেশ। ত্রিপলঢাকা বৃহদাকার এক মোটরলরিতে মাল ও মালিকেরা একই সঙ্গে বোঝাই হয়ে অন্তর্হিত হল।

হোটলে স্থান নির্দিষ্ট ছিল না, সুতরাং গন্তব্যস্থল অজ্ঞাত, পথ অপরিচিত অথচ ভরসা একমাত্র নিজের আদি ও অকৃত্রিম চরণযুগল। তারই শরণ নিয়ে পথে বিচরণ শুরু করব কি না ভাবছিলাম।

“আপনি কোথায় যাবেন, চলুন, নামিয়ে দিচ্ছি।”

গভীর রাত্রিতে নিশি ডাকে বলেই তো শুনেছি। তবে কি দিনেও? না; পিছনে তাকিয়ে দেখি নিজের মোটরের দোর খুলে দাঁড়িয়ে আছেন একমাত্র বেসামরিক যাত্রাসহচর এ. এস. বোখারি—ভারতীয় বেতার প্রতিষ্ঠানের ফুয়েরার।

রৌদ্রতপ্ত মধ্যাহ্নের নিরুপায় পথপ্রান্তে দাঁড়িয়ে মনে হল—স্বয়ং উর্বশী ‘লহ লহ জীবনবল্লভ’ বলে পায়ে লুটিয়ে পড়লেও বোধ হয় এত খুশি হতেম না।

সংবাদপত্র ও বেতারজগতে বোখারি সাহেবের নিন্দা ও প্রশংসা দুই-ই সমপরিমাণ যদিও সরকারি সুখ্যাতির সোপানে সোপানে, দুর্গম প্রমোশনের শিখরে শিখরে উত্তীর্ণ হয়ে অল-ইন্ডিয়া রেডিওর তিনি আজ সর্বাধিনায়ক।

বেতার-পূর্ব জীবনে তিনি ছিলেন লাহোর বিশ্ববিদ্যালয়ের অধ্যাপক। ছদ্মনামে রসরচনা দ্বারা উর্দু সাহিত্যেও একদা তিনি বহুবিস্তৃত খ্যাতি অর্জন করেছেন। ভদ্রলোক অসাধারণ বাকপটু এবং পরিহাসরসিক। লাওনেল ফিন্ডেন তাঁকে অধ্যাপনার ক্ষেত্র থেকে বেতারজগতে আমদানি করেন। কলেজের লেকচার-রুম থেকে রেডিওর স্টুডিও। এদিক দিয়ে বাংলাদেশের শিশির ভাদুড়ীর তিনি সগোত্র।

শুধু তিনি একাই নন, তাঁর অনুজ জেড. এ. বোখারিও ফিন্ডেনের অনুগ্রহপ্রচ্যায় অল-ইন্ডিয়া রেডিওর অঙ্গনে বাসা বেঁধেছিলেন। আশ্চর্য নয় যে, এককালে ভারতীয় বেতার প্রতিষ্ঠানের কৌতুক-আখ্যা ছিল : ইন্ডিয়ান বি. বি. সি.—বোখারি ব্রাদার্স কর্পোরেশন।

নয়াদিল্লির রাস্তাগুলি নয়নাভিরাম। ঋজু প্রশস্ত এবং ছায়াচ্ছন্ন মসৃণ পিচের আন্তরণ, ডাক্তরিন থেকে উপচীর্ণমান জঞ্জালভূত্বের দ্বারা পঙ্কিল নয়। যানবাহনের সংখ্যা পরিমিত; পদাতিকদের পক্ষে অনেকটা নিরাপদ। ভারতের অন্যান্য শহরের

ন্যায় সতত সঞ্চরমান নির্ভীক বৃষভকুল এখনকার রাজপথে দৃশ্যমান নয় এবং পথপার্শ্বের কোনো গৃহের অলিন্দ থেকে অকস্মাৎ তান্মুলরাগ নিরীহ পথচারীদের মস্তকে নিষ্কণ্ড হওয়ার আশঙ্কা নেই। মাঝে মাঝে গোলাকৃতি ক্ষুদ্রাকার পার্ক, সেখান থেকে সাইকেলের চাকার স্পোকের মতো একাধিক পথ নানাদিকে প্রসারিত। পার্কগুলির নাম প্রেস, আকৃতি একই। উইন্ডসর প্রেসের সঙ্গে ইয়র্ক প্রেসের তফাত যা, সে শুধু নামে। সবগুলিই সমতলে রচিত এবং রক্ষিত।

রাস্তার পরিচয় আমলাতান্ত্রিক। সরকারি দপ্তরখানার পূর্বতন বহু ইংরেজ কর্মচারীর নাম পথের প্রান্তসীমায় সুস্পষ্টাক্ষরে ঘোষিত। মোগল বাদশাহ বাবরের চাইতে চিফ-কমিশনার বেলি সাহেবের গুরুত্ব এখানে অধিক। তাই নূরজাহান লেন অপেক্ষা বেয়ার্ড রোড অধিকতর অভিজাত। বোঝা গেল, নয়াদিল্লির নগরপালদের আর যা-ই থাক, বিনয়ের অপবাদ নেই। প্রসঙ্গত একথা উল্লেখযোগ্য যে, একটি রাস্তার নামকরণ রবীন্দ্রনাথের নামে তাঁর জীবদ্দশায়ই হয়েছে, কবির জন্মস্থানে আজও যা সম্ভব হয়নি। গাঁয়ের যোগীর পক্ষে ভিখু পাওয়া সহজ নয়।

বোখারি সাহেব যেখানে নামিয়ে দিয়ে গেলেন, তার নাম কুইন্সওয়ে। নামটি ভালো। বাংলা রানীরদীঘির কথা স্মরণ করিয়ে দেয়। কিন্তু নাম নিয়ে কবিত্ব করার মতো মনের অবস্থা তখন নয়। ক্ষুৎ, পিপাসা ও ক্লান্তি নামক যে-ক'টি অসুবিধাজনক অবস্থা মানবদেহকে বিব্রত করে থাকে আপাতত তাদের নিরসন প্রয়োজন।

যুদ্ধের হিড়িকে গডর্নমেন্টের দপ্তরখানার বিস্তার ঘটেছে অভাবনীয় বেগে। কেরানি, দপ্তরি, সাহেব, সুবোয় শহরের ঘরবাড়ি পরিপূর্ণ। ফাঁকা মাঠের মধ্যে তাঁবু খাটিয়ে আছে সেক্রেটারিয়েটের বহু তিন-হাজারি চার-হাজারি মনসবদার। নানা দিকদেশ থেকে এসেছে খবরের কাগজের রিপোর্টার। হোটেল, বোর্ডিং-হাউস সর্বত্রই এক রব—ঠাই নাই, ঠাই নাই, ছোট এ বাড়ি। প্রচুর দক্ষিণা কবুল করেও সাতদিনের অবিশ্রান্ত চেষ্টায় একটা মাথা রাখবার স্থান সংগ্রহ করা গেল না। রবীন্দ্রনাথ লিখেছেন—বহুদিন মনে ছিল আশা; রহিব আপন মনে, ধরণীর এক কোণে, ধন নয়, মান নয়, একটুকু বাসা। অনুমান হয়, কবি এককালে দিল্লিতে ছিলেন।

যিনি আতিথ্য দিলেন, তিনি একটা বেসরকারি কোম্পানির স্থানীয় কর্ণধার। নিজের কর্মকুশলতায় কোম্পানিকে এখানে সুপ্রতিষ্ঠিত করেছেন। নয়াদিল্লি শহরটা সৃষ্টি হয়েছে সরকারি প্রয়োজনে; কপালে তার জয়পত্র আঁটা—“অন্ হিজ ম্যাজেস্টিস্ সার্ভিস।” জামসেদপুরকে যদি বলি স্টিল-টাউন, তবে নয়াদিল্লিকে বলা যেতে পারে স্টিলফ্রেমের টাউন। শহরের জনসংখ্যা গড়ে উঠেছে সেক্রেটারিয়েটকে কেন্দ্র করে। চাপরাশি, দপ্তরি, কেরানি, সুপারিন্টেন্ডেন্ট-আকীর্ণ এই শহরে বেসরকারি ব্যক্তিদের কঙ্কে পাওয়া ভার। এখনকার সম্মান ও প্রতিপত্তির উৎস থাকে ইন্ডিয়া গেজেটের পাতার মধ্যে। যে-অল্পসংখ্যক বেসরকারি লোক এখনকার সেক্রেটারি, জয়েন্ট-সেক্রেটারি-প্রভাবান্বিত সমাজে প্রতিষ্ঠা অর্জন করেন, তাঁরা যথার্থই শ্রদ্ধার যোগ্য। আমার হোস্ট সেন মহাশয় স্থানীয় সঙ্কটত্রাণ সমিতির সভাপতি, কালীবাড়ির সম্পাদক, বাঙালি ক্লাবের কর্মকর্তা এবং আরও একাধিক সাধারণ প্রতিষ্ঠানের বিশিষ্ট সদস্য।



ভদ্রলোকের আলমারিতে সারিবাঁধা ‘সবুজপত্রের’ বাঁধানো খণ্ড দেখে বোঝা যায় তাঁর রুচি। ভোজনপর্বে সেটা অধিকতর পরিস্ফুট হল। শুকতো, ভাজা, ডাল, তরকারি, মাছ, টক ও একটু দৈ। সাধারণ ভদ্র বাঙালি পরিবারে যা প্রাত্যহিক আহার—অতিথির জন্যও সেই ব্যবস্থা। অপরাহ্নে নারিকেলের কুচি-সহযোগে চিড়ে ভাজা বা বাড়িতে তৈরি খানকয়েক লুচি। চায়ের সঙ্গে পাতুয়া রসগোল্লায় সমারোহ এবং ভাতের সঙ্গে চপ-কাটলেটের বাহুল্য দ্বারা প্রত্যহই অতিথিকে স্মরণ করিয়ে দেবার চেষ্টা নেই যে, এ-গৃহে সে একজন বহিরাগত আগন্তুক মাত্র। সহজ হওয়ার মধ্যেই আছে কালচারের পরিচয়, আড়ম্বরের মধ্যে আছে দম্ভের। সে-দম্ভ কখনও অর্থের, কখনও বিদ্যার, কখনও-বা প্রতিপত্তির।

## দুই

বৈষ্ণব কাব্যের শ্রীরাধা কৃষ্ণবিরহে একদা ‘ঘর কৈনু বাহির বাহির কৈনু ঘর’ বলে আক্ষেপ করেছিলেন। দিল্লির কনট প্লেসকে বৃন্দাবনের কুঞ্জগলি বলে কোনোমতেই ভুল করবার সম্ভাবনা নেই, তার পুরনারীরা কেউ বৃষভানুন্দিনী নন। কিন্তু এখানকার শ্রীমতীরাও নিদাঘ রজনীতে ঘরকে বাহির এবং বাহিরকে ঘর করেছেন।

না-করে উপায় ছিল না। সমস্ত দিন ধরে মার্তণ্ডদেব এখানে যে-প্রচণ্ড কিরণ বিকিরণ করেন, তাতে ঘরের ভিতরটা প্রায় টাটা কোম্পানির অগ্নিগর্ভ বয়লারের মতো তেতে থাকে। মাথা গুঁজতে গেলে মাথা কুটতে ইচ্ছে হয়। পাখা খুলে দিলেও আগুনের হস্কা লাগে। সুতরাং বাইরে ঘুমানো ছাড়া গতি নেই।

শুধু মেয়েদের নয়, ছেলে বুড়ো বাচ্চাকাচ্চা সবারই এক অবস্থা। সন্ধ্যাবেলা বাড়ির সামনে জমিতে ঘটি ঘটি জল ঢেলে উত্তপ্ত ধরণীকে করা হয় শীতল। তার উপর খাটিয়া বিছিয়ে পড়ে সারি সারি বিছানা। দেখে মনে হয়, যেন সরকারি হাসপাতালের তিন, পাঁচ বা সাত নম্বর ওয়ার্ড। স্বামী, স্ত্রী, শ্বশুর-শাশুড়ি, ননদ, ভাজ, পুত্র কন্যা সবাই শুয়েছে উন্মুক্ত আকাশের নিচে। মাথার উপরে নেই আচ্ছাদন, শয্যা ঘিরে নেই কোনো আবরণ। অনভ্যস্ত চোখে হঠাৎ যেন একটু দৃষ্টিকটু ঠেকে।

কিন্তু পৃথিবীতে অন্য আর পাঁচটা নীতিবোধের ন্যায় আমাদের শালীনতা-জ্ঞানটাও আপেক্ষিক। দেশাচারের দ্বারা তার রকমফের ঘটে, প্রয়োজনের খাতিরে হয় রদবদল। কলকাতার বড়বাজারের রাস্তায় দেখা যায়, খাটো কাঁচুলি আর আঠারো গজি ঘাগড়ার মধ্যপথে মেদবহুল দেহের অনেকখানি অনাবৃত রেখে অসঙ্কোচে চলেছেন মারোয়াড়ি মহিলা। আমাদের বাঙালি তরুণীদের মধ্যে কারও মতি হবে না সে-সজ্জারীতিতে। হাঁটুর ওপরে-ওঠা স্কাট পরে ইংরেজ ও অ্যাংলো ইন্ডিয়ান মেয়েরা যাচ্ছে যত্রতত্র। কিছু খারাপ লাগছে না তো চোখে! অথচ আমাদের অতি-আধুনিকদের মধ্যেও কোনো দুঃসাহসিকা তার ফ্রেপ শাড়ির ঝুল পায়ের গোড়ালি থেকে জানু পর্যন্ত উন্মীত করতে পারবেন না। যদি-বা পারেন, লজ্জায় চোখ তুলে তাঁর দিকে কেউ তাকাতে পারব না।

একই বস্তু কেমন করে শুধুমাত্র আবেষ্টন, ভাষা ও পরিবেশের তফাতে শ্রীল ও অশ্রীল ঠেকে তার আরও সুস্পষ্ট দৃষ্টান্ত আছে সিনেমায়। স্বস্তর, ভাস্তর, পুত্রবধূ ও কন্যা-জামাতা একসঙ্গে মেট্রোতে বসে গ্রেটা গার্বো ও চার্লস্ বোয়ারের দীর্ঘস্থায়ী চুম্বন আর আলিস্পন দেখতে যাঁরা কিছুমাত্র সঙ্কুচিত হন না, বাংলা ছবির নায়ক-নায়িকার নিরামিষ প্রণয়-নিবেদন দৃশ্য তাঁদেরই অস্বস্তির কারণ হয়ে ওঠে দেখেছি। শরীরতত্ত্বের আলোচনায় যে-কথা বাংলায় বলতে বাধে, ইংরেজিতে তা নিয়ে গুরুজনের সঙ্গে তর্ক করা হয় অনায়াসে।

গরমকালে ঘরে ভুলে যে-দেশে জুরে ধরে, সে-দেশে মেয়ে-পুরুষকে বাইরে ঘুমোতে হয় এবং তিন-চারটে করে আলাদা উঠান যখন শতকরা নিরানব্বই জনের বাড়িতেই রাখা সম্ভব নয় তখন স্বস্তর, জামাতা, মা ও মেয়ে এক জায়গায় খাট না বিছিয়েই-বা করে কী? নয়াদিল্লি সার্বজনীন শহর। অঙ্গ, বঙ্গ, কলিঙ্গ, কাশী, কাশ্মির, কোশল থেকে এখানে ঘটেছে জনসমাগম। আহারে তারা যদি-বা নিজ নিজ রুচিকে রেখেছে বজায়; শয়নে মেনে নিয়েছে একই রীতি। পাঞ্জাবি মেয়েদের বসন এরকম কমিউনিটি শ্লিপিং-এর পক্ষে বিশেষ উপযোগী। গোড়ালির কাছে আঁট পায়জামা। শিথিলবন্ধন শাড়ির মতো অলক্ষ্যে নিদ্রিত দেহের উপর অবিন্যস্ত হওয়ার আশঙ্কা নেই।

সকালবেলা ঘুম ভাঙতে যে-দৃশ্যটা চোখে পড়ল সে হচ্ছে ফিরিওয়ালার ক্যাভেলকেড। দুধ, সবজি, মাছ, মাংস, ডিম, সবই এখানে ঘরে বসে পাওয়া যায়। পসারিণী যদিও-বা নেই, পসরা আসে দরজায়। মাথায় চেপে নয় সাইকেলে। ঐ জিনিষটা এখানে অসংখ্য। কলকাতায় সাইকেল চাপতে দেখি খবরের কাগজের হকারকে। কিন্তু নয়াদিল্লিতে গয়লা, ধোপা, নাপিত, জেলে, কসাই, ব্লাউজের ছিট, গায়ের সাবান-বিক্রেতা আসে সাইকেলের পিছনে মস্ত ঝুড়ি বা বাস্ক চাপিয়ে। মহানগরীর সওদাগরেরাও পদাতিক নয়।

প্রভাতে উঠিয়া যে-মুখ দেখিনু, তার বেসাতি দুধ। ছ্যাক্রা গাড়ির ঘোড়ার মতো হাড়গোড় বের-করা জীর্ণদেহ সাইকেল, তার পিছনের ক্যারিয়ারের দুপাশে বাঁধা দুধের দুটি টব। টিনের তৈরি, তলায় জলের কলের মতো ট্যাপ, ঘোরাতে দুধ বেরোয়। সামনের হাতলে ঝুলছে অনুরূপ গুটি দুই পাত্র। আশ্চর্য বহন ও চলন-ক্ষমতা এই দ্বিচক্রেরথের। আশ্চর্যতর তার চাকা, চেন ও দুগ্ধভাণ্ডের সম্মিলিত ঐকতানবাদন। টিনের টবগুলির উপরের দিকে ঢাকনি আছে, তাতে তালা আঁটা। বলা বাহুল্য দুগ্ধের বিশুদ্ধতা এবং গয়লার বিশুদ্ধতা সম্পর্কে ক্রেতাকে আশ্বস্ত করাই তার উদ্দেশ্য। কিন্তু সেটা অসাবধানী লোকের ছাতায় ঘটী করে নাম লেখার মতো। নীরং তত্ত্বা ক্ষীরং গ্রহণ করতে হলে পাঁচ সের দুধকে দু-সেরে দাঁড় করাতে হয়।

গয়লার পরে “কলকাতাকা হিলশা লো, করাচিকা চিংড়ি” হাঁক দিয়ে এল মাছওয়ালা। বলা বাহুল্য, সে-ইলিশ বেশির ভাগই বঙ্গজ নয়, এলাহাবাদের। তবে অনেক মানুষের মতো তারাও সবসময়ে চেহারায় ধরা পড়ে না, পড়ে স্বাদে। মাছওয়ালা সাইকেলের পিছনে ঝুড়ির উপরে মিহি জালের আবরণ, মাছির অত্যাচার নিবারণের জন্যে।

সবজিওয়ালা আসে একে একে। কেউ হাঁকে—লেউকি লো, কেউ হাঁকে—পালং অথবা গোবী। কারও-বা ঝুড়িতে আছে টমাটো, ভিণ্ডি, হরা ধনিয়া এবং সীতা ফল অর্থাৎ কুমড়ো। রজক বাইসিক্লের পশ্চাতে যে-পর্বতপ্রমাণ কাপড়ের বোঝা চাপিয়ে আসে তা দেখে ত্রেতাযুগের পবনন্দনেরও বিশ্বয়ের উদ্বেক হতে পারত।

মেয়েদের চুল ও ছেলেদের দাড়ি দু-এরই সমান প্রসাধন প্রয়োজন, সমান সময়সাপেক্ষ। তফাত শুধু এই যে প্রথমটির যত্ন বৃদ্ধিতে, দ্বিতীয়টির বিনাশে। চুল রোজ বাঁধতে হয়, দাড়ি রোজ কামাতে। যে রাঁধে সে চুলও বাঁধে এবং যে আপিস করে সে কুরও চালায়—একথা সত্য। তবুও বেণীরচনায় ভ্রাতৃজায়া বা ননদিনীর সহায়তা পেলে মেয়েরা খুশি হন; ক্ষৌরিকার্যে নরসুন্দরের সাহায্য পেলে অনেক ছেলে আয়েশ বোধ করে। তাই সকাল আটটা থেকে দ্বারে দ্বারে হানা দেয় হাজাম। তার সঙ্গে আছে খুব ছোট পিতলের একটি পোর্টেবল চুল্লি, অনেকটা ইক্মিক্ কুকারের মতো আকৃতি। তাতে শীতের দিনে সর্বদা জল গরম হয়। শীতের দেশের বাসিন্দারা জানেন, ডিসেম্বরের ৩৭ ডিগ্রির শীতে গালে ঠাণ্ডা জল দেওয়ার চাইতে চড় দেওয়া ভালো।

সাড়ে ন'টা থেকে শুরু হয় আপিস অভিযান। প্রথমে চাপরাশি দল। গায়ে খাকি রঙের উর্দি, মাথায় পাগড়ি ও কটিতে লাল সর্পাকৃতি তিন-চার ফেরতা কোমরবন্ধ। দু-একজনের কোমরবন্ধে সুদৃশ্য খাপের মধ্যে হাতির দাঁতের বাটওয়ালা ক্ষুদ্র ছুরিকা। মোগল বাদশাহের আমলে খোজা প্রহরীদের অনুকরণ। তারা অনারেবল মেম্বর বা সেক্রেটারিদের চাপরাশি। আদালি বাহিনীতে মেজর জেনারেল। তাদের সাইকেলের পিছনে লাল খেরো কাপড়ে বাঁধা একগুচ্ছ ফাইল, যা সাহেবরা প্রত্যেক শনিবারই বাড়ি নিয়ে যান কাজ করার জন্যে এবং বেশির ভাগই সোমবারে ফিরিয়ে আনেন একবারও না ছুঁয়ে।

চাপরাশিদের পরে যায় কেরানি, অ্যাসিস্ট্যান্ট ও সুপারিন্টেন্ডেন্টরা।

সাইকেল, সাইকেল, সাইকেলের পর সাইকেল। ঠিক যেমন একটা সাইকেলের প্রসেশন। তার সঙ্গে আছে টাঙ্গা। সেও দ্বিচক্রযান। ঘোড়ায় টানে। সামনে পিছনে চারজন বসা যায়—কিন্তু মুখোমুখি নয়, পিঠাপিঠি। মাথার উপরে সামান্য একটু ক্যাষিসের আচ্ছাদন; তাতে রৌদ্রতাপ বা বৃষ্টিধারা কোনোটাই পুরোপুরি নিবারিত হয় না। আরোহণ ও অবরোহণের কালে পুরুষদের পক্ষে হয় জিম্ন্যাস্টিকের পরীক্ষা, শাড়িপরিহিতাদের পক্ষে ভব্যতার। একটু সতর্কতার অভাবেই পতন ও মূর্ছা অসম্ভব নয়।

টাঙ্গার গতি মন্তর, আসন আরামহীন এবং পরিবেশ নাসারঞ্জের পক্ষে ক্রেশকর। সম্প্রতি আমেরিকানদের দক্ষিণ্যে দক্ষিণার হার হয়েছে বৃদ্ধি। আগে যে-রাষ্ট্রটুকুর মাঙল ছিল চার আনা, তার জন্য এখন বারো আনার কমে টাঙ্গাওয়ালারা কথাই বলে না; কিংবা এমন কিছু বলে, যা না-শোনাই ভালো। তবে দশটা-পাঁচটায় সেক্রেটারিয়েটের পথে সহযাত্রী মেলে। টাঙ্গাওয়ালা “দগুরকো, দগুর জানেবালা আইয়ে” বলে চেষ্টায়ে সংগ্রহ করে সওয়ারি! তাতে ভাড়ার অংশ বিভক্ত হয়ে পকেটের পক্ষে সুসহ হয়। ভাগের মা গঙ্গা পায় না, কিন্তু ভাগের টাঙ্গা গন্তব্যস্থল অবধি গিয়ে পৌছায়।

সাড়ে দশটার মধ্যে গোটা শহরটার সমস্ত পুরুষ নিষ্ক্রান্ত হল পথে। সব পথের একই লক্ষ্য—সেক্রেটারিয়েট। বাবু পালল পাড়া জুড়াল, গিল্লি এল পাটে।

ইম্পিরিয়ল সেক্রেটারিয়েটটি নবনির্মিত। শুধু সেক্রেটারিয়েট নয়, এখানকার বাড়িঘর, পথঘাট, হাটবাজার সবই নতুন। নয়াদিল্লি শহরটা আপস্টার্ট, বারানসী, প্রয়াগ এমনকি কলকাতা মুর্শিদাবাদের মতোও এর পশ্চাতে কোনো ট্র্যাডিশন নেই। সেই হঠাৎ-টাকা-করা ওয়ার কন্ট্রাক্টর, সাতপুরুষের বনেদি জমিদার নয়। কিন্তু যুগটাই যে ভুঁইফোঁড়দের। এ-যুগের জুড়িগাড়ির চাইতে বেবি-অস্টিন, সাতলহরির চাইতে মফচেন এবং খেয়ালগান অপেক্ষা গজলের আদর বেশি। বিত্ত হলেই হল, নাই-বা রইল বৈভব।

মাম্বখান দিয়ে প্রশস্তপথ কিংসওয়ে, ভাইসরয়'স হাউসের লৌহদ্বার অবধি প্রসারিত। তারই দুপাশে সেক্রেটারিয়েটের দুই মহল,—নর্থ ব্লক ও সাউথ ব্লক। আকৃতি, রং, রেখা, গঠনভঙ্গি ছব্ব এক। যেন ময়রার দোকানে 'আবার খাবো' বা জলতরঙ্গ ছাঁচে গড়া এক-এক জোড়া সন্দেশ। নর্থ ব্লকের সিঁড়ির মাথায় প্রস্তরফলকে উৎকীর্ণ পরিকল্পনাকার সার হার্বার্ট বেকারের নাম।

নয়াদিল্লির প্রায় সমস্ত সরকারি ও বেসরকারি বাড়িগুলোই মুখ্যত ক্ল্যাসিক্যাল অর্থাৎ গ্রিক স্থাপত্যের অনুকরণ, যদিও পুরোপুরি নয়। থাম আর গম্বুজ আর্চের সংখ্যা কম। যা আছে তা-ও রোমান ধরনের অর্ধবৃত্তাকার, মুসলিম পদ্ধতির সূক্ষ্মাভাগের নয়। থামগুলি চতুষ্কোণ নয়, গোলাকার। নয়াদিল্লির পত্তনে গ্রিক স্থাপত্যকে গ্রহণের পশ্চাতে কোনো উদ্দেশ্য ছিল কি না বলা শক্ত। তবে কোনো কোনো বিশেষজ্ঞের ধারণা এই যে, জলবায়ু ও আবহাওয়ার দিক দিয়ে গ্রিস উত্তরভারতের সমতুল্য, যদিও তার গ্রীষ্ম অপেক্ষাকৃত সহনযোগ্য এবং শীত অপেক্ষাকৃত কঠোরতর। উত্তরভারতের মতো গ্রিসেরও বাতাস অনর্দ্র, আকাশ নির্মেঘ এবং রৌদ্র নির্মল। সুতরাং গ্রিক স্থাপত্য নয়াদিল্লির পক্ষে স্থায়িত্বের দিক দিয়ে অধিকতর উপযোগী হবে, স্থপতিদের মনে এ-বিশ্বাস দেখা দেওয়া আশ্চর্য নয়।

কিন্তু নয়াদিল্লির স্থাপত্যকে পুরোপুরি কোনো-একটা বিশেষ সংজ্ঞা দেওয়া ঠিক নয়। সেটা ক্ল্যাসিক্যাল বটে কিন্তু একেবারে নির্ভেজাল নয়। সেক্রেটারিয়েট দালানে হিন্দুপদ্ধতিরও চিহ্ন আছে,—সারনাথে দৃষ্ট অশোকস্তম্ভের অনুকরণে গঠিত স্তম্ভগুলিতে। আছে প্রবেশ-তোরণ ও অন্যান্য অংশে হস্তী, ঘণ্টা প্রভৃতি অলংকরণে। তারই সঙ্গে আছে মুসলিম স্থাপত্যরীতির পাথরের জালি, ফতেপুর সিক্রিতে চিত্তির কবরে যার বহুল নিদর্শন। রাজমিস্ত্রিরা বেশির ভাগই এসেছে জয়পুর, রাজপুতানার অন্যান্য স্থান এবং আগ্রা থেকে। জনশ্রুতি এই যে, তাদের মধ্যে অনেকে ছিল তাজ-নির্মাভাদের উত্তরপুরুষ। নর্থ এবং সাউথ, দুব্লকেরই মাথায় বিরাট গম্বুজ, অনেকটা রোমের সেন্ট পল গির্জার অনুরূপ, যদিও এতে কিছুটা মুসলিম স্থাপত্যের ছাপ দেওয়ার চেষ্টা হয়েছে। চোখে দেখে মনে হয় না যে, গম্বুজদুটির উচ্চতা কুতুবশীর্ষ থেকে মাত্র একুশ ফুট কম। দুটি ব্লকে মিলিয়ে সেক্রেটারিয়েটে কক্ষ আছে প্রায় এক হাজার, সব ক'টি মিলিয়ে বারান্দার দৈর্ঘ্য হবে প্রায় আট মাইল। ইলাহি কাণ্ডই বটে!

সাধারণত সরকারি দপ্তরখানার সঙ্গে আর্টের বড় একটা সম্পর্ক থাকে না। তার নামে যে-দৃশ্যটি আমাদের কল্পনায় আসে তা একরাশি নথি, দলিল, দস্তাবেজ ও হিসাব-নিকাশ। দশটা থেকে পাঁচটা পর্যন্ত টেবিলের উপর ফাইল ঘাঁটাই যেখানে একমাত্র কাজ, সেখানে গৃহের গঠনভঙ্গি বা পরিবেশ নিয়ে আমরা মাথা ঘামাইনে। সে-দালানের জানালা কী রঙের সিঁড়ি কী ঢঙের সে-প্রশ্ন আমাদের মনেই আসে না। পুলিশকোর্টের দেয়ালে অজন্তার ফ্রেস্কো পেন্টিং আমরা আশা করিনে। কিন্তু দেখলে কি খুশি হতেম না? অন্তত নয়াদিল্লির সেক্রেটারিয়েটকে সুদৃশ্য করার চেষ্টা দেখে আনন্দিত হয়েছি।

লাল পাথরে গড়া বিরাট ভবন। মাঝখান দিয়ে দূরপ্রসারিত পথ। পথের দুপাশে শ্যামল দুর্বার আন্তরণে ঢাকা বিস্তৃত প্রাঙ্গণ। মাঝে মাঝে কৃত্রিম ঝিল, তাতে সারিবন্দি ফোয়ারা থেকে অবিরাম উৎসারিত হচ্ছে জলরাশি। পাশে পুষ্পিত মরশুমি ফুলের—ডেজি প্যানসি, অ্যাস্টর ও হলি-হকের—কেয়ারি। নির্বাচিত স্থানে একটি করে কমলালেবু গাছ। বহুতলে বৃত্তাকারে ছাঁটা তার ডালপালা, মনে হয় যেন বাঁটের উপর খোলা দাঁড়িয়ে আছে এক-একটি ছাতা।

দালানের ভিতরটাকেও কেবলমাত্র কাজের উপযোগী না করে দর্শনযোগ্য করার প্রয়াস আছে। নর্থ ও সাউথ ব্লকে ‘কমিটি রুম’ নামক যে-বহু কক্ষগুলি আছে তাদের সিলিং এবং দেয়াল চিত্রশোভিত। বগ্গে স্কুল অব আর্টের শিল্পীদের আঁকা। চিত্রগুলির বিষয়বস্তু ভালো কিন্তু দুঃখের বিষয় অঙ্কনচাতুর্য প্রশংসনীয় নয়। এই কক্ষগুলিতে নানারকম কমিটি, কনফারেন্স বসে। সার স্ট্যাফোর্ড ক্রিপসের প্রথম প্রেস-কনফারেন্স বসল সাউথ ব্লকের কমিটিরুমে।

ক্রিপসের বিমান নির্ধারিত সময়ের অনেক পরে এসে পৌঁছল দিল্লিতে, বেলা তখন দুটো। সুতরাং বেলা চারটায়—মাত্র দুঘন্টার ব্যবধানে—একটা প্রেস কনফারেন্স ডাকার মধ্যে তৎপরতার পরিচয় আছে যথেষ্ট। সাউথ ব্লকের সবটাই মিনিটারির দখলে, বেসামরিক দপ্তরের মধ্যে মাত্র হোম ডিপার্টমেন্ট আছে একটি টেরে। অবস্থান-নৈকট্যের কারণ বোধ হয় স্বভাবসাদৃশ্য। ভারতে পুলিশ আর মিনিটারি প্রায় কাছাকাছি। স্বগোত্র না হলেও স্বজাতি বটে।

দরজায় কড়া সামরিক পাহারা। সাংবাদিক ও রিপোর্টারদের জন্য ইনফরমেশন ডিপার্টমেন্ট থেকে ব্যবস্থা হয়েছে প্রবেশপত্রের।

প্রচুর বকশিশ ও প্রচুরতর তাড়না দ্বারা টাঙ্গাওয়ালাকে উৎসাহিত করা সত্ত্বেও সাউথ ব্লকের দরজায় এসে যখন অবতীর্ণ হলেম চারটে বাজতে তখন মিনিটখানেক মাত্র বাকি। বেচারার চেষ্টার ক্রটি ছিল না। কিন্তু টাঙ্গার ঘোড়াগুলি ভারতীয় যোগী-পুরুষদের মতো নির্লিপ্ত, নিরাসক্ত ও নির্বিকার; কোনোকিছুতেই তাদের উত্তেজিত করা সহজ নয়, বেগবৃদ্ধি প্রায় সাধ্যাতীত।

উর্ধ্বমুখে রওনা হলেম কনফারেন্স-কক্ষের উদ্দেশ্যে। সিঁড়ির মাথায় দাঁড়িয়ে আছেন সপারিষদ সার ফ্রেডরিক পাক্ল, ইনফরমেশন বিভাগের কর্ণধার। পরিচিত বন্ধুর প্রশ্নের জবাবে বললেন, ক্রিপসের অপেক্ষা করছেন। গোটা দুই সিঁড়ি উপরে

যাচ্ছিলেন একটি শ্বেতাঙ্গ, মনে হল সদ্য-আগত ইংরেজ-মার্কিন রিপোর্টারদের অন্যতম। হঠাৎ পিছিয়ে নেমে এসে সার ফ্রেডরিককে জিজ্ঞাসা করলেন, “Did you say Cripps? That’s me.”

এর চেয়ে বজ্রপাত হওয়া ভালো ছিল।

আমরা বিস্মিত, পাক্ল স্তম্ভিত, পারিষদেরা হতবাক।

সার স্ট্যাফোর্ড ক্রিপস্ ওয়ার ক্যাবিনেটের সদস্য। ভারতবর্ষের ভাগ্যানির্ধারণ করতে এসেছেন ব্রিটিশ মন্ত্রিসভার প্রস্তাব নিয়ে। আছেন ভাইসরয়ের প্রাসাদে। সুতরাং প্রেস কনফারেন্সে আসবেন বড়লাটের ক্রাউন-মার্ক গাড়ি চেপে, আগে চলবে লাল মোটরসাইকেলে পাইলট সার্জেন্ট, পাশে থাকবে ভাইসরয়ের প্রাইভেট সেক্রেটারি বা অনুরূপ কোনো হোমরাচোমরা পথপ্রদর্শক। জমকে জলুসে চিনতে বিলম্ব হবে না একমুহূর্ত। এইটেই আশা করছে সবাই। হা হতোম্মি, কোথায় প্রাইভেট সেক্রেটারি আর কোথায়-বা আগে-পিছনে পিস্তলকোমরে সার্জেন্ট পাহারা। সঙ্গে একটিমাত্র ভাইসরয়’স হাউসের চাপরাশি, বোধ করি সে-ও শুধু পথ চিনিয়ে দেওয়ার জন্য।

সরকারি কায়দাকানুন, ফর্মালিটি পরিহার করে আড়ম্বরহীন, সহজ ও সরল একটি পরিবেষ্টন সৃষ্টি করলেন ক্রিপস্। তাঁর আন্তরিকতায় ভারতবর্ষের আস্থা গভীরতর হল, তাঁর চেষ্টার সাফল্য কামনা করল জনসাধারণ, তাঁর সুখ্যাতি অকুপণ ভাষায় কীর্তিত হল সর্বপ্রদেশে ও সর্বভাষায় বিভিন্ন সংবাদপত্রের সম্পাদকীয় স্তম্ভে।

কনফারেন্সে ক্রিপস্ আবেদন জানালেন সাংবাদিকদের, তাঁরা যেন ক্রিপস্-প্রস্তাবের সারমর্ম নিয়ে অযথা গবেষণা না করেন। নেতৃবর্গের সঙ্গে আলোচনার পূর্বে সংবাদপত্রে মীমাংসা-প্রস্তাবের কল্পিত বিবরণ প্রকাশের দ্বারা যেন অবাস্তব বিরুদ্ধভাবে সৃষ্টি না হয় রাজনীতিক মহলে। বলা বাহুল্য, সে-আবেদনের প্রয়োজন ছিল।

সবচেয়ে বিস্ময়কর, প্রস্তাবের ভবিষ্যৎ সম্পর্কে ক্রিপসের মনে অবিচলিত আস্থা। ওয়ার ক্যাবিনেটের সর্বসম্মত এই মীমাংসা-প্রস্তাব ভারতীয় জাতীয়তাবাদের পক্ষে অনায়াসে গ্রহণীয় হবে, ব্রিটেন ও ভারতবর্ষের বিরোধ অপনীত হবে এবং দীর্ঘকাল ধরে স্বাধিকার প্রতিষ্ঠার যে-অদম্য অভিলাষে ভারতের অগণিত নরনারী দুঃস্থ ভাগ ও দুঃসহ নির্যাতন বরণ করেছে তার সার্থক পরিণতি ঘটবে, এ-বিষয়ে ক্রিপসের মনে সংশয়ের লেশমাত্র ছিল না।

ভারতবর্ষ সম্পর্কে প্রধানমন্ত্রী চার্চিলের মনোভাব কারও অজ্ঞাত নয়। জাতীয়তাবাদী ভারতবর্ষের প্রতি ক্রিপসের সহানুভূতি, বিশেষ করে কংগ্রেসের নেতৃস্থানীয় ব্যক্তিদের সঙ্গে তাঁর সৌহার্দ্যও তেমনি অতিপরিচিত তথ্য। চার্চিল ইম্পিরিয়ালিস্টদের মধ্যে সর্বাপেক্ষা রক্ষণশীল। ক্রিপস্ সোশ্যালিস্টগোষ্ঠীতেও সবচেয়ে প্রগতিশীল। জনৈক সাংবাদিক প্রশ্ন করলেন : সর্ববাদিসম্মত প্রস্তাব রচনায় প্রধানমন্ত্রী ও সার স্ট্যাফোর্ডের মতৈক্য হল কী করে? চার্চিল তাঁর মতবাদ ত্যাগ করেছেন, নাকি সার স্ট্যাফোর্ড ক্রিপস্ বদলেছেন?

প্রবল হাস্যরোলের মধ্যে ক্রিপস্ উত্তর করলেন : কোনোটাই নয়, দুজনারই মতের মিল হওয়ার মতো একটা নতুন পন্থা আবিষ্কৃত হয়েছে, যা এর আগে চোখে পড়েনি।

কনফারেন্স থেকে যখন বাইরে এলেম, ঘড়ির কাঁটা তখন প্রায় ছ'টার কোঠায়। অপরাহ্নবেলার শান্তরোষ সূর্যের অতপ্ত রশ্মি পড়েছে সেক্রেটারিয়েট ভবনের রক্তাভ প্রাচীরে। সামনের ফোয়ারার উৎসারিত জল কম্পিত ধারায় বিক্ষিপ্ত হচ্ছে বৃত্তাকার প্রস্তর-আধারে। ঋজু, দীর্ঘ কিংসওয়ারের প্রান্তভাগে দেখা যায় ওয়ার-মেমোরিয়াল, বিগত মহাযুদ্ধে নিহত ভারতীয় সৈন্যদের স্মরণলেখা যার গায়ে উৎকীর্ণ। দূরে ইন্দ্রপ্রস্থের পাষাণদুর্গের ভগ্নাবশেষ রূপসী তরুণীর পাশে পলিতকেশ, বিগতযৌবনা বৃদ্ধা পিতামহীর মতো নয়াদিল্লির বর্তমান বৈভবকে স্মরণ করিয়ে দিচ্ছে কালের অমোঘ বিধান, অপ্রতিরোধ্যনীয় পরিণাম।

পিছনে তাকিয়ে দেখি উন্নতশির ভাইসরয়'স হাউসের বিরাট গম্বুজের শীর্ষে বাতাসে মৃদু আন্দোলিত যুনিয়ন জ্যাক—ব্রিটিশ সাম্রাজ্যবাদের সনাতন গৌরবচিহ্ন। দুশো বছর ধরে ভারতবর্ষে রয়েছে অচল, অটল ও অনপন্যেয়। এইমাত্র যে-কনফারেন্স শেষ হল, তাতে আশ্বাস ছিল ঐ পতাকার বর্ণ পরিবর্তনের। সে-বর্ণ গৈরিক হবে কি সবুজ হবে, তাতে চরকা থাকবে কি অর্ধচন্দ্র থাকবে সে-প্রশ্ন পরের। আপাতত এইটিই বড় কথা যে, সে নতুন হবে, ভারতীয় হবে। কিন্তু সে কবে গো কবে?

## তিন

গৃহকর্ত্রীর সাত বছরের মেয়ে রেবা এসে অত্যন্ত গম্ভীরভাবে জিজ্ঞাসা করল, “মিনি সাহেব, ইংরেজ জিতবে কি জাপান জিতবে?”

মিনি সাহেব নামের পিছনে আছে ইতিহাস। শুধু ইতিহাস নয়, ভাষাতত্ত্বও।

বিলাতে গেলে আমাদের প্রথম রূপান্তর ঘটে বেশে, দ্বিতীয় নামে। দেশে থাকতে যারা পল্টু, গদাই, সুরেন কিম্বা সুবোধ বিদেশে তারাই সেন, রয়, মিটার অথবা ব্যানার্জি। নয়াদিল্লিটা খাটি বিলাত নয়—এরসাৎস্। এখানেও ব্যক্তির পরিচয় নামের আদিত্যে নয়, অন্তে। পি. এল. আস্থানার আদ্য অক্ষর দুটি কিসের সংক্ষেপ তা নিয়ে কারও ঔৎসুক্য নেই, শেষেরটুকু জানলেই হল। পদমর্যাদার উপরে নির্ভর করে সম্বোধনের বিশেষণ। কেরানি হলে আস্থানার সাফিন্স বসে বাবু, অফিসার হলে প্রেফিক্স লাগে মিষ্টার।

কিন্তু মুখে-মুখে কথার ধারা বদল হয়, নামেরও পরিবর্তন ঘটে। বিশেষ করে চাকর, বেয়ারা, আদালি, পিওনের অশিক্ষিত উচ্চারণে অনেক সময় চলতি বিকৃতি থেকে আসল আকৃতি আঁচ করাই কঠিন হয়। ব্যানার্জি বেনারসি হন, মি. ম্যাকার্টিস হন মারকুটি সাহেব। সেনগৃহের পরিচারিকা বিলাসিয়ার আদি বাস রামগিরি পর্বতের সানুদেশে। ভাষা কিছুটা দ্রাবিড় এবং কিছুটা আর্য, উচ্চারণ মারাত্মক! সুতরাং কবে কেমন করে কোন শব্দের অপভ্রংশ ও কোন শব্দের অর্ধাংশ মিলিয়ে তার মুখে মিনি সাহেবে দাঁড়িয়ে গেছি সে-গবেষণায় সুনীতি চাটুয্যের শরণ নিতে হবে।

“বলো না, মিনি সাহেব, কে জিতবে। ইংরেজ না জাপান?” প্রশ্নকর্ত্রী তাড়া দিলেন।

প্রশ্নটা নতুন নয়। ইতিপূর্বে আরও অনেকের কাছে শুনতে হয়েছে এ-জিজ্ঞাসা। জবাব অবশ্য দিতে হয়নি। কারণ অধিকাংশ ক্ষেত্রে প্রশ্নকারী নিজেই দিয়েছেন উত্তর, চেয়েছেন শুধু সমর্থন। যারা তা দেননি, তাঁরাও কী শুনলে খুশি হবেন সে-সম্পর্কে সন্দেহের অবকাশ মাত্র রাখেননি কখনও, ঠিক যেমন স্ত্রী স্বামীকে জিজ্ঞাসা করেন, নতুন শাড়িটায় তাঁকে কেমন দেখাচ্ছে। সুতরাং পালটা প্রশ্ন করলেম, “তুমি বলো, কে জিতবে।”

“ইংরেজ!” স্বর গম্ভীর, প্রত্যয়ব্যঞ্জক। স্বয়ং চার্চিলের পক্ষেও বোধহয় এতটা নিশ্চিত উত্তর দেওয়া সম্ভব ছিল না।

কিন্তু প্রতিপক্ষ কাছেই ছিল। বোনের উত্তর কানে যেতেই ভাই ছুটে এল! “কী বলনি? ইংরেজ জিতবে? জিতবে না হাতি। জাপানিদের সঙ্গে পারবে ইংরেজ? ফু!” বাক্যের সঙ্গে যোগ করল ভঙ্গি! ঠোট বাঁকিয়ে মুখেচোখে এমন একটা গম্ভীর তাল্ছিলের ভাব প্রকাশ করল যাতে শ্রোতাদের পক্ষে ইংরেজের জয় সম্পর্কে ক্ষীণতম আশা পোষণ করাও হাস্যকর নির্বুদ্ধিতা বলে গণ্য হবে।

বুড়ু রেবার চাইতে মাত্র দুবছরের বড়। কিন্তু অভিভাবকত্বের ধারা প্রায়ই বয়সের অনুপাত মেনে চলে না। বিশেষত বুড়ু স্কুলে ভর্তি হয়েছে, রেবার এখনও বাকি। সুতরাং তর্কবিতর্কের মাঝপথে বুড়ু যখন মাস্টার বা অন্য ছাত্রদের নজির উল্লেখ করে, রেবাকে তখন বাধ্য হয়ে বোবা হতে হয়। “বিশু আমাদের ক্লাসের ফাস্ট বয়, সে বলেছে। তার চাইতে তুমি বেশি জানো কিনা?” এ-যুক্তির উপরে আর তর্ক চলে না।

কিন্তু আজ তো ফাস্ট বয়ের মতামত নয়। এ যে তার নিজের বিশ্বাস। তাই রেবা দমল না।

“কেন জিতবে না, ঠিক জিতবে।” কিন্তু কণ্ঠে যেন সে-দৃঢ়তার আভাস পাওয়া গেল না।

বুড়ু অপরিসীম তাল্ছিলের সঙ্গে বলল, “ইংরেজ জার্মানের সঙ্গেই পারে না, আর পারবে জাপানের সঙ্গে! হঃ, হেরে ভূত হয়ে যাবে।”

“কেন হারবে? ইংরেজের কত কামান বন্দুক কত এরোপ্লেন। আছে জাপানিদের এরোপ্লেন?”

“জাপানিদের এরোপ্লেন নেই? হা হা হা! এরোপ্লেন থেকে বোমা ফেলে ইংরেজের রিপালস্ আর প্রিন্স অব ওয়েলস ডুবিয়ে দিল কে শুনি? পারল ইংরেজ জাপানিদের কিছু করতে? ইংরেজের এরোপ্লেন তো সব ভাঙা, কী হয় তা দিয়ে?”

“ইংরেজের এরোপ্লেন ভাঙা, মিনি সাহেব? ভাঙা যদি তবে আকাশে ওঠে কেমন করে?” করুণ কণ্ঠে আপিল জানালেন ইংরেজ-হিতাকাঙ্ক্ষিনী।

কিন্তু আমার জবাবের অপেক্ষা না করেই বুড়ু বলল, “ওঠে আর পড়ে যায়। কাল পত্রিকায় লেখনি ‘বিমান দুর্ঘটনা’? কলকাতায় এরোপ্লেন আকাশে উড়তে গিয়ে পড়ে গেছে। তাতে মানুষ মরেছে।”

অকাট্য প্রমাণ। শুধু ঘটনা নয়, একেবারে দিন তারিখ পর্যন্ত উল্লেখ। এর পরে



তর্ক করা কঠিন। তবুও শেষ চেষ্টা হিসাবে ক্ষীণ প্রতিবাদ করল রেবা। “দেখো ইংরেজ হারবে না।”

“তুমি কত জানো! হারবে, হারবে, হারবে। জাপানিরা চার্চিলকে হাতে পায়ে বেড়ি দিয়ে বেঁধে এনে তারপর ক্ষুর দিয়ে গলা কাটবে।” বলে, এমন বীরদর্পে প্রশ্ৰুত করল বুড়ু যেন জাপানি নয়, সে নিজেই চার্চিলের বন্ধনের উদ্যোগ করতে গেল।

রেবা প্রায় কাঁদোকাদো হয়ে বলল, “কখনও নয়, জাপানিরা পারবে না। পারবে মিনি সাহেব?”

তাকে কাছে টেনে আদর করে বললেম, “না পারবে না। আর পারলেই-বা কী? বাধুক না চার্চিলকে; আমাদের রেবা দিদিমণিকে তো আর বাঁধতে পারছে না।”

“ইংরেজ হেরে গেলে বিল্দের কী হবে? বিলের বাবাকে ধরে নিয়ে যাবে, মাকে নিয়ে যাবে, জন, লুসি ও অ্যানি সবাইকে তো বেঁধে নেবে?” বিল্ মানে প্রতিবেশী উইলিয়ম। রেবাদের পাশের ফ্ল্যাটের বাসিন্দা সিম্‌স্‌ দম্পতির বারো বছরের ছেলে জন। লুসি ও অ্যানি তারই দুই বোন।

“তা নিক না ধরে বিল্দের। ওদের ট্যাবি কুকুরটা আমাদের বিলাসিয়াকে সেদিন কামড়ে দিচ্ছিল যে!”

মাথা নেড়ে প্রবল আপত্তি করল রেবা। বলল, “না, ধরে নেবে না ওদের। বিল্ আমাকে চকোলেট দেয়, টফি দেয়। বলছে একদিন তার সাইকেল চড়তে দেবে।”

ও হরি! এতক্ষণে ব্রিটেনবান্ধবীর প্রবল ইংরেজ-হিতৈষণার আসল কারণটা বোঝা গেল। চকোলেট, টফি, তার উপরে আবার সাইকেল চড়তে দেওয়ার আশ্বাস। এর পরেও ইংরেজের পরাজয় কল্পনা করা অত্যন্ত কৃতঘ্নতার পরিচয় হবে। বিশ্বয়ের কিছুই নেই। ভারতবর্ষে ইংরেজ-অনুরাগী যে-ক’জন আছেন তাঁদের সবারই ঐ এক অবস্থা। চকোলেট, টফি না হোক, কারও চাকরি, কারও প্রমোশন, কারও-বা রায়সাহেব, খানবাহাদুর বা সি.আই.ই. নাইটহুড খেতাব।

কিন্তু সুদূর প্রাচ্যের যুদ্ধ প্রসঙ্গে বাধা পড়ল। সস্ত্রীক ঘোষ সাহেব হানা দিলেন। এই দম্পতিটির সঙ্গে আলাপ হয়েছে মাত্র দিনকয়েক। কিন্তু তাঁদের আন্তরিকতা অল্পকালের মধ্যেই অন্তরঙ্গতার সৃষ্টি করেছে। মিসেস বললেন, “চলুন ওখলায়।”

“সে কোথায়? পেরু না কাম্বোজিকা?”

“তার চাইতে কিছুটা কাছে। মথুরার পথে, এখান থেকে মাইল আটেক। ফিরতি পথে নিজামুদ্দিন দেখিয়ে আনব।”

ওখলা জায়গাটা একটা দ্বীপের মতো। যমুনার ধারাকে একটি কৃত্রিম খালের মধ্যে দিয়ে ভিন্নমুখী করা হয়েছে সেখানে। সে-খাল বেষ্টন করেছে এক টুকরো ভূমিখণ্ড। বৃক্ষবহুল, ছায়াচ্ছন্ন। একপাশে সরকারি সেচ বিভাগের দপ্তর, বাকিটা প্রমোদ-উদ্যান। খালের মুখ খোলা ও বন্ধ করার জন্য আছে লকগেট, তার উপরে প্রশস্ত সেতু। টাসা ও মোটর অনায়াসে যেতে পারে। ছুটির দিন দলে-দলে লোক আসে পিকনিক করতে। ওখলা নয়াদিল্লির বটানিক্‌স্‌।

স্থানটি মনোরম। চারিদিকের ধূসর রুক্ষ খুলিকীর্ণ দেশে একটুখানি শিথল, শ্যামলতার আমেজ মেলে। যমুনার অগভীর প্রবাহ খালের দিকে প্রসারিত করার জন্য দীর্ঘ বাঁধ। তার উপর দিয়ে উপচীযমান শুভ্র জলধারা গড়িয়ে পড়ছে ওপাশে। বেদির মতো পাথর দিয়ে বাঁধানো সেখানটা। চাষিদের ছেলেরা কাপড় দিয়ে মাছ ধরায় ব্যস্ত। খালের মুখে ছিপ ফেলে বসে আছেন দু-একজন সাহেব ঘণ্টার পর ঘণ্টা। তাঁদের ধৈর্য বিপুল এবং আশা সীমাহীন। গাছের নিচে ফরাশ বিছিয়ে বসেছেন কোনো শেঠ, প্রসাদ বা গুণ্ডজি। চৌরীবাজারে বিরাট লোহার আড়ত। সারা সপ্তাহ হিন্দর হিসাবে লোহা বেচে অর্থ উপায় করেছেন প্রচুর। রবিবারে এসেছেন প্রমোদ-ভ্রমণে। সঙ্গে এসেছে বিপুলকায়ী গৃহিণী, আধডজন পুত্রকন্যা, গোটা-চারেক বৃহদাকার টিফিন-কারিয়ার, জলের সোরাই, আলবোলা ও ভৃত্য।

এসেছে কাঁধের উপরে পিতলের চাক্তি-বসানো খাকি-গায়ে ইংরেজ, ক্যানাডিয়ান বা অস্ট্রেলিয়ান ক্যাপ্টেন। বাহসংলগ্না ফিরিস্তি বাক্তবী। স্কন্ধে চামড়ার ফিতে দিয়ে লম্বান ফটোগ্রাফের ক্যামেরা। প্রকাশ্য দিবালোকে তাদের প্রণয়কাণ্ডের উৎকট আতিশয্য দেখে মাঝে মাঝে লজ্জিত হতে হয় দর্শকদেরই।

স্বদেশে ইংরেজকে কখনও দেখিনি এমন মাত্রাজ্ঞানহীন। শনিবার বিকেলে পিকাডিলিতে দেখেছি প্রণয়ীযুগলের দল। কপোত-কপোতী যথা উচ্চ বৃক্ষ চূড়ে। তাদের আনন্দোচ্ছ্বাস ঠিক ভট্টপল্লীর বিধানানুযায়ী নয় বটে, কিন্তু তবুও অদৃশ্য, অলিখিত একটা রেখা টানা আছে যা লঙ্ঘন করে না কেউ। সে-রেখা সুনীতির নয়, সুরুচির। ডিসেন্সিকে ইংরেজ ভালোবাসে মনেপ্রাণে। ইন্ডিসেন্ট বলার বাড়ী গাল নেই ইংলন্ডে। ছাব্বিশ মাইল জল পার হলেই কন্টিনেন্টে দেখা যায় না এ-রুচিবোধ। শালীনতার অঙ্গুলিনির্দেশকে সেখানে তরুণ-তরুণীরা বৃদ্ধাঙ্গুলি দেখায় অকুণ্ঠিত চিন্তে।

সাত সমুদ্র তেরো নদী পার হয়ে এদেশে এসেছে যে-ইংরেজ, সে ঐ সুরুচির রেখাটির কথা ভুলে গিয়েছে নিঃশেষে। ব্রিটেনের বাইরে ব্রিটিশ-কলঙ্কের কদর্য কাহিনী আছে Somerset Maugham-এর গল্পে ভূরি ভূরি। পালামো ভ্রমণে সঞ্জীবচন্দ্র এক জায়গায় লিখেছেন : বন্যেরা বনে সুন্দর, শিশুরা মাতৃকোড়ে। ব্রিটেন-অরণ্যের বাইরে ইংরেজকে দেখলে সংশয়ের অবকাশ থাকে না ডার্কইন-তত্ত্বে।

ভারতবর্ষে ইংরেজের এই নির্লজ্জ উচ্ছৃঙ্খলতার প্রধান কারণ এই যে, চারপাশের দর্শকদের ওরা মানুষ বলেই গণ্য করে না। আমরা ওদের সম্বন্ধে কী ভাবি না-ভাবি তা নিয়ে ওদের কোনো মাথাব্যথা নেই, নেই আমাদের সামনে ভদ্র আচরণের দায়িত্ব। আরও একটা কারণ আছে, সেটা গভীরতর। এদেশে ইংরেজ তার পরিবার ও সমাজ থেকে একেবারেই বিচ্ছিন্ন। এখানে সে বন্ধাহীন অশ্ব। সে যেন কলকাতার মেসে-থাকা মফস্বলের ধনী জমিদারনন্দন। পিছনে অভিভাবকের এতটুকু নেই রাশ, হাতে টাকা আছে রাশি রাশি।

দুটি ইংরেজ দম্পতি এসেছেন নয়াদিল্লি থেকে সাইকেল চেপে এই দারুণ গ্রীষ্মে—স্নানার্থে। নদীতে জল কোথাও বুকের উপর নয়, কিন্তু স্বচ্ছ। তারই মধ্যে ঘণ্টাকয়েক

ধরে তাঁদের সন্তরণ অর্থাৎ সন্তরণের চেষ্টা চলল সোৎসাহে। ওপারে বালুচরে যে-মৎস্যার্থী বকের দল ধ্যানমগ্ন সন্ধ্যাসীর ন্যায় নিশ্চল, নিথর, জলের উপর নিবন্ধদৃষ্টি দাঁড়িয়ে শিকারের প্রতীক্ষা করছিল, স্নানার্থীদের সশব্দ জলক্রীড়া ও কলহাস্যে তাদের স্বৈর্য ক্ষুণ্ণ হল। সচকিত হয়ে বারংবার তারা স্থান পরিবর্তন করতে লাগল।

স্ত্রী-পুরুষে এই মিলিত স্নানপর্বটা তেমন রুচিকর নয় আমাদের দেশে। প্রাচীনপন্থীদের কথা ছেড়েই দিলেম। আহারে বিহারে শয়নে স্বপনে যারা ইংরেজের অনুগামী; তাঁদের মধ্যেও মেয়েরা এটা খুব স্বচ্ছন্দচিত্তে গ্রহণ করতে পারেন না। ক্লাবে জিন বা ভারমুখ পান করে পরপুরুষের সঙ্গে ওয়লজ নাচতে যাঁদের বাধে না, তাঁরাও সহস্নানটা খুব প্রীতির চোখে দেখেন না।

স্থিরচিত্তে বিচার করলে বোঝা যাবে, এর মূলে আছে আমাদের সংস্কার। কিন্তু সংস্কারের মুক্তি তো যুক্তি দিয়ে হয় না, যেমন বুদ্ধি দিয়ে জয় হয় না ভূতের ভয়। সংস্কার রাতারাতি পরিহার করতে হলে চাই বিপ্লব, রয়ে সয়ে করতে হলে চাই অভ্যাস।

আমাদের প্রাচীন সমাজে নরনারীর একটা সম্মিলিত সত্তা খুব স্পষ্টরূপে স্বীকৃত নয়। উভয়ে ক্ষেত্র পৃথক, পরিবেশ বিভিন্ন এবং কর্তব্য আলাদা। একমাত্র ধর্মাচরণ ব্যতীত স্ত্রী-পুরুষের একত্র করণীয় কিছুই উল্লেখ আমাদের শাস্ত্রে নেই। অর্জুনের রথে সুভদ্রার সারথিত্যকে বাদ দিলে সমগ্র পুরাণ, কাব্য ও সাহিত্যে স্বামী-স্ত্রীর মিলিত কর্মের দ্বিতীয় উপাখ্যান মিলে না। সাবিত্রী সত্যবানের সঙ্গে নিয়েছিলেন কাঠ কুড়োতে নয়, স্বপ্নে-দেখা অমঙ্গলের ভয়ে। সেকালে পুরুষেরা করত যজ্ঞ, যাজ্ঞ, অধ্যাপনা, হলকর্ষণ ও বাণিজ্য। মেয়েরা করত গো-ব্রাহ্মণের সেবা, রন্ধন ও গৃহমার্জনা। উভয়ের মধ্যে সাক্ষাতের সময় ও সুযোগ ছিল সঙ্কীর্ণ এবং অনেক ক্ষেত্রে একমাত্র নিশীথে শয্যাগৃহের স্বল্পপরিসর অবকাশের মধ্যেই তা নিবন্ধ ছিল।

আমাদের একানুবর্তী পরিবার-প্রথাও স্বামী-স্ত্রীর সর্বব্যাপী যোগাযোগকে বাধাগ্রস্ত করেছে পদে-পদে। সেখানে স্বামী এবং স্ত্রী একটা বৃহৎ সংসারযন্ত্রের স্ক্রু বা বল্ট মাত্র, উভয় মিলে আপনাতে আপনি সম্পূর্ণ একটা সৃষ্টি নয়। সরগমের তারা আলাদা দুটি সুর; দুয়ে মিলে একটি অখণ্ড সঙ্গীত নয়। চৌধুরীবাড়ির মেজগিনি পারেন না বাড়ির আর তিনটি জা ও পাঁচটি ননদকে রেখে একা স্বামীর সঙ্গে সিনেমায়, কিন্না গঙ্গার ধারে হাওয়া খেতে যেতে। বটঠাকুরের মনেও আসবে না একা বড়গিনিকে দার্জিলিং কি সিমলা পাহাড়ে বেড়িয়ে আনার কথা।

নরনারীর মিলিত অস্তিত্বের ধারণাটি আমাদের সমাজে অধুনাজাত। স্ত্রী-পুরুষের পৃথক সত্তা পুরোপুরি মেনে নিয়েও উভয়ের মিলিত জীবনের একটি সমগ্র রূপ সম্প্রতি আমরা উপলব্ধি করতে শুরু করেছি এবং স্বীকার করতে দোষ নেই যে এ-জ্ঞান আমরা যুরোপের কাছ থেকে পেয়েছি। এখনও পুরুষ দশটা-পাঁচটায় আপিস করে, আদালতে যায়, ব্যবসা-বাণিজ্য চালায় এবং মেয়েরা ঘরকন্নার তত্ত্বাবধান করে, সন্দেহ নেই। কিন্তু দুপক্ষের রেস্পনসিবিলিটি আলাদা হলেও পলিসির যোগ থাকে। এ-যুগের স্ত্রীরা আদার ব্যাপারী হয়েও স্বামীদের জাহাজের খবর রাখেন।

গৃহ এখন কেবলমাত্র স্ত্রীর প্রয়োজন ও স্বাস্থ্যের বিচারেই গঠিত নয়। বাইরে পুরুষের বন্ধুত্ব, সামাজিকতা ও অবসর বিনোদনও শুধু স্বামীর নিজস্ব অভিরুচির দ্বারা নিয়ন্ত্রিত নয়। প্রাগৈতিহাসিক যুগের অতিকায় জীবজন্তুর মতো বর্তমানে একানুবর্তী পরিবার লুপ্ত হচ্ছে ধীরে ধীরে। স্বামী, স্ত্রী ও দু-চারটি ছেলেমেয়ে নিয়ে যে নাতিবৃহৎ সংসার, তাতে স্বামীর স্থান গৃহকর্তার। সে স্বনামে পুরুষোদ্যম। সে-গৃহে স্ত্রীর পরিচয়ও মেজ, সেজ বা ছোটবউ রূপে নয়, আপন সাম্রাজ্যের সম্রাজীরূপে।

অনেকেই ভুলে যান যে, স্বামী-স্ত্রীর মিলিত জীবনের পরিপূর্ণতাও প্রয়াসের অপেক্ষা রাখে—সেটা আকস্মিক নয়। বিবাহ সে-পরিপূর্ণতার লাইফ ইনসিওরেন্স নয়, গ্যারান্টি তো নয়ই। সে শুধু মিন্স, সে য়েড নয়। সামাজিক স্বীকৃতি ও আইনগত অধিকার দিয়ে বিবাহ স্ত্রী-পুরুষের মিলনের ক্ষেত্রটিকে সুপরিসর ও নির্বিঘ্ন করে মাত্র। তাকে সফল করতে হয় উভয়পক্ষের সযত্ন চেষ্টায়, নিরলস সাধনায়। আগে প্রেম ও পরে বিবাহকে যারা সমস্ত দাম্পত্যসমস্যার সমাধান জ্ঞান করতেন, তারা এখন ঠেকে শিখেছেন যে, কোর্টশিপ করে বিয়েও ফুল-ফ্রফ নয়, যেমন নয় ইন্টারভিউ দিয়ে কর্মচারী নিয়োগ।

স্বামী এবং স্ত্রী দিনে-দিনে একে অন্যকে প্রভাবান্বিত করে আপন রুচির দ্বারা, অভ্যাসের দ্বারা এবং মতবাদের দ্বারা। পরস্পরকে গঠন করে নিজ অভিলাষানুযায়ী, সৃষ্টি করে পলে পলে। এই দেওয়া-নেওয়া, ভাঙাগড়া চলে অলক্ষ্যে, অজ্ঞাতে এবং অনেকটা অবিসংবাদে। সেটা সুগম হয় নিকটতম সান্নিধ্যের দ্বারা। সান্নিধ্য শুধু গৃহে নয়, বাইরেও।

মানুষের মন বহু-বিচিত্র, তার পরিচয়ের নাই শেষ। তার সত্তা ধ্রুব নয়, পরিবেশের পরিবর্তনে তার প্রকাশ হবে বিভিন্ন। স্ত্রী স্বামীকে চিনবে নানা পরীক্ষায়, উৎসবে ব্যসনে দৈব দুর্ভিক্ষে রাষ্ট্রবিপ্লবে। স্বামী স্ত্রীকে আবিষ্কার করবে তিল তিল করে নিত্য নব আবেষ্টনে, যেমন মণিকার হীরা, পান্না মুক্তাকে করে নতুন ডিজাইনের বালাতে, চুড়িতে চন্দ্রহারে। সুতরাং স্ত্রী যদি জলকেলির সঙ্গিনী হন, তবে তাঁকে এমন একটি বিশিষ্টরূপে পাই, যা সকালবেলার সধুম চায়ের পেয়ালা-হস্তে প্রতীক্ষমাণা গৃহিণীর মধ্যে নেই। স্ত্রীকে নাচঘরে অপরের বাহুলগ্না দেখে যারা রাগ না করেন, তারা তাঁকে স্নানের সহচরী পেলে দুঃখিত হবেন কেন? নারীদেহ সুইমিং কপ্তিউমে দেখলেই শক্‌ড হবেন এ-যুগে মার্কিন সিনেমা দেখে যারা চোখ পাকিয়েছেন তাঁদের মধ্যে নিশ্চয়ই এমন কেউ নেই।

ঘোষজায়া প্রতিশ্রুতি রক্ষা করলেন। ফিরবার পথে মোটর থামালেন নিজামুদ্দিনের দরগায়। দরজা খুলে গেল ইতিহাসের এক অনযীত অধ্যায়ের।

পাঠান সম্রাট আলাউদ্দিন খিলজি তৈরি করেছিলেন একটি মসজিদ সেদিনকার দিল্লির এক প্রান্তে। তাঁর মৃত্যুর দীর্ঘকাল পরে একদা এক ফকির এলেন সেই মসজিদে। ফকির নিজামুদ্দিন আউলিয়া। স্থানটি তাঁর পছন্দ হল। সেখানেই রয়ে

গেলেন এই মহাপুরুষ। ক্রমে প্রচারিত হল তাঁর পুণ্যখ্যাতি; অনুরাগী ভক্তসংখ্যা বেড়ে উঠল দ্রুত বেগে।

স্থানীয় গ্রামের জলাভাবের প্রতি দৃষ্টি আকৃষ্ট হল তাঁর। মনস্থ করলেন খনন করবেন একটি দিঘি সেখানে তৃষ্ণার্ত পাবে জল, গ্রামের বধূরা ভরবে ঘট এবং নামাজের পূর্বে প্রক্ষালন দ্বারা পবিত্র হবে মসজিদে প্রার্থনাকারীর দল। কিন্তু সংকল্পে বাধা পড়ল অপ্রত্যাশিতরূপে। উদ্দীপ্ত হল রাজরোষ। প্রবল পরাক্রান্ত সুলতান গিয়াসুদ্দিন তোগলকের বিরক্তিজাজন হলেন এক সামান্য ফকির দেওয়ানা নিজামুদ্দিন আউলিয়া।

তোগলক রাজবংশের প্রতিষ্ঠাতা গিয়াসুদ্দিনের পিতৃপরিচয় কৌলীন্যযুক্ত নয়। ক্রীতদাসরূপে তাঁর জীবন আরম্ভ। কিন্তু বীর্য এবং বুদ্ধির দ্বারা আলাউদ্দিন খিলজির রাজত্বকালেই গিয়াসুদ্দিন নিজেকে প্রতিষ্ঠিত করেছিলেন একজন বিশিষ্ট ওমরাহরূপে। সম্রাটের 'মালিক'দের মধ্যে তিনি হয়েছিলেন অন্যতম।

আলাউদ্দিনের মৃত্যুর পরে ছয় বৎসর পরপর রাজত্ব করল দুজন অপদার্থ সুলতান, যারা আপন অক্ষম শাসনের দ্বারা দেশকে পৌছে দিল অরাজকতার প্রায় প্রাপ্ত সীমানায়। গিয়াসুদ্দিন তখন পাঞ্জাবের শাসনকর্তা। এমন সময় খসরু খান নামক এক ধর্মত্যাগী অন্ত্যজ হিন্দু দখল করল দিল্লির সিংহাসন। গিয়াসুদ্দিন তাঁর সৈন্যদল নিয়ে অভিযান করলেন পাঞ্জাব থেকে দিল্লি, পরাজিত ও নিহত করলেন খসরু খানকে, সগৌরবে নিজেকে প্রতিষ্ঠিত করলেন বাদশাহি তক্তে।

গিয়াসুদ্দিনের দৃঢ়তা ছিল, শক্তি ছিল, রাজ্যশাসনের দক্ষতা ছিল। কিন্তু ঠিক সে-অনুপাতেই তাঁর নিষ্ঠুরতাও ছিল ভয়াবহ। একদা দায়িত্বজ্ঞানহীন লোকের অসাধবানী রসনায় রটনা শোনা গেল গিয়াসুদ্দিনের মৃত্যুর। সুলতানের কানেও পৌছল সে ভিত্তিহীন জনরব। কিছুমাত্র উত্তেজনা প্রকাশ না করে সুলতান আদেশ করলেন তাঁর সিপাহসালারকে, “লোকে আমাকে মিথ্যা কবরস্থ করেছে, কাজেই আমি তাদের সত্যি সত্যি কবরে পাঠাতে চাই।” অগণিত হতভাগ্যের জীবনান্ত ঘটল নিমেষে; গোরস্থানে শবভুক পশুপক্ষীর হল মহোৎসব।

কিন্তু গিয়াসুদ্দিনের বিচক্ষণতা ছিল। সেকালে মুঘলদের আক্রমণ এবং তার আনুষঙ্গিক হত্যাকাণ্ড ও লুণ্ঠন ছিল উত্তরভারতের এক নিরন্তর বিভীষিকা। গিয়াসুদ্দিন তাদের আক্রমণ ব্যর্থ করতে পড়ন করলেন নূতন নগর, তৈরি করলেন নগর ঘিরে দুর্ভেদ্য প্রাচীর এবং প্রাচীরদ্বারে দুর্জয় দুর্গ। একদিকে ক্ষুদ্র পর্বত আর একদিকে প্রাচীরবেষ্টিত নগরী, মাঝখানে খনিত হল বিশাল জলাশয়। বর্ষার দিনে শৈলশিখর থেকে ধারাস্রোতে জল সঞ্চিত হত এই জলাশয়ে; সংবৎসরের পানীয় সম্পর্কে নিশ্চিত আশ্বাস থাকত প্রজাপুঞ্জের।

ফকির এবং সুলতানে সংঘর্ষ ঘটল এই নগর নির্মাণ, কিম্বা আরও সঠিকভাবে বললে বলতে হয় নগরপ্রাচীর নির্মাণ উপলক্ষ করেই।

নিজামুদ্দিন আউলিয়ার দিঘি কাটাতে মজুর চাই প্রচুর। গিয়াসুদ্দিনের নগর তৈরি করতেও মজুর আবশ্যক সহস্র সহস্র। অথচ দিল্লিতে মজুরের সংখ্যা অত্যন্ত পরিমিত, দু-জায়গায় প্রয়োজন মিটানো অসম্ভব। অত্যন্ত স্বাভাবিক যে, বাদশাহ

চাইলেন মজুরেরা আগে শেষ করবে তাঁর কাজ, ততক্ষণ অপেক্ষা করুক ফকিরের খয়রাতি খনন। কিন্তু রাজার জোর অর্থের, সেটা পরিমাপ করা যায়। ফকিরের জোর হৃদয়ের, তার সীমার শেষ নেই। মজুরেরা বিনা মজুরিতে দলে-দলে কাটতে লাগল নিজামুদ্দিনের তালাও। সুলতান হুসার ছেড়ে বললেন, ‘তবে রে—’

কিন্তু তার ধ্বনি আকাশে মিলাবার আগেই এস্তালা এল আশু কর্তব্যের। বাংলাদেশে বিদ্রোহ দমন করতে ছুটেতে হল সৈন্যসামন্ত নিয়ে।

শাহজাদা মহম্মদ তোগলক রইলেন রাজধানীতে রাজ-প্রতিভূরূপে। তিনি নিজামুদ্দিনের অনুরাগীদের অন্যতম। তাঁর আনুকূল্যে দিবারাত্রি খননের ফলে পরহিতব্রতী সন্ন্যাসীর জলাশয় জলে পূর্ণ হল অনতিবিলম্বে। তোগলকাবাদের নগর-প্রাচীর রইল অসমাণ্ড।

অবশেষে সুলতানের ফিরবার সময় হল নিকটবর্তী। প্রমাদ গণনা করল নিজামুদ্দিনের অনুরাগীরা। তারা ফকিরকে অবিলম্বে নগর ত্যাগ করে পলায়নের পরামর্শ দিল। ফকির মৃদু হাস্যে তাদের নিরস্ত করলেন—“দিল্লি দূর অস্ত্”। দিল্লি অনেক দূর।

প্রত্যহ যোজন পথ অতিক্রম করছেন সুলতান। নিকট হতে নিকটতর হচ্ছেন রাজধানীর পথে। প্রত্যহ ভক্তরা অনুনয় করে ফকিরকে। প্রত্যহ একই উত্তর দেন নিজামুদ্দিন—দিল্লি দূর অস্ত্।

সুলতানের নগরপ্রবেশ হল আসন্ন, আর মাত্র একদিনের পথ অতিক্রমণের অপেক্ষা। ব্যাকুল হয়ে শিষ্য-প্রশিষ্যেরা অনুনয় করল সন্ন্যাসীকে—এখনও সময় আছে, এই বেলা পালান। গিয়াসুদ্দিনের ক্রোধ এবং নিষ্ঠুরতা অবিদিত ছিল না কারও কাছে, ফকিরকে হাতে পেলে কী দশা হবে তাঁর সেকথা কল্পনা করে তারা ভয়ে শিউরে উঠল বারংবার। স্থিতহাস্যে সেদিনও উত্তর করলেন বিগতভয় সর্বভাগী সন্ন্যাসী—“দিল্লি হনুজ দূর অস্ত্”। দিল্লি এখনও অনেক দূর। ব’লে হাতের জপের মালা ঘোরাতে লাগলেন নিশ্চিন্ত ঔদাসীনে।

নগরপ্রাপ্তে পিতার অভ্যর্থনার জন্য মহম্মদ তৈরি করেছেন মহার্ঘ মণ্ডপ। কিংখাপের শামিয়ানা। জরিতে, জহরতে, ঝলমল। বাদ্যভাণ্ড, লোকলশকর, আমির ওমরাহ মিলে সমারোহের চরমতম আয়োজন। বিশাল ভোজের ব্যবস্থা, ভোজের পরে হস্তিযুথের প্রদর্শনী-প্যারেড।

মণ্ডপের কেন্দ্রস্থলে ঈষৎ উন্নত ভূমিতে বাদশাহের আসন, তার পাশেই তাঁর উত্তরাধিকারীর। পরদিন গোখলিবেলায় সুলতান প্রবেশ করলেন অভ্যর্থনা মণ্ডপে। প্রবল আনন্দোচ্ছ্বাসের মধ্যে আসন গ্রহণ করলেন। সিংহাসনের পাশে বসালেন নিজ প্রিয়তম পুত্রকে। কিন্তু সে মহম্মদ নয়, তার অনুজ।

ভোজনান্তে অতি বিনয়াবনত কণ্ঠে মহম্মদ অনুমতি প্রার্থনা করলেন সম্রাটের। জাহাঁপনার হুকুম হলে এবার হাতির কুচকাওয়াজ শুরু হয়, হস্তিযুথ নিয়ন্ত্রণ করবেন তিনি নিজে। গিয়াসুদ্দিন অনুমোদন করলেন স্থিতহাস্যে।

মহম্মদ মণ্ডপ থেকে নিষ্ঠাস্ত হ'ল ধীর শান্ত পদক্ষেপে ।

কড় কড় কড় কড়াৎ ।

একটি হাতির শিরসঞ্চালনে স্থানচ্যুত হ'ল একটি স্তম্ভ । মুহূর্তমধ্যে সশব্দে ভূপতিত হ'ল সমগ্র মণ্ডপ ।

চারদিকে ছড়িয়ে পড়ল অসংখ্য কাঠের থাম । চাপাপড়া মানুষের আতর্কণ্ঠে বিদীর্ণ হ'ল অন্ধকার রাত্রির আকাশ । ধূলায় আচ্ছন্ন হ'ল দৃষ্টি । ভীত সচকিত ইতস্তত ধাবমান হস্তিযুথের গুরুভার পদতলে নিষ্পিষ্ট হ'ল অগণিত হতভাগ্যের দল । এবং সে-বিভ্রান্তকারী বিশৃঙ্খলার মধ্যে উদ্ধারকর্মীরা ব্যর্থ অনুসন্ধান করল বাদশাহের ।

পরদিন প্রাতে মণ্ডপের ভগ্নস্তূপ সরিয়ে আবিষ্কৃত হ'ল বৃদ্ধ সুলতানের মৃতদেহ । যে-প্রিয়তম পুত্রকে তিনি উত্তরাধিকারী মনোনীত করেছিলেন মনে-মনে, তার প্রাণহীন দেহের উপরে সুলতানের দুই বাহু প্রসারিত । বোধ হয় আপন দেহের বর্মের রক্ষা করতে চেয়েছিলেন তাঁর স্নেহাস্পদকে ।

সমস্ত ঐহিক ঐশ্বর্য প্রতাপ ও মহিমা নিয়ে সপুত্র গিয়াসুদ্দিনের শোচনীয় জীবনান্ত ঘটল নগরপ্রান্তে । দিল্লি রইল চিরকালের জন্য তাঁর জীবিত পদক্ষেপের অতীত ।

দিল্লি দূর অস্ত্ । দিল্লি অনেক দূর ।

## চার

নিজামুদ্দিনের দরগায় প্রবেশ করে আজও প্রথমেই চোখে পড়ে আউলিয়া-খনিত পুকুর । তার পাশ দিয়ে আসা গেল এক প্রশস্ত চত্বরে যার মাঝখানে সমাধিস্থ হয়েছে ফকিরের দেহ । সমাধির উপরে ও আশেপাশে রচিত হয়েছে সুদৃশ্য ভবন ও অলিন্দ । উত্তরকালে সম্রাট শাজাহান সমাধির চারিদিক ঘিরে তৈরি করেছেন স্বেতপাথরের খিলান; প্রাঙ্গণ বেষ্টিত করেছেন সূক্ষ্ম কারুকার্য-খচিত জালিকাটা পাথরের দেয়ালে । দ্বিতীয় আকবর রচনা করেছেন সমাধির উপরিস্থ গম্বুজ । ফকিরের পুণ্য নামের সঙ্গে আপনাকে যুক্ত করে নিজেকে তাঁরা ধন্য জ্ঞান করেছেন ।

গিয়াসুদ্দিনের রাজধানী তোগলকাবাদ আজ বিরাট ধ্বংসস্তূপে পরিণত । বি.বি.সি. আই. রেলওয়ে লাইন গেছে তার উপর দিয়ে । একমাত্র প্রত্নতাত্ত্বিকের গবেষণায় এবং টুরিস্টদের দ্রষ্টব্য হিসাবে আজ তার গুরুত্ব । নিজামুদ্দিনের দরগায় আজও মেলা বসে প্রতি বছর । দূরদূরান্ত থেকে পুণ্যকামীরা আসে দর্শনাকাজক্ষায় । সেদিনের রাজধানী তার অভ্রভেদী অহঙ্কার নিয়ে বহুদিন আগে মিশেছে ধূলায়; দীন সন্ন্যাসীর মহিমা পুরুষানুক্রমে ভক্তজনের সশ্রদ্ধ অন্তরের মধ্য দিয়ে রয়েছে অম্লান । তার আকর্ষণ দূরকালে প্রসারিত ।

হিন্দুর অন্তিম অভিলাষ গঙ্গাতীরে দেহরক্ষার ন্যায় শত শত বর্ষ ধরে দিল্লির বিত্তশালীরা কামনা করেছেন আউলিয়ার কবরের নিকটে সমাধিস্থ হতে, চেয়েছেন জীবনান্তে 'মির মজলিসে'র সান্নিধ্য । তাই তার আশেপাশে আছে সংখ্যাতিত আমির ওমরাহের সমাধি । তারই মধ্যে একটির গর্ভে আছে কবি আমির খসরুর দেহাবশেষ ।

খসরুর প্রতিভা ছিল বিস্ময়কর; খ্যাতি ছিল বহুবিস্তৃত। দিল্লির কবিগোষ্ঠীতে তিনি ছিলেন অনন্যসাধারণ। আলাউদ্দিন খিলজির কাব্যরসিক পুত্র খিজির খানের সঙ্গে তাঁর হৃদ্যতা ছিল গভীর। আপন অনুপম ছন্দে গ্রন্থিত করে খিজির খানের বীরত্ব-কাহিনীকে তিনি কালজয়ী অমরত্ব দান করে গেছেন।

নিজামুদ্দিনের সংলগ্ন সমাধিক্ষেত্রে আর একজন কবি রয়েছেন চিরনিদ্রিত, যাঁর রচনা আজও উর্দু সাহিত্যে অজ্ঞাতশত্রু। কবি গালিবের সমাধিটি আড়ম্বরহীন, সাধারণ প্রস্তর-বেদিকায় মাত্র আবৃত। ঊনবিংশ শতাব্দীর উর্দু সাহিত্য অন্ধান রেখেছে তাঁর স্মৃতি, কাব্য ও গাথায়। জগতে বহু ঐশ্বর্যময় সৌধ রচিত হয় অক্ষম ব্যক্তিদের সমাধির উপরে। কিন্তু কবি'পরে ভার থাকে নিজ মেমোরিয়ালের।

হিন্দুযুগে রেওয়াজ ছিল না স্মৃতিসৌধের। তার কারণ মরলোকের চাইতে পরলোকের দিকে হিন্দুদের দৃষ্টি ছিল বেশি। তাই শ্মশানে দালান খাড়া করে প্রিয়জনের স্মৃতি অক্ষয় করার কথা কখনও তাদের মনে হয়নি। মৌর্যরাজদের আমল থেকে পৃথ্বীরাজ পর্যন্ত কোনো হিন্দু রাজা রাখেননি কোনো স্মৃতিসৌধ। রাজপুত রাজন্যেরা গড়েননি কোনো এতমদৌলা, সফদারজঙ্গ বা হুমায়ুন'স্ টুঘ। তাঁরা জলাশয় খনন করেছেন, মন্দির স্থাপন করেছেন, ভূমিদান, গোদান করেছেন ব্রাহ্মণকে। সমস্তই জগৎ-হিতায়। অশোক যে স্তম্ভ রচনা করেছিলেন, তা নিজ কীর্তি ঘোষণার জন্য নয়, জনশিক্ষার উদ্দেশ্যে। বুদ্ধ গড়েছিলেন চৈত্য ও বিহার সঙ্ঘের জন্য, শঙ্করাচার্য স্থাপন করেছেন মঠ বেদান্তচর্চার মানসে।

সে-যুগে হিন্দুর জীবনে শেষ কথা ছিল ভক্তি। সূর্যমুখী ফুলের মতো তার সমস্ত কর্ম, চিন্তা, ধ্যান, ধারণা, সাক্ষাৎ বা পরোক্ষভাবে ভগবানের নামে উর্ধ্বমুখীন। ঐহিক সম্পর্ককে তারা যথেষ্ট গুরুত্ব দেয়নি। যখন কা তব কান্ত্য কস্তে পুত্র, তখন প্রেম দিয়ে আর হবে কী? মায়াময়মিদম্ অখিলং বিশ্বম্। কাজেই পিতাকে হতে হয়েছে পরমং তপঃ, স্বামীকে হতে হয়েছে পতিদেবতা, স্ত্রীকে হতে হয়েছে সহধর্মিণী। নারী যে সহমৃত্যু হয়েছে তার কতটা প্রেমের আকর্ষণে আর কতটা পুণ্যলোভবশে তা বলা শক্ত। স্বয়ম্বরা যাঁরা হয়েছেন, তাঁরা প্রেমে পড়ে নয়। সংযুক্তা পৃথ্বীরাজের গলায় মালা দিয়েছিলেন তাঁর খ্যাতি ও বৈভবের জন্য যেমন একালের তরুণীরা আংটি পরিয়ে দেন আই.সি.এস.-এর অঙ্গুলিতে।

মুসলমানেরাই আনল ভিনু জীবনাদর্শ। বৈরাগ্যসাধনে মুক্তি সে তাদের নয়। তারা পরকালকে খোড়াই পরোয়া করল; ইহকালকে করল সর্বস্ব। তারা জীবনকে করল ভোগ, কাঁদল, কাঁদাল এবং ভালোবাসল। তাই নারীর জন্য করল লুণ্ঠন, প্রেমের জন্য করল অপহরণ এবং প্রিয়জনের জন্য হনন ও বহু অপকর্ম সাধন। বলা বাহুল্য, এর সবগুলি সমর্থনযোগ্য নয়। কিন্তু প্রেম কি কারও সমর্থনের অপেক্ষা রাখে? মেনে চলে নীতির অনুশাসন? অহল্যা করেছে সমাজের বা শাস্ত্রের সমর্থনের অপেক্ষা? মহাভারতের অর্জুন করেছে? বৃন্দাবনের কানু করেছে? করেছে রিজিয়া বেগম, মেরি ওয়ালেউঙ্কা বা লেডি হ্যামিল্টন?

মুসলমানেরা প্রিয়তম-প্রিয়তমার স্মৃতিকে করতে চেয়েছে কালজয়ী। রাখতে চেয়েছে স্মারকচিহ্ন। তাই সৌধ গড়েছে পিতার, পতির, পত্নীর, এমনকি উপপত্নীর



সমাধিতে। হিন্দুরা তপস্বী, তারা দিয়েছে বেদ ও উপনিষদ। মুসলমানেরা শিল্পী, তারা দিয়েছে তাজ ও রঙমহল। হিন্দুরা সাধক, তারা দিয়েছে দর্শন। মুসলমানেরা গুণী, তারা দিয়েছে সঙ্গীত। হিন্দুর গর্ব মেধার, মুসলমানের গৌরব হৃদয়ের। এই দুই নিয়েই ছিল ভারতবর্ষের অতীত; এই দুই নিয়েই হবে তার ভবিষ্যৎ। একটিকে বাদ দিলেই পাকিস্তান—মিস্টার মহম্মদ আলি জিন্না না চাইলেও।

যাত্রাসহচরী দৃষ্টি আকর্ষণ করলেন একটি ক্ষুদ্র মর্মর-সমাধির প্রতি। সেটি সম্রাটদুহিতা জাহানারার।

ইতিহাসে সম্রাট আলমগিরের শাসন বিধর্মীনির্যাতনের দূরপন্থে কলঙ্কে মলিন : সে-তথ্য স্কুলপাঠ্য পুস্তকে আছে। কিন্তু এই হৃদয়হীন অথচ অমিতবিক্রম যোদ্ধা নৃপতির জীবন যে দুটি বিশিষ্ট উপদ্রুতা বন্দিণীর উষ্ণ দীর্ঘশ্বাসে অভিশণ্ড ছিল, সে-কথা যথোচিত বিদিত নয় জগতে।

জাহানারা ও জেবুন্নেসা দুজনেই ছিলেন আওরঙ্গজেবের অতি নিকটতম আত্মীয়া। একজন অনুজা, অপর জন আত্মজা। দুজনেই ছিলেন রূপসী, দুজনেই ছিলেন অসাধারণ নির্ভীক ও তেজস্বিনী। দুজনেই চিরকুমারী এবং দুজনেরই জীবনের সুদীর্ঘকাল কেটেছে আওরঙ্গজেবের কারাগৃহে।

কিন্তু আরও এক জায়গায় এই দুই দুর্ভাগিনীর মিল ছিল গভীরতর। তাঁরা দুজনেই ছিলেন কবি। মুঘল যুগের মহিলা-কবি।

জাহানারার সমগ্র রচনা সম্বন্ধে রক্ষিত হয়নি। গহন অরণ্যে প্রস্ফুটিত পুষ্পের মতো প্রায় সবই লোকচক্ষুর অন্তরালে ধূলিতে হয়েছে বিলীন, দু-একটি মাত্র নিদর্শন আছে ইতস্তত বিক্ষিপ্ত।

জেবুন্নেসার কাব্যখ্যাতি অধিকতর বিস্তৃত। 'জেব-উল্-মুনশোয়াতে' সত্যিকার কাব্যপ্রতিভার চিহ্ন আছে। বিখ্যাত পারশি কাব্যগ্রন্থ 'দিওয়ানে মখ্ফির' রচয়িত্রীরূপেও জেবুন্নেসার উল্লেখ আছে অনেক গ্রন্থে, যদিও পণ্ডিতেরা সম্প্রতি সে-বিষয়ে সংশয় প্রকাশ করেছেন।

জাহানারা আমাকে আকৃষ্ট করেছেন শৈশব থেকে। ইতিহাস পরীক্ষার পূর্বক্ষেণে সন-তারিখে কটকাকীর্ণ মুঘল-কাহিনী কণ্ঠস্থ করার দুরূহ প্রয়াস করতেন প্রাণপণে দীর্ঘরাত্রিব্যাপী। ঘুমো চোখের পাতা আসত জড়িয়ে, দেহ হত অলস, মাথা কিমিয়ে পড়ত ঢুলুনিতে। ওরই মধ্যে জাহানারার উপাখ্যান পড়ে কল্পনায় আঁচ করার চেষ্টা করতেন তাঁর চেহারা।

প্রথম যৌবনে জাহানারা বাদশাহ বেগমের মর্যাদা ভোগ করেছেন বিপুল মহিমায়। হারেমে করেছেন একাধিপত্য। অপ্রতিহত অনুগ্রহ ও শাসন বিতরণ করেছেন দুই হস্তে। কন্যাদের মধ্যে তিনি ছিলেন শাজাহানের প্রিয়তরা। তাঁর জন্য সম্রাট তৈরি করেছিলেন দিল্লির জুম্মা মসজিদ, ভারতের বৃহত্তম মুসলিম ভজনালয়।

জাহানারার স্নেহভাজন ছিল এক বাঁদি। অতর্কিতে একদিন আশুন লাগল তার বসনে। সে-আশুন নেভাতে গিয়ে শাহজাদী নিজে দগ্ধ হলেন সাংঘাতিকরূপে।

রাজ্যের নানা জায়গা থেকে এল হাকিম, হল নানারকম এলাজ। কিন্তু ফল হল না কিছুই। সম্রাটনন্দিনীর জীবনসংশয় দেখা দিল।

বিচলিত শাজাহান এতলা দিলেন এক সাহেব-চিকিৎসককে। গ্যাব্রিয়েল বাউটন। সুরাটে ইংরেজ কুঠির ডাক্তার। বাউটন বললেন, ওষুধ দিতে হলে রোগিনীকে চোখে দেখা চাই। শুনে সভাসদেরা হতবাক হলেন। বলে কী বেয়াদব! শাহানশাহ বাদশাহের জেনানা মানে না কন্মবক্ত?

কিন্তু শেষ পর্যন্ত পিতৃস্নেহ জয়লাভ করল সামাজিক প্রথার উপরে। শাজাহান সম্মত হলেন বাউটনের প্রস্তাবে। অল্পকালমধ্যে আরোগ্যলাভ করলেন জাহানারা। তাঁর অনুরোধে শাজাহান বাউটনকে দিতে চাইলেন পুরস্কার, যা চাইবে তা-ই পাবে।

আত্মমিনত কুর্নিশ করে বাউটন বললেন : নিজের জন্য কিছুই চাইনে। কলকাতার একশো চল্লিশ মাইল দক্ষিণে বালাশোরে ইংরেজের কুঠিনির্মাণের জন্য প্রার্থনা করি একটুকরো ভূমিখণ্ড। ইংরেজকে দান করুন এদেশে বিনাশুল্কে বাণিজ্যের অধিকার।

বাউটনের প্রার্থনা মঞ্জুর হল। স্বজাতিহিতৈষণার এতবড় দৃষ্টান্ত আর একটি মাত্র আছে আধুনিককালে। সেটি ইহুদি বৈজ্ঞানিক ডক্টর কাইম ভাইজমানের।

উনিশশো ষোলো সালে প্রথম মহাযুদ্ধের যখন সংকটজনক কাল, ইংলন্ডে বিস্ফোরক উৎপাদনের অপরিহার্য উপাদান অ্যাসিটোনের অভাব, তখন কৃত্রিম অ্যাসিটোন তৈরির ভার নিলেন ম্যাক্সেস্টার ইউনিভার্সিটির এক অধ্যাপক। প্রধানমন্ত্রী লয়েড জর্জ বললেন : প্রফেসর, সমগ্র ব্রিটেনের ভাগ্য নির্ভর করছে তোমার সফলতা বিফলতার উপরে। আমি চাই তাড়াতাড়ি কাজ, তাড়াতাড়ি ফললাভ।

অধ্যাপক বললেন, তথাস্তু।

দিবারাত্রির অবিশ্রান্ত পরিশ্রমে সপ্তাহ কয়েকের মধ্যে আবিষ্কার করলেন কৃত্রিম অ্যাসিটোন। পরাজয়ের হাত থেকে রক্ষা করলেন ব্রিটেনকে এই বৈজ্ঞানিক অধ্যাপক ভাইজমান।

কৃতজ্ঞ লয়েড জর্জ তাঁকে ডেকে দিতে চাইলেন সর্বশ্রেষ্ঠ পুরস্কার।

ভাইজমান প্রত্যাখ্যান করলেন সবিনয়ে।

লয়েড জর্জ আবার জিজ্ঞাসা করলেন, পিয়ারেজ? অর্থ?

“কিছু নয়। একটি মাত্র যাত্রণা আছে আমার। আমার স্বজাতির জন্য চাই নির্দিষ্ট একটি দেশ, ইহুদির ন্যাশনাল হোম।”

কিছুকাল পরে বালফোর ঘোষণায় ইহুদিদের জন্য প্যালেস্টাইনে নির্দিষ্ট হল জাতীয় বাসস্থান। অবশ্য কাগজেপত্রে। আজও প্রকৃত অধিকার স্থাপিত হল না ইহুদিদের। বরং ইদানীং কনসারভেটিভরা প্যালেস্টাইনে আরবদেরই করতে চাইছেন সুয়োরানী, মধ্যপ্রাচ্যে ইংরেজপ্রভাব অক্ষুণ্ণ রাখবার প্রয়োজনে। কৃতজ্ঞতা কথাটা আছে ইংরেজের ভাষায়, নেই ইংরেজের চরিত্রে।

জাহানারার অনুগ্রহে ইংরেজেরা বাণিজ্য নিরঙ্কুশ করলেন ভারতবর্ষে, সাম্রাজ্যের ভিত্তি স্থাপন করলেন সকলের অলক্ষ্যে। সেই জাহানারার চরিত্রেই কলঙ্ক আরোপ করে ইতিহাস রচনা করেছে ইংরেজ। এতে বিখ্যিত হইনে। যে-সিভিলিয়ান

ভারতবর্ষের পেনশনে স্ট্যাফোর্ডশায়ারে বাড়ি হাঁকিয়ে আছেন, তিনিই ভারতের নিন্দা করেন সবচেয়ে জোরগলায়। লিওপোল্ড এমারিই ভারতবর্ষের স্বাধীনতার সবচেয়ে বড় শত্রু, কারণ তাঁর জন্য গোরখপুরে।

জাহানারার জীবননাট্যের শেষ দৃশ্যগুলি বেদনাবিধুর।

শাজাহানের পুত্রদের মধ্যে দারাশিকো ছিলেন পিতার সর্বাপেক্ষা প্রীতিভাজন। কিন্তু তাঁর অনুরক্তি ছিল খ্রিষ্টধর্মে। সেটা মুসলিমসমাজে জনপ্রিয়তার কারণ নয়। পিতার অসুস্থতার সংবাদে সুজা সৈন্যসামন্ত নিয়ে রওনা হলেন দিল্লি অভিযুখে। বারাণসীর যুদ্ধে দারা তাঁকে করলেন পরাজিত। আওরঙ্গজেব তখন মোরাদকে বললেন, এ-হলনা চাতুরীময়, পৃথিবীর কোনোকিছুতেই লোভ নেই তাঁর। তাঁরা দুজনে মিলে দারাকে পরাজিত করলে শাজাহান যদি পরলোকগত হন—আল্লামার দোয়ায় তিনি যেন সেরে ওঠেন—তবে দিল্লির সিংহাসন হবে তাঁর অর্থাৎ মোরাদের। মদ্যপ মোরাদের প্রতীতি হল এই আশ্বাসে। দারা পরাজিত হয়ে পলায়ন করলেন পাঞ্জাবে, এক উৎসবরজনীর অবসানে সুরামণ্ড মোরাদ হল বন্দি, আওরঙ্গজেব নিজেকে ঘোষণা করলেন সম্রাটরূপে, পিতা শাজাহানকে কয়েদ করে আবদ্ধ করলেন আত্রা দুর্গের এক ক্ষুদ্র প্রকোষ্ঠে।

আওরঙ্গজেব জাহানারাকে দিতে চেয়েছিলেন বাদশাহ বেগমের পদ। কিন্তু জাহানারা প্রত্যাখ্যান করলেন সে-অনুরোধ। স্বৈচ্ছায় বরণ করলেন শাজাহানের সহ-বন্দিত্ব। পিতার পরিচার্যার জন্য। চতুর্দিকে ক্রুর প্রবঞ্চনা, সীমাহীন বিশ্বাসঘাতকতার ঘন অন্ধকারের মধ্যে সেদিন একমাত্র জাহানারা রইলেন অচল, অটল, অকম্পিত দীপশিখার মতো দীপ্তিময়। শাজাহানের দ্বিতীয় কন্যা রোশেনারা আওরঙ্গজেবের পক্ষ নিলেন, হলেন তাঁর প্রিয়পাত্রী। দিল্লির সিভিল লাইনসে আছে তাঁর উদ্যান। সেখানে এ-আমলে স্থাপিত হয়েছে রোশেনারা ক্লাব, দিল্লির মন্টিকার্লো। দশ টাকা পয়েন্টে স্টেকে বিজ্ঞখেলার খ্যাতি আছে তার উত্তরভারতে।

দিনের পর দিন গত হয়, মাসের পর মাস। চক্রাকারে আবর্তিত হয় ষড়ঋতু। গ্রীষ্ম গত হয় তার উত্তাপ ও প্রভঞ্জন আহুতি নিয়ে। বর্ষার মেঘকজ্জল দিবসের দীর্ঘ ছায়া নামে যমুনার কালো জলে। বর্ষণমুখর রাত্রির বিদ্যুচ্চমকে উৎফুল্ল ভবন-শিখীরা নৃত্য করে প্রাসাদের মর্মর অলিন্দে। শরতের আলো-ছায়া-বিজড়িত প্রভাতে নদীতীরে কাশের বনে লাগে দোলা। হেমন্ত আনে কুহেলি; শীত দেয় হতাশ্বাস। বসন্তে ফুলের মঞ্জরি আন্দোলিত হয় শিরীষের শাখাপ্রশাখায়। অগ্রার প্রাসাদ প্রাচীরের অন্তরালে জাহানারার বন্দিজীবনে একটি করে বৎসর হয় বৃদ্ধি, আয়ু থেকে খসে পড়ে একটি করে বছর। কর্মহীন অবসরে শাহজাদী কবিতা রচনা করেন আপনমনে।

একদা নিশীথকালে আওরঙ্গজেবের কাছ থেকে শাজাহানের কাছে এসে পৌঁছল একটি সুদৃশ্য মোড়ক। পুত্র পাঠিয়েছে পিতাকে উপহার। তবে কি অনৃতপুত্র পুত্রের ক্ষমপ্রার্থনার প্রথম নিদর্শন? আগ্রহকম্পিত হস্তে বৃদ্ধ শাজাহান খুললেন মোড়ক। পরতের পর পরত। খুলতে খুলতে শেষকালে হাত থেকে গড়িয়ে পড়ল শাজাহানের প্রিয়তম পুত্র দারাশিকোর খণ্ডিত মুণ্ড। সম্রাট মূর্ছিত হয়ে পড়লেন জাহানারার অঙ্কে।

শাজাহানের জীবনের শেষদিন পর্যন্ত জাহানারা রইলেন তাঁর পাশে। স্থবির পিতার পরিচর্যা করলেন অমিত নিষ্ঠা ও অবিচলিত ধৈর্যে। তাঁর মৃত্যুর পর প্রত্যাবর্তন করলেন দিল্লিতে।

অবশেষে রমজানের এক পুণ্য তিথিতে মৃত্যুর শান্ত শীতল ক্রোড়ে মুক্তিলাভ করলেন বন্দিনী। তাঁরই ইচ্ছায় তাঁর দেহ সমাধিস্থ হল ফকির নিজামুদ্দিন আউলিয়ার সমাধির পার্শ্বে। সে-সমাধির উপরে না রইল মণ্ডপ, না রইল আচ্ছাদন, না রইল ঐহিক ঐশ্বর্যের লেশমাত্র আভাস। শুধু তাঁরই স্বরচিত একটি কবিতা উৎকীর্ণ হল তার গায়ে,—

“বেগায়র সবজা না পোশাদ কসে মাজারে মারা

কে কবর পোষে গড়িবান্ হামিন্ গিয়াহ বসন্ত্।”

“একমাত্র ঘাস ছাড়া আর যেন কিছু না থাকে আমার সমাধির উপরে। আমার মতো দীন অভাজনের সেই তো শ্রেষ্ঠ আচ্ছাদন।”

পুণ্যশ্লোক নিজামুদ্দিন আউলিয়ার অনুগামিনী শাজাহান-দুহিতা নস্বর জাহানারার এই তো যোগ্য সমাধি।

আসন্ন সন্ধ্যায় শান্ত নিস্তব্ধতায় শ্রদ্ধান্ম্র চিন্তে, সামনে এসে দাঁড়ালেম আমরা তিন দর্শনার্থী। কার মুখে ছিল না কথা, কিন্তু মনে ছিল ভার।

নবশ্যাম দুর্বাদল ছেয়ে আছে ক্ষুদ্র নিরলঙ্কার সমাধি। নির্মল নীল আকাশ থেকে প্রত্যহ নিশীথে সঞ্চিত হয় বিন্দু বিন্দু শিশির, প্রভাতে স্পর্শ করে তরুণ অরুণের প্রথম কিরণরেখা, সন্ধ্যায় ছড়িয়ে পড়ে গোধূলি-আলোকের সোনালি আভা। তারা কি পায় শতাধিক বর্ষ পূর্বে সমাধিস্থ সেই অঙ্গের ললিত সুবাস? পায় তাঁর সুকুমার বক্ষের নিচে ভক্তিনত হৃদয়ের মৃদু স্পন্দনধ্বনি?

## পাঁচ

প্রভাতের সবচেয়ে বড় সেশশন। স্থানীয় একটি সংবাদপত্রে বেরিয়েছে ক্রিপস্ প্রস্তাবের সারমর্ম। নিজস্ব সংবাদদাতার বিশ্বস্তসূত্রে পাওয়া বিবরণ। শোনা গেল, গভর্নমেন্ট বিচলিত হয়েছে এ-সংবাদ প্রকাশে। গোয়েন্দা বিভাগের বড়কর্তারা তদন্ত শুরু করেছেন সংবাদের সূত্র সম্পর্কে।

সাংবাদিক মহলে উত্তেজনার সৃষ্টি হল। কারণ প্রস্তাবগুলির কিছুটা আঁচ আমরা সবাই পেয়েছিলাম গত ক’দিন ধরেই। প্রকাশ করা হয়নি, জেন্টলম্যানস এগ্রিমেন্ট স্বরণ করে। ইংরেজ ও আমেরিকান সহ-সংবাদদাতারা অনুমান করলেন, ভাইসরয়’স কাউন্সিলের কোনো মহামান্য সদস্যের কাছ থেকে বেরিয়েছে এ-খবর।

জনশ্রুতি এই যে, ক্রিপস্ যেদিন এলেন, বেলা সাড়ে বারোটো থেকে অনাহারে ভাইসরয়’স হাউসে তাঁর অভ্যর্থনার জন্য অপেক্ষা করেছিলেন এই মাননীয় সদস্যগণ। বেলা দুটোয় এলেন ক্রিপস্। লর্ড লিনলিথগো আলাপ করিয়ে দিলেন তাঁর সঙ্গে সারিবন্দি দণ্ডায়মান নিজ সহকর্মীদের। ক্রিপস্ করমর্দন করলেন সবার

সঙ্গে, নিরাসক্ত কণ্ঠে আবৃত্তি করলেন, “হাউ ডু ইউ ডু?” দ্বিতীয় বাক্য উচ্চারণ না করে মুহূর্তে অন্তর্হিত হলেন আপন নির্দিষ্ট কক্ষে।

তারা আশা করেছিলেন নেতৃবৃন্দের সঙ্গে সাক্ষাতের পূর্বে ক্রিপস্ তাঁর প্রস্তাব আলোচনা করবেন তাঁদের সঙ্গে, জানতে চাইবেন তাঁদের অভিমত। সেদিক দিয়েও হতাশ হলেন। ক্রিপস্-প্রস্তাবের সারমর্ম অনুদ্বাটিত রইল তাঁদের কাছে। আশ্চর্য নয় যে, তারা ক্ষুণ্ণ হলেন। এক্সিকিউটিভ কাউন্সিলর হলেও, হাজার হোক, মানুষের শরীর তো! শোনা যায়, অবশেষে ভাইসরয়ের সুপারিশে বিগত রাত্রে লাট-প্রাসাদে অনুষ্ঠিত এক ভোজসভায় ক্রিপস্ তাঁর প্রস্তাবের চূষক জানিয়েছেন তাঁদের। আজই প্রভাতে সংবাদপত্রের উৎসাহী নিজস্ব রিপোর্টারের জবানিতে ঘটল তার প্রকাশ। ধূম দ্বারা যদি পর্বতের বহি অনুমান করা সম্ভব হয়, তবে বিদেশি সংবাদদাতাদের সন্দেহ একেবারে অগ্রাহ্য করা কঠিন।

সংবাদ ‘স্কুপ’ করার অধিকার সাংবাদিকের আছে। কিন্তু তারও একটা অলিখিত মাত্রা আছে। জাতির বা দেশের বৃহত্তর স্বার্থ যেখানে জড়িত, সেখানে সাংবাদিকের আপন বিবেক সেন্সর করে তার কপি। এডোয়ার্ড দি এইট্থের রাজ্যত্যাগের ঘটনা মনে পড়ছে সুস্পষ্ট। যে মাস থেকে ব্রিটেনের সকল সংবাদপত্র জানত সিম্পসন-এডোয়ার্ড প্রণয়-কাহিনী। ফ্লিট স্ট্রিটে কানাঘুষায় শুনেছেন অনেকেই। কেউ প্রকাশ করেনি মুদ্রিতাক্ষরে। সরকারি দপ্তরের কোনো অনুশাসন ছিল না, ছিল না কোনো আইনগত বাধা। একদিন জার্মানির বিরুদ্ধে সেকেন্ড ফ্রন্ট হবে। কোথায়, কোনখানে করবে মিত্রশক্তি আক্রমণ সে-তথ্য জানা হয়তো সম্ভব হতে পারে স্ট্র্যাট গেন্ডার বা ড্রুপিয়ান্সনের। তাঁরা কদাচ প্রকাশ করবেন না সে-সংবাদ, যদিও ক্রিপস্-প্রস্তাবের চাইতে সে কম বড় ‘স্কুপ’ নয়।

সকল প্রশ্নের বড় প্রশ্ন সততার। ক্রিপস্ আন্তরিক আবেদন জানিয়েছিলেন ব্রিটেন এবং ভারতের কল্যাণের নামে। আমরা সবাই সম্মতি নিয়েছিলেম বিনা প্রতিবাদে। পূর্বপ্রকাশের দ্বারা এই ভারতীয় সাংবাদিক ভঙ্গ করলেন সে-প্রতিশ্রুতি। তাই লজ্জিত বোধ করছি আমরা সমস্ত ভারতীয়রা। জেন্টলম্যানরা যদি জার্নালিস্ট হতে পারেন, জার্নালিস্টরা জেন্টলম্যান হতে পারবেন না কেন?

ভাইসরয়’স হাউস থেকে ক্রিপস্ এসেছেন তিন নম্বর কুইন ভিক্টোরিয়া রোডে। এক্সিকিউটিভ কাউন্সিলের অন্যতম সদস্য সার এন্ডরু ক্রো-র বাংলায়। ক্রো আসামের আগামী গভর্নর। গদি দখলের আগে দুমাসের ছুটি নিয়ে গেছেন মুসৌরী না আলমোড়ায়, বিশ্রাম-মানসে।

এক্সিকিউটিভ কাউন্সিলারদের বাড়িগুলি সরকারি। সুদৃশ্য একতলা দালান। ঈষৎ পীতাম্ব রং; সামনে অতিবিস্তৃত অঙ্গন। এতবড় যে দুদিকে গোলপোস্ট খাড়া করে মোহনবাগান-ইন্সট্রুমেন্টেলের ম্যাচ খেলা যায়। সবুজ ঘাস, লন-মৌর দিয়ে পরিপাটি ছাঁটা। মাঝখানের বৃত্তাকার ফুলের কেয়ারি। তাকে বেটন করে টকটকে লাল সুরকির রাস্তা; মোটর ঘোরাতে বেগ পেতে হয় না এতটুকুও। ফটকের গায়ে একপাশে কাচের উপরে বড় হরফে লেখা বাড়ির নম্বর। কাচের একদিকে ছোট

একটু খুপরি। রাত্রিবেলায় তাতে লণ্ঠন জ্বলে রাখা হয়, অনেক দূর থেকেও যাতে বাড়ির নম্বরটা চোখে পড়ে। দালানের সম্মুখে পোর্চ, তার নিচে গাড়ি দাঁড়ায়। বারান্দার দুপাশে দুটি ছোট কুঠুরি। সেখানে অনাবল মেস্বারের সেক্রেটারি ও স্টেনোগ্রাফারের দপ্তর।

হুব্ধ একই ধরনের ছ'টি বাড়ি। সেক্রেটারিয়েটের সুমুখ থেকে দুই বাহুর মতো দু'দিকে প্রসারিত দুটি রাস্তা—কিং এডওয়ার্ড ও কুইন ভিক্টোরিয়া রোডের উপরে। যেন দু'টি যমজ ভাই, ডিয়োনি কুইন্টোপ্রেটসের দোসর।

আতিশয্যের দ্বারা অত্যন্ত ভালো জিনিসকেও যে কতখানি হাস্যকর করে তোলা যায় তার দৃষ্টান্ত আছে নয়াদিল্লির নগরপরিকল্পনায়। যুনিফর্মিটির বাতিকের পাওয়া স্থপতিরা শহরটাকে শ্রী দিতে গিয়ে ছাঁচ দিয়েছেন, বাড়ি দিতে গিয়ে ব্যারাক। বৈচিত্র্যের মধ্য দিয়ে মূলগত ঐক্য প্রকাশ করার নাম সৃষ্টি। গজ, ফুট বা ইঞ্চি মিলিয়ে সামঞ্জস্য বিধানের নাম নকলনবিশি। প্রথমটা যিনি করেন তাঁকে বলি ব্রহ্মা, দ্বিতীয়টা যিনি করেন তাঁর নাম বিশ্বকর্মা। প্রথমটার মধ্যে আছে আর্ট, পরেরটার মধ্যে আছে ক্র্যাফ্ট।

পুরাকালে নগর-পত্তনে গোড়াতে ছিল নৃপতি। রাজার অবস্থিতি ও অভিরুচি অনুসরণ করে গড়ে উঠত জনপদ, তাঁর প্রাসাদকে কেন্দ্র করে আমির-ওমরাহেরা তুলত সৌধ, সাধারণেরা বাঁধত বাসা, শ্রেষ্ঠিরা সাজাত বিপণি। রাজশক্তির পতন অভ্যুদয়ের সঙ্গে রাজধানীর ভাগ্যে এসেছে বিপর্যয়, নগর-নগরীর ঘটেছে বিলুপ্তি বা বৃদ্ধি। আগ্রা, আগরসাবাদ ও ফতেপুর সিক্রিতে আজও রয়েছে তার নির্ভুল নিদর্শন।

একালে রাজ্যের চাইতে বাণিজ্যের কদর বেশি। লেডি ডাক্তারের স্বামীর মতো রাজার মহিমাও এখন আর আপন বীর্যবত্তায় নয়, প্রজাদের বাণিজ্যবিস্তারে। শুধু ভারতবর্ষে নয়, অন্য দেশেও এখন বণিকের মানদণ্ড পোহালে শরীরী দেখা দেয় রাজদণ্ডরূপে—কখনও স্বনামে, কখনও-বা বেনামিতে। তাই এ-যুগের মহানগরীর centre of gravity থাকে ক্লাইভ স্ট্রিটে বা হর্নবি রোডে। তাদের প্রেরণার মূল চেম্বার অব প্রিন্সেস নয়, চেম্বার অব কমার্স। তাই ওয়াশিংটনের চাইতে নিউইয়র্কের গুরুত্ব হয় বেশি, লন্ডনকে ছাপিয়ে ওঠে কানপুর, পাটনাকে পিছনে ফেলে এগিয়ে যায় টাটানগর।

আধুনিক ভারতবর্ষে নয়াদিল্লি হচ্ছে একমাত্র সিটি যেখানে স্টক এক্সচেঞ্জের প্রভুত্ব নেই। সেখানে বৈশ্য নেই। ব্রাহ্মণও না। আছে শুধু ক্ষত্রিয়। অবশ্য তাদেরও আয়ুধের পরিবর্তন ঘটেছে। মডার্ন ক্ষত্রিয়েরা অসিজীবী নয়, মসিজীবী। প্রাচীন ক্ষত্রিয়েরা ব্যুহ রচনা করে হাত পাকিয়েছিলেন। তার দৈর্ঘ্য, প্রস্থ ও ব্যাস সবই রুলমাফিক। আধুনিক ক্ষত্রবীরেরা ফাইল ঘেঁটে ঘেঁটে হাত এবং চুল দুই-ই পাকিয়ে দেন, তারও নির্দেশ হল precedent সুতরাং নয়াদিল্লির পথ, ঘাট, বাড়ি, ঘর সবকিছুই পিছনে আছে কেবলই একরকম হওয়ার প্রয়াস। দোকান-পাট থেকে গুরু করে রাস্তা, পার্ক, কোয়ার্টার, মায় পথের পাশে জামগাছের সারি পর্যন্ত সবকিছুই যেন খাকি কোর্তা-পরা পল্টনের মতো সঙ্গিন উঁচিয়ে অ্যাটেনশনের ভজিতে খাড়া দাঁড়িয়ে আছে।

নতুন আস্তানায় ক্রিপসের সভা বসল পাত্র-মিত্র নিয়ে। অক্সফোর্ডের অধ্যাপক কুপল্যান্ড, এবং ক্যানাডার সমাজতন্ত্রী গ্রেহাম স্পাই আছেন তাঁর দপ্তরে।

কুপল্যান্ডের সঙ্গে আলাপ হয়েছিল একবার লন্ডনের এক বিতর্কসভায়। ভারতবর্ষ সম্পর্কে তাঁর ঔৎসুক্য আছে যথেষ্ট, ঔদার্য আছে কি না জানিনে।

ক্রিপসের সঙ্গে একে-একে সাক্ষাৎ করেছেন মৌলানা আজাদ, গান্ধীজি, পণ্ডিত নেহরু ও মিস্টার জিন্মা। আজাদের সঙ্গে দোভাষী হিসেবে উপস্থিত ছিলেন আর-একজন কংগ্রেসি মুসলমান। ব্যারিস্টার মিস্টার আসফ আলী। আসফ আলীর জন্মস্থান যুক্তপ্রদেশ, কর্মস্থান দিল্লি, শ্বশুরবাড়ি বাংলায়। তাঁর স্ত্রী অরুণা আসফ আলীর পৈতৃক উপাধি ছিল গাঙ্গুলী, অতি নিকটআত্মীয় সম্পর্ক আছে রবীন্দ্রনাথের কন্যা মীরাদেবীর সঙ্গে।

পণ্ডিত জওহরলালের ইংরেজিজ্ঞানের খ্যাতি তাঁর দেশপ্রীতিরই মতো বহুবিদিত। জীবিত ইংরেজ সাহিত্যিকদের মধ্যেও তাঁর তুল্য ইংরেজি রচনাকুশলী বড় বেশি নেই, একথা স্বীকার করেছেন বহু ইংরেজ সমালোচক। গান্ধীজির ইংরেজি জওহরলালের ন্যায় সাহিত্যপ্রধান নয় কিন্তু তার স্বচ্ছতা ও অলঙ্কারহীন মাধুর্য বহুক্ষেত্রে বাইবেলের ভাষাকে স্মরণ করিয়ে দেয়। মিস্টার জিন্মা ছিলেন প্রথিতযশা ব্যবহারজীবী। ইংরেজিতে সওয়ালে তাঁর দক্ষতা অসাধারণ। ক্রিপসের সঙ্গে একটি মাত্র লোক আলাপ করেছেন—ক্রিপসের ভাষায় নয়, নিজের ভাষায়। ইংরেজিতে নয় উর্দুতে। যদিও কাজ চালাবার মতো ইংরেজি তিনি জানেন বলে জনশ্রুতি শুনেছি বহুবার। মৌলিকতা আছে মৌলানার। তাঁর জয় হোক।

ইংরেজি আমাদের মাতৃভাষা নয়, কিন্তু ইংরেজি আমাদের শিখতে হয়। তাতে ক্ষোভ নেই। হয়তো লাভই আছে। স্বাভাৱিকতার আধুনিক ধারণা, ইংরেজিতে যাকে বলে ন্যাশন্যালইজম, তার বেশিটা আমরা পেয়েছি ইংরেজিশিক্ষার ফলে। কিন্তু এদেশে বিদ্যা, বুদ্ধি এবং কর্মকুশলতার মাপকাঠিও দাঁড়িয়েছে ইংরেজি বলা ও লেখার কৃতিত্বে। এটা হাস্যকর। কলেজে পরীক্ষার খাতায় যে-ছেলে ভালো ইংরেজি লেখে, চাকরির বাজার থেকে বিবাহযোগ্য কন্যার উদ্বিগ্না জননী পর্যন্ত সর্বত্র তার আদর আছে। এদেশের নেতাদের সম্পর্কেও তাই বিদেশি পর্যটকেরা যখন বলেন যে he speaks faultless English আমরা তখন আনন্দে গদগদ হই। এই মনোভাবের বিরুদ্ধে সর্বাপেক্ষা সতেজ প্রতিবাদ আছে মৌলানা আজাদের আচরণে। ক্রিপস্‌ই হোক, ভাইসরয়ই হোক, কিম্বা স্বয়ং জর্জ দি ফিফ্থই হোক, যদি আমার সঙ্গে আলাপ করতে আমার ভাষা না বলতে চান বা না পারেন তবে আমিই-বা তাঁর ভাষা বলতে যাব কেন? শাবাশ!

গান্ধীজি ক্রিপসের কক্ষ থেকে নিষ্ক্রান্ত হলেন প্রায় তিন ঘণ্টা পরে। তাঁকে বারান্দার সিঁড়ি অবধি এগিয়ে দিতে সঙ্গে এলেন ক্রিপস্। মুহূর্তমধ্যে সাংবাদিকেরা চক্রবাহু রচনা করলেন তাঁকে ঘিরে। চোখে তাঁদের জিজ্ঞাসা, মুখে তাঁদের আগ্রহ, উত্তেজনা ও উদ্বেগের ছাপ। স্থিতহাস্যে উদ্বেল জনতাকে অভ্যর্থনা করলেন তিনি। বিনাবাক্যে নিরস্ত করলেন বহু উদ্যত প্রশ্ন।

ক্রিপসের রসবোধ আছে। রহস্য করে বললেন, গান্ধীজির হাসি দেখে সাংবাদিকরা যেন ক্রিপস-প্রস্তাবের গুণ বিচার না করেন। ঘর থেকে বেরোবার সময় মুখে হাসি ফুটিয়ে তুলতে তিনি গান্ধীজিকে শিখিয়ে দিয়েছেন। প্রবল হাস্যধ্বনি উঠিত হল এই কৌতুকালোচনায়।

কিন্তু কাশীর পাণ্ডা, বিয়ের ঘটক এবং বিমার দালালের চাইতেও নাছোড়বান্দা আছে জগতে। তার নাম রিপোর্টার। গান্ধীজির আলোচনা সম্পর্কে জানতে চাইলেন তাঁরা। অঙ্গুলিনির্দেশে ক্রিপসকে দেখিয়ে উত্তর করলেন মহাত্মা, “ওঁকে জিজ্ঞাসা করুন, আমার কিছু বলার নেই।”

“প্রস্তাবটি এমনই চিঁজ যে, দেখেই আপনি হতবাক?” প্রশ্ন করলেন এক ঝানু সাংবাদিক।

“You naughty boy” বলে প্রসন্ন হাস্যে সমাপ্তি ঘটালেন আলোচনার। মোটরে উঠে যুক্তকরে অভিবাদন করলেন উপস্থিত জনমণ্ডলীকে। প্রস্থান করলেন বিরলা-ভবনোদ্দেশে।

ইনফরমেশন বিভাগের ক্যাম্প হয়েছে পাশের একটি ক্ষুদ্র কক্ষে, সাংবাদিকদের সুবিধার্থে। সেখানে হানা দিচ্ছি আমরা রিপোর্টারের দল প্রত্যহ প্রাতে, দুপুরে, বিকালে ও সন্ধ্যায় অমিত উৎসাহে। যদিও কবে কখন কোন ভারতীয় নেতা ক্রিপসের সঙ্গে সাক্ষাৎ করেছেন তার বেশি আর কিছুই জানার উপায় নেই সেখান থেকে।

ক্যাম্প আপিসের কর্তা জগদীশ নটরাজন, ইন্ডিয়ান সোশ্যাল রিফর্মার-এর প্রতিষ্ঠাতা বম্বের বিখ্যাত সাংবাদিক কে. এস. নটরাজনের পুত্র। পাইওনিয়রের সম্পাদকগোষ্ঠী থেকে এসেছেন গভর্নমেন্টে। ভারতের রাজনৈতিক ইতিহাসের তথ্য জানেন অনেক, ইংরেজি বলেন স্বচ্ছন্দে, উচ্চারণে নেই তামিলজ্ঞানোচিত ধ্বনিবিকৃতি। একদিন নৈশভোজনের নিমন্ত্রণ ছিল তাঁর গৃহে।

নটরাজন গৃহিণী মাদোজি নন—অ্যাংলো-ইন্ডিয়ান। তাঁর পিতৃকুল বব-পরিবারের খ্যাতি আছে টেনিস খেলায়, মাতৃকুলের মূল অনুসন্ধান করা যায় বঙ্গদেশে। তাঁর মাতামহী ব্যানার্জী-কন্যা ছিলেন, সে-হিসাবে বল্লাল সেনের স্টুট কোলীন্ডো দাবি আছে। পিয়ানো বাজাতে পারেন চমৎকার।

আধুনিক অনেক প্রগতিশীল বাঙালি পরিবারেও ভারতীয় রূপটি খুব স্পষ্ট নয়। গৃহের কর্তা হয়তো বিদ্যার্জন করেছেন বিদেশে। অক্সফোর্ডে ইংরেজি, গ্লাসগোতে এঞ্জিনিয়ারিং, এডিনবরায় ডাক্তারি বা লিঙ্কনস্ ইনে ব্যারিস্টারি পড়ে দেশে এসে প্রতিষ্ঠিত হয়েছেন কর্মজীবনে, অর্থার্জন করেছেন অজস্র ধারে। তাঁদের বসনে সুট, অশনে সুপ এবং আসনে কৌচ। তাঁদের গৃহিণীরা পার্টি দেয়, ক্লাবে যায়, ব্রিজ খেলে পুরুষ বন্ধুবান্ধবের সঙ্গে অসঙ্কোচে। সে-গৃহে চাকরেরা বয়, মায়েরা মেমসাব, এবং মেয়েরা মিসিবাবা।

বিলাতে না গিয়ে যাঁরা সাহেব, তাঁরা আরও দুর্ধর্ষ। কংগ্রেস থেকে লিগে যোগ দেওয়া মুসলমানের মতো, হিরোডকে করেন আউটহিরোড। শ্রীপিং পায়জামা না



পরে ঘুমানো বা ছুরিকাটা দিয়ে না-খাওয়াকে তাঁরা প্রায় মধ্যযুগের গঙ্গায় সন্তান বিসর্জন বা সতীদাহের ন্যায় রোমহর্ষক বর্বরতা জ্ঞান করে থাকেন।

তবুও একথা মানতে হবে যে, ইংরেজ অথবা অ্যাংলো-ইন্ডিয়ান বিয়ে করে আমরা আমাদের সংস্কৃতির মূল থেকে যেমন নিঃশেষে উৎপাটিত হই এমন আর কিছুতেই নয়। বাঙালি গৃহিণীরা যতই চুল খাটো করুক, গিমলেট গিলুক, রং-করা ঠোঁটের মধ্যে জ্বলন্ত সিগারেট চেপে ফিরিস্টি উচ্চারণে ভুল ইংরেজি বলুক, সংস্কার থাকে Coty বা ম্যাকস্ফ্যাক্টর-ঘষা চামড়ার তলায়। রক্তে থাকে ঠাকুমা দিদিমাদের অন্ধবিশ্বাসের রেড কর্পাসল। তাই মেয়ের বিয়ের দিন ঠিক করতে খোঁজ পড়ে গুপ্তপ্রেস পত্রিকার, স্বামীর অসুখে লুকিয়ে মানত করেন সুবচনী, ছেলের কল্যাণ-কামনায় ষষ্ঠীর দিনে থাকেন উপোস। পুরুষেরা হোটেলে যতই খান স্টেক বা ভিল, মা-বাবার শ্রদ্ধ করেন গুরু-পুরোহিত ডাকিয়ে যথারীতি।

সবচেয়ে দুর্ভাগা ভারতীয় ও যুরোপীয় জনক-জননীর সন্তানেরা। তারা পিতার সমাজ থেকে বিচ্যুত, মাতার সমাজ দ্বারা বর্জিত। তারা না ভারতবর্ষের, না ইংলন্ডের। কোন দেশের প্রতি তাদের দেশাত্মবোধ জাগবে, কোন জাতির প্রতি মমত্ববোধ? তারা বাবার কাছে পাবে নামের পদবি, মায়ের কাছ থেকে পাবে গায়ের রং, কার কাছ থেকে পাবে মনোভাব? তারা সত্যিকার বর্ণসংস্কর, শুধু জন্মে নয়, আকৃতিতে ও প্রকৃতিতে। ভারতীয়-যুরোপীয় বিবাহজাত সন্তানেরা আজ পর্যন্ত হয়নি কোনো উঁচুদের শিল্পী, সাহিত্যিক, বৈজ্ঞানিক বা সঙ্গীতজ্ঞ। তাদের দৌড় বড়জোর রেলের বড়সাহেব নয়তো টেলিগ্রাফের ডিরেক্টর।

যুরোপের সমাজ অনেকটা সার্বজনীন। ইংলন্ড থেকে ইটালি পর্যন্ত মোটামুটি তার একই রূপ। ইংরেজ, ফরাসি, চেক, হাঙ্গেরিয়ানের প্রায় একই বেশ, একই পরিবেশ, একই আচার-আচরণ। সমগ্র যুরোপে লোক ব্রেকফাস্ট, লাঞ্চ, ডিনার ও সাপারে বসে ঘড়ি ধরে, খায় ছুরিকাটায়। থিয়েটারে যায় শনিবারে রাত্রে, গির্জায় জানু পেতে ভজনা করে রবিবারে। ভাষার বিভেদ ছাড়া যুরোপের এক প্রান্ত থেকে আর-এক প্রান্তে সামাজিক মিল আছে সর্বত্র। লন্ডনের ইংরেজ স্বামীর অস্ট্রিয়ান স্ত্রীকে দেখেছি অন্য আর পাঁচজন ইংরেজ-গৃহিণীর মতো অনায়াসে সমাজে প্রতিষ্ঠিত। স্বামী, পুত্র, কন্যা নিয়ে তার গৃহের সঙ্গে অন্য আর পাঁচটি ইংরেজ পরিবারের নেই তফাত। ছেলে-মেয়েরা বেড়ে উঠছে ঠিক অন্য আর পাঁচটি ডিক, পল বা হ্যারিংটন পুত্র-কন্যার মতো।

অবশ্য সমস্যা যে একেবারে নেই, তা নয়। সে-সমস্যা প্রাত্যহিক জীবনে প্রত্যক্ষগোচর নয় কিন্তু বিশেষ বিশেষ ক্ষণে দেখা দেয় স্বামী-স্ত্রীর মনে। যেমন লর্ডসে টেস্ট ম্যাচের সময় কোন পক্ষের অ্যাশেজ লাভ কামনা করবে ইংরেজ স্বামী আর অস্ট্রেলিয়ান স্ত্রী? মহাযুদ্ধে কার জয়লাভে উৎফুল্ল হবে জার্মান মিস্টার, কোন পক্ষের পরাজয়ে মুহ্যমান হবেন তাঁর রাশিয়ান মিসেস?

তবুও দূর-ভবিষ্যতে কোনোদিন যুনাইটেড স্টেটস অব যুরোপ যদি গড়ে ওঠে, যদি সম্ভব হয় এক কথ্যভাষা, তবে কল্লনা করা কঠিন নয় যুরোপের বিভিন্ন রাষ্ট্রের

মধ্যে অধিকতর বৈবাহিক যোগাযোগ। তখন স্পেনের তরুণ হামেশা বিয়ে করবে নরওয়ের তরুণী ঠিক যেমন এখন করে স্কচেরা ওয়েলসের। যেমন আমাদের কোন্নাগরের কনেকে ঘরে নিয়ে আসে বরিশালের বর।

ভারতীয় ও যুরোপীয় জীবনের মর্ম আলাদা, সমাজের গঠন বিভিন্ন। একানুবর্তী পরিবারের কথা বাদ দিলেও আমাদের সমাজ কেবল ব্যক্তি ও তার স্ত্রী-পুত্রের মধ্যেই নিবদ্ধ নয়। বহু আত্মীয় পরিজনগোষ্ঠীর প্রতি নানাবিধ দায়িত্ব এবং সম্পর্কের দ্বারা তার প্রভাব ও ক্ষেত্র দূরপ্রসারিত। তাই পূর্ব-পশ্চিমের বৈবাহিক যোগাযোগে ব্যক্তিগত জীবন সুখের হওয়া হয়তো বিচিত্র নয়, কিন্তু তা দ্বারা কোনোকালে ঘটবে না দুই মহাদেশের সামাজিক মিলন। যুরোপের স্ত্রীলোক মাত্রই আমাদের পক্ষে পরস্ত্রী।

নটরাজনের ভোজসভায় পরিচয় ঘটল এক মারাঠি ব্রাহ্মণের সঙ্গে। বয়স চল্লিশের অনেক উপরে, মাথায় কালোর চাইতে সাদার ছোপ বেশি, বলিষ্ঠ দেহ, প্রশস্ত ললাট, উন্নত নাসা। সবচেয়ে আশ্চর্য তাঁর চোখদুটি। দীর্ঘায়ত নয়ন, অবনী ঠাকুরের আঁকা ভারতীয় চিত্রকলার অর্জুনের মতো। তাতে অপরিসীম ক্রান্তির ছাপ। দৃষ্টিতে বুদ্ধির দীপ্তি আছে বটে, কিন্তু তাকে ছাপিয়ে আছে আঘাটের জলভারানত ঘনমেঘের মতো কালো গম্বীর ছায়া। সাধারণত চোখে পড়ে না পুরুষের এমন অসাধারণ চোখ।

কিন্তু নয়াদিল্লির সোসাইটিতে চারুদত্ত আধারকারের খ্যাতি পানীয়ঘটিত। এক বৈঠকে তিনি দশ পেগ হুইস্কি পান করতে পারেন অবলীলাক্রমে। চোখের পাতা কাঁপবে না এতটুকু। সেটা অভূতপূর্ব নয়। আরও দু-চার জন পারেন তা। কিন্তু আধারকারের কৃতিত্ব শুধু পানীয়ের গ্রহণে নয়, উদ্ভাবনেও। সংখ্যাভীত মিস্ত্রি জানা আছে চারুদত্তের। ককটেল তৈরির বহু পদ্ধতি তাঁর নথাত্রে। ডিনারে, পার্টিতে নিমন্ত্রণকারিণীরা আগেভাগে পরামর্শ করেন আধারকারের সঙ্গে। মহানন্দে মন্ত্রণা দেন তিনি। “কে কে আসছে, কতজন আসছে? যদি তিন রাউন্ডেই ঘায়েল করতে চাও, তবে প্রথমে দাও রাম-অরেঞ্জ, তারপর জিন অ্যান্ড লাইম। তারপর হুইস্কি। মেয়েদের জন্য মাঝখানে ব্রান্ডি দিতে পারো জিজ্ঞারেলের সঙ্গে মিশিয়ে। কী বললে, রাম-অরেঞ্জ কেমন করে করবে জানো না! হোয়াট এ পিটি! আচ্ছা শিখিয়ে দিচ্ছি। Shaker-এর মধ্যে সিকি ভাগ নাও ইটালিয়ান ভারমুথ। ইটালিয়ান নেই? আচ্ছা অভাবে ফ্রেঞ্চই দাও। মেশাও সিকি ভাগ কমলালেবুর রস, অর্ধেক ঢালো রাম। বেশি করে বরফ, আর সামান্য একটু দারুচিনির রস। ব্যস। আচ্ছা করে মিশিয়ে এবার ককটেল গ্লাসে পরিবেশন করো।”

নটরাজন-গৃহিণী বললেন, “মিনি সাহেব, (আমার মিনি সাহেব নামটা সেন সাহেবের অন্তরমহল থেকে বাহির বিশ্বে ছড়িয়ে পড়েছে বন্ধুজনের সকৌতুক সম্বোধনে) যদি নতুন নতুন ককটেল চাখতে চান তো মিস্টার আধারকারের বুদ্ধি নেবেন।”

স্মিত হাস্যে আধারকার বললেন, “হ্যাঁ, চাকরি থেকে রিটায়ার করে আমার রেসিপিগুলোর পেটেন্ট নেব ভাবছি। কাগজে কাগজে বিজ্ঞাপন দেব—If it's a

drink, consult আধারকার। ঘরে ঘরে মিসেস বিটনের মতো নতুন গৃহীদেৱ আলমাৱিতে থাকবে আধারকার'স বুক অব ড্রিঙ্কস্।”

কিন্তু আমাৱ জন্যে এসবের চেয়েও বড় বিষয় অপেক্ষা কৱছিল। ভোজনপূর্বেৱ শেষে অতিথিদেৱ সনির্বন্ধ অনুরোধে বেহালা বাজিয়ে শোনােন আধারকাৱ। দরবাৱি কানেড়ার সুৱ। গং নয়, শুধু আলাপ। প্রায় মিনিট কুড়ি ধরে বাজােন অপূৰ্ব দক্ষতাৱ। বাজনাশেষে আমাৱ পােনে তাকিয়ে বললেন, “বলতে পাৱো কী সুৱ বাজােনম, মিনি সাহেব?”

বিশ্বয়ে হতবাক হয়ে ৱইলেম খানিকক্ষণ, উত্তৱ দেওয়ার কথাই মনে ৱইল না। পৱিষ্কাৱ বাংলা।

“কী, ংকেবারে থ’ হয়ে ৱইলে যে?” এবাৱও বাংলাৱ।

সে-প্রশ্নেৱ জবাৱ না দিয়ে বললেম, “আপনি আশ্চৰ্য। বাংলা শিখলেন কেমন কৱে?”

“ংকি ংকটা প্রশ্ন? তুমি ইংৱেজি শিখেছ কেমন কৱে?”

“আমি শিখেছি পেটের দায়ে।”

“আমি শিখেছি প্রাণেৱ দায়ে। না, না, আৱ প্রশ্ন নয়, Curiosity is a feminine vice.”

বিদাৱ নেওয়ার আগে আন্তরিকতাৱ সঙ্গে কৱমর্দন কৱে বললেন, “মিনি সাহেব, ‘তুমি’ বলছি বলে চটোনি তো মনে-মনে? তুমি তো বয়সে ংনেক ছোটই হবে। আমি থাকি ৱটেভাম ৱোডে, ২২ নম্বৱ। এসো ংকদিন সন্ধ্যাবেলা, বাংলা বলব, বেহালা শোনাব, আৱ দেব টপ-হ্যাট। টপ-হ্যাট জানো তো? জানো না? ংর্ধেক জিন, সিকিভাগ ফ্রেঞ্চ ভারমুখ, সিকিভাগ ইটালিয়ান। ংকফোটা বিটাৰ্স, তাৱ সঙ্গে খুব খানিকটা বৱফ।”

আধাৱকাৱেৱ বাড়িতে গেলেম। টপ-হ্যাটের লোভে নয়, লোকটির আশ্চৰ্য আকর্ষণে। ংকদিন গেলেম, দুদিন গেলেম। তাৱপৱ প্রত্যহ। কখনও-বা সকাে ংবং বিকেলে। ংনেকদিন ব্ৰেকফাস্ট থেকে শুৰু কৱে ডিনাৱ পৰ্যন্ত সবই সমাধা হয়েছে তাঁৱ ওখানে। ংল্প সময়ে আন্তরিকতা ংত ঘনিষ্ঠ হল যে, আধাৱকাৱ পুৰুষ না হলে নিন্দুকেৱ কুৎসাৱটনাৱ কলঙ্কিত হতে পাৱত আমাৱ নাম। তাঁৱ বিবাহযোগ্যা কন্যা থাকলে নয়াদিঘ্নিৱ গৃহিণীৱ সম্ভবপৱ বৱ কল্পনা কৱে মুখৱোচক আলোচনাৱ অবসৱ বিনোদন কৱতে পাৱতেন ংলস মধ্যাহ্নে।

কিন্তু কন্যা দূৱে থাক, কন্যাৱ জননীৱ চিহ্ন পৰ্যন্ত ছিল না ংকৃতদাৱ আধাৱকাৱেৱ গৃহে। গোটা তিন-চাৱ চাকৱ, বেয়াৱা খানসামা নিয়ে আধাৱকাৱেৱ হোম গভৰ্নমেন্ট। তাৱ ংকমাত্র ৱেভিনিউ ডিপাৰ্টমেন্টেৱ ভাৱ তাঁৱ নিজেৱ, বাকি ংক্সিকিউটিভ, লেজিসলেটিভ, মাৱ জুডিশিয়াৱি পৰ্যন্ত সমস্তটাই চাকৱদেৱ হাতে। খাটি প্রজাতন্ত্র। মজাতন্ত্র বললেও ক্ষতি নেই, ভৃত্যদেৱ পক্ষে।

তৰ্ক চলে, আলোচনা হয়। ৱাজনীতি, ধৰ্ম, ওয়ৱ স্ট্র্যাটেজি, মাৱ সিনেমা স্টাৱ পৰ্যন্ত। কোনো বিষয় বাদ পড়ে না। মাঝে মাঝে হয় কাব্যালোচনা। ৱবি ংককুৱেৱ বহু

কবিতা ও কবিতাংশ আধারকারের কণ্ঠস্থ। গভীর কণ্ঠে আবৃত্তি করেন : মন দেয়া নেয়া অনেক করেছি মরেছি হাজার মরণে, নূপুরের মতো বেজেছি চরণে চরণে। আমার দিকে তাকিয়ে প্রশ্ন করেন, “বলো কোথায় আছে?” বলতে পারলে বলেন, “শাবাশ! Now you have earned a drink, নাও একটা অরেঞ্জ গিম্লেট—খানিকটা জিন ও কমলালেবুর রস। এই বয়, সাবকোবাস্তে—” কোনোদিন বলেন, “আজ পরীক্ষা। বলো কোথায় আছে—আমারে যে ডাক দেবে তারে বারংবার এ জীবনে ফিরেছি ডাকিয়া; সে নারী বিচিত্র বেশে, মৃদু হেসে, খুলিয়াছে দ্বার থাকিয়া থাকিয়া।”

“পারলে না? আচ্ছা আর পাঁচ মিনিট সময় দিলুম। তবু পারলে না, হাঃ, হাঃ, বাঙালি হয়ে বাংলা কবিতার বাজিতে অবাঙালির কাছে হারলে। লোকে শুনে বলবে কী হে? আচ্ছা আগে মাথা সাফ করে নাও। বয়,—লাও একটো ব্রুকলিন। একটা টাম্বলারে অর্ধেকটা বরফের টুকরো, কিছুটা ফ্রেঞ্চটাইল ভারমুখ, কিছুটা ড্রাই জিন। আচ্ছা করে নেড়ে দুফোঁটা অরেঞ্জ বিটার্স। ডিল্লিসস্।”

একদিন জিজ্ঞাসা করেন, “মিনি সাহেব, প্রেমে পড়েছ কখনও?”

“না।”

“বলো কী হে, ইয়ং ম্যান, বিলেতে ছিলে, প্রেমে পড়নি, একথা বিশ্বাস করবে কে?”

“বিশ্বাস করা উচিত। There are more things in heaven and earth...”

“কিন্তু There are more girls in Piccadilly and Leicester Square -ও তো বটে।”

“আসল কথা কী জানেন? প্রেমে পড়লে চেহারাটা বড্ড বোকা-বোকা দেখায়, সিনেমায় দেখেছি। সে-ভয়ে এগোতে সাহস করিনি।”

উচ্চহাস্যে ফেটে পড়লেন আধারকার। “বোকা-বোকা দেখায়, হাঃ, হাঃ, হাঃ, Just imagine প্রেমে না-পড়ার কারণ। বার্নার্ড শ এর চাইতে ভালো কিছু বলতে পারতেন না। তুমি একটি genius। না, তোমাকে আজ নতুন কিছু না দিতে পারলে মান থাকে না। Try রাম ব্রুইয়ট। চার চামচে রাম, এক চামচে লাইম, এক রত্তি চিনি, আধ পেয়লা ব্ল্যাক কফির সঙ্গে মিশিয়ে। ওয়াভারফুল!”

দিনের পর দিন বাড়ে বিশ্বয়। ক্রমশ আকৃষ্ট হই এই মারাঠা ব্রাহ্মণের প্রতি। আশ্চর্য ঐর জীবন। কাব্যে, সাহিত্যে, সঙ্গীতে, শিল্পে গভীর ঐর অনুরাগ, বেহালাবাদনে অসাধারণ ঐর দক্ষতা। আয় করেন প্রচুর, ব্যয় করেন প্রচুরতর। বেশির ভাগই মদ খাওয়া এবং খাওয়ানোয়। অথচ অশোভন আচরণ করতে দেখিনি কখনও। দম্ব করে বলেন, “মিনি সাহেব, তোমাদের শরৎ চাটুয্যে লিখেছেন,—যে মদ খায় সে কোনোদিন-না-কোনোদিন মাতাল হয়েছে নিশ্চয়। যে অস্বীকার করে সে হয় মিছে কথা বলে, নয়তো মদের বদলে জল খায়। শরৎ চাটুয্যে দেখেননি চারুদত্ত আধারকারকে। দেখলে বই থেকে ঐ লাইনদুটি তুলে দিতেন।”

স্ত্রী নেই আধারকারের সেকথা সবাই জানে। কিন্তু আত্মীয়, পরিজন? কারও জানা নেই কোনো তথ্য। হাসিতে, খুশিতে, গল্পে, গুজবে, সরগরম রাখেন মজলিশ,

মুখরিত করেন নিজগৃহের প্রাত্যহিক বন্ধুসমাগম। তবু চোখের দিকে তাকালে মনে হয় এহ বাহ্য। কী এক গভীর দুঃখের ভার পুঞ্জীভূত হয়ে আছে ঐ ভাবানত নয়নের অন্তরালে, নিঃসঙ্গ জীবনের পশ্চাতে আছে অপরিসীম বেদনার ইতিহাস। কিন্তু কৌশলে প্রশ্ন এড়িয়ে আবৃত্তি করেন আধারকার—

আমারে পাছে সহজে বোঝ তাইতো এত লীলার হল;  
বাহিরে যার হাসির ছটা, ভিতরে তার চোখের জল।

## ছয়

দুজন ইংরেজ একত্র হলে গড়ে একটা ক্লাব, দুজন স্কচ একত্র হলে খোলে একটা ব্যাঙ্ক, দুজন জাপানি করে একটা সিক্রেট সোসাইটি। দুজন বাঙালি একত্র হলে করে কী? দলাদলি? তা করে এবং বোধ হয় একটু বেশি মাত্রায়ই করে। কিন্তু তা ছাড়া আরও একটা জিনিস করে। স্থাপন করে একটি কালীবাড়ি। উত্তরভারতের এমন শহর দুর্ঘট যেকোনো বাঙালি আছে কিছুসংখ্যক অথচ কালীবাড়ি নেই একটি।

হিন্দু দেবদেবীর মধ্যে কালীমূর্তিটি সুখদৃশ্য নয়। বীণাবাদিনী সরস্বতীর সুষমা বা কমলাসনা লক্ষ্মীর শ্রী নেই তাঁর মসিকৃষ্ণ দেহে। ভগবতী দুর্গার হাত দশটি, গ্রহরণ সমপরিমাণ। কিন্তু কালীমূর্তির কাছে তাঁকে অনেক শান্ত ও সুকুমার মনে হয়। কণ্ঠে তাঁর নরমুণ্ডের মালা, কটিতে তাঁর ছিন্নবাহুর গুচ্ছ, এক হাতে ধৃত মুক্ত কৃপাণ, আর হাতে দোলে খণ্ডিত শির। অতিবিস্তৃত আননের কোনোখানে নেই কমণীয়তার লেশমাত্র আভাস, নয়নে নেই স্নিগ্ধনত দৃষ্টি। নিরাবরণ বক্ষ, নিরাভরণ দেহ। লোলায়িত রসনা। স্বদেশীয় ভক্তরা বলেন, মা ভয়ঙ্করা: ক্যাথারিন মেয়ো বই লিখে বলেন, বীভৎস।

এই রুদ্র ভয়াল মূর্তিকে ভালোবাসে বাঙালি। শ্রীচৈতন্য যে ভক্তিশ্রোত আনলেন তার চিহ্ন রইল একটিমাত্র বিশেষ শ্রেণীতে। কালীর ভক্তরা আছেন দেশব্যাপী। শুধু শাক্তদের মধ্যেই তাঁর পূজারিরা নিবদ্ধ নয়। তাঁর পূজা নিরঙ্কর গ্রাম্য কৃষকের কুটির থেকে ধনীর প্রাসাদ পর্যন্ত পরিব্যাপ্ত। পুরাকালে কাপালিকেরা শবাসনে সাধনা করেছে দেবী কালিকার, তান্ত্রিকেরা আরাধনা করেছে শ্যামামায়ের, দসুদল লুণ্ঠন মানসে নির্গত হয়েছে নৃমুণ্ডমালিনী কালীর অর্চনা করে। আধুনিক যুগেও অসুস্থ আত্মীয়ের আরোগ্যকামনায় বাঙালি মেয়েরা মানত করেন মা কালীর কাছে, পল্লীতে মহামারি দেখা দিলে সরলচিত্ত অধিবাসীরা পূজা করে ভক্তিতে। ঠাকুর রামকৃষ্ণ তাঁর ধ্যান করেছেন দক্ষিণেশ্বরে, তাঁরই ভজনা করেছেন সাধক রামপ্রসাদ; রচনা করেছেন অপূর্ব শ্যামাসঙ্গীত।

বাঙালির পক্ষে এই কালীপ্রীতি আপাতদৃষ্টিতে কিছুটা বিস্ময়কর মনে হবে। তাঁর শারীরিক সামর্থ্য এবং মানসিক গঠন বাঙালিকে আকৃষ্ট করবে কোমলতার প্রতি, স্নিগ্ধতার প্রতি, মাধুর্যের প্রতি,—এইটেই আশা করা স্বাভাবিক। কিন্তু বাঙালিকে যারা ঘনিষ্ঠভাবে জানেন, তার প্রকৃতিকে যারা যথার্থরূপে অনুশীলন করেছেন তাঁরা

জ্ঞানেন, এই আপাতবিরোধিতাই তার চরিত্রের বৈশিষ্ট্য। কুসুমের মৃদুতা এবং বজ্রের কাঠিন্য অঙ্গাঙ্গিভাবে জড়িত তার প্রকৃতিতে। তাই ভীৰুতার অপবাদ যেমন তার বহুপ্রচারিত, চরম দুঃসাহসিকতার জয়তিলকও তারই ললাটে।

ভারতবর্ষের জাতীয় আন্দোলনের সংঘাত ও সংঘর্ষ আজ বহুব্যাণ্ড, আসমুদ্রহিমাচল তার বিস্তার ও বেগ। স্বাধিকার প্রতিষ্ঠার এই সুদীর্ঘ সংগ্রামে যোগ দিয়েছে জাতিধর্মনির্বিশেষে সর্ব প্রদেশের সর্বসাধারণ। মারাঠি এসেছে, মাদাজি এসেছে, এসেছে গুজরাতি, পারশি ও বেহারি। ভরেছে জেল, সময়েছে নির্যাতন। কিন্তু স্বাধীনতার অদম্য স্পৃহায় বাঙালিই সাধন করেছে অগ্নিমন্ত্রের, দিয়েছে দক্ষিণা, জীবন দিয়ে পরিশোধ করেছে দেশমাতৃকার ঋণ। একমাত্র বাঙলা ছাড়া ভারতবর্ষের কোথায় কুলের ছেলে বরণ করেছে ফাঁসি, মেয়েরা ছুড়েছে পিস্তল, পলিতকেশ অন্তঃপুরিকা বুক এগিয়ে নিয়েছে গুলির আঘাত?

রিডিং রোডের উপর যে-কালীমন্দিরটি স্থাপিত হয়েছে মিলিত উদ্যোগ ও আর্থিক প্রচেষ্টায়, তার জন্য নয়াদিল্লির বাঙালিসমাজের গর্ব করার অধিকার আছে। আত্মঘাতী বুদ্ধির কর্মনাশা হঠকারিতায় সে কেবলই করে কলহ, ঘটায় ভেদ, ধ্বংস করে প্রতিষ্ঠান—এ-অপবাদ বাঙালির। বোধ হয় একেবারে অমূলকও নয়। একক প্রচেষ্টায় বাঙালির কৃতিত্ব তুলনাহীন। তার মেধা, তার ঋদ্ধি, তার নৈপুণ্য সর্বজনস্বীকৃত। কিন্তু বহুজনের সম্মিলিত কর্ম দ্বারা একটা বৃহৎ প্রতিষ্ঠান গড়ে তোলার যথেষ্ট শক্তি দেখায়নি বাঙালি—কথাটা গভীর পরিতাপের সঙ্গে স্বীকার করতে হয়। তাই এই কালীবাড়িটি দেখে মন খুশি হয়। কোনো রাজন্যব্যক্তির অনুগ্রহে নয়, নয় কোনো বিত্তশালীর একক অর্থানুকূল্যে, প্রবাসী বাঙালিদের প্রদত্ত ও সংগৃহীত চাঁদায় গড়ে উঠেছে এই মন্দির, স্থাপিত হয়েছে বিগ্রহ।

সরকারি দপ্তরখানায় জীবিকার্জনের তাগিদে উত্তরভারতের এই মহানগরীতে এসেছে বাঙালি। তাদের কেউ এক্সিকিউটিভ কাউন্সিলের সদস্যরূপে আয় করেছেন প্রচুর অর্থ, কেউ সাধারণ কেরানির কাজে পেয়েছেন পরিমিত বেতন। তাঁরা সবাই দিয়েছেন দান—স্বৈচ্ছায় ও শ্রদ্ধায়। অল্প অল্প করে জমেছে অর্থ, ভরেছে দেবীর ভাণ্ডার। সাধুবাদ দিই তাঁদের। তাঁরা ধন্য।

মন্দিরটির পরিকল্পনা করেছেন যে-স্থপতি তাঁর নাম জানিনে, কিন্তু প্রশংসা করি। আড়ম্বরহীন, বাহুল্যবর্জিত, সহজ, সরল গঠন। বড়বাজারের গঙ্গা নেই, নেই মার্কিনি টঙের অতিআধুনিক স্ট্রিমলাইন। দূর থেকে দেখে চোখ তৃপ্ত হয়, কাছে গেলে মন গুচিয়ায় ভরে ওঠে।

গুটিকয়েক সোপান অতিক্রম করে উপরে উঠলে বিস্তৃত অলিন্দ, ঈষৎ উচ্চ জালিকাটা প্রাচীর দিয়ে ঘেরা। মাঝখানে মন্দির, চারিদিক ঘিরে পথ। সে-পথে দর্শনার্থীরা প্রদক্ষিণ করে বিগ্রহ, দ্বারে লম্বমান ঘণ্টাধ্বনি করে মন্দিরের ধূলি নেয় মাথায়। আপন অন্তরের কামনা নিবেদন করে ভক্ত নরনারীর দল। আকাশের আলো এবং বাইরের বাতাস আসতে বাধা নেই এতটুকুও। মন্দিরের অভ্যন্তরে নেই অন্ধকার, নেই পুষ্পপত্র ও গঙ্গোদকের দ্বারা অর্দ্র অপরিচ্ছন্ন আবহাওয়া।

মন্দিরের প্রাঙ্গণটি সুপরিসর। একদিকে আরাবল্লি পর্বতের 'রিজ'। পাথরের খাড়া দেয়াল, সিমেন্ট দিয়ে জোড়া। অন্যদিকে রাস্তা এবং রেলিং। পিছনে এক কোণে পুরোহিতের বাসস্থান। ছোট্ট একটি কোয়ার্টার, মন্দির-কর্তৃপক্ষের তৈরি।

দূরদেশে দেবীর নিয়মিত পূজার আয়োজনে পুরোহিত সংগ্রহ খুব সহজ নয়। বাঙলা থেকে কাউকে এনে রাখতে হলে চাই তাঁর জন্য নিয়মিত আয়ের ব্যবস্থা। তাঁর পরিজন প্রতিপালনের নিশ্চিত আশ্বাস। তাই মন্দিরের কর্তৃপক্ষ পুরোহিতের জন্য নির্দিষ্ট করেছেন মাসিক মাসোহারা। তার গ্রেড আছে, ইনক্রিমেন্ট আছে, ছুটির ব্যবস্থা আছে। আছে প্রণামী, দর্শনীর প্রাপ্য অংশ নির্ধারিত। এ-যুগে দেব-সেবককেও চাকরির ফান্ডামেন্ট্যাল রুলস্ মেনে চলতে হয়।

মানুষের জীবন যখন জটিল হয়নি, তখন তার অভাব ছিল সামান্য, প্রয়োজন ছিল পরিমিত। সেদিনে ব্রাহ্মণের পক্ষে আবশ্যিক ছিল না বিত্তের। সে বিদ্যা দান করত ছাত্রদের, জ্ঞান বিতরণ করত শিষ্যকে, ভজন পূজন করত নিশ্চিন্ত নির্বিল্পে। সে নির্লোভ, নিরাসক্ত শুদ্ধাচারী, সান্ত্বিক। সে-দিন বিগত, তার সঙ্গে সে-ব্রাহ্মণও তিরোহিত। একালে পুরোহিতেরও সংসারযাত্রার উপকরণ হয়েছে বৃদ্ধি। তার স্ত্রীর জন্য চাই সায়া, সেমিজ ও ব্লাউজ, ছেলের জন্য মেলিনস ফুড, মেয়ের জন্য হেজলিন নো। ইহকালের সমাজ, সংসার ও পারিপার্শ্বিকের প্রতি উদাসীন হয়ে শুধু যজমানের পরকালীন মঙ্গলচিন্তা করলে তার নিজের পরকাল ঘনি়ে আসে। তাই মন্দিরের পূজারির জন্য রাখতে হয়েছে বিনাভাড়া বাসস্থান, তাতে বিজলি আলো আছে, কলের জল আছে, আছে ভদ্র স্বল্পবিস্ত বাঙালি পরিবারের উপযোগী সাধারণ স্বাস্থ্যশস্যের আয়োজন।

সিঁড়ির পাশে জুতা খুলে রেখে উঠলেম মন্দিরে। অকৃপণভাবে পুরোহিত দিলেন দেবীর পাদোদক, দিলেন নির্মাণ্য ও প্রসাদকণিকা।

কলকাতার মতো মন্দিরপ্রাঙ্গণে সুটপরা বাঙালির উপস্থিতি এখানকার সমাজে পরিহাসের উদ্দেক করে না। কারণ বসনকে এখানে ব্যক্তির পরিধেয় বলেই গণ্য করে, মনোভাবের পরিচয়রূপে নয়। এটি সম্ভব হয়েছে শুধু শহরে বিভিন্ন পরিচ্ছদের মানুষের অবস্থিতির ফলে। এখানে মদ্রাজি ব্রাহ্মণ, পাঞ্জাবি সিং, মহারাষ্ট্রীয় বাঈ, বাঙালি বিধবা আসে প্রণাম নিবেদনে। তাদের বেশ, ভূষা, এমনকি বস্ত্র পরিধানের রীতিনীতি সমস্তই বিভিন্ন। তারা ভক্ত, এইটেই তাদের একমাত্র পরিচয়; পরিচ্ছদটা তাদের শীত, আতপ ও নগ্নতা নিবারণের উপকরণ মাত্র।

মন্দিরের সামনে উন্মুক্ত প্রান্তর। সেখানে শরৎকালে ত্রিপলঢাকা মণ্ডপে দুর্গাপূজা হয় মহাআড়ম্বরে। বাঙালি ছেলেমেয়েদের হাতে-গড়া কারুশিল্পের প্রদর্শনী বসে। দিনের বেলায় বালক-বালিকারা পায় প্রসাদ, নিশাযোগে থিয়েটারে গৌপ কামিয়ে মিহিস্বরে মেয়ের পার্ট করে শখের দলের তরুণ-সম্প্রদায়।

কালীমন্দিরে প্রতি অমাবস্যায় কালীকীর্তন হয়। শ্যামাবিষয়ক গান, কীর্তনের পদ্ধতিতে মূল গায়ন ও দোহার মিলে গাওয়া হয়। রচনা ভক্তিমূলক, সুর বৈচিত্র্যহীন। তাতে মহাজন পদাবলীর লালিত্য নেই, নেই সাধকের একক

ভক্তিনিবেদনের গাম্ভীর্য ও আবেগ। জিনিসটা সঙ্গীতশাস্ত্রে প্রশিক্ষণ এবং ভক্তিতত্ত্বের দিক থেকে অনাবশ্যক অনুকরণ। সব দিক দিয়েই অসার্থক। কালীর অঙ্গনে রামপ্রসাদী সুরে ভক্তের কণ্ঠে—‘শ্যামান ভালো বাসিস বলে শ্যামান করেছি হৃদি’ জাতীয় গানই হচ্ছে শেষ কথা।

গানের আসরে যে-প্রৌঢ় ভদ্রলোকের সঙ্গে গভীর পরিচয় ঘটল তাঁর নাম মোহিতকুমার সেনগুপ্ত, বয়স পঞ্চাশের ওপারে, শরীর অকৃশ, দৈর্ঘ্য সাধারণ বাঙালিজ্যোতিত, অডিট অ্যাকাউন্টস সার্ভিসের লোক। সুদক্ষ অফিসার বলে খ্যাতি আছে সরকারি মহলে। বর্তমানে যানবাহন বিভাগের আর্থিক উপদেষ্টা। বেতন এবং পদমর্যাদা দুই-ই গুরুত্বপূর্ণ। ঐর আর দুভাইয়ের নাম বাংলাদেশে কলেজের ছাত্রছাত্রীদের কাছে সুপরিচিত। পরীক্ষার আগে এম্. সেনের ইকনমিক্স ও মিহির সেনের সিভিল পড়েন এ-দশকে এমন বিদ্যার্থীর সংখ্যা বেশি নেই। ছাত্রজীবনে সেনগুপ্ত নিজেও প্রতিভাযশা ছিলেন। প্রেসিডেন্সি কলেজ ম্যাগাজিনের তিনি দ্বিতীয় ছাত্র-সম্পাদক।

ভদ্রলোক মৃতদার, অমায়িক এবং নয়াদিল্লির বাঙালিসমাজে যথেষ্ট সম্মানিত। বাঙালিদের সমুদয় ক্রিয়াকর্মে যোগ আছে ঘনিষ্ঠ। কীর্তনের আসরে তাঁর উপস্থিতি দেখা যায় অবধারিত।

ফ্রিট স্ট্রিটে আছে খবরের কাগজ, সেভিল রো’তে দরজি। নয়াদিল্লির রিডিং রোডেও তেমনি মন্দির। একটি নয়, দুটি নয়, পরপর তিনটি। রাস্তাটার নাম টেম্পল স্ট্রিট হলে ক্ষতি ছিল না।

শ্রীযুগলকিশোর বিড়লার লক্ষ্মীনারায়ণ মন্দিরটি বোধ করি ভারতবর্ষে বর্তমান শতাব্দীতে নির্মিত সর্বশ্রেষ্ঠ দেবনিবাস। শুধু আকারে নয়, গঠন-পারিপাট্যে ও অর্থব্যয়ের বিপুলতায় এর জুড়ি আছে বলে জানা নেই। দূরদূরান্ত থেকে আসে লোক। শুধু ভক্ত নয়, নিছক দর্শনাভিলাষীরাও। আসে হিন্দু, বৌদ্ধ, শিখ, পারসিক খ্রিস্টান। আসে যুরোপীয় ও আমেরিকান টুরিস্ট। সকালে, সন্ধ্যায়, মধ্যাহ্নে নানাভাবে, নানা দিক থেকে ফটো তুলে খালি করে ক্যামেরার স্পুল।

প্রায় বারো বছর আগের কথা। পিতৃনাম চিহ্নিত করে যুগলকিশোর স্থাপন করতে চাইলেন একটি মন্দির যেখানে হিন্দুমাত্রেরই থাকবে অবাধ প্রবেশাধিকার। বিড়লাদের আদিবাস জয়পুরে, সেখানে এ-মন্দিরের সার্থকতা সীমাবদ্ধ। বছরে ক’জন লোক যায় সেখানে, ক’জন খবর রাখে সেখানকার? স্থান নির্বাচিত হল দিল্লি, ভারতবর্ষের রাজধানী—শুধু আজকের ভারতবর্ষের নয়, শত সহস্র বৎসর থেকে। এখানে ইন্দ্রপ্রস্থে রাজত্ব করেছে মহাভারতের কুরুপাণ্ডব, বাস করেছে সংযুক্তা পৃথিবীরাজ। শিরিতে ছিল সম্রাট কুবুর্জিন, লাল কেল্লায় রাজদণ্ড ধরেছে বাদশাহ শাজাহান। যমুনার দুই তীরের বিস্তীর্ণ প্রান্তর, আরাবল্লির বনভূমি, অধুনা-বিলুপ্ত জনপদের পদধূলিতে কত শক হনুদল, পাঠান, মোগল একদেহে হল লীন। ভাবীকালের ভারতবর্ষেও দিল্লি হবে নগরমালিকার মধ্যমণি। আর যাই হোক, স্বাধীন ভারতের রাজধানী হবে না ওয়ার্ডা।



উনিশশো বত্রিশ সালে শুরু হল মন্দিরের নির্মাণকার্য। বহু এঞ্জিনিয়ার, বহু কর্মী, শত শত রাজমিস্ত্রি, মুটে মজুর খাটতে লাগল ছ'বছর ধরে অবিশ্রাম। উনিশশো আটত্রিশ সালে সম্পূর্ণ হল মন্দির। লক্ষ্মীনারায়ণের আরাধনার স্থান, ধনকুবের বিড়লা ভাতৃবর্গের জনক রাজা বলদেও দাস বিড়লার নামে উৎসর্গীকৃত।

মন্দিরের গঠনভঙ্গিটি ভারতীয় স্থাপত্যের সুন্দর নিদর্শন। লাল পাথরের চূড়া, ধারগুলিতে আছে গৈরিক। মনে হয় যেন লাল জমিতে গেরুয়া পাড়। রাজপথ থেকে স্বেতপাথরের অতি বিস্তীর্ণ সিঁড়ি উঠে গেছে উপরে। সেখান থেকে উঠেছে মন্দির। মেঝে ও দেয়ালে বিভিন্ন বর্ণের প্রস্তরখণ্ডের সমাবেশে রচিত বর্ণাঢ্য আলিঙ্গন ও পুষ্পসম্ভার। প্রাচীরগায়ে আছে অজস্র ফ্রেস্কো পেইন্টিং। জয়পুর শিল্পবিদ্যালয়ের শিল্পীরা অঙ্কন করেছে সেসব চিত্র। তাদের বিষয়বস্তু ও অঙ্কনচাতুর্য প্রশংসনীয়। জয়পুর শিল্পবিদ্যালয়ের যিনি অধ্যক্ষ—কোশল মুখার্জি—তিনি বাঙালি; নব্যবঙ্গীয় চিত্রকলার উদ্ভাবক নন্দলাল, অসিতকুমার, সমর গুপ্ত প্রভৃতির সতীর্থ। বিড়লা মন্দিরটির পরিকল্পনায়ও আর একজন বাঙালি স্থপতির যথেষ্ট অংশ আছে, একথা জেনে আনন্দিত হওয়ার কারণ আছে আমাদের।

মন্দিরের মধ্যে বিহ্বল আছে স্বেতপাথরের। প্রত্যহ অগণিত নরনারীর কুসুমার্ঘ্যে প্রায় আচ্ছন্ন তাঁর চরণ ও পাদপীঠ। দ্বারে লৌহ-পেটিকা, উপরের ছিদ্রপথে ভক্তেরা রাখে প্রণামি। মন্দিরের বামপার্শ্বে বিরাট ধর্মশালা, সেটি বিড়লা জননীদেব স্মৃতিরক্ষার্থে। ধর্মশালার সংলগ্ন নাট্যমণ্ডপ। তাতে প্রত্যহ সন্ধ্যায় ভজনসংগীত করেন সুকণ্ঠ গায়ক। সহস্রাধিক শ্রোতা অনায়াসে বসতে পারে সে-সভায়। মাইক্রোফোনের সাহায্যে বাইরে সর্বসাধারণের শ্রবণায়ত্ত করার ব্যবস্থাও নিখুঁত। মন্দিরপ্রবেশের বহু দূরে থাকতেই কানে এল সে-গান—শ্রীরামচন্দ্র কৃপালু ভজ মন হরণ ভব ভয় দারুণম্।

মন্দিরের পিছনে একটি বৃহদাকার পার্ক। এটি পরবর্তী রচনা। সাধারণ লোকের চমকলাগার মতো অনেক আয়োজন আছে এই পার্কে। পাথরের বিরাটকায় হস্তী, তার ঠুঁড় দিয়ে ফোয়ারার জল ঝরছে ঝরঝর ধারায়। আছে পাথরের কুমির, তারও মুখ দিয়ে নির্গত হচ্ছে জল। ফোয়ারা, পুষ্পবীথিকা, কৃত্রিম স্রোতস্বতী ও গিরিগহ্বর প্রভৃতি একাধিক আকর্ষণ আছে বালক-বালিকা ও দেহাতিদের। প্রতিদিন অপরাহ্ন-বেলায় ভিড় জমে তাদের। কেউ বসে বিশ্রামবেদিতে, কেউ দোলে দোলনায়, কেউ-বা পরিক্রমণ করে এদিক থেকে ওদিক। অর্থব্যয়ে কার্পণ্য করেননি শেঠ যুগলকিশোর। যুদ্ধপূর্বকালের অর্থমূল্যে মন্দির ও পার্কের নির্মাণে ব্যয় হবে প্রায় কুড়ি লাখ টাকা।

বিড়লা পরিবারের তিনজন, পাঞ্জাবের আর্থ প্রতিনিধিসভার প্রতিনিধি তিনজন এবং স্থানীয় সনাতন ধর্মসভা থেকে তিনজন মিলে এক ট্রাস্ট। তাঁরাই রক্ষণাবেক্ষণ করেন মন্দির এবং তার সংলগ্ন উদ্যান, ধর্মশালা প্রভৃতি। আধুনিক মনোভাবের পরিচয় আছে পরিচালন-ব্যবস্থায়। প্রতিনিধিরা প্রতি তিন বৎসরান্তে নির্বাচিত হন। ছোটখাটো ব্যাপারেও আধুনিকতার ছাপ আছে।

মন্দিরপ্রবেশের পূর্বে জুতা খুলে রাখবার ব্যবস্থাটি চমৎকার। সিঁড়ির ঠিক গোড়াতেই একটি ক্ষুদ্র কক্ষ। দেয়ালে জুতা রাখার র্যাক। সেখানে জুতা জমা দিতে

হয়। মালিককে দেওয়া হয় সংখ্যায়ুক্ত কার্ডবোর্ডের একটি চাকতি। অনুরূপ আর একটি চাকতি এঁটে রাখা হয় জুতার গায়ে, যাতে একজনের হাইহিল লেডি'স শু'র সঙ্গে অন্যজনের কাবুলি চপ্পল বদল না হয়ে যায়। চাকতি ফেরত দিলেই ঠিক নিজের জুতাজোড়া এনে হাজির করে জুতাঘরের কর্মচারী যেমন স্যাভয়, গ্রেনর বা কলকাতার গ্রেট ইস্টার্ন টুপি, ছাতা কিম্বা লাঠি।

১৯৩৮ সালে মহাত্মা গান্ধী দ্বার উদ্ঘাটন করেন এ-মন্দিরের। তাঁর চাইতে যোগ্যতর পুরোধা ছিল না এ-অনুষ্ঠানের। ব্রাহ্মণ, শূদ্র ও হরিজনের সমান প্রবেশাধিকার যে-মন্দিরে, তার দরজা তিনি খুলবেন-না তো খুলবে কে? বিংশ শতাব্দীর সর্বশ্রেষ্ঠ ভারতীয় মন্দিরের সঙ্গে যুক্ত রইল এ-যুগের সর্বশ্রেষ্ঠ মানবাত্মার নাম।

বিড়লা মন্দিরের সংলগ্ন ভূমিখণ্ডে তৃতীয় মন্দিরটি মূলত বিড়লাদেরই অর্থানুকূলে নির্মিত। সেটি বৌদ্ধদের। বাঙালি কালীমন্দির ও লক্ষ্মীনারায়ণের মন্দিরের মাঝখানে এই ক্ষুদ্র মন্দিরটির অবস্থিতি ও গঠন কারুর দৃষ্টি এড়াবার নয়। মন্দিরাভ্যন্তরে ভগবান তথাগতের ধ্যানগমীর মূর্তি। পীতবসন ভিক্ষু আছেন কয়েকজন। তাঁদের মধ্যে একজন রবীন্দ্রনাথের বিশেষ অনুরাগী ছিলেন। কবির স্মৃতিচিহ্নরূপে একটি বকুলবৃক্ষ রোপণ করেছিলেন মন্দিরাঙ্গনে। রবি-বকুলবৃক্ষ রোপণানুষ্ঠানে পৌরোহিত্য করেছিলেন একজন বাঙালি ঐতিহাসিক। ডক্টর সুরেন্দ্রনাথ সেন। ভারত সরকারের দলিল-দস্তাবেজ সংরক্ষক, কিপার অব ইম্পিরিয়েল রেকর্ডস।

সেন মহাশয় এককালে কলকাতা বিশ্ববিদ্যালয়ের আশুতোষ-অধ্যাপক ছিলেন। মহারত্ন-ইতিহাসে তাঁর গবেষণার মূল্য ঐতিহাসিকমণ্ডলীতে শ্রদ্ধার সঙ্গে স্বীকৃত। স্ফীত বেতনের সরকারি চাকরিতে অনায়াস জীবনযাপন করেও যে-স্বল্পসংখ্যক ব্যক্তি সাহিত্যচর্চা করেন এবং অক্সফোর্ডের ডিগ্রি পাওয়ার পরেও যে-স্বল্পতর ঐতিহাসিক বাংলায় ইতিহাস রচনা করেন, বঙ্গবাণীর সে-সেবকদের মধ্যে শ্রীযুক্ত সেন বিশিষ্ট। এঁদের পৈতৃকবাস বরিশাল জেলায়। বাচনভঙ্গিতে তার আভাস পাওয়া যায়।

রিডিং রোডের একপাশে মন্দির, অন্যদিকে কোয়ার্টার। গভর্নমেন্টের কেরানি ও অনুরূপ কর্মচারীদের বাসস্থান। লম্বা একটানা ব্যারাক, কোনোটার ইংরেজি L অক্ষরের মতো একপ্রান্ত প্রসারিত, কোনোটার-বা E'র মতো আকৃতি, শুধু মাঝখানের বাড়তিটুকু বাদ। সামনে খানিকটা মাঠ। মন্দির ও কোয়ার্টার—সুন্দর এবং কুৎসিতের এত নিকট অবস্থিতি সচরাচর দৃষ্টগোচর নয় কোনোখানে। এক-একটা ব্যারাকে ত্রিশ-চল্লিশটি পরিবারের বাসব্যবস্থা। অল্প বেতনের কর্মচারীদের জন্য সুলভ সরকারি আয়োজন। এ-পাড়াটা নয়াদিল্লির ইস্ট য়েড।

দেখতে ভালো না হলেও থাকতে মন্দ নয় এই কোয়ার্টারগুলি। বিশেষ করে সুলভতা বিচার করে অভিযোগ করার উপায় থাকে না। বেতনের এক-দশমাংশ ভাড়া, মাসের শেষে আপিস থেকেই কেটে নেয় নিয়মিত। সেক্রেটারিয়েটের কেরানিদের সর্বনিম্ন বেতন ষাট টাকা। সুতরাং ছটাকা ভাড়ায় বাড়ি। দুখানা শোবার ঘর, একখানা রান্নার,

একটি ভাঁড়ার। ভিতরে একটু উঠান, বাইরে ছোট বারান্দা। জলের কল আছে, বাথরুম আছে, আছে ইলেকট্রিক আলো এবং—চমকে উঠো না যেন—আছে বড় একটি সিলিং ফ্যান। বাড়িতে রোদ আসে, বাতাস আসে এবং ধূলিরও বাধা নেই। কলকাতা শহরের এমন ভাড়ায় এমন বাড়ি কোটিকে গুটিক মিলে না।

শুধু বাড়ি নয়। ফার্নিচারও। বিবাহসভায় সালঙ্কারা কন্যা সম্প্রদানের মতো গভর্ণমেন্টের বাড়িও আসবাবপত্রসহ পাওয়া যায়। সেন্ট্রাল পি.ডব্লিউ.ডি.-র ফার্নিচার। দুটাকা মাসিক ভাড়া পাওয়া যায় দুখানা তক্তপোশ, একটি আলমারি, একটি টেবিল ও তিনখানা চেয়ার।

এক-একটা ব্যারাক ও তার সামনে খোলা মাঠটুকু নিয়ে এক-একটা 'স্কোয়ার'। অধিকাংশই ভারতে ব্রিটিশ সাম্রাজ্য প্রতিষ্ঠাতাদের নামের দ্বারা গৌরবান্বিত। ক্লাইভ স্কোয়ার আছে সেই ইংরেজ ভদ্রলোকের নামে যিনি পলাশীর অম্রকাননে ভারতবর্ষে ব্রিটিশ সাম্রাজ্যের ভিত্তিস্থাপন করেছিলেন। যিনি আশি টাকা বাৎসরিক বেতনে ইস্ট ইন্ডিয়া কোম্পানির সামান্য কেরানিরূপে ভারতবর্ষে এসে দেশে ফিরেছিলেন ইংলন্ডের সর্বশ্রেষ্ঠ ধনশালীরূপে। ১৭৪৪ সালে মাদ্রাজে আগত খ্যাতিহীন, বিত্তহীন রবার্ট ক্লাইভ ১৭৬০ সালের ৯ মে যখন সেনানায়ক ক্লাইভরূপে প্রত্যাবর্তন করলেন ইংলন্ডে, জাহাজ থেকে অবতরণ করলেন পোর্টস্মাউথ বন্দরে, তখন ইংলন্ডের অ্যানুয়েল রেজিস্টারে তাঁর সম্পর্কে মন্তব্য ছিল—“এই কর্নেলের কাছে নগদ টাকা আছে প্রায় দুকোটি, তাঁর স্ত্রীর গহনার বাস্ত্রে মণিমুক্তা আছে দুলাখ টাকার। ইংলন্ড, স্কটল্যান্ড ও আয়ারল্যান্ডে তাঁর চাইতে অধিকতর অর্থ নেই আর কারও কাছে।”

স্কোয়ার আছে লর্ড ডালহৌসির নামে, যিনি একে-একে পাঞ্জাব ও ব্রহ্মদেশ যোগ করলেন ভারত সাম্রাজ্যে, জোর করে দখল করলেন পেশোয়াদের সাতারা, কেড়ে দিলেন ঝাঁসি, নাগপুর, নিজামের বেরার, নবাব ওয়াজেদ আলি শাহ'র কাছ থেকে অযোধ্যা।

স্কোয়ার আছে ওয়ারেন হেস্টিংস-এর নামে, যিনি কানীনরেশ চেষ্টসিংহের কাছ থেকে আদায় করেছিলেন বহু লক্ষ মুদা, অযোধ্যায় বেগমদের পীড়ন করে অর্থ ও মণিমুক্তা সংগ্রহ করেছিলেন ন্যূনাধিক দেড় কোটি টাকার। যার কুশাসন ও কুকার্যের সুদীর্ঘ তালিকা ব্রিটিশ পার্লামেন্টের বিচারসভায় অভূতপূর্ব বাগিতায় উদ্ঘাটিত করেছিলেন এড্‌মন্ড বার্ক। সে-অপকীর্তির রোমহর্ষক বর্ণনা শুনে পার্লামেন্টকক্ষে দর্শকের গ্যালারিতে মূর্ছিত হয়ে পড়েছিলেন একাধিক ইংরেজ রমণী।

আর আছে সিপাহি যুদ্ধের ছোট বড় মাঝারি ইংরেজ সেনাপতিদের নাম। হেভলক্ স্কোয়ার, আউটরাম স্কোয়ার, উইলসন স্কোয়ার, নিকলসন্ স্কোয়ার ইত্যাদি ইত্যাদি। স্কোয়ার নেই শুধু মেজর জেনারেল হিউয়েটের নামে যিনি ১৮৫৭ সালের ৯ই মে মিরাত সেনানিবাসে ৮৫ জন ভারতীয় সিপাহিকে হাতে-পায়ে লোহার শক্ত বেড়ি পরিয়ে সমস্ত সৈন্যদলের সামনে লাঞ্চিত করেছিলেন। সেদিন নিরুপায় ভারতীয় সিপাহিরা দাঁড়িয়ে দেখেছিল তাদের সঙ্গীদের এই অবমাননা। তাদের মুখে ছিল না প্রতিবাদ, কিন্তু চোখে ছিল আগুন। সে-আগুন সহজে নেভেনি।

পরদিন রবিবার। সন্ধ্যার প্রাক্কালে আসন্ন রজনীর ঈষৎ অন্ধকার নামল মিরাতের ছাউনিতে। ব্রিটিশ সৈন্যেরা তৈরি হয়েছে চার্চ-প্যারেডের জন্য। ভারতীয় সৈন্যেরা করছে কী? বোধ হয় বিশ্রাম। এমন সময় অকস্মাৎ আওয়াজ এল—

গুডুম!

পদাতিক বাহিনীর সিপাহিরা অস্ত্র ঘুরিয়ে ধরেছে ব্রিটিশ সেনানায়কদের ঠিক ললাটে। বন্দুকের ঘোড়া টিপছে ক্লিক, ক্লিক, ক্লিক। আকাশ, বাতাস, প্রাচীর ও প্রান্তর কাঁপিয়ে ধ্বনিত হচ্ছে গুডুম! গুডুম!! গুডুম!!!

উত্তরভারতে সিপাহিযুদ্ধের সেই হল প্রারম্ভ।

নেতৃত্ববিহীন অসংজ্ঞবদ্ধ পরিচালনা, পরিকল্পনাবিহীন পদ্ধতি, বিভিন্ন অংশে যোগাযোগশূন্যতা এবং কেন্দ্রীয় নির্দেশের অভাবে ব্যর্থ হলেও একথা আজ স্বীকার করতে হয় যে, ভারতবর্ষে ব্রিটিশশাসনের অবসান ঘটাবার ও স্বরাষ্ট্র গঠনে ভারতীয়দের সেই প্রথম উদ্যোগ।

মিরাতের সিপাহিরা ঘোড়া ছুটিয়ে পরদিন প্রভাতে এসে পৌছল দিল্লিতে। বাদশাহ বাহাদুর শাহ তখন দিল্লির মসনদে। বাবরের বিক্রম, আকবরের ব্যক্তিত্ব এবং আওরঙ্গজেবের রণকুশলতার লেশ ছিল না এই বৃদ্ধ মুঘলসম্রাটের চরিত্রে। সিপাহিদের শৌর্য, শক্তি ও যুদ্ধোপকরণ কাজে লাগাবার ক্ষমতা ছিল না তাঁর। জনসাধারণের সংগ্রামোন্মুক্ত ব্রিটিশ-বিদ্বেষকে সফল পরিণতি দান করতে পারলেন না তিনি।

দিল্লির পরিধি সাত মাইল। অধিবাসীরা উত্তেজিত। ইংরেজের শিবিরে শিক্ষিত ও ইংরেজেরই অন্ত্রশস্ত্রে সজ্জিত চল্লিশ হাজার রণনিপুণ সিপাহি তার পাহারা। নগরপ্রাচীরের উপরে চৌদ্দটি বৃহদাকার কামান। দুর্গাভ্যন্তরে বৃহত্তর বারুদখানা। তা ছাড়া আছে আরও ষাটটি ছোট ছোট কামান। আছে বহু সুদক্ষ গোলন্দাজ;—বেশির ভাগই দুদিন পূর্বে ছিল ব্রিটিশ সৈন্যদলভুক্ত। তারা যুরোপীয় যুদ্ধরীতিতে সুশিক্ষিত, সুনিপুণ এবং সুসুজ্জ্বলাবদ্ধ। দিল্লি দুর্গকে সুরক্ষিত করেছে ভারতীয় এঞ্জিনিয়রেরা যারা আধুনিকতম এঞ্জিনিয়ারিং জ্ঞান লাভ করেছে ইংরেজের সেনাবাহিনীতে। দিল্লি অধিকারের ক্ষীণতম আশার কারণ ছিল না ‘রিজে’ সমবেত ব্রিটিশবাহিনীর মনে। লেশমাত্র যুক্তিযুক্ত সম্ভাবনা ছিল না দুর্গপতনের।

কিন্তু তবুও সিপাহিরা হারল। দিল্লি দখল করল ইংরেজ। ভারতে মুসলিম রাজত্বের ঘটল সমাপ্তি। শতবর্ষ পূর্বে নির্মিত সম্রাট শাজাহানের লালকেল্লার শীর্ষে উত্তোলিত হল ব্রিটিশ পতাকা।

নগরপ্রান্তে ‘রিজে’র ইংরেজ-শিবিরে সৈন্যসংখ্যা ছিল চৌদ্দ হাজারের সামান্য কিছু বেশি। এরা সবই যুরোপীয় নয়। প্রায় সাড়ে পাঁচ হাজার ছিল ভারতীয় সেপাই। আড়াই হাজার সৈন্য—বলা বাহুল্য, তারাও ভারতীয়—পাঠিয়েছিলেন ইংরেজানুরাগী দেশীয় রাজন্যবর্গ। তাঁদের জন্য আজ একুশ, এগারো বা পাঁচ সাত করে তোপধ্বনির বিধি আছে।

কর্নাল থেকে গ্রান্ড ট্রাঙ্ক রোডে ব্রিটিশবাহিনী এসে শিবির স্থাপন করল ‘রিজে’, যেখানে এখন দিল্লি যুনিভার্সিটি। বর্তমান সর্জিমতীতে ঘটেছে দীর্ঘকালব্যাপী অনেক

খণ্ডযুদ্ধ। ইংরেজ সৈন্যদের সেই অস্থায়ী আবাসভূমিতে পরে রচিত হয়েছে পুরাতন ভাইসরিগ্যাল লজ। সেখানে বসে এখন বিশ্ববিদ্যালয়ের বিদ্যার্থীরা, ফিজিক্স, কেমিস্ট্রির বা ইকনমিক্সের নোট টোকে। তারই অনতিদূরবর্তী একটি ভবনে উনিশশো চব্বিশ সালে তিন সপ্তাহের অনশন করেছিলেন মহাত্মা গান্ধী—দিল্লির সাম্প্রদায়িক দাঙ্গার প্রতিবাদকল্পে। প্রথম সর্বদল মিলনের প্রচেষ্টায় সম্মেলন আহ্বান করেছিলেন পণ্ডিত মালবীযজি।

ইংরেজ জানত, অনতিবিলম্বে দিল্লি অধিকার করতে না পারলে ভারতবর্ষে ব্রিটিশ সাম্রাজ্য ধূলিসাৎ হবে চিরতরে। তাই সর্বস্ব পণ করল তারা। জিতি তো বাদশাহ, হারি তো ফকির। ব্রিগেডিয়ার আর্কডেল উইলসন তখন ব্রিটিশ শিবিরের অধিনায়ক। তিনি জয় সম্পর্কে আশাবিত ছিলেন না।

গ্রীষ্ম গেল, বর্ষা অতীত, শরতের প্রথমার্ধও বিগতপ্রায়। অর্ধেকের উপর ইংরেজ সৈন্য জ্বর, উদরাময় ও অন্যান্য ব্যাধিতে রুগুণ। পাঞ্জাব থেকে সেনাপতি লরেন্স ক্রমাগত উৎকণ্ঠিত পত্র পাঠাচ্ছেন—আর কতদিন? দিল্লি বিজয়ের আর বিলম্ব কত? সমগ্র ভারতবর্ষে একমাত্র পাঞ্জাবেই সিপাহিরা তখনও আছে অনুগত, আশ্বালার সেনানিবাসে দেখা দেয়নি বিক্ষোভ। কিন্তু আর বেশিদিন শান্তিরক্ষা কঠিন হবে। দিল্লি, দিল্লি, দিল্লির উপরেই নির্ভর করছে ভারতবর্ষে জন কোম্পানির ভাগ্য।

অবশেষে সেপ্টেম্বরের গোড়ার দিকে ফিরোজপুর থেকে হস্তিপৃষ্ঠে বাহিত প্রচুর গোলাবারুদ ও অন্যান্য আগ্নেয়াস্ত্র এসে পৌঁছল ‘রিজের’ ছাউনিতে। ব্রিটিশ-সেনানায়কদের প্রাণে ফিরে এল ভরসা, মনে এল সাহস। সেনাপতি উইলসনকে অতিক্রম করে যুদ্ধ-পরিচালনার ভার গ্রহণ করল জন নিকলসন।

চৌদ্দই সেপ্টেম্বর। রাত্রি প্রায় নিঃশেষিত, যদিও আলোর রেখা দেখা দেয়নি আকাশে। ইংরেজবাহিনী আক্রমণ করল দিল্লি দুর্গ। পূর্ববর্তী ছয় দিন দিবারাত্রিব্যাপী গোলাবর্ষণের দ্বারা নগরপ্রাচীর বিধ্বস্ত করা হয়েছে ধীরে ধীরে—মূল আক্রমণের মুখবন্ধরূপে। কাশ্মীরি গেটের দিকে খণ্ড খণ্ড দলে হানা দিল ইংরেজের সৈন্য। দুইপক্ষের কামানগর্জনে দুরূহ কল্পিত হল দূরদূরান্তের গৃহগবাক্ষ, তাদের অগ্নিবর্ষণের রক্তিম আভায়ে সীমন্তিনীর সিঁথির মতো রঞ্জিত হল প্রভাতের বিস্তীর্ণ আকাশ।

এই মরণপণ যুদ্ধ চলল প্রহরের পর প্রহর। অবশেষে বিকট শব্দে কাশ্মীরি গেটের রুদ্ধদ্বার বিধ্বস্ত হয়ে পড়ল ধুলায়।

এঞ্জিনিয়ার বিভাগের ক্ষুদ্র একটি দল সরীসৃপের মতো বেয়ে উঠেছে প্রাচীরে। বিক্ষোভকে অগ্নিসংযোগের দ্বারা বিচূর্ণ করেছে সুদৃঢ় কাশ্মীরি গেট। তাদের অমানুষিক সাহসের ফলেই জয়লাভ সম্ভব হল ইংরেজের। ইংরেজ ঐতিহাসিকেরা স্বীকার করেছেন, এই দলের মধ্যে আটজন ছিল ভারতীয়।

সেই ভগ্নদ্বারপথে জয়দুগ্ধ ব্রিটিশবাহিনী প্রবেশ করল ভীমবেগে। বিপক্ষকে আক্রমণ করল দ্বিগুণ তেজে। উন্মুক্ত তরবারি-হস্তে সেনাপতি নিকলসন পরিচালনা করছিলেন সেই সৈন্যদল। জনৈক সিপাহি নিশানা করল তাঁকে। মুহূর্তে আত্ননাশ করে ধুলায় লুটিয়ে পড়লেন নিকলসন। গুলি লেগেছিল তাঁর কপালে।

পরাজিত বৃদ্ধ বাহাদুর শাহ পলায়ন করলেন দুর্গ থেকে। আত্মগোপন করলেন দিল্লি-প্রাসাদের চার মাইল দক্ষিণে হুমায়ূনের সমাধিসৌধে। সেখানে এক মুসলমান ফকিরের নিলেন আশ্রয়। জনশ্রুতি এই যে, সেই ফকিরই তাঁকে ধরিয়ে দিলেন ইংরেজের গুপ্তচর বিভাগের এক তরুণ কর্মচারী হডসনের হাতে।

হামা আজ দস্তে

গয়ের নালা কুনান্দ,

শাদী, আজ দস্তে

খেশ্তান ফরিয়াদ্।

নিজের হাতই যখন নিজের গালে চড় বসিয়ে দেয়, তখন, হে শাদি, অপরের হাতে মার খাওয়া নিয়ে আর খেদ করে লাভ কী!

বন্দি সম্রাটকে হডসন পালকি করে নিয়ে এল দিল্লিতে! সেখানে বিচার হল তাঁর। দণ্ড হল নির্বাসন। ব্রহ্মদেশে। সেখানে পাঁচ বছর পরে বন্দিদশায় জীবনান্ত ঘটল তাঁর। হতভাগ্য বাহাদুর শাহ,—ভারতের শেষ মুসলিম সম্রাট!

ঠিক যেখানে বাহাদুর শাহ ধৃত হন, হুমায়ূন'স টুসেই পরদিন হডসন গ্রেফতার করল আর তিনটি পলাতক। বাহাদুর শাহের দুই পুত্র ও এক পৌত্র। তারা স্বেচ্ছায়ই ধরা দিয়েছিলেন। তাঁদের আশ্বাস দেওয়া হয়েছিল যে, তাঁদেরও বিচার হবে বাহাদুর শাহের মতো।

হডসন তাঁদের একটি ঘোড়ার গাড়িতে চাপিয়ে নিয়ে এল দিল্লিতে। দিল্লিগেটের কাছে এসে হডসন থামাল সে-গাড়ি। বন্দুক নিয়ে নিজহাতে পরপর গুলি করল বন্দিদের ঠিক বুকের মাঝখানে। রাজরক্ত ঝরঝর ধারায় গড়িয়ে পড়ল দিল্লির ধূলিধূসর পথে। মৃতদেহ নিয়ে চাঁদনি চকের উন্মুক্ত প্রান্তরে প্রকাশ্য প্রদর্শনীরূপে রাখা হল তিন দিন। সম্রাটবংশধরদের বিকৃত মৃতদেহ দেখে শিউরে উঠল পথচারীর দল, বারংবার অশ্রুসিক্ত চক্ষু মার্জনা করল নিঃশব্দে।

## সাত

সাক্ষী স্ত্রী, পিতৃভক্ত পুত্র, ভ্রাতৃবৎসল অনুজ এবং প্রভুপ্রাণ সেবকের দৃষ্টান্ত আছে আমাদের পুরাণ-ইতিহাসে একাধিক। জনকতনয়া সীতা, দশরথাস্বজ্ঞ রামচন্দ্র, সুমিত্রানন্দন লক্ষ্মণ এবং রামানুচর হনুমানের কাহিনী জানে এদেশের আপামর সাধারণ। কিন্তু পত্নী-অনুগত স্বামীর উদাহরণ জানতে চাও তো সর্বাত্মে দেখে আসা প্রয়োজন ন'মাসিমার বান্ধবী ইন্দুমতী রায়ের বর প্রিয়নাথবাবুকে। ইন্দুমতীচরণ-চারণ-চক্রবর্তী শ্রীপ্রিয়নাথ রায়।

প্রাগ্‌বৈবাহিক জীবনের পরিচয়লিপিতে ইন্দুমতী ছিলেন দাশগুণ্ডা। গোখলেতে পড়েছেন ইংরাজি, সঙ্গীত সখিলনীতে শিখেছেন সেতার। ফুল শ্রিভসের রাউজ গায়ে দিয়ে মাঘোৎসবের দিনে ব্রাহ্মসমাজে উপাসনায় করেছেন গান—প্রভু, তুমি আমাদের পিতা। তাঁর এক দাদা রেলের অফিসার, অন্য ভাই ব্যারিস্টার।

ইন্দুমতীর বাবার সিন্দুকে রূপা ছিল প্রচুর, কিন্তু নিজের দেহে রূপ ছিল না এতটুকুও। ফলে কয়েক বছর আই.সি.এস., বিলাত-ফেরত, ডেপুটি প্রভৃতির জন্য অযথা অপেক্ষার পর অবশেষে যৌবনের প্রান্তসীমায় পৌঁছে এক শুভ মাঘে মাসি গুরুপক্ষে পঞ্চম্যাং তিথৌ কঠলগ্না হলেন প্রিয়নাথবাবুর। বিয়ের পরে কনের বদল হল পদবি, বরের বৃদ্ধি হল পদ। অ্যাসিস্ট্যান্ট থেকে সুপারিন্টেন্ডেন্ট। পয় আছে বটে আমাদের ইন্দুমতীর।

প্রিয়নাথবাবু তাঁর স্ত্রীর নাথ তো নিশ্চয়ই, বোধ করি প্রিয়ও হবেন। হওয়াই উচিত। কিন্তু আমার পক্ষে—। থাক সেকথা। আমি তো আর তাকে জামাই করছি নে।

মহাদেও রোডে প্রিয়নাথবাবুর বাড়িটি। ‘বি’ টাইপ কোয়ার্টার। নয়াদিল্লিতে বাজারে ডিম থেকে শুরু করে বসতবাড়ি পর্যন্ত সবই হ্রোড করা। এ, বি, সি, ডি ইত্যাদি। হীরার বিচার ঔজ্জ্বল্যে, মসলিনের বিচার সূক্ষ্মতায়। সরকারি কর্মচারীর মূল্য নিরূপিত হয় বেতনে। পি.ডব্লিউ.ডি.’র খাতায় বেতন অনুযায়ী ভাগ করা আছে বাড়ি। পাঁচশো থেকে ছশো টাকা মাহিনার কর্মচারীর জন্য ‘এ’ টাইপ কোয়ার্টার, চারশো থেকে পাঁচশোওয়ালারা পায় ‘বি’। ছশোর উপরে মাইনে যাদের তারা পায় বাংলা। তারও শ্রেণীবিভাগ আছে। শুধু গঠন বা ব্যবস্থায় নয়, অবস্থানেও। ঠিকানা শুনেই বলে দেওয়া যায় লোকটার বেতনের পরিমাণ। হেষ্টিংস রোডের বাসিন্দা পায় তিন থেকে চার হাজার, তোগলক রোডে তার নিচে। এক হাজারের বেশি না পেলে বাংলা মেলে না রাইসিনা রোডে।

নম্বর মিলিয়ে সন্ধান করলেম বাড়ির। বারান্দার পাশের ঘরে আধময়লা গেঞ্জি গায়ে একটি ভৃত্য ইলেকট্রিক ইন্ট্রি দিয়ে একখানা চকোলেট রঙের বেনারসি শাড়ির পরিচর্যায় ব্যস্ত। জিজ্ঞাসা করলেম, “এইটে প্রিয়নাথবাবুর বাড়ি?”

“হ্যাঁ, মিষ্টার রায়ের বাড়ি।”

গলার স্বরে বিরক্তি এবং কপালে কুণ্ঠিত রেখার দ্বারা স্পষ্ট বোঝা গেল বাবু সম্বোধনটা শোতার পক্ষে শ্রবণসুখকর নয়। সুতরাং ভ্রম সংশোধন করতে হল।

“মিষ্টার রায়কে একটু খবর দিতে পারো?”

“আমিই মিষ্টার রায়।”

গড সেভ দি কিং! মিসেস ইন্দুমতী রায়ের স্বামী যে সকাল আটটার সময় শাড়ি ইন্ট্রি করবেন তা কল্পনা করব কেমন করে? কিন্তু এখন তো আর ফিরবার উপায় নেই। ন’ মাসিমার সঙ্গে তার স্ত্রীর সম্পর্ক ব্যক্ত করতে হল, দিতে হল সংক্ষিপ্ত আত্মপরিচয়। মিষ্টার রায় অন্দর থেকে যথারীতি নির্দেশ লাভ করে ড্রয়িংরুমে নিয়ে বসালেন। ‘উনি’ চান করছেন, আসতে বিলম্ব হবে না আশ্বাস দিলেন।

ড্রয়িংরুমটির মেঝেতে শতরঞ্চি পাতা, তার উপরে ছোট মির্জাপুরী কার্পেট। টিপাই-এর উপরে পুষ্পহীন জাপানি কাচের ফুলদানি। এককোণে একখানা ভাঁজ-করা কেম্বিসের ইজিচেয়ার। মাথার কাছটা উপবেশনকারীদের তৈলশিক্ত শিরের অজস্র চিহ্নের দ্বারা মলিন। দেয়ালে কাচ দিয়ে বাঁধানো খানদুই সূচিশিল্পের নমুনা। এই

সিবন কারুকর্মের শিল্পীর পরিচয় সম্পর্কে দর্শকের মনে পাছে কিছুমাত্র সংশয় ঘটে সেজন্য বড় বড় হরফে এক কোণে লেখা আছে ‘ইন্দু’। একটাতে একটা ঝুড়ি, তাতে কয়েকটি গোলাপ ফুল। আর একটাতে একটা বিচিত্র বর্ণের কুকুর। লাল, নীল, সবুজ, হলদে রঙের যদৃচ্ছ এবং অকুষ্ঠ ব্যবহার; ‘ভিবজিওর’ বললেই হয়। কুকুরটির মাথার উপরে ইংরেজি অক্ষরে লেখা—গড ইজ গুড। বোঝা গেল গৃহস্বামিনী ধর্মশীলা। কিন্তু সেটা প্রমাণের জন্য তো সারমেয়’র প্রয়োজন ছিল না। বোধ করি, লেখার ভুল। ডগ ইজ গুড হবে।

প্রিয়নাথবাবুর সঙ্গে খানিক আলাপ করা গেল। আলাপ অর্থে তিনি বক্তা, আমি শ্রোতা। প্রায় সবটাই ‘উনি’ প্রসঙ্গ। উনি আবার বিছানায় এক পেয়ালা গরম চা না পেলে উঠতে পারেন না। উনি রোজ নিজে দাঁড়িয়ে থেকে ঠাকুরের চাল ডাল মেপে দেন। বাজারের খাবার উনি বাড়ির ত্রিসীমানায় আসতে দেন না। নয়াদিল্লি বঙ্গ মহিলা সমিতির যা-কিছু তা তো সব উনিই করেন। লেডি মিত্র তো উনি ছাড়া ইত্যাদি ইত্যাদি।

ইন্দুমতী রায়ের প্রবেশ। মিস্টার রায়ের উত্থান। এটা ইংরেজি রীতি।

গৃহস্বামিনী রায় আসন পরিগ্রহণ করলেন। প্রথমে গৃহে স্থানাভাবের বিস্তৃত বর্ণনা দিলেন। তবে ছ’মাস পরেই গুরুদ্বোয়ারা রোডে বাংলা পাওয়ার আশা আছে। এ-বাড়িতে ঘরদোর ইচ্ছেমতো সাজাতে পারেননি। তবুও তো সিমলা থেকে যে-আসবাবপত্র এনেছেন তার সব এখনও প্যাকিং খোলা হয়নি (সিমলা থেকে এসেছেন এই পাঁচমাস হল)। ফি বছর দিল্লি-সিমলা করেন। গ্রীষ্মকালে দিল্লিতে এই প্রথম। এবার গভর্নমেন্ট অব ইন্ডিয়ার শৈল-বিহার বন্ধ। নতুন কমান্ডার-ইন-চিফ নাকি বলেছেন, সিমলা গেলে যুদ্ধজয়ে বিঘ্ন ঘটবে। শোনো একবার যত অনাসুষ্টির কথা! আরও বেশি গরম পড়লে কিন্তু তিনি সিমলা না গিয়ে পারবেন না, তা বাপু, তোমরা যাই বল না কেন।

বেবি—অর্থৎ ন’ মাসিমা এখন আছে কোথায়? তার মেয়ের বিয়ের কত দূর? ছেলে পড়ে কোন ক্লাসে? তাঁর নিজের চিঠিপত্র লেখার অভ্যাস কম। অবসরও পান না। কত ঝামেলা! এই তো আজ চারটায় আছে এক পার্টি। হ্যাঁগা, শাড়িটা ইস্তিরি করে রেখেছ তো? প্রিয়নাথবাবুর প্রতি।

হাতের ঘড়ির পানে তাকিয়ে বিদায় প্রার্থনা করলেম।

এখনই উঠবে? হ্যাঁ, বেলা হয়েছে বটে। আছ ক’দিন? দিল্লি থেকে যাবে কোথায়? বিলেতে কী হল? যুদ্ধ না থামলে তো আর যেতে পারছ না। বসিং-এর সময় লন্ডনে ছিলে বুঝি? সেখানকার অবস্থা কীরকম? বাজারে ড্রিন শ্যাম্পু পাওয়া যায়? ট্যাসি লিপস্টিক? এখানে তো ছাই কিছু মিলে না! আচ্ছা, একটু চা-টাও তো খেলে না। ওর আবার আগিসের বেলা হচ্ছে, আচ্ছা আর একদিন এসে খেয়ে যেও কিন্তু।

আরও একটি ভদ্রলোকের সঙ্গে দেখা করবার ফরমাশ ছিল। ঠিকানা জানা ছিল না। প্রিয়নাথবাবু, খুড়ি, মিস্টার রায়কে জিজ্ঞাসা করলেম—“ভি. আর. ভেক্টরশরণের বাড়িটা কোথায় জানেন? কোন ডিপার্টমেন্টের যেন অ্যাসিস্ট্যান্ট সেক্রেটারি?”



‘প্রচণ্ড বিস্ফোরণ’ বলে একটা কথা বাংলা পত্রিকায় আজকাল প্রায়ই দেখা যায়। সেটা ঠিক কীরকম জানা ছিল না। প্রিয়নাথ রায়ের অবস্থা দেখে কিছুটা অনুমান করতে পারলেম।

“অ্যাসিস্ট্যান্ট সেক্রেটারি! ভেঙ্কটশরণ বলেছে বুঝি? চাল, কেবল চাল। চাল দিতে দিতেই গেল মাদ্রাজিটা। জানে, আপনি নতুন লোক, ধরতে পারবেন না। এ্যাসিস্ট্যান্ট সেক্রেটারি, হঃ। রিটারার করার দু-এক বছর আগে যে হতে পারে সে তো ভাগ্যবান। এখন যুদ্ধের বাজার। তাই সেকেন্ড ডিভিশন ক্লার্কেরা পর্যন্ত সুপারিন্টেন্ডেন্ট হচ্ছে। নইলে মশাই, অ্যাসিস্ট্যান্ট হতেই যে চূলে পাক ধরে। আমি যেবার সুপারিন্টেন্ডেন্ট হলেম, উডহেভ সাহেব,—সার জন উডহেভ, পরে বাংলাদেশে গভর্নর অবধি উঠল,—ডেপুটি সেক্রেটারি। ডেকে বললেন, “রয়, তোমার মতো এমন কাজের লোক—।”

অত্যন্ত অন্ততপ্ত হলেম। অনিচ্ছাক্রমে এবং নিজের অজ্ঞাতেও যে অপর লোকের গভীর মনস্তাপের কারণ হতে হয়, তারই দৃষ্টান্ত।

ভেঙ্কটশরণের গৃহ আছে, গৃহিণী নেই। থাকলে বিপদ ছিল। তিনি প্রাচীনপন্থী হলে তাঁকে গলায় দড়ি দিতে হত, আধুনিক হলে প্রথমে স্বামীর বন্ধুর সঙ্গে পলায়ন ও পরে বাংলা সিনেমার নায়িকা। মাতাল বর নিয়ে ঘর করা যায়, কলহ করা যায় অন্যান্যনারাগী স্বামীর সঙ্গে। কিন্তু উদাসীন ব্যক্তির স্ত্রী হওয়ার মতো দুর্ভাগ্য নেই জগতে। প্রেম ভালো, বিদ্রোহ দুঃখের, কিন্তু সবচেয়ে মারাত্মক ইন্ডিফারেন্স—যে কাছেও টানে না—দূরেও ঠেলে না—শুধু ভুলে থাকে।

ভক্তেরা বলেন—ধ্যান, জ্ঞান, নিদিধ্যাসন সমস্তই ভগবানের উদ্ভিষ্ট না হলে ঈশ্বরলাভ ঘটে না। বরদারাজলু ভেঙ্কটশরণ ভগবানপ্রাপ্তির জন্যে উদ্যত নন। কিন্তু ভক্তের ঐকান্তিকতা নিয়েই আরাধনা করছেন সেক্রেটারিয়েটের। আপিস, আপিস, আর আপিস। কাজ, কাজ আর কাজ।

সকালে সাড়ে নটায় সবেমাত্র ফরাশ যখন ঘর ঝাঁট দিয়ে গেছে তখন এসে বসেন টেবিলে। অপরাহ্ন গড়িয়ে যায় সন্ধ্যার আঁধারে, উর্ধ্ব ও অধস্তন কর্মচারীরা চলে যায় নিজ-নিজ বাসায়, সহকর্মীরা একে-একে করে প্রস্থান। একা ভেঙ্কটশরণ কাজ করে যান অনন্যমনা। বাড়ি ফিরেন কখনও রাত আটটায়, কখনও-বা তারও পরে। গ্রীষ্ম, বর্ষা, শীত, বসন্ত ঐ একই ধারা। ছুটি নেই, ক্যাসুয়েল লিভ নেই। রবিবারে দুপুরে অনেক দিন চলে আসেন আপিসে। ফাইল নিয়ে লেখেন নোট, ফ্লাগ দিয়ে দাগ দেন, “ফ্রেশ রিসিট” অথবা “পি.ইউ.সি.—পেপার আভার কনসিডারেশন।” বন্ধুবান্ধবেরা ঠাট্টা করে বলে, ভেঙ্কট, কেবল খেটেই গেলে, জীবনটা ভোগ করবে কখন?

ভেঙ্কটশরণ হাসেন আর ডাইনে বাঁয়ে মাথা নাড়েন। বোধ হয় মনে-মনে বলেন কী আহাম্যক! হোয়াস্টে ফুল-অ! ভোগ? হঃ, থার্ড ডিভিশন ক্লার্ক থেকে সেকেন্ড, সেকেন্ড থেকে এ্যাসিস্ট্যান্ট, অ্যাসিস্ট্যান্ট থেকে সুপারিন্টেন্ডেন্ট, সুপারিন্টেন্ডেন্ট থেকে অ্যাসিস্ট্যান্ট সেক্রেটারি। অনেকটা পাল্লা। ভোগের জন্য জীবন তো আছেই পড়ে। চাই প্রমোশন, চাই উন্নতি। চাকরি রে তুহ মম শ্যাম সমান।

ডেক্টশরণের এক অনুজ ছিলেন বিলাতে। আই.সি.এস. মানসে। সেখানেই পরিচয়। ভাই-এর অধ্যবসায় লক্ষ করেছি তাঁরও চরিত্রে। আশা করি, একদা সিভিল লিষ্টের পাতায় নাম ছাপা হবে সগৌরবে।

ডেক্টশরণের স্বজাতিয়েরা নয়াদিল্লিতে সুপ্রতিষ্ঠিত। ভারত সরকারের দপ্তর গোড়াতে ছিল কলকাতায়। লালদিঘির কাছে যে-বাড়িতে এখন বাংলার লাট থাকেন, সেখানে বসতি ছিল ওয়ারেন হেস্টিংস থেকে লর্ড হার্ডিঞ্জের। তখন সেক্রেটারিয়েটে বাঙালি ছিল বহু। পরে রাজধানী স্থানান্তরিত হল দিল্লিতে। তখন থেকে তাদের সংখ্যা হয়েছে হ্রাস। অতঃপর পাঞ্জাবি, মারাঠি, গুজরাটি নানা জাতি এসেছে ধীরে ধীরে। দখল করেছে চাকরির মসনদ। সে-অভিযানে মাদ্রাজিরা সর্বাগ্রে। তারা খাটে বেশি, কথা কয় কম, ফাঁকি দেয় কদাচিৎ।

নয়াদিল্লিতে মাদ্রাজিদের ক্লাব আছে, সম্ম আছে, স্কুল আছে। বোর্ডিংহাউসও আছে একাধিক। সেখানে স্কুলের ডেকের মতো ছোট ছোট টেবিল। তার উপরে কদলীপত্রের আহার। চার আনায় মিলে স্বাথম, কুটু, সম্বর ও আঙ্গালম। একজন তামিল বা অন্ধ্র দেশীয়ের নিয়মিত খাদ্য। কোনোদিন ওর সঙ্গে পাওয়া যায় তৈয়রপত্চন্তি অর্থাৎ নারকেলের কুচি সহযোগে দৈ। সেদিন তো রীতিমতো ভূরিভোজন।

গুধু অশনে নয়, বসনেও যথেষ্ট মিতাচারী দাক্ষিণাত্যের লোক। একখানা চাদর দ্বিখণ্ডিত করে হয় পরিধেয়, একটি সাধারণ ফতুয়া গাত্রাবরণ। কাঁধে একটি তোয়ালে, পায়ে একজোড়া স্যান্ডেল। ব্যস্। আপিস ছাড়া সর্বত্র সচ্ছন্দচিত্তে চলাফেরা করে এই বেশে। আর যা-ই হোক, পোশাক নিয়ে শোক করে না মাদ্রাজি কোনোদিন।

তাদের মেয়েদেরও সম্ভ্রা বাহুল্যবর্জিত। ভূষণ পরিমিত। অবশ্য সংখ্যায়। মূল্যে নয়। সাধারণ মধ্যবিত্ত মাদ্রাজি গৃহিণীরও কানে আছে হীরার ফুল। তার দাম শুনে অনেক বাঙালি স্বামী চোখে সর্ষেফুল দেখবেন। বেশির ভাগ মাদ্রাজি তরুণীদের রূপ নেই, কিন্তু রুচি আছে। তাদের গৃহদ্বার সকালে-সন্ধ্যায় আলিঙ্গনের দ্বারা সুদৃশ্য, তাদের কবরীবন্ধন পুষ্পস্তবকে সজ্জিত। সঙ্গীতে দক্ষতা আছে প্রায় সবারই।

সদ্যপরিচিত একজন পদস্থ মাদ্রাজির গৃহে আমন্ত্রণ ছিল ডিনারের। অদ্রলোক দুহাজার টাকা মাইনে পান। অথচ আহারের আয়োজন দেখে রসনার বদলে চক্ষু জলসিক্ত হওয়ার উপক্রম। কিন্তু তাঁর স্ত্রীর পারদর্শিতা আছে বীণাবাদনে। অপূর্ব সুর সৃষ্টি করলেন তারযন্ত্রে। জঠর যদি-বা রইল অভুক্ত শ্রবণ হল মধু-তৃপ্ত। স্বচ্ছন্দ চিত্তে ক্ষমা করা গেল তাঁর ভোজন-সভার ব্যয়কুষ্ঠ আয়োজন।

মাদ্রাজিদের সঙ্গে পাঞ্জাবিদের তফাত এইখানে। আচার এবং আচরণে পাঞ্জাবিরা গুধু মডার্ন নয়, আলট্রা-মডার্ন। যুবক, বৃদ্ধ সবাই মিলে করছে উর্ধ্বশ্বাসে বিলাতির নকল। গুধু ছেলেরা হলে ক্ষতি ছিল না। মেয়েরাও।

রেস, ক্লাব ও কার্নিভাল—অতি-আধুনিকতার এই তিন তীর্থক্ষেত্রে পাঞ্জাবি মহিলারাই প্রধান পাণ্ডা। তাঁরা চার রাউন্ড শেরি সাবাড় করতে পারেন হাসতে হাসতে। রজনীর শেষ প্রহর পর্যন্ত ফল্ট্রট নাচতে পারেন অক্লান্ত চরণে। তাঁদের দেহে শোভার চাইতে সম্ভার অধিক। তাঁরা বিয়ের আদিতে তব্বী, অন্তে বিপুলা।

তাদের বর্ণ গৌর, কিন্তু আনন লালিত্যহীন। চাকর-চাকরানিদের শাসনকার্যে স্বহস্তে উত্তম-মধ্যম প্রয়োগ করতে দ্বিধা করেন না এতটুকুও। দেহে কিস্বা মনে পাঞ্জাবিনীর নাইকো কোমলতা।

ভারতবর্ষে যুরোপীয় ভাবধারার প্রথম উন্মেষ ঘটল বাংলাদেশে। ইংরেজি শিক্ষা ও সভ্যতাকে প্রথম বরণ করল বাঙালি। সে-যুগের বাঙালির প্রাণশক্তি ছিল প্রচুর, প্রতিভা ছিল প্রখর। ইংরেজের সাহিত্য, বিজ্ঞান ও সভ্যতাকে সে গলাধঃকরণ করল না, করল গ্রহণ। আপন ঐতিহ্য ও সংস্কৃতির জারকরসে পরিপাক করে তাকে সে আত্মসাৎ করল। পশ্চিমের চিন্তাধারাকে সে ধার করল না, ধারণ করল। তাই বাঙালির মধ্যে সম্ভব হল মাইকেল মধুসূদন, বিবেকানন্দ ও চিত্তরঞ্জন দাশ। সাহিত্যে, শিল্পে ও ললিতকলায় বাংলাদেশ সূচনা করল সমৃদ্ধিযুক্ত নবযুগের, আনল দেশাত্মবোধের অভূতপূর্ব প্রেরণা। যৌবনকে দিল অভয়মন্ত্র, নারীকে দিল আত্মচেতনা। সেদিন সর্বভারতীয় অধিনায়িকার আসনে অধিষ্ঠিতা হলেন বঙ্গজননী।

যুরোপের সংস্পর্শে সর্বশেষে এসেছে পাঞ্জাব। বাংলায় ইংরেজশাসন প্রতিষ্ঠার প্রায় শত বৎসর পরে লর্ড ডালহৌসি দখল করেছিলেন পাঞ্জাব। কিন্তু যুরোপকে পাঞ্জাব অন্তরের মধ্যে পায়নি, শুধু বাইরে থেকে করেছে অনুবর্তন। যুরোপের সভ্যতা ও সংস্কৃতিকে সে অনুসরণ করেনি, অনুকরণ করেছে। সে ভারতবর্ষকে দেয়নি কাব্য, দেয়নি সঙ্গীত, দেয়নি বিজ্ঞান। দিতে পারেনি দেশসেবার আদর্শ। আধুনিক ভারতবর্ষে তার দান একদল পি.ডব্লিউ.ডি'র এঞ্জিনিয়ার, সৈন্যদলের সুবেদার এবং আই.এম.এস.-এর ডাক্তার। একমাত্র লাজপৎ রায় ছাড়া পাঞ্জাবের আর কেউ হয়নি আজ পর্যন্ত কংগ্রেসের সভাপতি।

কলকাতার লালদিঘির জল সাদা এবং গোলদিঘির আকার চতুষ্কোণ। কিন্তু এখনকার গোলমার্কেট সার্থকনামা। সেটা গোলই বটে। চারটি রাস্তার সংগমস্থলে বৃত্তাকার দ্বীপের মতো এ-বাজারটি। দোতলা বাড়ি। উপরে দরজির দোকান, নিচে শাকসবজি, মাছ, মাংস, ফল ইত্যাদি। পৃথক পৃথক কক্ষ। ইংরেজিতে লেখা আছে বিজ্ঞপ্তি—কোনটাতে মাছ, কোনটাতে-বা মাংস। প্রবেশপথগুলিতে সূক্ষ্ম তারের জাল-আঁটা দরজা। স্প্রিং দেওয়া আছে, যাতে আপনিই বন্ধ হয়ে যায়। মাছের ঘরটিতে উঁচু সিমেন্টের বেদিতে রাখা হয় মাছ। তার উপর দিয়ে গেছে জলের কলের সছিদ্র পাইপ। ছিদ্রপথে অবিরাম বিন্দু বিন্দু করে ঝরছে জল। আপনি ধুইয়ে নিচ্ছে বেদিটি। আইসচেপ্টার ভিতরে থাকে মাছ। পরিষ্কার, পরিচ্ছন্ন। মাছির উপদ্রব নেই, কর্দমাক্ত জলসিঞ্চনে পঙ্কিল হওয়ার আশঙ্কা নেই ক্রেতাদের বসন। মার্কেটের দুধারে মনোহারি দোকান, মুদি ও ময়রা ইত্যাদি। বাঙালির দোকান আছে কয়েকটি, তার মধ্যে একটিতে মিলে দৈ, সন্দেশ ও অন্যান্য বাঙালির খাবার।

গোলমার্কেটের পথে আছে লেডি হার্ডিঞ্জ কলেজ, ভারতবর্ষে পুরুষের সম্পর্কশূন্য একমাত্র মহিলা মেডিকেল কলেজ। বিদ্যার্থিনীদের মধ্যে অ্যাংলোইন্ডিয়ান আছে,

মদ্রাজি আছে, মারাঠি আছে, আসামি আছে। বাঙালি নেই একটিও। পাঞ্জাবি এক অধ্যাপক বন্ধুর শ্যালিকা পড়েন ফোর্থ ইয়ারে। সুদর্শনা। বাংলার বাইরে কলেজ যুনিভার্সিটিতে সুন্দরীর সাক্ষাৎ মিলে। রূপের অভাবটাই সেখানকার মেয়েদের উচ্চশিক্ষার কারণ নয়। পড়াশুনাটা নয় বিয়ের আগের স্টপ গ্যাপ।

মেয়েটি মেধাবী, ক্লাসে প্রথম স্থান অধিকার করেছেন পরীক্ষায়। বললেন, মেডিসিনের চাইতে সার্জারিতে আগ্রহী বেশি। পাশ করে হবেন সার্জন। সর্বনাশ!

প্রাচীনারা হাতে ধরতেন সম্মার্জনী। ঘরের মেঝে থেকে অবাধ্য স্বামীর পৃষ্ঠ পর্যন্ত সর্বত্র তার অপক্ষপাত ব্যবহারের দ্বারা সংসারযাত্রাকে তাঁরা নিরঙ্কুশ রাখতেন। আধুনিকাদের হস্তে শোভে ভ্যানিটি ব্যাগ। তার গর্ভে নিহিত প্রসাধনসামগ্রী নিজের স্বামীর হৃদয়ে ত্রাস এবং পরের স্বামীর হৃদয়ে চাঞ্চল্যের সঞ্চার করে। অতি-আধুনিকারা যদি ধরেন ফরসেপস তবে বেচারি পুরুষজাতিকে আত্মরক্ষা সমিতি স্থাপন করতে হবে অচিরে!

রসবোধ আছে তরুণীর। কলহাস্যে উচ্ছ্বসিত হয়ে উঠলেন।

লেডি হার্ডিঞ্জের বাঙালি ছাত্রী না থাকলেও অধ্যাপিকা আছেন একজন। মহিলার এক ভাই আই.সি.এস., এক ভাই আই.এম.এস., দুই ভাই অ্যাকাউন্টস সার্ভিসে উচ্চপদস্থ অফিসার। এক বোন শিল্পী। গভর্নমেন্ট অব ইন্ডিয়ার শিল্প ও বিজ্ঞান-বিষয়ক মাসিক পত্রিকা ‘জার্নেল অব সাইন্টিফিক অ্যান্ড ইন্ডাস্ট্রিয়াল রিসার্চ’-এর চিত্রসম্পাদিকা। অন্য ভাইবোনেরা সকলেই কৃতী। তিনি নিজের ডব্লিউ.এম.এস. অর্থাৎ আই.এম.এস.-এরই মহিলা সংস্করণের অন্তর্ভুক্ত। মাইনে পান অনেক, ডাক্তারি করে আয় করেন যথেষ্ট, ভদ্র ব্যবহার, অমায়িক ভাষণ, সহৃদয় আচরণ। লেডি-ডাক্তারি গন্ধ নেই কোনোখানে। কলেজের সংলগ্ন সরকারি কোয়ার্টার। সেখানে গৃহসজ্জায় গৃহকর্ত্রীর সুরুচির পরিচয় পরিস্ফুট।

নয়াদিল্লিতে মহিলা-ডাক্তার আছেন একাধিক। যুক্তপ্রদেশের আছেন জন দুই। লেডি হার্ডিঞ্জের যিনি প্রিন্সিপাল তিনি দক্ষিণদেশীয়। একটি আছেন পাঞ্জাবি। এর জনক ধরমবীর পাঞ্জাবের সুপরিচিত, জননী যুরোপীয়। তাঁরা উভয়েই জননায়ক সুভাষচন্দ্র বসুর অত্যন্ত অন্তরঙ্গ সুহৃদ। মহিলা বিয়ে করেছেন একটি বাঙালি। এঁরা দুজনেই ডাক্তার। স্বামী-স্ত্রী দুজনেই রাজনীতিক বা স্কুলমাস্টার হওয়ার চাইতে ভালো। পলিটিক্যাল ইকনমির মতো দাম্পত্যেও ডিভিশন অব লেবার আছে। সেখানে স্ত্রীর অংশ কথা বলার, স্বামীর অংশ কথা শোনার। দুজনেই বক্তা হলে গার্হস্থ্য স্বাস্থ্য রক্ষায় নিদারুণ বিঘ্ন ঘটে।

কনট প্রেসকে বলা যায় দিল্লির চৌরঙ্গী। সাহেবি এবং সাহেবি ধরনের দোকান পশার সেখানে। সুট বানাবার দরজি, ফটো তোলায় স্টুডিও, প্রভিসনসের স্টোর, চুলে ঢেউ খেলাবার বিউটিপার্লার, লাঞ্চ খাওয়ার হোটেল, সিনেমা দেখবার ছবিঘর—সবই এক কনট প্রেসে। শুধু চৌরঙ্গী নয়, ক্লাইভ স্ট্রিটও। ব্যাঙ্ক ও আপিসপাড়াও এইটেই। বার্ড কোম্পানির পেটেন্ট স্টোন, মার্টিনের টাইলস, ডালমিয়ার সিমেন্ট কিনতে হলে আসতে হবে কনট প্রেসেরই আশেপাশে।

কনট প্রেসের নামকরণ হয়েছে রাজা পঞ্চম জর্জের পিতৃব্য পরলোকগত ডিউক অব কনটের নামে। ম্যান্টেগু-চেমসফোর্ড রিফর্মসের ফলে বর্তমানে কেন্দ্রীয় পরিষদ সৃষ্টি হলে তার আনুষ্ঠানিক উদ্বোধন করতে ভারতে আসেন তিনি। জালিয়ানওয়ালাবাগের নরঘাতন নিষ্ঠুরতার স্মৃতি তখনও স্পষ্ট জাগ্রত ভারতীয়দের মনে। বৃদ্ধ ডিউকের উদ্বোধন-বক্তৃতায় তার প্রতি ইঙ্গিত ছিল, ছিল আন্তরিকতার সুর—“দুপক্ষেই ভুলক্রটি ঘটেছে বিস্তর। আজ তার পর্যালোচনার প্রয়োজন নেই। আসুন আমরা সবাই অতীতের কথা বিস্মৃত হই, পরস্পরকে ক্ষমা করি। ফরগিভ অ্যান্ড ফরগেট।”

কিন্তু ফরগেটনেস তো চলে শুধু সমানে সমানে। শাসক-শাসিতের মধ্যে তার স্থিতি পদ্যপত্রে জলবিন্দুর মতোই ক্ষণিকের। মুহূর্তে মুহূর্তে নতুন করে স্বরণের কারণ ঘটে একপক্ষের ক্ষমতাগর্বিত আফালন ও অপরপক্ষের নিরুপায় নিষ্ফল আর্তনাদ। জালিয়ানওয়ালাবাগ ভুলতে-না-ভুলতে আসে হিজলি, তার স্মৃতি শূন্য মিলাবার আগে ঘটে কাঁথি বা তমলুক।

কনট প্রেসের আকৃতি গোলাকার। বৃন্তের ভিতরের দিকে মুখ করে একসারি দালান। তার পিছনে আছে অনুরূপ আর-এক সারি। তাদের মুখ বাইরের দিকে। সেটার নাম কনট সার্কাস। রোমান পদ্ধতির বিরাটাকার থামের উপরে প্রসারিত বারান্দা। সেখানে অহরহবেলায় ভিড় জমে সুবেশ নরনারীর, সওদা করে শৌখিন ক্রেতারা, আলোকোজ্জ্বল শো-কেসে বিচিত্র দ্রব্যের দর্শন পায় কৌতুহলী জনতা।

দালানের পরেই প্রশস্ত রাজপথ। তার ঠিক মাঝখানে সাদা দাগ দিয়ে পার্কিংয়ের নির্দেশ, সেখানে থাকবে অপেক্ষমাণ মোটরকার ও টাক্সা। দুপাশ দিয়ে চলে যানবাহন। রাস্তার ওপারে বিস্তীর্ণ পার্ক। লৌহশৃঙ্খলের দ্বারা ফুটপাথ থেকে বিচ্ছিন্ন। সেখানে বিশ্রামার্থীদের জন্য আছে বেঞ্চি, ক্রীড়াচঞ্চল শিশুদের জন্য আছে তৃণাচ্ছাদিত অঙ্গন এবং পুষ্পবিলাসীদের জন্য আছে অজস্র ফুলের আয়োজন।

ঘাস জিনিসটার মূল্য যে কত তা জানা নেই বাংলাদেশে, যেখানে দুদিন না হাঁটলে পায়ের তলায় গজায় ঘন ঘাসের বন। অপদার্থ ব্যক্তিকে ঘাস খেতে বলে গাল দেওয়ার উপায় নেই উত্তরভারতে। ভাতের চাইতে সেটা অনেক বেশি দুর্ঘট। গ্রীষ্মকালে সূর্যের তাপ সেখানে একশো তেরো ডিগ্রিতে ওঠে এবং সারাবছরে যে-দেশে মাত্র কুড়ি ইঞ্চি বৃষ্টি হয়, সে-দেশে ঘাস জন্মাতে প্রয়াসের প্রয়োজন। নয়াদিল্লির কনট প্রেসের প্রত্যেকটি ঘাস হাতে করে বোনা এবং হাতে ধরে বাঁচানো। তার জন্য সরকারি হর্টিকালচার ডিপার্টমেন্ট থেকে যে-পরিমাণ যত্ন, জল ও অর্থ ব্যয় করা হয়, সে-হিসাবটা যে-কোনো দৈনিক পত্রিকার সম্পাদকদের জ্বালাময়ী প্রবন্ধ রচনার উপাদান হতে পারে।

ফুল সম্পর্কে আমরা ভারতীয়েরা, বিশেষ করে বাঙালিরা যথেষ্ট সচেতন নই। ফুল এবং চাঁদের আলো একমাত্র কলেজ ম্যাগাজিনে কিশোরবয়স্কদের প্রথম পদ্যরচনা ছাড়া আর কোনো কাজে লাগে বলে তো জানা নেই। আর্টিস্টিক জাতি বলে বাঙালির মনে যে-আত্মাভিমান আছে সে নিয়ে তর্ক চলে, কিন্তু তথ্য মিলে না। সাধারণ

বল্লবিত্ত ইংরেজ-পরিবারেও খাওয়ার টেবিলে বা বসার ঘরে সামান্য কিছু ফুলের সন্ধান মিলে নিশ্চিত। অতি সম্ভল বাঙালির গৃহে পুষ্পগুচ্ছের চিহ্ন দেখা যায় কদাচিত্। অর্থের প্রশ্ন নয়, রুচির প্রশ্ন। বেশির ভাগ বাঙালি-পরিবারে ফুলের প্রয়োজন হয় জীবনে মাত্র দুবার—ফুলশয্যার রাত্রিতে এবং শবাধার সজ্জায়।

পুরাকালে পরিবারে গৃহদেবতার পূজার রীতি ছিল। সেজন্য প্রয়োজন ছিল গন্ধপুষ্পের। বাড়িতে থাকত দু-একটি ফুলের গাছ। আধুনিকতায় গৃহদেবতার স্থান নেই। পূজা যদি করতেই হয়, তবে পাথরের ঠাকুর অপেক্ষা রক্তমাংসের দেবতাদের তুষ্ট করাই বুদ্ধিমানের কাজ। ফল মিলে হাতে-হাতে। তাই এ-যুগে আমাদের ভজন-পূজন হয় আপিসের বড়সাহেব, জেলার ম্যাজিস্ট্রেট এবং রাষ্ট্রনৈতিক নেতাদের। আমাদের ঠাকুরঘরের জায়গা দখল করেছে ড্রয়িংরুম। কিন্তু জবা, দোপাটি ও নাগকেশরের স্থান কার্নেশন, ডালিয়া বা গ্ল্যাডিওনাস এসে পূর্ণ করেনি। সখীপরিবৃত্তা আধুনিকা শকুন্তলাকে পুষ্পবীথিকায় তরু আলবালে জলসিঞ্জনরত দেখার সম্ভাবনা মাত্র নেই। তার দর্শনাভিলাষে এ-যুগের দুঃস্বপ্নকে যেতে হবে লাইট হাউস সিমেনায়, নয়তো লেকে। কলকাতায় যে লোক ফুল ঘরে রাখে সে নেহাতই ফুলবাবু।

এ-শহরে ফুলের অভাব নেই। পথের দুপাশে সরকারি বাংলোগুলির বিস্তৃত অঙ্গন পুষ্পসজ্জারে সমৃদ্ধ। পথচারণে দৃষ্টি মুগ্ধ হয়। রাস্তার চৌমাথায় বৃত্তাকৃতি পার্কগুলিতে আছে ফুলের কেয়ারি। ডাকঘরের গায়ে, হাসপাতালের মাঠে, ফুটে রয়েছে প্রচুর মরসুমি ফুল। কনট প্লেসে আছে ‘ক্যানা’ ফুলের ঝাড়। শীতের দিনে তাদের পুষ্পাভরণের অজস্রতা কল্পনা করা যায় গ্রীষ্মের ভগ্নাবশেষ দেখেই।

নয়াদিল্লির আকাশে আছে বৈরাগীর দৃষ্টি, বাতাসে আছে নিঃশ্বের হতাশ্বাস, মাটিতে আছে তপস্বিনীর কাঠিন্য। কিন্তু তার পথপার্শ্বে সমুদ্রোপিত তরুশ্রেণী পথচারীর জন্য প্রসারিত করেছে ছত্রচ্ছায়া, তার শ্যামল তৃণাবৃত পার্ক বিছিয়ে দিয়েছে হরিৎ অঞ্চল, তার বহুবিচিত্র কুসুমের দল রচনা করেছে বর্ণাঢ্য ইন্দ্রজাল। প্রণয়ীযুগলের পক্ষে সর্বাপেক্ষা অনুকূল আবেষ্টন আছে নয়াদিল্লিতে। সন্ধ্যার ঈষৎ অন্ধকারে তার জনবিরল, ধ্বনিবিরহিত গন্ধ-আমোদিত পথে পাশাপাশি চলতে গিয়ে সদ্যবিবাহিত তরুণ-তরুণীর হৃদয় হয় উদ্বেল, কণ্ঠ হয় ক্ষীণ, চুপিচুপি বলতে অভিলাষ হয় অত্যন্ত তুচ্ছ কোনো কথা, যার না আছে অর্থ, না আছে সম্ভতি, না আছে প্রয়োজন। এবং সেই স্তব্ধ সায়াহ্নে একজনের বুমকা-দোলানো কানের অতি নিকটে আর-একজনের মুখ আনতে গেলে তা দু-একবার লক্ষ্যচ্যুত হয়ে পড়াও একেবারে বিচিত্র নয়।

## আট

সকালবেলা ঘুম ভাঙল একটি মেয়ের চোঁচানিতে। শুধু আজ নয়, প্রত্যহই ভাঙে। অবশ্য আমি বলি চোঁচানি। মেয়ের মা বলেন গান। মেয়েটি গান শিখছে।

পৃথিবীতে সঙ্গীত কে কখন সৃষ্টি করেছেন জানিনে। কিন্তু এতকাল এইটুকু বিশ্বাস ছিল, যিনিই করুন, তাঁর মনে কোনো নিষ্ঠুর অভিপ্রায় ছিল না। কিন্তু সে-ধারণা বজায় রাখা ক্রমেই শক্ত হয়ে উঠছে।

মেয়েটির গলায় সুরের লেশ মাত্র নেই, অথচ জোর আছে অসুরের। সেটা আরও সাংঘাতিক। ভোর পাঁচটা থেকে সাতটা—এই পাকা দুটি ঘণ্টা সে প্রত্যহ সঙ্গীতভ্যাস করে। সপ্তসুরের সঙ্গে কুস্তি করে বললেই ঠিক হয়। আশেপাশের প্রতিবেশীরা যে এখনও ননভায়োলেট আছে সেটা গান্ধীজির শিক্ষায় নয়, একান্ত নিরুপায় হয়েছে। সভ্যতার অনেক দণ্ড আছে। তার মধ্যে এ-ও একটা।

যুরোপ আমাদের অনেকগুলি মন্দ জিনিস দিয়েছে। তার মধ্যে সবচেয়ে মারাত্মক কোনটা সে-বিষয়ে মতভেদ আছে। ডাক্তারেরা বলেন সিফিলিস, গুরুজনেরা বলেন ফ্রি-লভ এবং গান্ধীজি বলেন কলকারখানা। আমার মনে হয় ভারতবর্ষে যুরোপের সবচেয়ে ক্ষতিকর আমদানি হারমোনিয়ম। মানুষের স্নায়ুতন্ত্রের উপর নিদারুণ অত্যাচারের এমন দ্বিতীয় যন্ত্র নেই। আশ্চর্য নয় যে, পণ্ডিত জওহরলাল বলেছেন, জনসভায় অভিনন্দনপত্র পাঠ করার আগে কেউ যখন হারমোনিয়ম বাজিয়ে উদ্বোধন- সঙ্গীত শুরু করে তখনই তাঁর অদম্য অভিলাষ হয়, জনতার মাঝখানে ঝাঁপিয়ে পড়ে ঐ বাদ্যযন্ত্রটাকে পদাঘাতের দ্বারা চূর্ণ-বিচূর্ণ করেন।

জড়পদার্থের একটা সুবিধা আছে। তার সহনশীলতা অপরিসীম। সে বিদ্রোহ করে না। দিনের পর দিন দুঘণ্টা বেসুরো চিৎকারের সঙ্গে পাল্লা দিয়ে আওয়াজ বের করা একমাত্র হারমোনিয়মের পক্ষে সম্ভব। গত দশদিন ধরে সেই এক সুরে—‘বঁধু, তুমি যে চলে গেলে, ফিরে তো নাই এলে’। বঁধু লোকটা যে কে, ঠিক জানিনে। যে-ই হোক, বেচারির অবস্থা কল্পনা করতে পারি। মেয়েটির সঙ্গে আলাপ থাকলে হাতজোড় করে বলতেম—বাছা, চলে যে গেছে, সে নেহাত প্রাণের দায়েই গেছে। এবং তোমার ঐ গান না থামলে সে আর ফিরছে না এ-ও নিশ্চয়। প্রেম যত গভীরই হোক প্রাণের মায়া, অর্থাৎ কানের মায়ায় চাইতে সে বড় নয়।

মেয়েটির অপরাধ নেই। তার মাকে দোষ দেওয়া বুঝা। তিনি জানেন মেয়ের বিয়ে দিতে হবে। পাত্রপক্ষ কনে দেখতে এলে গানের পরীক্ষা আছেই। সুতরাং তার জন্য মেয়েকে তৈয়ার করা আবশ্যিক। তাই কিনতে হয় হারমোনিয়ম, রাখতে হয় গানের মাষ্টার, মেয়েকে প্রাণান্তকর কসরত করতে হয় কণ্ঠস্থলীর।

এদেশে সর্বগুণান্বিতা হবার দাবি মেয়েদের উপরে। বিবাহযোগ্য কন্যাকে হতে হবে বিদুষী, কলাবতী, সুধীরা ও গৃহকর্মনিপুণা। যে-মেয়ে ফিজিক্সে অনার্স নিয়ে বি. এস-সি. পাশ করেছে তাকেও কার্পেটে ফুল তোলা শিখতে হয়, বড়ির ফোড়ন দিয়ে মোচার ঘণ্ট রাঁধতে জানতে হয় এবং সম্ভবপর বরের বন্ধুদের সামনে কনে-বাছনির সময় মহাত্মা গান্ধীর একটি অতিপরিচিত ফটোর ভঙ্গিতে মাদুরে বসে হারমোনিয়ম বাজিয়ে গান ধরতে হয়—‘যে ছিল আমার স্বপনচারিণী তারে’ ইত্যাদি।

বিবাহের দরবারে পুরুষের কাছে প্রত্যাশা সামান্য। ডাক্তার বরের মাসিক আয়ের ঝোঁজ নিয়েই মেয়ের মায়েরা খুশি থাকেন, তার ক্রীড়া-দক্ষতা, অভিনয়-পারদর্শিতা

কিন্তু বক্তৃতা-শক্তি নিয়ে মাথা ঘামান না। ছেলেরা করবে শুধু একটা। হয় লেখাপড়া, নয় ফুটবল, নয় তো ইনকেলাব জিন্দাবাদ। মেয়েদের বিচার কোনো একটামাত্র কৃতিত্বে নয়, সবকিছু মিলিয়ে। তাদের দাম প্রথমত রূপে, তারপর তাদের বিদ্যায়, তাদের সঙ্গীতে, তাদের নৃত্যে, তাদের সৃষ্টিশিল্পে এবং বেশির ভাগ ক্ষেত্রে তাদের পিতৃকুলের ব্যাঙ্ক-ব্যালেন্সের পরিমাপে।

পুরাকাল রাজকন্যারা নিজেরা পতি নির্বাচন করতেন। পুরুষের হত পরীক্ষা। বীর্যবন্তর পরীক্ষা। পুরুষকে তখন স্বয়ম্বরসভায় নারীর বরমাল্যের যোগ্য হওয়ার সাধনা করতে হত। একালে মেয়েরা সহজলভ্য। তাদের জন্য হরধনু ভাঙতে হয় না, প্রতিবিশ্ব দেখে মৎস্যচক্র বিদ্ধ করতে হয় না। তাদের লাভ করতে বাঁধা মাইনের একটা চাকরি হলেই যথেষ্ট। একালে রাজপুত্র, কোটালপুত্রদের কুঁচবরণ কন্যার খোঁজে ঘর ছেড়ে বিদেশে বেরোতে হয় না। দুধসাগরের জলের নিচে যে রূপার কৌটায় কালো ভোমরার মধ্যে আছে রাক্ষসের প্রাণ তার সন্ধান করতে হয় না। সোনার কাটি ছুঁয়ে পাতালপুরীর রাজকন্যার ঘুম ভাঙতে হয় না। সরকারি দপ্তরখানার অফিসারের তকমা এঁটে তারা বীরদর্পে প্রজাপতি ঋষিকে দুয়ারে হাঁক দিয়ে বলেন—লে আও নিপুণিকা, চতুরিকা, মালবিকার দল। তোমার রেণুকা সেন, মাধুরী রায়, ডলি দত্ত বা অরুন্ধতী চ্যাটার্জীদের! একালের কেশবতী রাজকন্যারা নব্বই ভরি সোনা আর তিনপ্রস্থ ফার্নিচারের খেয়ানোক চোপে আপনি এসে উত্তীর্ণ হন বাসরঘরের ঘাটে। পণের টাকায় কারেন্সি নোটের মালা বরের গলায় পরিয়ে দিয়ে বলেন, যদিদং হৃদয়ং তব তদিদং হৃদয়ং মম।

আমার কর্ণপটহ-বিদীর্ণকারিণী সঙ্গীত-অভিলাষিণীকে চোখে দেখিনি। শুনেছি একেবারে রূপহীনা নন। লেখাপড়ায়ও ভালো। তা হোক। কিন্তু গান তাঁকে শিখতেই হবে। আমরা হতভাগ্য প্রতিবেশী—আমাদের ললাটে দুঃখ আছে; খণ্ডবে কে?

দীর্ঘনিশ্বাস ছেড়ে পাশ ফিরে আর একবার নিদ্রার উদ্যোগ করলেম। বৃথা। এবার গান নয়, কার্ড। দর্শনপ্রার্থী এক ভদ্রলোক। কার্ডের উপরে ছাপা—পি. সি. সমাদ্দার, বি.এ., ডেপুটি অ্যাসিস্ট্যান্ট কন্ট্রোলার। ভদ্রলোক আজ সকালে আসবেন কথা ছিল বটে। কিন্তু সকাল মানে যে সাড়ে ছ’টা তা ভাবতে পারিনি।

এই যে, নমস্কার। ঘুমুচ্ছিলেন নাকি? বড় অন্যায় হয়ে গেছে তা হলে। আমি? আমি মশাই ঠিক পাঁচটায় উঠে খানিকটা হেঁটে আসি। বারখান্না ধরে ফিরোজ শা রোড, উইন্ডসর প্রেস, কুইনসওয়ে হয়ে বাড়ি, মাইল দুই হবে। আছি ভালো মশাই! ডিসপেনসিয়াটা অনেকটা চাপা আছে। চা? আচ্ছা দিন এক কাপ, একবার অবশ্য হয়ে গেছে। আপনার বৃষ্টি এখনও হয়নি। সাতটার আগে বিছানা ছাড়েন না? খাসা আছেন মশাই। দশটা-ছ’টা আপিস করতে হয় না, কারও, তোয়াক্কা নেই! হাই সার্কেলে মুত করেন। হ্যাঁ, ভালো কথা, জিজ্ঞাসা করেছিলেন নাকি নেহরুকে ঐ ডিয়ারনেস অ্যালাউয়েন্সের কথাটা।

নেহরু মানে, বি. কে. নেহরু। ফিনান্স ডিপার্টমেন্টের আন্ডার সেক্রেটারি। পণ্ডিত জওহরলাল নেহরুর সঙ্গে আত্মীয়তা আছে। ভদ্রলোক নিজে আই.সি.এস. এবং স্ত্রী বিদেশিনী, কিন্তু ভারতবর্ষের প্রতি দুজনাই সত্যিকার টান আছে।



ক্রটি স্বীকার করতে হল। স্বরণ ছিল না। কিন্তু তিনি নিরাশ হয়ে হাল ছাড়বার পাত্র নন। বললেন, আজ একটু মনে রাখবেন। শুনেছি তো সাড়ে সতেরো পারসেন্ট করার কথা হয়েছে। কিন্তু কত মাইনে অবধি অ্যালাউন্সটা দেবে সেইটেই আসল কথা। পাঁচশো টাকার উপরে মাইনে হলে দেবে না বলে কেউ-কেউ বলছে। দেখেন তো একবার অন্যায়টা। কেন, আমাদের অপরাধটা কী? জিনিসপত্রের দাম তো আর শুধু পাঁচশোর নিচেওয়ালাদের জন্যেই বাড়েনি। দুধের দাম টাকায় ছ'সেরের জায়গায় এক সের নিতে হচ্ছে তাকেও আমাদেরও। বলুন সত্যি কি না? তবে কেন ডিয়ারনেস অ্যালাউন্সের বেলায় আমরা বাদ পড়ব? এসব ইনজাস্টিসের জন্যেই তো মশাই গভর্নমেন্টের কাজে ঘেন্না ধরে যায়। গান্ধী মহারাজ কি আর অমনি শয়তানি গভর্নমেন্ট বলেন?

গান্ধীভক্তকে সবিনয়ে স্বরণ করিয়ে দিতে হল যে, গান্ধীজি পাঁচশো টাকার বেশি কারও মাইনেই রাখতে রাজি নন।

না না, সেটা ঠিক নয় মশাই। তিনি মহাত্মা, তাঁর কথা আলাদা। ঋষিতুল্য লোক। একটু ছাগলের দুধ পেলেই হল। আর পাঁচজনের তো তা নয়। এই ধরুন-না আমারই কথা। আপনি তো ঘরের লোকের মতো, আপনাকে বলতে আর কী? আটশো টাকা পাই। ইনকাম ট্যাক্স, প্রভিডেন্ট ফান্ড কেটে নিয়ে হাতে আসে সাতশো তেরো টাকা পাঁচ আনা। ফি-মাসেই শেষের দিকে টানাটানি হয়। কোন্টা না করলে হয়? গাড়ি আছে, মেয়ের বিয়ে দিতে হবে, ছেলেকে বিলেতে পাঠাতে হবে। পাঁচশো টাকার সীমা কিছু কাজের কথা নয়। স্ট্যান্ডার্ড অব লিভিং বাড়তে হবে, তা না হলে ভারতবর্ষের উন্নতি নেই। দেখুন-না বিলেতে, আমেরিকায়। হ্যাঁ, সাহেবগুলিকে তাড়িয়ে দিন-না। ওরা করে কী? শুধু দস্তখত। যা-কিছু তো আমরাই লিখে পড়ে দিই। কিন্তু পাঁচশো'র উপরে যদি মাইনে না থাকে, তবে চাপরাশির মাইনে যে মাসে আট আনায় দাঁড়াবে। দাঁড়াবে না? বরং এখনকার চাইতে আরও বাড়বে? অবাক করলেন মশাই! কী জানি; আপনাদের কংগ্রেসিদের কী বিচার-বুদ্ধি আপনারাই জানেন।

কংগ্রেসিদের বিচার-বুদ্ধি ব্যাখ্যা করার মতো ধৈর্য বা সময় কোনোটাই ছিল না। প্রসঙ্গ পরিবর্তনের জন্য ক্রিপস্ আলোচনার কথা তুললেম। দেখা গেল তাতেও আগ্রহের একেবারে অভাব নেই। জিজ্ঞাসা করলেন, কিছু হবে মনে হচ্ছে কি? হলে বাঁচা যায় মশাই। ইংরেজ ব্যাটাদের আচ্ছা শিক্ষা হয়। ছিল বটে আগের দিনে সব দিলদরিয়া সাহেব। যথার্থ মা-বাপের মতো। আমি তখন সবে সেক্রেটারিয়েটে ঢুকেছি। আমাদের সুপারিন্টেন্ডেন্ট ছিলেন মহাতপবাবু। মহাতপ ঘোষ, খড়দায় বাড়ি। বুড়ো হয়েছেন, বয়স সাতান্ন'র কাছাকাছি। সার্ভিস বুকে লেখা আটচল্লিশ। পেনশনের আরও সাত বছর বাকি। চোখে একেবারেই দেখতে পান না, লিখতে হাত কাঁপে। একদিন ফাইলে টাইপ-করা লেখার উপরেই দস্তখত করে বসে আছেন। আমরা ভয়ে সারা। আজ আর রক্ষে নেই। মারে,—স্যার অ্যালেকজেন্ডার মারে—সাহেব ছিলেন আমাদের সেক্রেটারি। ডেকে নিয়ে বললেন, মহাটপ, ছেলে ম্যাট্রিক

পাশ করেছে? না করে থাকে তো ক্ষতি নেই। কাল নিয়ে এসো ভর্তি করে দেব। তুমি এবার রিটার্নার করো। অনেক খেটেছ, এখন ডিসার্ভ ওয়েলআর্নড রেস্ট। আর এখন মশাই, আমার মেজো শ্যালক কলকাতা যুনিভার্সিটির গ্রাজুয়েট। দুবছরের চেষ্টায় ঢোকাতে পারছি নে।

শুধু মেজো শ্যালকের চাকরিপ্রাপ্তিতে ব্যর্থতা নয়। নিজের প্রমোশন সম্পর্কেও অভিযোগ ছিল।

স্বরাজ না হলে আর চাকরি করে সুখ নেই মশাই। ইংরেজ ব্যাটারদের কাছে এখন মুসলমানেরা হচ্ছে বড় পিয়ারের। তাদেরই পোয়া বারো। কাজ জানুক আর না-ই জানুক, মাথায় ফেজ থাকলেই হল। পেটে বোমা মারলে এককথা শুদ্ধ ইংরেজি বেরোয় না এমন সব লোক অফিসার হয়ে এসে বসেছে। খান বলে আমাদের এক নতুন কন্ট্রোলার এসেছে। আকাট মূর্খ। সেদিন এক ফাইলে রেফারেন্স লিখতে দুটো r দিয়ে বসে আছে। গত মাসে দুবছরের জুনিয়র একজন মুসলমান আমাদের চারজনকে ডিঙিয়ে ডেপুটি চিফ হয়ে গেল। এসব অবিচার কি আর চিরকাল সহিবে? ইংরেজদের দিন ঘনিয়ে এসেছে। তবে হ্যাঁ, এ-ও বলি, হবে না-ইবা কেন? মুসলমানদের ফেলো-ফিলিং আছে। চাকরি নিয়ে, প্রমোশন নিয়ে তাদের লিডারেরা সবসময় লড়ছে। পান থেকে চুন খসেছে কি, অমনি অ্যাসেম্বলিতে পাঁচজন মুসলমান মেম্বর পাঁচটা প্রশ্ন করবে, উইল দি অনারেবল মেম্বর বি প্লিজড টু স্টেট। একটা মুসলমান চাপরাশিকে কিছু বলেছেন তো মিনিষ্টারেরা কৈফিয়ত তলব করবে। আর আমাদের হিন্দুরা? সব কংগ্রেসি। তাঁরা কেবল উচ্চাঙ্গের কথা বলে বলেই গেলেন। স্বরাজ, স্বাধীনতা, কমপ্লিট ইন্ডিপেন্ডেন্স। আরে চাকরি-বাকরিগুলো সবই যদি অন্যের হাতে গেল তবে স্বরাজ নিয়ে কি ধুয়ে খাব? আমি পষ্ট কথা বলব মশাই, আমাদের কংগ্রেসের কর্তারা প্রাকটিক্যাল পলিটিক্স একেবারেই বোঝেন না। তাই জীবন কাটাচ্ছেন শুধু জেলখানায়।

হুদুলোককে বাধা দিয়ে লাভ নেই, তর্ক করা নিরর্থক। মধ্যবিত্ত বাঙালি পরিবারের অতিপরিচিত আবহাওয়ায় মানুষ। চাকরিকে জানেন জীবনের অনিবার্য অবলম্বন, গভর্নমেন্ট পোস্টকে আকাঙ্ক্ষিত সৌভাগ্য। তাঁর ধ্যান, ধারণা, চিন্তা ও স্বপ্ন সমস্তই এই চাকরিকে কেন্দ্র করে। ক্যারিয়ারের রোল নিয়ে তার আরম্ভ, পেনশন নিয়ে তা শেষ। এবং এই আদি অন্তের মাঝখানে প্রমোশন দিয়ে তার বিস্তার।

আপিসের বেলা হচ্ছিল। সমাদ্দারবাবু গাত্রোথান করলেন। আচ্ছা, এখন তা হলে উঠি। আপিস আছে। আজ আবার এ-মাসের এরিয়ায় স্টেটমেন্টটা পাঠাতে হবে। বিকেলের দিকে আর একদিন আসব। বিকেলে বাড়ি থাকেন না? তা হলে সকালেই আসব। আচ্ছা, চলি এখন। ঐ ডিয়ারনেন্স অ্যালাউয়েন্সের কথাটা কিন্তু আজ একবার কাইভলি—।

বিকালের দিকে চায়ের নিমন্ত্রণ ছিল। নয়াদিল্লির প্রেস ক্লাব টি-পার্টি দিচ্ছে সার স্ট্যাফোর্ড ক্রিপসকে। ক্রিপস চা, লাঞ্চ ও ডিনারের বহু নিমন্ত্রণ পেয়েছিলেন। কিন্তু একমাত্র প্রেস ক্লাব ছাড়া আর কার কোনো আমন্ত্রণই তিনি গ্রহণ করেননি। বললেন,

তাঁর প্রতি ভারতীয় সাংবাদিকদের সহৃদয় ব্যবহারে তিনি অত্যন্ত কৃতজ্ঞ এবং সে-কৃতজ্ঞতা প্রকাশের উদ্দেশ্যেই এই চা-চক্রে তিনি যোগ দিতে স্বীকৃত হয়েছেন। সেক্রেটারিয়েটের সাউথ ব্লকের প্রাঙ্গণে চা-পার্টির আয়োজন। স্বদেশীয় ও বিদেশীয় সাংবাদিকদের নিয়ে নিমন্ত্রিত প্রায় শ-দেড়েক। কয়েকজন মহিলাও আছেন। অবশ্য তাঁরা সবাই বিদেশিনী।

প্রেস ক্লাবের সভাপতি বাঙালি। উষানাথ সেন। ভারতে সাংবাদিকদের গুরুস্থানীয় ও অ্যাসোসিয়েটেড প্রেসের প্রতিষ্ঠাতা স্বর্গীয় কে. সি. রায়ের সহকর্মী ছিলেন। বর্তমানে অ্যাসোসিয়েটেড প্রেসের অন্যতম কর্ণধার, দিল্লির আপিসের কর্মসচিব। বয়স ষাটের উপরে, শরীর সুগঠিত। বিরলকেশ, তীক্ষ্ণনাসা, উজ্জ্বল দৃষ্টি। কথাবার্তা, চালচলন ও বেশভূষায় প্রখর ব্যক্তিত্বের চিহ্ন আছে। ভদ্রলোক অবিবাহিত। নয়াদিল্লিতে কোনোদিন চিরকুমার সভা বসলে তিনিই হবেন তার সর্বজনসম্মত পার্মানেন্ট প্রেসিডেন্ট।

টি-পার্টির পরে সাংবাদিক সম্মেলন। নয়াদিল্লির সরকারি ও বেসরকারি ইতিহাসে এইটিই সর্বাপেক্ষা বৃহৎ প্রেস কনফারেন্স। সাউথ ব্লকের কমিটি-রুমে তিল ধারণের স্থান ছিল না। এই কনফারেন্সে ক্রিপস তাঁর পরিকল্পনা সর্বপ্রথম সর্বসাধারণের কাছে প্রকাশ করলেন। প্রায় দেড়ঘণ্টাব্যাপী বিভিন্ন সাংবাদিকের শতাধিক প্রশ্নের উত্তর তিনি দিলেন। তাঁর বাচনভঙ্গি, তাঁর ক্ষিপ্ততা, তাঁর অক্লান্ত উদ্যম উপস্থিত সমুদয় সাংবাদিকদের প্রশংসা অর্জন করল। তাঁর রসবোধও আছে। মাঝখানে একবার হঠাৎ বললেন, সবুর। তারপর গায়ের কোটটা খুলে রেখে আন্তিন গুটিয়ে বললেন, এবার আসুন! বিপুল হাস্যরোলে ধ্বনিত হয়ে উঠল কনফারেন্স।

সার স্ট্যাফোর্ড বিলাতের খ্যাতিনামা ব্যবহারজীবীদের অন্যতম। আইনব্যবসায়ী মহলে তাঁর বার্ষিক উপার্জনের পরিমাণ বহু লোকেরই স্বর্ষাজড়িত বিশ্বয়ের উদ্রেক করেছে। এই সাংবাদিক-বৈঠকে যুক্তিতর্কে ব্যারিস্টার ক্রিপসের অসামান্য দক্ষতা নতুন করে প্রমাণিত হল।

কিন্তু মানুষ মাত্রেরই ধৈর্যের সীমা আছে। সেকথাটা অত্যন্ত অপরিহার্যভাবেই ক্রিপসও সাংবাদিকদের স্মরণ করিয়ে দিতে বাধ্য হলেন। জনৈক সাংবাদিকের এক অভদ্র প্রশ্নে অবশেষে কঠিন স্বরে বললেন, ভদ্রমহোদয়গণ, আমার ধৈর্য অসাধারণ, কিন্তু তারও শেষ আছে। ব্রিটিশ মন্ত্রিসভা সম্পর্কে কোনো অভদ্র ইঙ্গিত আমি বরদাস্ত করতে রাজি নই।

ভারতীয় সাংবাদিকদের, বিশেষ করে রিপোর্টারদের বুদ্ধি আছে, শক্তি আছে, কৃতিত্বও কম নয়। কিন্তু তাঁদের ক্ষেত্রবোধ নেই। তাঁরা যে রাজনীতিক নন একথাটা তাঁরা কদাচিৎ স্মরণে রাখেন। প্রেস না হলে পলিটিস্স চলে না, কিন্তু পলিটিস্স না হলেও প্রেস চলে। যথা—হরিজন। এদেশের সাংবাদিকেরা শুধু প্রথম শ্রেণীর রিপোর্টার হয়েই খুশি থাকতে চান না, প্রথম শ্রেণীর পলিটিশিয়ানও হতে চান। তাই অনেক সময়েই অপ্রীতিকর পরিস্থিতির উদ্ভব ঘটে। তাঁদের অপরাধ নেই। স্পেশিয়েলাইজেশনে এদেশে বিশ্বাস নেই। এখানে যে-ভাক্তার জ্বরের চিকিৎসা করেন, তিনি ফোড়াও কাটেন এবং দরকার হলে দাঁতও তোলেন।

ক্রিপস্ প্রস্তাব গ্রহণযোগ্য কি-না সে-সম্পর্কে সাংবাদিকদের মধ্যে মতদ্বৈধ দেখা গেল। প্রস্তাবটির সমস্ত গুরুত্বই ভবিষ্যতে। জনশ্রুতি এই যে, গান্ধীজি ক্রিপসের সঙ্গে প্রথম সাক্ষাতের দিন এই প্রস্তাবটি সম্পর্কে মন্তব্য করেন : a post-dated cheque. অতি-উৎসাহী কোনো কোনো সাংবাদিক তাঁর সঙ্গে নিজেদের ভাষ্য যোগ করলেন : on a crashing bank। মুখে-মুখে এই প্রক্ষিপ্ত অংশটিও গান্ধীজির মূল উক্তি বলেই চলতে লাগল। ইচ্ছাকৃত কিম্বা অনবধানতায় সত্যবিকৃতির এমন বহু দৃষ্টান্ত আছে আমাদের রাজনৈতিক ইতিহাসে।

সেদিন সন্ধ্যায় দুই বন্ধু নিয়ে গেলেন এক ক্লাবে।

নয়াদিল্লির সবচেয়ে নামকরা ক্লাব আই.ডি.জি.। ইম্পিরিয়েল দিল্লি জিমখানা। ক্লাব বর্ণাশ্রমে দ্বিজোত্তম। প্রবেশাধিকার অত্যন্ত সীমাবদ্ধ। শুধু ব্যয়বাহুল্যের দ্বারা নয়, লিখিত অনুশাসনের দ্বারা। অ্যাডমিশন ফি ও মাসিক চাঁদা দুই-ই গুরুভার। তা ছাড়া আই.সি.এস, আই.পি., অডিট অ্যাকাউন্টনস ইত্যাদি প্রথম শ্রেণীর চাকুরে ছাড়া সরকারি লোক আর কারও পক্ষেই আই.ডি.জি.-র সদস্য হওয়ার উপায় নেই। বেসরকারি ডাক্তার, জার্নালিস্ট, ব্যারিস্টারদের পক্ষে ঠিক এরকম বাধা না থাকলেও নতুন সদস্য গ্রহণের সময় ক্লাব-কর্তৃপক্ষ যথেষ্ট সতর্কতা অবলম্বন করে থাকেন যাতে একমাত্র তাঁরাই মেসার হন, আর্থিক সঙ্গতি এবং সামাজিক মর্যাদা যাদের শীর্ষস্থানীয়, ইংরেজিতে যাকে বলে এ-ওয়ান। ক্লাবের কৌলীন্য যাতে কলুষিত না হয় সেজন্য সজাগ দৃষ্টি আছে কর্তৃপক্ষের।

ক্লাবের টেনিস লন আছে, সুইমিং পুল আছে, ব্যাড আছে। মায় নিজস্ব ধোবা পর্যন্ত। নয়াদিল্লিতে এইটি একমাত্র ক্লাব যেখানে শুধু পান, ভোজন ও অবসর বিনোদনের নয়, স্থায়ী বাসস্থানের ব্যবস্থাও আছে। আই.ডি.জি. কেবলমাত্র খেলা বা আড্ডা দেওয়ার জায়গা নয়, পুরোপুরি ক্লাবই বটে।

দু নম্বর ক্লাব—চেমসফোর্ড। সেক্রেটারিয়েটের কাছাকাছি রাইসিনা ও কুইন ভিক্টোরিয়া রোডের সংগমস্থলে এই ক্লাবটি সবচেয়ে সরগরম। প্রথমত এর দক্ষিণা তেমন সাম্রাজ্যিক নয়, দ্বিতীয়ত এর অবস্থিতি অনেকটা সুবিধাজনক এবং তৃতীয়ত এখানে অ-ভারতীয় অল্প। সদস্য গ্রহণেও অতটা কড়াকড়ি নেই। চেমসফোর্ডের সুইমিং পুলে ফি-বছর এখানকার সন্তরণ প্রতিযোগিতা হয়। প্রতি মঙ্গলবার রাত্রিতে হয় নাচ। শীতের দিনে ঘরের ভিতরে, গ্রীষ্মকালে বাইরে। বাইরে অবশ্য কাঠের ফ্লোর নয়, শান-বাঁধানো। বাগবাজারের রসগোল্লার মতো চেমসফোর্ড ক্লাবের পকোড়া—অর্থাৎ ফুলুরিরও নাম আছে।

মহিলাদের এখানে পৃথক চাঁদা দিতে হয় না। স্বামীর গরবে গরবিনীরা স্বচ্ছন্দে এসে বসেন পুরুষবন্ধুদের তাসের টেবিলে। সুদক্ষ পার্টনার পেলে কেবলই ডামি হন। না-পেলে তিন রঙের তিনখানা অনার্স কার্ড সম্বল করে মিহি সুরে ডাকেন—টু নো-টাম্পস্। দেনার সুদের মতো হারের হার বাড়ে হ হ করে। খেলার শেষে খাতায়

সই করে আসেন নিঃশঙ্কে । মাসের শেষে স্বামী-বেচারি কল্পিত হৃদয়ে মুখ বুজে চেক লিখে দেন আর বোধ করি মনে-মনে ভগবানকে স্বরণ করেন ।

জাতিধর্মনির্বিশেষে বেশির ভাগ ভারতীয় অফিসারই চেমসফোর্ডের সদস্য । পাঞ্জাব, সিন্ধু, গুজরাট, মারাঠা, দ্রাবিড়, উৎকল, বঙ্গ—কোনো দেশীয়ই বাদ নেই । কিন্তু উপস্থিতির দিক দিয়ে পাঞ্জাবিরাই প্রধান । বিশেষ করে শিখ । তাঁরা বিকালে এসে তিন সেট টেনিস খেলেন, সন্ধ্যায় পাঁচ রাবার ব্রিজ । তিন পেগ হুইস্কি ও চার কোর্সের ডিনার খেয়ে তাঁরা যখন স্বগৃহে প্রত্যাবর্তন করেন, তার আগেই ইংরেজি ক্যালেন্ডারে তারিখের পরিবর্তন ঘটে । তাঁদের গৃহিণীরাও পিছনে পড়ে থাকবার পাত্রী নন । ক্লাবে পাঞ্জাবি-দম্পতিদের দেখলে সহধর্মিণী কথাটার মানে বুঝতে কষ্ট হয় না ।

বন্ধুদের ক্লাবটি শহরের অপর প্রান্তে । এর চাঁদা সামান্য, সভ্যসংখ্যাও বেশি নয় । বাঙালি আছে, মাদ্রাজি আছে, আসামি আছে এবং আছে আরও অন্যান্য প্রদেশের লোক । এটিও ছেলে এবং মেয়েদের সম্মিলিত ক্লাব । মেয়েদের মধ্যে অনেকে খ্রিস্টীয় সমাজের ।

ক্লাবের রেজিস্টারে যা-ই থাক, ঘরে মেয়েদের সংখ্যাই যেন বেশি । প্রায় পনেরো আনাই কুমারী । গায়ের রং কালো, নখের রং লাল এবং গালের রং ছাই-ছাই । বলা বাহুল্য শেষের দুটো ভগবানপ্রদত্ত নয় । তার পেছনে বিলাতি প্রসাধন কোম্পানির অনেকখানি হাত আছে । বিচিত্র বসন, বিচিত্রতর ভূষণ । একটি মহিলা পরেছেন গোলাপি রঙের একটি সায়ার উপরে একখানা মশারির নেট, তাতে সাটিনের পাড় বসানো । আর একজনের লেস-বসানো ব্লাউজে সুতার ব্যবহারে এত কঠোর মিতব্যয়িতা যে, তার দিকে চোখ তুলে তাকালে কান আপনিই লাল হয়ে ওঠে ।

বয়স বেশির ভাগই ত্রিশের উর্ধ্বে । দেহ কারও-বা ইউক্লিডের সরলরেখা, কেউ-বা অঙ্কশাস্ত্রের ইলিপ্স । আমাদের মেয়েদের ভূগোলে নাতিশীতোষ্ণের স্থান নেই—হয় উত্তরমেরু, নয়তো দক্ষিণ । কেউ করেন মাস্টারি, কেউ নার্স, কেউ-বা স্টেনোগ্রাফার ।

ক্লাবে ব্যাডমিন্টন আছে, ক্যারম আছে, পিংপং আছে । কিন্তু খেলার চাইতে টং এবং কথার চাইতে ন্যাকামির পরিমাণ বেশি । একটি পঁয়ত্রিশ বছরের বিপুলা মহিলা কোনো-এক সাহায্য-অভিনয়ের টিকিট বিক্রয়ের চেষ্টা করছিলেন । তাঁর কথা বলার ভঙ্গি ও আচরণ দেখে বারংবার ইচ্ছা হচ্ছিল, আলাপ করে বলি : ভদ্রে আপনার নিশ্চয়ই ধারণা যে, আপনার ষোলো বছর এখনও পার হয়নি । কিন্তু সেটা যে কুড়ি বছর আগেই কেটে গেছে সেকথা আপনাকে স্বরণ করিয়ে দেওয়া দরকার ।

জানি, এদের উপরে রাগ করে লাভ নেই । ভগবান এদের রূপ দেননি, ভাগ্য দেয়নি বিত্ত । এদের পিতৃকুল আভিজাত্যের খ্যাতিতে গৌরবান্বিত নয় । বয়স উর্ধ্বগামী, যৌবন অপগতপ্রায় । এদিকে ঠিকুজি মিলিয়ে অভিভাবকদের পাত্র স্থির করার দিন কেটে গেছে । কুলে ছাত্রীকে জিরাভিয়েল ইনফিনিটিভ মুখস্থ করিয়ে দেছে ও মনে নেমেছে ক্লাস্তি, রাত জেগে অনাস্থীয় অপরিচিত রোগীকে থার্মোমিটার আর আইসব্যাগ দেওয়ার কাজে ধরেছে বিরক্তি, আপিসে “উইথ রেফারেন্স টু ইওর লেটার নম্বর” টাইপ করে করে জীবনে এসেছে বিতৃষ্ণা ।

প্রিয় ও পরিজন নিয়ে নীড়রচনার চিরন্তন মোহ আছে নারীর রক্তে। একখানি ছোট গৃহ, একজন প্রেমাসক্ত স্বামী ও একটি দুটি সুস্থ সবল শিশু—এই কল্পনা সে যুগযুগান্ত ধরে পেয়ে আসছে মায়ের কাছে থেকে, মাতামহীর কাছ থেকে, জগতের আদি মানবী আদমপত্নী ইভের কাছ থেকে। সে-কল্পনা সত্য হতে পারল না, সে-কামনা সার্থক হল না। অতৃপ্ত বাসনার সহস্র নাগিনী জাগায়ে জর্জর বক্ষে সে বুথাই প্রতীক্ষা করেছে এই দীর্ঘকাল। তার দেহে একদিন রূপ না থাকলেও স্বাস্থ্য ছিল। কিন্তু আজ তার শ্রী গিয়েছে ঘুচে, স্বাভাবিক কমনীয়তা হয়েছে দূর এবং নারীর সর্বশ্রেষ্ঠ ভূষণ যে লজ্জা তা হয়েছে লুপ্ত। অবশেষে বঞ্চিত হৃদয়ের অপরিসীম বেদনাকে ঢাকতে সে প্রাণপণে প্রয়াস করছে নানাভাবে। কেউ করছে মহিলা সমিতি, কেউ করছে রেডিওতে বক্তৃতা, আর কেউ-বা রুজ, পাউডার ও লিপস্টিক মেখে পুরুষের সঙ্গে করছে নির্জলা ফ্লাট।

ক্লাবের পুরুষ-সদস্যদের মধ্যে কলেজের ছাত্র আছে, সেক্রেটারিয়েটের কর্মচারী আছে, বিমার দালাল আছে, ডাক্তার আছে। প্রায় সবাই তরুণ। বিবাহিত সদস্যেরা বেশির ভাগ খ্রিস্টান এবং কুমার সভ্যেরা বেশির ভাগ হিন্দু। কারণ সুস্পষ্ট।

পশ্চিমের শিক্ষা, সভ্যতা ও ভাবধারা আমাদের দেশে এনেছে নতুন আবেষ্টন। তার ফলে অভাবনীয় পরিবর্তন ঘটেছে আমাদের কর্মে এবং চিন্তায়। আমাদের আহার, বিহার, বসন, ভূষণ বদল হয়েছে। বদল হয়েছে রীতি, নীতি ও ধ্যান-ধারণা। এতকাল নারীকে আমরা শুধুমাত্র পুরুষের আত্মীয়রূপেই দেখেছি। সে আমাদের ঠাকুমা, দিদিমা, মাসি, পিসি, দিদি, বৌদি কিম্বা শ্যালিকা। কিন্তু জননী, জায়া এবং অনুজা ছাড়াও নারীর যে আরও একটি অভিনব পরিচয় আছে, সে-সম্পর্কে আমরা বর্তমানে সচেতন হয়েছি। তার নাম সখী।

প্রাণিজগতের মতো মনোজগতেরও বিবর্তন আছে। তার ফলে বিভিন্ন বস্তু, ব্যক্তি বা নীতির মূল্য সম্পর্কে আমাদের মনোভাবের পরিবর্তন ঘটে। নারীর মূল্যেরও যুগে যুগে তারতম্য ঘটেছে।

একদা সমাজে মায়ের স্থান ছিল সর্বপ্রধান। সেদিন পরিবার পরিচালনা থেকে বংশ-পরিচয় এবং উত্তরাধিকার নির্ণীত হত মাতার নির্দেশ, সংজ্ঞা এবং সম্পর্ক দিয়ে। ক্রমে এই ম্যাট্রিয়ার্কল ফেমিলি বিলুপ্ত হল। রাজমাতার চাইতে রাজরানীর মর্যাদা হল অধিক। সাধারণ পরিবারেরও পরিধি পরিমিত হল। সংসারে কর্ত্রী হলেন জননী নয়, গৃহিণী। ছেলেরা মায়ের কোল ছেড়ে বউ-এর আঁচলে আত্মসমর্পণ করল।

বলা বাহুল্য, এই হস্তান্তরের ফলে মায়েরা খুশি হলেন না। কেউ-কেউ অধিকার-রক্ষার জন্য যুদ্ধ ঘোষণা করলেন। ফল হল না। হার হল তাঁদেরই। শুধু বউকাটকী শান্তড়ি আখ্যা পেয়ে নাটক, নভেলে তাঁরা নিশ্চিত হলেন। যারা বুদ্ধিমতী, তাঁরা কালের লিখন পাঠ করলেন দেয়ালে, মেনে নিলেন অবধারিত বিধি। নিঃশব্দে—কিন্তু স্বচ্ছন্দ চিন্তে নয়। জগতের সমস্ত বিক্ষুব্ধ মাতৃকুলের অনুক্ত অভিযোগ আজও জেগে আছে বহুশাসিত আধুনিক গৃহের বিরুদ্ধে। যুরোপ ও আমেরিকার সমাজে পত্নীকর্তৃত্ব পুরোপুরি স্বীকৃত। বিবাহের পর ছেলের সংসারে তার মায়ের স্থান

নেই, কিম্বা থাকলেও সে-স্থান উল্লেখযোগ্য নয়। সংস্কৃত ব্যাকরণের লুপ্ত অকার-চিহ্নের মতো তাঁর অস্তিত্ব আছে, গুরুত্ব নেই।

কিন্তু স্ত্রী বলতে যেদিন ভাবী সন্তানের গর্ভধারিণী বা গৃহকর্ত্রী মাত্র বুঝতেন, সেদিনও বিগত। স্ত্রীর মধ্যে চাই সচিব সখীমিত্র প্রিয় শিষ্য ললিতে কলাবিধৌ। কিন্তু একজনের কাছে এতখানি প্রত্যাশা করা শুধু কালিদাসের কাব্যেই শোভা পায়, বাস্তবক্ষেত্রে নয়।

এ-যুগের পুরুষের কাছে ঘরের চাইতে বাইরের ডাক বেশি। সে দশটা-পাঁচটায় আপিসে যায়, কারখানার খাটে, শেয়ার মার্কেটে ঘোরে। সেখান থেকে টেনিস, রেস কিংবা মিটিং। রাত্রিতে ক্লাব অথবা সিনেমা। এর মধ্যে গৃহের স্থান নেই, গৃহিণীরও আবশ্যিকতা নেই। আগে সস্ত্রীক ধর্মাচরণ করতে হত। যাগ-যজ্ঞ, ব্রত-পার্বণে প্রয়োজন ছিল ভাষার। কিন্তু ধর্ম এখন শুধু ইলেকশনে ভোটসংগ্রহ ছাড়া ভারতবর্ষেও বড় একটা কাজে লাগে না। তাই এ-যুগে সহধর্মিণীর চাইতে সহকর্মিণীকে নিয়ে বেশি রোমাস লেখা হয়।

পুরুষের জীবনে আজ গৃহ ও গৃহিণীর প্রয়োজন সামান্যই। তার খাওয়ার জন্য আছে রেস্তোরাঁ, শোয়ার জন্য হোটেল, রোগে পরিচর্যার জন্য হাসপাতাল ও নার্স। সন্তানসন্ততিদের লালনপালন ও শিক্ষার জন্য স্ত্রীর যে অপরিহার্যতা ছিল, বোর্ডিং-স্কুল ও চিলড্রেনস হোমের উদ্ভব হয়ে তারও সমাধা হয়েছে। তাই স্ত্রীর প্রভাব ক্রমশ সঙ্কুচিত হয়ে ঠেকেছে এসে সাহচর্যে। সে পত্নীর চাইতে বেশিটা বান্ধবী। সে কত্রীও নয়, ধাত্রীও নয়,—সে সহচরী।

নারীর পক্ষেও স্বামীর সম্পর্ক এখন পূর্বের ন্যায় ব্যাপক নয়। একদিন স্বামীর প্রয়োজন মুখ্যত ছিল ভরণ, পোষণ ও রক্ষণাবেক্ষণের। কিন্তু এ-যুগের স্ত্রীরা একান্তভাবে স্বামী-উপজীবিনী নয়। তারা দরকার হলে আপিসে খেটে টাকা আনতে পারে। তাই স্বামীর গুরুত্ব এখন প্রধানত ভর্তাক্রমে নয়, বন্ধুরূপে।

ভারতবর্ষও এই নবভাবধারার বন্যাকে এড়িয়ে থাকতে পারেনি। টেউ এসে লেগেছে তার সমাজের উপকূলে। আমাদেরও পরিবার ক্রমশ ক্ষুদ্রকায় হচ্ছে, আত্মীয়-পরিজনের সম্বন্ধ সঙ্কীর্ণ হচ্ছে। গ্রাম্য সভ্যতার ভিত বিধ্বস্ত, কলকারখানাকে কেন্দ্র করে নগরনগরীর বিস্তৃতি ঘটেছে ধীরে ধীরে। তার সঙ্গে নূতন সভ্যতা, নূতন দৃষ্টিভঙ্গি, নূতন জীবন-ধর্মের উদ্ভব অপরিহার্য।

এদেশেও পুরুষের জীবনে এবার আবির্ভূত হয়েছে সখী; নারীর জীবনে সখা। সেটা ভালো কি মন্দ তা নিয়ে তর্ক করতে পারো, মনু পরাশর উদ্ধৃত করে মাসিক পত্রে প্রবন্ধ লিখতে পারো। কিন্তু তাকে ঠেকাতে পারবে না।

স্ত্রী-পুরুষের জীবনে সখাসখীর যে-উপলব্ধি, তার প্রয়োজনীয়তা সম্পর্কে আমাদের সমাজকর্তারা একেবারে উদাসীন ছিলেন না। কিন্তু পতিকে পরম গুরু এবং পত্নীকে সেবিকা বানিয়ে দাম্পত্যে তাঁরা সখিত্বের অবকাশ রাখতে পারেননি। ট্রান্সফারড এপিথেটের মতো সেটা পুরুষের পক্ষে বৌদি এবং স্ত্রীর পক্ষে দেবরের উপর ন্যস্ত করেছিলেন। সংসারে এর চাইতে মধুরতর সম্পর্ক আমার জানা নেই।

সীতার সাথি ছিলেন লক্ষ্মণ, তাঁর অপর আর কোনো বন্ধুর প্রয়োজন ছিল না। বুড়ো হলেও ঋষি বাল্মীকি সেকথা জানতেন। পাঞ্চালীর পাঁচ-পাঁচটা স্বামী থাকতেও একটি দেবরের অভাব ঘোচেনি। তাই বেদব্যাসকে আনতে হল—শ্রীকৃষ্ণ। তিনি দ্রৌপদীর সখা—সংকটে শরণ্য, সম্পদে স্মরণীয়।

এ-যুগে জীবনযাত্রার উপচার বহুবিধ এবং ব্যয়সাধ্য। যে-লোক দুশো টাকা পায় তার পক্ষে বউ কাছে রাখাই কঠিন, বৌদি দূরে থাক। মেয়েরাও জানেন, পণের টাকা ও সোনার হার না হলে বরই জুটবে না অনেকের, দেবর তো পরের কথা। তাই আধুনিকারা ঘা খেয়ে মন দিয়ে মেনেছেন যে, বেশি আশা করে ফল নেই। একটি নির্ভরযোগ্য সহৃদয় বন্ধু পেলেই ভাগ্য। আধুনিকেরা বুদ্ধি দিয়ে বুঝেছেন যে, অনেক লোভে লাভ নেই, তার চেয়ে বরং চাই শুধু একটি বান্ধবী। প্রিয়বান্ধবী।

কিন্তু সাধারণ হিন্দু-পরিবারে অনাখ্যায় স্ত্রী-পুরুষের বন্ধুত্বের পথ উন্মুক্ত নয়। সাধারণ মুসলমান-পরিবারেও নয়। সেখানে বান্ধবীর স্বীকৃতি মাত্র নেই। সেখানে পুরুষের জীবনে প্রথমে যে-অনাখ্যায় নারীর সান্নিধ্য ঘটে, তিনি নিজের স্ত্রী। তাই ক্লাবে পার্টিতে বিলাতফেরত ও বড় চাকরদের ড্রইংরুমে তরুণের দল আসে। কাউকে ডাকে ললিতাদি, আর কাউকে বলে বীণাবউদি, কাউকে-বা শুধু পদবির আগে ‘মিস’ বা ‘মিসেস’ জুড়ে দিয়ে সম্বোধন করে—মিস গুপ্ত, মিস আয়েসার বা মিসেস সোনেরা জাহীর।

## নয়

তিরিশে মার্চ সন্ধ্যায় ফিরোজশাহ-কোটলায় মুনলাইট-পিকনিকের যিনি আয়োজন করেছিলেন, আইডিয়্যাল হোটেল বলে নয়াদিল্লির সোসাইটিতে তাঁর প্রসিদ্ধি আছে। মহিলা সুদর্শনা, পরিহাসপটু এবং প্রিয়ভাষিনী। বন্ধুসমাগমে আনন্দ লাভ ও আনন্দ দান করার দুর্লভ ক্ষমতা আছে তাঁর।

ফিরোজশাহ-কোটলা দিল্লির পঞ্চম নগরীর ধ্বংসাবশেষ। ভারতের শেষ হিন্দু সম্রাট পৃথ্বিরাজের সময়ে দিল্লি নগরী ছিল বর্তমান কুতুবের নিকটস্থ মেহরৌলীতে। পুরাতত্ত্ব বিভাগ কিছুকাল পূর্বে এই রাজধানীর নগরপ্রাচীর মৃত্তিকাগর্ভ থেকে আংশিক উদ্ধার করেছেন। জনপ্রবাদ এই যে, নিজ প্রিয়তমা কন্যার যমুনা দর্শনাভিলাষ পূরণার্থে পৃথ্বিরাজই তৈরি করেছিলেন কুতুব মিনার। প্রত্যহ অপরহ্নবেলায় প্রসাধন সমাপনান্তে রাজনন্দিনী আরোহণ করতেন তার শীর্ষে, অবলোকন করতেন দূরবর্তী যমুনার জলধারা। কিন্তু ঐতিহাসিকেরা এ-কাহিনী বিশ্বাস করেন না। তাঁদের অভিমত, পাঠান সম্রাট কুতুবদ্দিন আইবেক নির্মাণ শুরু এবং আলতামাস শেষ করেন জগতের সর্বোচ্চ বিজয়স্তম্ভ এই মিনার।

দ্বিতীয় দিল্লি নগরী প্রতিষ্ঠা করেন সুলতান আলাউদ্দিন খিলজি। তাঁর রাজত্বকালে দুর্ধর্ষ মুঘল দস্যুদল ভারতবর্ষ আক্রমণে করল, হত্যা ও লুণ্ঠনের দ্বারা বহু নগরনগরী



বিধ্বস্ত করে উপনীত হল দিল্লিতে। দিল্লির সমতল ভূমিতে তাদের প্রতিরোধ করা সহজ ছিল না। সম্রাট পশ্চাদপসরণ করলেন কুতুব। মুঘলেরা দিল্লির পার্শ্ববর্তী অঞ্চল দখল করে আমির-ওমরাহদের ধনরত্ন লুণ্ঠন করল এবং সাধারণ কৃষকের শস্যক্ষেত্র বিধ্বস্ত করল। অবশেষে দিল্লির অসহনীয় গ্রীষ্মের প্রখরতায় ক্লান্ত ও রোগাক্রান্ত হয়ে দস্যুদল দিল্লি পরিত্যাগ করল। আলাউদ্দিন এই দস্যুদলের পুনরাক্রমণ প্রতিরোধের জন্যে নির্মাণ করলেন সুদৃঢ় প্রাচীরবেষ্টিত নব নগরী, নাম দিলেন সিরি। এই নগরীতে সুলতান নির্মাণ করেছিলেন নিজের জন্য এক মহার্ঘ প্রাসাদ, তার স্তম্ভসংখ্যা ছিল এক সহস্র। আজ সে-প্রাসাদের চিহ্নমাত্র নেই।

আলাউদ্দিন খিলজি ছিলেন অসমসাহসিক যোদ্ধা। রাজ্য-জয়ের নেশা ছিল তাঁর রক্তে। তিনি রাজপুতদের পরাজিত করে চিতোর অধিকার করেছিলেন। দাক্ষিণাত্যে প্রথম মুসলিম অধিকারও প্রতিষ্ঠিত করলেন তিনি। সেই বিজয়গৌরবকে চিরস্মরণীয় করতে নির্মাণ শুরু করলেন দ্বিতীয় কুতুব। প্রথম কুতুবের পাশেই। প্রথম কুতুবের চাইতে এর আকার হবে দ্বিগুণ—এই অভিলাষ ছিল সুলতানের মনে। কিন্তু আরন্ধ কাজ শেষ করার মতো আয়ুর মিয়াদ ছিল না তাঁর। অর্ধসমাপ্ত এই নবপরিকল্পিত কুতুবের চিহ্ন আজও দর্শকজনের কৌতূহল উদ্বেক করে। বর্তমান সিরির স্মারক আছে শুধু প্রত্নতাত্ত্বিকের গবেষণায় এবং কিছুটা বিরাট নগরপ্রাচীরের ভগ্নাবশেষের মধ্যে।

ফিরোজাবাদের প্রতিষ্ঠা করেন সুলতান ফিরোজশাহ তোগলক। রাজার নামে রাজধানীর পরিচয় মুসলিম রাজত্বের ইতিহাসের অভূতপূর্ব নয়। চতুর্দশ শতাব্দীতে ভারতের মুসলিম নৃপতিদের মধ্যে ফিরোজশাহ তোগলক ছিলেন সর্বশ্রেষ্ঠ। দীর্ঘ ৩৭ বৎসর তিনি প্রবল প্রভাবে রাজদণ্ড পরিচালনা করেছেন। দিল্লির মুসলিম বাদশাহদের মধ্যে একমাত্র আওরঙ্গজেব ব্যতীত আর সবার চাইতেই তিনি ছিলেন বয়োবৃদ্ধ। মহম্মদ তোগলকের মৃত্যুর পরে তিনি যখন সিংহাসনে আরোহণ করেন তখনই তাঁর বয়স ষাটের উর্ধ্বে।

ইতিহাসে মহম্মদ বিন তোগলকের নাম অব্যবস্থিতচিত্ত ও অপরিণামদর্শী নৃপতির উদাহরণরূপে কুখ্যাত। কিন্তু একথা অস্বীকার করার উপায় নেই যে, তাঁর চরিত্রে বহু রাজোচিত সদগুণেরও সমাবেশ ঘটেছিল। মহম্মদ বহুভাষাবিদ, কবি, গণিতজ্ঞ এবং সুদক্ষ লিপিকার ছিলেন। সাহসী যোদ্ধা এবং সহৃদয় দাতা বলেও তাঁর সুনাম আছে। আবার নিষ্ঠুরতার জন্য নিন্দারও অভাব নেই। প্রসিদ্ধ আরবি পর্যটক ইবন বতুতার আত্মচরিতে সম্রাট মহম্মদের একটি সংক্ষিপ্ত কিন্তু যথার্থ বর্ণনা আছে।

“দান করা এবং হত্যা করা এই দুই ব্যাপারেই রাজা মহম্মদ তুলা দ্বিতীয় ব্যক্তি নেই। যে-পথ দিয়ে তিনি যান সে-পথে কোনো-না-কোনো অতি দরিদ্রকে তিনি ধনী বানিয়ে যান, কোনো-না-কোনো জীবিত ব্যক্তিকে তিনি পরলোকে পাঠিয়ে দেন। একাধারে তাঁর মহানুভবতার ও নিষ্ঠুরতার শত শত গল্প লোকের মুখে মুখে ফিরছে।”

ইবন বতুতা নিজে মহম্মদের অধীনে কয়েক বছর দিল্লির কাজি অর্থাৎ প্রধান বিচারক ছিলেন।

মহম্মদের নানা উদ্ভাবনী বুদ্ধি ছিল, কিন্তু সাধারণ কাণ্ডজ্ঞান ছিল না। বহু বিষয়ে পরীক্ষা করার তাঁর বোঁক ছিল। বেশির ভাগ পরীক্ষারই মারাত্মক পরিণতি ঘটেছে। উত্তরভারত থেকে দাক্ষিণাত্যে একাধিকবার রাজধানী স্থানান্তরিত করা, দিল্লি এবং দৌলতাবাদের মধ্যে রাজধানীর সমুদয় অধিবাসীর গমন ও প্রত্যাগমন, রৌপ্যমুদ্রার পরিবর্তে তাম্রমুদ্রার প্রচলন, চীনজয়ের প্রয়াস ইত্যাদি মহম্মদের সর্বনাশা উদ্যোগের একাধিক কাহিনী স্কুলপাঠ্য ইতিহাসে বাল্যকালে আমরা পড়েছি।

জীবনের শেষভাগে মহম্মদ আপন সেনাবাহিনী নিয়ে বর্তমান করাচির নিকটবর্তী খাটায় এক দুর্গ অবরোধ করেছিলেন। একদিন প্রভাতে সেখানে এক ধীবর সিঙ্কুনদে হঠাৎ এক অদ্ভুত মৎস্য শিকার করেছিল। সে-মৎস্য রাজসমীপে উপস্থিত করা হল। সম্পূর্ণ অপরিচিত আকৃতির এই মৎস্য মানুষের রসনার পক্ষে সুস্বাদু কিনা সে পরীক্ষার বাসনা জাগল মহম্মদের মনে। পাত্রমিত্রের অনুরোধ-উপরোধ অগ্রাহ্য করে সে-মৎস্য সম্রাট আহাৰ করলেন। ইহলোকে সেই তাঁর শেষ পরীক্ষা। সেদিনই জীবনান্ত ঘটল তাঁর।

মহম্মদের প্রতিভা ছিল, শক্তি ছিল। সে-সময়ে আলাউদ্দিন খিলজির রাজধানী সিরি ও প্রাচীন মেহেরৌলীর মাঝখানে দিল্লির বিস্তৃতা পানী ব্যক্তিদের বহু প্রাসাদ ও প্রমোদোদ্যান গড়ে উঠেছিল ধীরে ধীরে। কিন্তু যথোচিত রক্ষাব্যবস্থার অভাবে মুঘল দস্যুদের আক্রমণ-সম্ভাবনা থেকে সেগুলি মুক্ত ছিল না। মহম্মদ তাঁর নিজ প্রাসাদ রচনা করলেন সেখানে। দুর্ভেদ্য প্রাচীর দিয়ে ঘিরে দিলেন সিরি থেকে মেহেরৌলী। নব নগরীর নামকরণ করলেন ‘জাহানপুনা’—বাংলা ভাষায় যার মানে হল জগতের আশ্রয়। প্রাসাদের সংলগ্ন ভূমিতে বৃহৎ এক হ্রদ খনন করেছিলেন পানীয় জলের সংস্থানে। কৃত্তবের অদূরবর্তী বর্তমান খিরকি গ্রামে আজও চোখে পড়ে এই প্রাচীরের অবশিষ্টাংশ। তার গায়ে হ্রদে জল প্রবেশ-ব্যবস্থার চিহ্ন আছে পরিস্ফুট।

বর্তমান কৃত্তব রোডের নিকটে সরকারি প্রত্নতাত্ত্বিক বিভাগের খননকার্যের ফলে আবিষ্কৃত হয়েছে মহম্মদের স্নানাগার, তাঁর জেনানা ও তাঁর বিখ্যাত মঞ্চ, যেখানে বসে প্রত্যহ তিনি তাঁর সৈন্যদলের কুচকাওয়াজ পরিদর্শন করতেন। আলাউদ্দিনের সহস্রশতক কক্ষের অনুরূপ মহম্মদও একটি বিরাট কক্ষ নির্মাণ করেছিলেন, যার কিছু-কিছু চিহ্ন আজও কৌতূহলী দর্শকদের বিস্মিত করে।

মহম্মদের মৃত্যুর পরে ফিরোজশাহ তোগলক সম্রাট হলেন। মহম্মদের তিনি আত্মীয় এবং সেনানায়ক ছিলেন। সিঙ্কু থেকে সৈন্যসামন্ত নিয়ে তিনি ফিরে এলেন দিল্লিতে। রাজ্যের গঠনকার্যে মনোনিবেশ করলেন অবিলম্বে। অনেকেই বোধ হয় জানে না যে, ফিরোজশাহই ভারতের সর্বপ্রথম নরপতি যার ধর্মনিতে হিন্দু ও মুসলমানের রক্ত এক হয়ে মিশেছিল। তাঁর জননী ছিলেন রাজপুতানী।

দুই বিভিন্ন ধর্মের সম্মিলিত প্রভাব তাঁর চরিত্রে একটি বৈশিষ্ট্য দান করেছিল। বিদ্বান ও ধর্মপরায়ণ বলে তিনি খ্যাত ছিলেন এবং প্রজাদের কল্যাণসাধনে তাঁর আন্তরিক স্পৃহা ছিল। মুসলিম-যুগের প্রথম কৃত্রিম সেচব্যবস্থার প্রবর্তন করেন ফিরোজশাহ। অধুনা ওয়েস্টার্ন যমুনা ক্যানেল নামে খ্যাত খালটি তিনিই খনন

করেন। কর্নালের নিকটস্থ যমুনার মূলধারা থেকে উৎসারিত হয়ে এর এক শাখা এসেছে দিল্লিতে, অপর শাখা গেছে হিসারে। ফিরোজশাহের আমলে এই খালের পরিধি বিস্তৃততর ছিল। সম্রাট শাজাহানের আদেশে তৎকালীন পূর্তবিভাগের অধ্যক্ষ আলি মর্দান খাঁ এই খালের সংস্কারসাধন করেন। এখানে স্মরণ করা অপ্রাসঙ্গিক নয় যে, সম্রাট শাজাহানের রক্তেও হিন্দুপ্রভাব ছিল। তাঁর জননী যোধপুরী বেগমও রাজপুতানী ছিলেন। আহম্মদশাহ আব্দালি কর্তৃক দিল্লি অবরোধকালে এ-খালটি দ্বিতীয়বার বিনষ্ট হয় এবং পরবর্তী যুগে ইংরেজশাসকগণের চেষ্টায় তার পুনঃসংস্কার ঘটে।

সৌধনির্মাণে ফিরোজশাহের গভীর অনুরাগ ছিল। এদিক দিয়েও সম্রাট শাজাহানের সঙ্গে তাঁর চরিত্রের মিল ছিল। কুতুবমিনারের উর্ধ্বতন যে-দুটি তলা শ্বেতপাথরের গড়া তা ফিরোজশাহেরই কীর্তি। ভূমিকম্পে কুতুবের যে-ক্ষতি ঘটেছিল তারও সংস্কার তিনিই করেছিলেন। দিল্লির হিন্দুরাও হাসপাতালের সংলগ্ন ‘রিজে’ এখনও তাঁর নির্মিত মৃগয়াগৃহের ভগ্নাবশেষ বর্তমান।

সিরি, বিজয়মণ্ডল ও কুতুবে তিন-তিনটি নগরী থাকা সত্ত্বেও ফিরোজশাহ যমুনার ধারে আর-একটি নতুন নগরের পত্তন করলেন। একেবারে যমুনার ঠিক গায়ে নির্মাণ করলেন রাজপুরী ফিরোজশাহ-কোটলা। আজ তোরণপথে ঢুকলেই বাঁদিকে চোখে পড়ে বিস্তীর্ণ তৃণাচ্ছাদিত অঙ্গন। একদা সেখানে ছিল ফিরোজশাহের দরবারগৃহ। আজ আমাদের পিকনিক পার্টির আসর বসল সেখানে।

দলটি ক্ষুদ্র নয়। ছেলে মেয়ে নিয়ে প্রায় জন-বারো। কিন্তু অধিনায়িকা আহাৰ্য যা এনেছেন, তা দিয়ে অনায়াসে তার ডবল লোকের উদরপূর্তি করা যেতে পারে।

পিকনিকে সবচেয়ে যিনি মনোযোগের যোগ্য, তিনি মিষ্টার খোশ্‌লা। বহুলপরিচিত ব্যক্তি। বিশেষ করে মহিলামহলে। মেয়েরা এগজিভিশন করেছেন, তার দরজায় ভলান্টিয়ারি করেছেন কে? মিষ্টার খোশ্‌লা। মহিলা সমিতি দামোদর বন্য়ার সাহায্যভাণ্ডারে টাকা তুলেছেন। মেয়েদের সঙ্গে বাড়ি বাড়ি ঘুরে চাঁদা আদায় করেছেন কে? মিষ্টার খোশ্‌লা। চাঁদনী চক থেকে মিসেস মুখার্জীর উল কিনে আনছেন, মিসেস স্বামীনাথনের জন্য পাঁচ দোকান ঘুরে পন্ডস্‌ ক্রিম জোগাড় করেছেন। সমস্তই মিষ্টার খোশ্‌লা। নয়াদিল্লিতে মেয়েরা আছেন অথচ মিষ্টার খোশ্‌লা নেই, এমন কোনো সভা, সমিতি, পার্টি, পিকনিক কেউ কল্পনা করতে পারবে না।

সাধারণ পাঞ্জাবির তুলনায় বেঁটে, দোহারা চেহারা। মাথার চুল ব্যাকব্রাশ করা। নির্বাক যুগের চিত্রাভিনেতা ডগলাস ফেয়ার ব্যাক্সস-এর অনুকরণে দীর্ঘ জুলপি গালের মধ্যপথ পর্যন্ত প্রসারিত। হিটলারের মতো গোঁপের কায়দা। পরিধানে ব্রাউন রঙের কর্ডরয়ের প্যান্ট, পায়ের গোড়ালির কাছটা সফর। প্যান্টের পিছনে হিপ-পকেট। তাতে মনোপ্রাণ-করা লম্বা রূপার সিগারেট-কেস যার গর্ভে প্রায় পঞ্চাশটা সিগারেট রাখা চলে। গায়ে গ্যাবার্ডিনের কোট। প্রায় আজানুলব্ধিত, নিচের পকেটদুটি ঈদের চাঁদের আকৃতিতে কাটা। সিক্কের শার্ট। টকটকে লাল রঙের টাই, তাতে নীল রঙের লতাপাতার ছাপ। মাথায় একটি সবুজ ফেল্টের

টুপ, নিচের দিকে নামিয়ে পড়েন। পায়ে কখনও কব্চিনেশন শু, কখনও-বা বাকলস আঁটা সুয়েডের জুতা। দিনের বেলায় চোখে একজোড়া শাদা মোটা শেলের ফ্রেমযুক্ত সানগ্লাস। রোদ থাক আর না-ই থাক মেয়েদের হাতে রিস্টওয়াচের মতো মিষ্টার খোশ্‌লার গগলসও প্রয়োজনের জন্য নয়, শোভার জন্য।

মিষ্টার খোশ্‌লার প্রকৃত পেশা নিয়ে মতভেদ আছে। কেউ বলে তিনি কন্‌ট্রাক্টর, কেউ বলে তিনি দু-তিনটে বিমা কোম্পানির এজেন্ট, আর কেউ-বা এমন কিছু বলে যার ইংরেজি তর্জমা করলে কথাটা দাঁড়ায়—স্বেচ্ছা লোফার। তিনি নিজের কার্ডে নামের পিছনে লেখেন একটি শব্দ যা দিয়ে নলিনীরঞ্জন সরকার থেকে শুরু করে বাবুগঞ্জের হাটে কাটা-কাপড়ের ব্যবসাদার পতিতপাবন সাহাকে পর্যন্ত বুঝানো যায়। মার্চেন্ট। কিন্তু কাজ তাঁর যা-ই হোক, ব্যস্ততার অভাব নেই। এই দারুণ পেট্রোল রেশনিং-এর দিনেও সারাদিনই দেখা যায় তিনি তাঁর বেবি অস্টিন নিয়ে ব্যস্তসমস্ত হয়ে ছুটছেন শহরের এক প্রান্ত থেকে অপর প্রান্তে। পথে পরিচিত কারও সঙ্গে দেখা হলে এক মিনিট কথা বলেই বলেন, “আচ্ছা ভাই, এখন বড্ড ব্যস্ত। আবার দেখা হবে, শ্যাল সি ইউ এগেন।”

পিকনিকে খোশলা বিপুল উদ্যমে মেয়েদের আহাৰ্য পরিবেশন করলেন। স্যাভুইচের প্লেট নিয়ে ছুটতে গিয়ে প্রায় আছাড় খেতে খেতে বেঁচে গেলেন। সন্দেশের থালা নিয়ে হস্তদস্ত হলেন, কোনো মহিলাকে “প্লিজ”, কোনো মহিলাকে বা “ফর মাই সেক”, বলে দুটো বেশি পেট্রি খাওয়ালেন। একটি তরুণী অন্য কার কাছে একগ্লাস জল চাইছিলেন। পাশ দিয়ে যাচ্ছিলেন মিষ্টার খোশ্‌লা। তাঁর কানে যেতেই “জল, জল, মিস্ উপাধ্যায়ের জন্য জল” বলে এমন উতলা হয়ে জলের অন্বেষণে ছুটতে লাগলেন যে, মনে হল, হাতের কাছে অন্য কোথাও না পেলে তিনি বুঝিবা তৎক্ষণাৎ ভগীরথের ন্যায় গঙ্গা আনয়নের জন্যে কৈলাসে ছুটবেন!

শ্রীমতী সুব্বা রাও প্রস্তাব করলেন চারিদিকে ঘুরে দেখবার। দেখার মধ্যে যা আছে তা ফিরোজশাহ্ নির্মিত একটি মসজিদ। সুলতান পাত্রমিত্র নিয়ে জুম্মার দিনে এখানে প্রার্থনা করতে আসতেন। অনুমান করা অন্যায্য নয় যে, সেদিন এই মসজিদের গুরুত্ব ছিল অসাধারণ। যদিও আজ ভগ্নদশা দেখে তার বিগত সৌষ্ঠব বুঝবার উপায় নেই। কিন্তু তার গঠন-পারিপাট্য লক্ষ্য করার মতো। ইংরেজিতে যাকে বলে ‘প্রোপোরশন’—ফিরোজশাহ্-কোটলার মসজিদ ও অন্যান্য প্রাসাদ-ভগ্নাবশেষে তা বিশেষভাবে বর্তমান।

ফিরোজশাহের আমলে সর্বপ্রথম ভারতীয় স্থাপত্যে হিন্দু ও মুসলিম পদ্ধতির সিনথেসিস ঘটেছিল। প্রাগ্‌মুসলিম যুগের উত্তরভারতীয় হিন্দু-স্থাপত্য ছিল সম্পূর্ণ আলাদা ধরনের। অতি প্রাচীন হিন্দুমন্দিরে এখনও তার চিহ্ন আছে। বর্তমানে জৈন-পদ্ধতি নামে অভিহিত এ স্থাপত্যের সর্বশ্রেষ্ঠ নিদর্শন বোধ হয় রাজপুতনার মাউন্ট আবু পর্বতোপরি বিখ্যাত মন্দিরটি।

সেদিনের হিন্দু স্থাপত্যে আর্চ—অর্ধবৃত্তাকার গঠন—ছিল না। তার বৈশিষ্ট্য ছিল চতুষ্কোণ স্তম্ভে। এই স্তম্ভগুলি কারুকার্যবচিত। কোনোটাতে দেবদেবীর মূর্তি,

কোনোটাতে পুষ্পসজ্জা, কোনোটাতে-বা ঘণ্টা কিম্বা গাছ। প্রস্তরে গঠিত এই স্তম্ভগুলির অলঙ্করণের মধ্যে মিলত সেদিনকার স্থপতিদের মণ্ডন-চাতুৰ্যের পরিচয়। সেকালের স্থাপত্যে গম্বুজেরও অস্তিত্ব ছিল না। চতুষ্কোণ স্তম্ভের উপরে সমান্তরাল প্রস্তরখণ্ড একটির পর একটি সাজিয়ে দুদিক থেকে ক্রমশ মিলিয়ে আনা হত মাঝখানে। দ্বার, গবাক্ষ ও প্রবেশপথের উপরাংশে আর্চের পরিবর্তে এই গঠন অনেকটা থাক-কাটা সিঁড়ির মতো দেখায়। আর্চের ভারবহন ক্ষমতা অধিক এবং তার ব্যবহার যুরোপ ও মধ্য-এশিয়ায় প্রচলিত ছিল।

এই স্থাপত্যের প্রথম পরিবর্তন ঘটল দ্বাদশ শতাব্দীর শেষভাগে। দাশ-বংশের কুতুবুদ্দিন আইবেক দিল্লিতে এসে প্রথম তৈরি করতে চাইলেন একটি মসজিদ যেখানে বসে তিনি আল্লার কাছে পাঠাতে পারবেন প্রচুরতর অর্থ, প্রবলতর প্রতাপ এবং প্রভূততম শাস্তি কামনা করে প্রাত্যহিক আবেদন। বলা বাহুল্য তাঁর নিজ জন্মস্থান আফগানিস্থানে যে-ধরনের মসজিদের সঙ্গে তিনি আশৈশব পরিচিত তারই অনুরূপ ভজনালয় নির্মাণ করা ছিল তাঁর বাসনা। সে-মসজিদ পয়েন্টেড আর্চের, অনেকটা গণিতশাস্ত্রের দ্বিতীয় বন্ধনীচিহ্নের মতো খিলানের উপর তৈরি।

রোমানরা ব্যবহার করত বৃত্তাকার আর্চ। আরবীয়েরা পছন্দ করত পয়েন্টেড আর্চ। পণ্ডিতেরা সিদ্ধান্ত করেছেন যে, পয়েন্টেড আর্চ-সম্বলিত স্থাপত্যের প্রথম নিদর্শন হল ষষ্ঠ শতাব্দীতে নির্মিত ইরাকের অন্তর্গত সামাররার মসজিদটি। হিন্দু স্থপতিদের জানা ছিল না তার নির্মাণকৌশল। কাবুল কান্দাহার থেকে মুসলিম কারিগর আনাও সম্ভব ছিল না। সুতরাং দিল্লির প্রথম মসজিদের স্থাপত্যের যে-নিদর্শন রইল সেটা হিন্দু ও মুসলিম স্থাপত্যের সম্মেলন নয়, গৌজামিলন। কুতুবমিনার-সংলগ্ন মসজিদে আজও তার প্রমাণ আছে। সে-মসজিদের বারান্দায় ও দ্বারপথে অর্ধবৃত্তাকার গঠন সত্যিকার খিলানের উপর নয়। তাতে 'কি-স্টোন' নেই।

মুসলিম স্থাপত্যে দেবদেবীর মূর্তি বা পুষ্প ও বৃক্ষলতা উৎকীর্ণ করার রীতি ছিল না। কোরানের বচন উদ্ধৃত হত মসজিদের প্রাচীরের গাত্রে ও আর্চের উপরে। আরবি লিপি ও কোরানের রচনা সম্পর্কে কুতুবুদ্দিনের মসজিদ নির্মাণরত ভারতীয় রাজমিস্ত্রিদের জ্ঞান ছিল সামান্যই। এই কৃত্রিম আর্চের উপরে তারা বৃক্ষ অঙ্কন করে তার আশেপাশে আরবি বচন উৎকীর্ণ করার প্রয়াস করেছে কোনোমতে। হিন্দু-স্থাপত্যের চিহ্ন মসজিদের সংলগ্ন মণ্ডপে আরও অধিকতর প্রকট। তার স্তম্ভগুলি নিঃসন্দেহে কোনো হিন্দু-মন্দির থেকে আহৃত। সেকালের মুসলিম নরপতিরা লুণ্ঠনকে লজ্জার বিষয় মনে করতেন না। বরং অপহৃত দ্রব্যের প্রকাশ্য ব্যবহারের দ্বারা তাঁরা বিজয়স্তম্ভ রচনা করে আপন অপকীর্তির সাক্ষ্য রাখতেন পরবর্তীকালের জন্য।

সুলতান আলতামাস কুতুবুদ্দিন-রচিত মসজিদের বিস্তারসাধনে উদ্যোগী হয়ে গজনি থেকে আনলেন মুসলিম স্থপতি ও কারিগর। তারা জ্যামিতিক পদ্ধতির মুসলিম অলঙ্করণ প্রচলন করল ভারতবর্ষে। খিলজি যুগে অধিকসংখ্যক মুসলিম রাজমিস্ত্রি এল আফগান থেকে। তারা প্রবর্তন করল চতুষ্কোণ স্তম্ভের পরিবর্তে 'কি-স্টোন'-যুক্ত সত্যিকার আর্চ, সমতল ছাদের বদলে গম্বুজ, চলতি ভাষায় যাকে বলে শিকারা, এবং

ঘণ্টা, পুষ্প, বৃক্ষ ইত্যাদির বদলে জ্যামিতিক রেখাঙ্কন সজ্জা। ভারতে পুরোপুরি মুসলিম স্থাপত্যের প্রতিষ্ঠা হল। কুতুব-সংলগ্ন আলাই দরওয়াজা ও নিজামুদ্দিনের জামাতখানা মসজিদ সেকালের হিন্দুপ্রভাববর্জিত একান্তভাবে মুসলিম স্থাপত্যের নিদর্শন।

তোগলক রাজত্বে, বিশেষ করে ফিরোজশাহের নির্মিত প্রাসাদ, দুর্গ ও অন্যান্য অট্টালিকায় হিন্দু-স্থাপত্যের পুনর্ব্যবহার দেখা গেল। সে-যুগের স্থাপত্যের প্রথম বৈশিষ্ট্য হল অলঙ্কার ও বাহ্যবর্জিত গঠন। সাধারণ পাথর ও চুন-সুরকির আন্তর দিয়ে তা তৈরি—খিলজি আমলে ও পরবর্তী মুঘলযুগে ব্যবহৃত লাল বা শ্বেতপাথরের চিহ্ন বড় নেই। বোধ হয় মুঘল দস্যুদের আক্রমণ প্রতিরোধ-ব্যবস্থায় ও দাক্ষিণাত্য অভিযান প্রভৃতিতে ফিরোজশাহের পূর্ববর্তী রাজকোষ শূন্য হয়ে এসেছিল, ব্যয়বহুল প্রস্তর ব্যবহার আর সম্ভব ছিল না। মহম্মদ তোগলক কর্তৃক বারংবার দিল্লির অধিবাসীদের স্থানান্তরিত করার ফলে পাথরের কাজে দক্ষ রাজমিস্ত্রির অভাব ঘটাও বিচিত্র নয়।

ফিরোজশাহের সৌধাবলিতে সবচেয়ে উল্লেখযোগ্য, চতুষ্কোণ স্তম্ভের ব্যবহার, দ্বারপথে ও বারান্দায় আর্চের বদলে হিন্দু-পদ্ধতির গঠন এবং প্রস্তুতিত পদ্ম উৎকীর্ণ প্রাচীরসজ্জা। ফিরোজশাহ নির্মিত হাউজ খসের পরবর্তী অংশগুলিতে আছে এর প্রকৃষ্ট পরিচয়।

মসজিদের গায়ে যে অট্টালিকার উপর অশোকস্তম্ভটি আছে তার আরোহণপথ খুব কঠিন নয়। সিঁড়ির ধাপগুলি কিছুটা উঁচু সন্দেহ নেই। কিন্তু আমাদের সঙ্গী নারীবাহন মিস্টার খোশলা থাকতে মেয়েদের চিন্তার কারণ নেই। প্রত্যেকটি মহিলা নিরাপদে উপরে না-ওঠা পর্যন্ত তিনি নিচে দাঁড়িয়ে তদারক করলেন। বেশি পরিচিতাদের হাতে ধরে উঠতে সাহায্য করলেন এবং সদ্যপরিচিতাদের দিকে হাত বাড়িয়ে বললেন, “মে আই—।”

অশোকস্তম্ভটি প্রাসাদের যে-অংশে স্থাপিত সেটা ফিরোজশাহের অন্দরমহলের অন্তর্ভুক্ত বলে কথিত। স্তম্ভটি প্রস্তরনির্মিত। আশ্বিনার নিকটবর্তী এক গ্রামে সম্রাট অশোক কর্তৃক এই স্তম্ভটি স্থাপিত হয়েছিল খ্রিস্টজন্মের প্রায় আড়াই শত বৎসর পূর্বে। একদা মৃগয়া থেকে প্রত্যাবর্তনের পথে তা ফিরোজশাহের চোখে পড়ল। পুরাকীর্তিতে ফিরোজশাহের গভীর আগ্রহ ও অনুরাগ ছিল। সেখান থেকে স্তম্ভটি তুলে নিয়ে এলেন তিনি দিল্লিতে, তাঁর রাজধানী ফিরোজশাহ-কোটলায়।

বিয়াল্লিশ চাকার গাড়িতে চাপিয়ে শত শত মজুর টেনে এনেছিল এই স্তম্ভটিকে। স্তম্ভটির শীর্ষে একটি স্বর্ণনির্মিত আচ্ছাদন ছিল। পরবর্তী যুগে জাঠ দস্যুরা দিল্লি লুণ্ঠনকালে তা আত্মসাৎ করেছে। বহুবর্ষ পরে স্তম্ভের গায়ে পালি ভাষায় উৎকীর্ণ লিপির পাঠোদ্ধার হয়েছে। অহিংসা ও সর্বজীবে দয়াপ্রদর্শনের অনুরোধ জানিয়ে ভগবান বুদ্ধের অনুগামী সম্রাট অশোক সমগ্র ভারতবর্ষে যে বহুশত অনুশাসন প্রচার করেছিলেন, এই স্তম্ভে তারই একটি সাক্ষ্য রয়েছে।

অশোকস্তম্ভের পাশে দাঁড়িয়ে দেখা যায় অদূরবর্তী যমুনার জলস্রোত। ফিরোজশাহের আমলে যমুনার ধারা কোটলার পাদদেশ স্পর্শ করত সেকথা বুঝতে আজও কিছুমাত্র কষ্ট হয় না।

নিচে নেমে সদলবলে বসা গেল খোলা মাঠের মধ্যে । পাশে একটি ক্ষুদ্র জলাশয় । স্থানীয় লোকেরা বলে, বাউলী । দারুণ গ্রীষ্মের দিনে সুলতান অবগাহন করতেন এর জলে, বিশ্রাম করতেন এর তীরবর্তী পাষাণ-বেদিকায় ।

কে একজন বললেন, “তাস সাথে থাকলে একহাত খেলা যেত ।”

আমাদের অধিনায়িকা অমনি তাঁর তোরঙ্গ থেকে বার করলেন দুপ্যাকেট সুদৃশ্য ঝকঝকে তাস, নম্বর লেখার ছাপানো প্যাড ও পেন্সিল ।

সবাই জয়ধ্বনি করে বলল—“একেই বলে দূরদৃষ্টি । সকল কালের সকল রকম দরকারের কথা যিনি আগে থাকতে ভেবে রাখেন, তাঁরই নাম অনাগতবিধাতা ।”

ডাক্তার অধিকারী আমাদের মধ্যে সর্বাপেক্ষা বয়োজ্যেষ্ঠ । আর্মিতে লেফটেনেন্ট কর্নেল । অত্যন্ত রসিক লোক । মাথার পাকা চুল দিয়ে মনের কাঁচা ভাবকে ঢেকে রেখেছেন । মাইল দশেক দূরবর্তী ক্যান্টনমেন্ট থেকে এসেছেন পিকনিকে যোগ দিতে । কন্ট্রাষ্টব্রিজে তাঁর জুড়ি মেলা ভার । খুশি হয়ে বললেন, “ক্রিপস্ আলোচনা চলছে । স্বরাজ হলে আমরা ওঁকেই প্রেসিডেন্ট করব । স্বাধীন ভারতে প্রথম মহিলা প্রেসিডেন্ট, মিসেস বিজয়া ব্যানার্জী । বিজয়া ব্যানার্জী কী—”

সবাই মিলিত কণ্ঠে উচ্চধ্বনি করলেন “জয় ।”

বাধা দিয়ে বললেন, “কর্নেল, প্রেসিডেন্ট বললেই মনে হয় পলিতকেশ, বিগতযৌবনা বৃদ্ধা । তার চাইতে বলুন মহারানী ।”

কর্নেল তৎক্ষণাৎ স্বীকার করলেন : “ঠিক বলেছ ভায়া । মহারানীই ভালো । দিল্লির দ্বিতীয় মহিলা সম্রাজ্ঞী । সুলতানা রিজিয়ার পরে সুলতানা বিজয়া । জয় মহারানী বিজয়া কী জয় । বন্দে মাতরম্, আত্মা হো আকবর, হিপ্ হিপ্ হুররে ।”

ভাবী সুলতানা সহাস্যে জিজ্ঞাসা করলেন, “একসঙ্গে তিনটাই বলেন নাকি আপনি?”

“নিশ্চয় । গান্ধী মহারাজ, জনাব জিন্মা ও ব্রিটিশ গভর্নমেন্টকে খুশি রাখতে হয় । যখন যার হাতে ক্ষমতা আমি তাঁরই দলে আছি । অবস্থা অনুযায়ী যার যত তাড়াতাড়ি মত বদলায় ইংরেজিতে তাকেই তো বলে তত প্রথমেসিভ ।”

মিস্টার জুবেরি সদ্য আই.সি.এস. হয়েছেন । বিলেতে লন্ডন স্কুল অব ইকনমিক্সে কিছুকাল পড়েছিলেন । সোশ্যালিজমে এখনও ভক্তি আছে । বললেন, “মহারানী তো মনাকর্জম । ডেমোক্রেসির যুগে তা চলবে না ।”

কর্নেল বললেন, “খুব চলবে । ঘরে ঘরে মনাকর্জম চলছে, আর ঘরের বাইরে গবর্নমেন্টে চলবে না? ভায়া হে, তোমার বয়স অল্প, শিখতে এখনও ঢের বাকি । ডেমোক্রেসি বস্তুটা আছে শুধু হয়ারল্ড ল্যাক্সির বইতে । আমাদের মিস্টার ব্যানার্জীকে জিজ্ঞাসা করে দ্যাখো, তাঁর বাড়িতে তাঁর জানালার পর্দা নীল হবে কি সবুজ হবে, সকালে সুভো রান্না হবে কি ছেঁচকি রান্না হবে—এসব সিদ্ধান্ত ব্যানার্জীর ভোট নিয়ে ঠিক হয়, না মহারানীর হুকুমে চলে? বিয়ে করলে নিজেই বুঝতে পারবে যে, হার মেজেস্টিস্ গভর্নমেন্টে আর যা-ই থাক, লিডার অব দি অপোজিশন নেই ।”

প্রবল উচ্চহাস্য উখিত হল সভায় ।

লজ্জাজড়িত আত্মপ্রসাদে মহিলার গৌরব গণ্ডয় রক্তিম হয়ে উঠল। প্রসঙ্গ চাপা দেওয়ার জন্য আমার দিকে তাকিয়ে বললেন, “আর কথা নয়। আসুন এবার খেলা যাক।”

হাত জোড় করে বললেন, “মাপ করবেন ও-বিদ্যে আমার একেবারে জানা নেই।”

“বলেন কী! আচ্ছা তা হলে খেলা থাক। গান করুন।”

“কী সর্বনাশ! তার চাইতে বরং কুতূবমিনারের উপর থেকে লাফিয়ে পড়তে বলুন। না-হয় আপনার খাতিরে তা-ই চেষ্টা করে দেখব। গান করলে অবশ্য লাফিয়ে পড়ার ইচ্ছাটা হবে আপনাদের।”

ব্যানার্জী বললেন, “তবে আবৃত্তি শোনান, রবি ঠাকুরের কবিতা।”

জবাবে বললেন, “ছোটবেলায় সংস্কৃত শব্দরূপ আর বড় হয়ে জুরিস্‌প্রুডেন্সের ধারা মুখস্থ করে করে কবিতা মনে রাখবার আর সময় পেলেম কখন?”

মিসেস বললেন, “আচ্ছা, তা হলে গল্প বলুন।”

ডাক্তার অধিকারী অ্যামেভমেন্ট যোগ করলেন—“প্রেমের গল্প।”

হেসে বললেন, “কর্নেল, প্রেমের হলে সেটা যে গল্পই হবে, সত্যি হবে না, সে তো জানা কথা। কিন্তু সে-গল্পও আমার জানা নেই। চান তো ভূতের গল্প বলতে পারি। জানেন, এই বাউলীর ধারে ঠিক আপনার ডাইনে মিসেস মিত্র যেখানটায় বসেছেন, সেখানে রাজরক্তের দাগ আছে? সম্রাট দ্বিতীয় আলমগিরকে এখানে হত্যা করা হয়।”

“ও মাগো!”—বলে ত্রিংশ করে লাফ দিয়ে সরে একেবারে দলের মাঝখানটিতে এসে বসলেন মিসেস মিত্র। বারবার নিজ শাড়ির দিকে পরীক্ষামূলক দৃষ্টিতে তাকাতে লাগলেন, সত্যিই রক্তের দু-একটি ছিটেফোঁটা তাঁর বসনে লেগেছে কি না সেই আশঙ্কায়। সবাই খানিকটা হেসে নিল। কিন্তু অন্যান্য মহিলারাও যে একটু চঞ্চল না হলেন তা নয়।

মিস্টার খোশ্‌লা মিসেস মিত্রের জন্য অত্যন্ত উদ্বিগ্ন হলেন। বারবার বলতে লাগলেন এমনভাবে মেয়েদের ভয় দেখানো মোটেই উচিত হয়নি। হঠাৎ ভয় পেয়ে শক্‌ লাগলে সাজাতিক ইত্যাদি ইত্যাদি।

অধিনায়িকা দমবার পাত্র নন। বললেন, “বেশ, বলুন ভূতের গল্প। সত্যি ভূতের হওয়া চাই কিন্তু। বানানো নয়।”

“মিসেস ব্যানার্জী, ভূত চিরকালই বানানো হয়ে থাকে। ভূতের গল্পের তো কথাই নেই। কিন্তু দুর্ভাগ্যের বিষয় তা-ও আমি জানিনে।”

মহিলা সবেগে মাথা নেড়ে বললেন, “না না, আপনি কেবলই ফাঁকি দিচ্ছেন। তাস খেলা নয়, গান নয়, গল্পও নয়। একটা-কিছু করুন।”

কর্নেল বললেন, “তাই তো হে, তোমার কেস খারাপ হচ্ছে। তুমি যদি কোনোকিছুই না পারো তবে মহারানীর গভর্নমেন্টে তোমার জায়গা হবে না।”



মহিলা বললেন, “সত্যি তো। আপনাকে নিয়ে করব কী? গান গাইতে জানেন না যে, বৈতালিক হবেন! পদ্য কইতে পারবেন না যে, সভাপণ্ডিতের চাকরি দেব। গল্প বলতে পারেন না যে, বয়স্য করব। এমন অকর্মা লোক আপনি, হবেন কী?”

যুক্তকরে বললেন, “আমি তব মালঞ্চের হব মালাকার।”

বিপুল হাস্যরোল।

## দশ

আরোগ্য-সম্ভাবনাহীন রোগীর অত্যাশন্ন মৃত্যু নিশ্চিত জানার পরেও যে প্রফেশন্যাল নির্লিপ্ততা নিয়ে ডাক্তার প্রেসক্রিপশন লিখে যান, ক্রিপস্-আলোচনা সম্পর্কেও বর্তমানে আমাদের সেই মনোভাব উপস্থিত। এর ব্যর্থতা সম্পর্কে নয়াদিগ্লিতে সমবেত জার্নালিস্টদের মনে এখন আর সংশয় নেই। প্রশ্ন এখন শেষমুহূর্তে হঠাৎ অপ্রত্যাশিত কিছু ঘটবার নয়, প্রশ্ন কবে আলোচনার অসাফল্য সরকারিভাবে ঘোষণা করা হবে।

অথচ মাত্র সপ্তাহ দুই পূর্বেও ক্রিপস্-দৌত্যের এই পরিণতি আশঙ্কা করার কারণ ছিল না। বরং এই রাজনৈতিক আলোচনা দ্বারা শীঘ্রই ভারতবর্ষ ও ব্রিটেনের মধ্যে একটা সম্মানজনক মীমাংসার ফলে ভারতে জাতীয় গভর্নমেন্ট প্রতিষ্ঠিত হবে, এই আশাই বেশির ভাগ লোকে পোষণ করেছে।

উনিশশো একচল্লিশ সালের ডিসেম্বর মাসে জাপান ব্রিটেন ও আমেরিকার বিরুদ্ধে যুদ্ধ ঘোষণা করল। প্রথম দিনেই পার্ল হারবার বিধ্বস্ত হল। তিন দিন পরে ব্রিটিশ নৌবহরের অন্যতম গর্ব ও নির্ভর প্রিন্স-অব-ওয়েলস ও রিপালস্ জাপানি বোমার আঘাতে প্রশান্ত মহাসাগরের গর্বে সলিলসমাধি লাভ করল। দেখতে দেখতে হংকং ও মালয় জাপানিরা কেড়ে নিল। ষোলোই ফেব্রুয়ারি সুদূর প্রাচ্যে ব্রিটিশের সর্বশ্রেষ্ঠ ঘাঁটি—যা দুর্ভেদ্য বলে সবার ধারণা ছিল—সিঙ্গাপুরের পতন ঘটল।

দুইশত বৎসরের ব্রিটিশ শাসনকালে এই প্রথম জল এবং স্থলপথে ভারতবর্ষ শত্রু-আক্রমণের সম্মুখীন। কর্তৃপক্ষের মনে উদ্বেগ, সাধারণের মনে ভীতি এবং সহজ-বিশ্বাসপ্রবণ অজ্ঞজনের অসংবদ্ধ রসনায় নানাবিধ ত্রাসজনক রটনার সৃষ্টি হল।

এই পরিস্থিতির মুখোমুখি দাঁড়িয়ে হাউস অব কমন্সে প্রধানমন্ত্রী চার্চিল ঘোষণা করলেন—ওয়ার ক্যাবিনেট সর্বসম্মতিক্রমে ভারতবর্ষের বর্তমান ও ভবিষ্যৎ সমস্যা সম্পর্কে একটি ন্যায়সঙ্গত ও চূড়ান্ত সমাধান—জাস্ট অ্যান্ড ফাইন্যাল সলিউশন—স্থির করেছেন এবং লর্ড প্রিভিসিল সার স্ট্যাফোর্ড ক্রিপস্ নিজের ভারতীয় নেতৃবর্গের সম্মতি সংগ্রহের জন্য মন্ত্রিসভার প্রস্তাবটি নিয়ে ভারতে যাচ্ছেন।

যুদ্ধ শুরু হওয়ার পর থেকে পুনঃ পুনঃ উপেক্ষিত হয়েছে জাতীয়তাবাদী ভারতের দাবি, বারংবার প্রত্যাখ্যাত হয়েছে কংগ্রেসের সহযোগিতার প্রস্তাব। মাসখানেক পূর্বে মার্শাল চিয়াং কাইসেক ও মাদাম এসেছিলেন ভারতবর্ষে। তাঁরা প্রকাশ্যে বিবৃতিতে ব্রিটেনকে ভারতীয়দের হাতে যথাসম্ভব ক্ষিপ্ৰতায় প্রকৃত রাজনৈতিক ক্ষমতা প্রদানের

অনুরোধ করেছিলেন। প্রেসিডেন্ট রুজভেল্ট তার পরেই সুস্পষ্ট ভাষায় চার্চিলের উক্তির প্রতিবাদ করে বললেন : অ্যাটলান্টিক চার্টার সমগ্র পৃথিবীর জন্য, কেউ তা থেকে বঞ্চিত হবে না। এবং প্রায় সঙ্গে সঙ্গেই অস্ট্রেলিয়ার বৈদেশিক মন্ত্রী এভাট সেখানকার পার্লামেন্টে ভারতের স্বাধীনতার দাবিকে ন্যায্য বলে স্বীকার করে বললেন, সে-দাবির প্রতি অস্ট্রেলিয়ানদের পূর্ণ সহানুভূতি আছে।

ভারতবর্ষে জনগণের স্বাধিকার প্রতিষ্ঠার প্রচেষ্টার প্রতি সম্মিলিত জাতিগুলির ক্রমবর্ধমান অনুকূল মনোভাব ও প্রকাশ্য উক্তি দ্বারা ব্রিটেনের রক্ষণশীল কর্তৃপক্ষ বিব্রত হচ্ছিলেন সন্দেহ নেই। কিন্তু তার চাইতেও গুরুতর কারণ ছিল প্রধানমন্ত্রীর ঘোষণায়। সে কারণ সহৃদয়তার নয়, অনুরোধ উপরোধ বা উপদেশজাত নয়। কারণ কঠোর বাস্তব ঘটনা-পরম্পরার। ৮ই মার্চ রেঙ্গুনের পতন হল, ব্রহ্মে ব্রিটিশশাসনের সমাপ্তি ঘটল। ভারতবর্ষের বিক্ষুব্ধ জনমতকে শান্ত ও ইংরেজের অনুকূল করার প্রয়োজনীয়তা ইতিপূর্বে এমন আর কখনও অনুভূত হয়নি। এগারোই মার্চ চার্চিল ক্রিপস্ মিশনের কথা ঘোষণা করলেন।

তবুও একথা মানতেই হবে যে, প্রধানমন্ত্রীর ঘোষণা ভারতবর্ষে অভূতপূর্ব উৎসাহের সঞ্চার করেছিল। এদেশের সংবাদপত্র ও জনসাধারণ ব্রিটিশ ওয়ার ক্যাবিনেটের এই নবপ্রচেষ্টাকে অভিনন্দিত করল। বোধ হয় এতদিনে সত্য সত্যই ব্রিটেন ভারতীয় সমস্যার সত্যিকার সমাধানে উৎসুক। ক্ষমতা-হস্তান্তরে স্বীকৃত।

ভারতে এই অনুকূল মনোভাবের পশ্চাতে ছিল মন্ত্রিসভার ভারপ্রাপ্ত আলোচনাকারী ব্যক্তিটির প্রতি ভারতবর্ষের আস্থা। সার স্ট্যাফোর্ড ক্রিপস্কে ভারতবর্ষ বর্তমান শতাব্দীর মুষ্টিমেয় ভারতহিতৈষী ইংরেজের মধ্যে অন্যতম জ্ঞান করে থাকে। ক্রিপস্ ইতিপূর্বে দুবার ভারতবর্ষে এসেছেন। কংগ্রেস-নীতি ও কর্মপদ্ধতির সঙ্গে তাঁর প্রত্যক্ষ পরিচয় আছে। পণ্ডিত জওহরলাল নেহরুর তিনি একজন অন্তরঙ্গ সুহৃদ। একাধিকবার ভারতে ইংরেজশাসনের ত্বরিত সমাপ্তি কামনা করে তিনি লেখনী চালনা করেছেন। বেশিদিনের কথা নয়, যুরোপে যুদ্ধঘোষণার সাত সপ্তাহ পরে হাউস অব কমন্সে দাঁড়িয়ে গভীর প্রত্যয়ব্যঞ্জক স্বরে ক্রিপস্ বলেছেন, “কংগ্রেসের নয়, ব্রিটিশ গভর্নমেন্টের অনমনীয় মনোভাবের জন্যই ভারতীয়দের ন্যায়সঙ্গত স্বাধীনতার দাবি আজও অপূর্ণ রয়েছে। সাম্প্রদায়িক কলহের কথাটা একটা ছুতা মাত্র।”

সেই ক্রিপসের আপোস আলোচনা নিরর্থক হতে চলল! মতভেদের বর্তমান কারণ দেশরক্ষার প্রশ্ন। ব্রিটিশ গভর্নমেন্টের প্রস্তাবানুসারে দেশরক্ষার ভার থাকবে একান্তভাবে প্রধান সেনাপতির হাতে। কংগ্রেসের দাবি, দেশরক্ষার দায়িত্ব দেশবাসীর। সে-দায়িত্ব পালনের জন্য জনসাধারণের মধ্যে যে অনুপ্রেরণা সঞ্চার প্রয়োজন তা একমাত্র ভারতীয় দেশরক্ষা সচিবের পক্ষেই সম্ভব, বিদেশি কমান্ডার-ইন-চিফের নয়।

যুদ্ধ পরিচালনার প্রত্যক্ষ ভার কংগ্রেস প্রধান সেনাপতির ওপর ন্যস্ত করতে রাজি ছিলেন। যে-ব্যাপারে তাঁকে সর্বাধিক স্বাধীনতাদানে কংগ্রেসের আপত্তি ছিল না। কিন্তু দেশরক্ষার মূল দায়িত্ব ভারতীয় দেশরক্ষা সচিবের হাতে না থাকলে স্বাধিকার

লাভের অর্থ থাকে না। বিশেষত যুদ্ধের সময়ে দেশের অন্যান্য সমস্যা ও ব্যবস্থা দেশরক্ষার বৃহত্তর প্রশ্নের দ্বারাই বহুলাংশে প্রভাবান্বিত। সত্যিকার দায়িত্ব ও স্বাধীনতালাভের পরিমাপ দেশরক্ষার নিরবচ্ছিন্ন অধিকারের দ্বারাই নিরূপিত হয়।

এই যুক্তির সারবত্তা অস্বীকার করা ক্রিপসের সাধ্য ছিল না। তাই তিনি বিকল্প প্রস্তাব করলেন, প্রধান সেনাপতি যুদ্ধ-সচিবরূপে সমর-পরিচালনাসংক্রান্ত দায়িত্ব পালন করবেন এবং দেশরক্ষা-সচিব আখ্যা নিয়ে একজন জনপ্রতিনিধি দেশরক্ষা ব্যবস্থার সঙ্গে যুক্ত থাকবেন।

ভালো কথা। কিন্তু এ দুজনের কর্মবিভাগ হবে কীভাবে? ক্রিপস প্রস্তাবিত নব দেশরক্ষা-সচিবের করণীয় কর্মের একটি তালিকা দিলেন। সে-তালিকায় আছে, (১) পেট্রোল সরবরাহ; (২) স্টেশনারি অর্থাৎ কাগজ, পেন্সিল, নিব, কালি, কলম কেনা, রাখার ভার, ফর্ম ছাপানো; (৩) ক্যান্টিন পরিচালনা ইত্যাদি ইত্যাদি।

গাভীর্য় রক্ষা করে এই তালিকাটি পাঠ করা কঠিন। এদেশের অন্তঃপুরে পানের ভিতরে লঙ্কার কুচি, লুচির মধ্যে ন্যাকড়া ও শরবতে চিনির বদলে নুন মেশানো প্রভৃতি কতকগুলি জামাই-ঠাকানো প্রাচীন মেয়েলি কৌতুকের কথা শোনা আছে। কিন্তু চল্লিশ কোটি নরনারীর ভাগ্য নিয়ে দুই দেশের নেতৃস্থানীয় ব্যক্তিদের মধ্যে যেখানে চরম গুরুত্বপূর্ণ আলোচনা চলেছে, সেখানে এই পিঁড়ির নিচে সুপুরি রেখে আছাড়-খাওয়ানো-রসিকতা নিশ্চয়ই কেউ প্রত্যাশা করে না।

অপরাহ্নে ইম্পিরিয়াল হোটেলে এক সাংবাদিক বন্ধুর চায়ের নিমন্ত্রণ ছিল। বন্ধুটি কংগ্রেসের সমর্থক নন, গান্ধীজিকে তিনি সাংসারিক বুদ্ধিহীন স্বপুবিলাসী-আনুপ্রাকটিক্যাল আইডিয়েলিস্ট মনে করেন। ভারতীয় নন। আমেরিকানও নন,—ইংরেজ। অত্যন্ত বিরক্তির সঙ্গে তিনি বললেন, “ব্রিটেনের কোন শত্রু এই তালিকাটি রচনা করে ক্রিপসের হাতে দিয়েছে? জাপানিদের টাকা খাচ্ছে এমন কোনো ফিফ্থ কলামিস্ট নয় তো?”

অসম্ভব নয়।

বন্ধুটি রীতিমতো ক্রুদ্ধ হয়েছিলেন। বললেন, “পেট্রোল, স্টেশনারি, ক্যান্টিন! ব্যাংরা কঠি ও দাঁতের খড়কে নয় কেন—হোয়াই নট ক্রুমস্টিকস অ্যান্ড টুথপিকস?”

ভারতবর্ষের প্রথম দেশরক্ষা-সচিব হবেন পণ্ডিত জওহরলাল নেহরু, এই কথা গত এক সপ্তাহ ধরে নানাভাবে আমরা আলোচনা করেছি। একবার কল্পনা করে দেখা যাক জাপানি আক্রমণ প্রতিরোধের জন্য সমগ্র দেশব্যাপী জনগণকে উদ্বুদ্ধ করে পণ্ডিত নেহরু তাঁর অনবদ্য ভাষায় বেতারে আবেদন করছেন, তার সঙ্গে পড়ে শোনাচ্ছেন কর্মের তালিকা—“পেট্রোল, পেন্সিল, নিব, আলপিন—।” পৃথিবীতে সব জিনিসেরই নাকি মাত্রা আছে। নেই কি শুধু নির্বুদ্ধিতার? পরিহাসের?

ব্রিটিশ কর্তৃপক্ষের বক্তব্য এই—যুদ্ধের সময় দেশরক্ষার দায়িত্ব ব্রিটেনের। সে-দায়িত্ব শুধু ভারতের অগণিত জনসাধারণের প্রতি নয়, সে-দায়িত্ব মিত্র জাতিসঙ্ঘের প্রতি, যাদের সঙ্গে সম্মিলিতভাবে ব্রিটেন যুদ্ধ করছে চক্রশক্তির বিরুদ্ধে। সে-দায়িত্ব তারা পরিত্যাগ করতে পারেন না।

দেশরক্ষার প্রশ্ৰুটি ভারতবর্ষের পক্ষে নানা দিক দিয়ে জটিল। ইংরেজিতে ন্যাশন্যাল আর্মি বলতে যা বুঝায় ভারতবর্ষের তেমন কোনো সেনাবাহিনী নেই। ভারতে সেনাবাহিনী গড়ে উঠেছে পেশাদার সিপাহিদল থেকে। ইস্ট ইন্ডিয়া কোম্পানির আমলে এই সিপাহিদের সংগ্রহ করা হত দেশের বিভিন্ন অঞ্চল থেকে। একের পর এক করে কোম্পানি নগর, প্রদেশ ও রাজ্য দখল করেছে, ধীরে ধীরে বৃদ্ধি করেছে সিপাহিদল, বেতনের আকর্ষণে।

সিপাহি-বিদ্রোহের অব্যবহিত পরে কোম্পানির হাত থেকে রাজ্যশাসনের ভার নিলেন মহারানী ভিক্টোরিয়া। সেনাবাহিনীও সম্রাজ্ঞীর অধীন হল। গুরু হল পরিবর্তন। সিপাহি-বিদ্রোহের ফলে দেশীয় সৈন্যদের সম্পর্কে কঠোর সতর্কতা অবলম্বনের প্রয়োজন বোধ করলেন ইংরেজ সামরিক কর্তৃপক্ষ। প্রতি দুটি ভারতীয় বাহিনীর সঙ্গে যুক্ত করলেন এক ব্রিটিশ বাহিনী, যাতে কোনোদিন কোনো কারণে ভারতীয় বাহিনী বিরুদ্ধভাবে পালন হলে অবিলম্বে দমন করা চলে তাদের। সিপাহি-বিদ্রোহের আগে ছয়টি ভারতীয় বাহিনীর সঙ্গে একটি মাত্র ব্রিটিশবাহিনী থাকত। গোলন্দাজ বাহিনীতে একটিও ভারতীয় নেওয়া হয়নি উনিশশো পঁয়ত্রিশ সাল পর্যন্ত। এই যুদ্ধের আগে পর্যন্ত অফিসার র‍্যাঙ্কে ভারতীয় যারা ছিলেন তাঁদের আঙুলে গোনা যায় এবং যারা ছিলেন তাঁদের মধ্যেও কেউ মেজরের উপরে ওঠেননি। সামরিক বিচারে বোধ করি তখন পর্যন্ত ভারতীয়দের মেজরিটি প্রাপ্তি ঘটেনি।

সবচেয়ে সতর্কতামূলক ব্যবস্থা হল সৈন্যদলের লোক নির্বাচনে। 'সামরিক' ও 'অসামরিক' জাতি, এই কৃত্রিম শ্রেণীবিভাগের দ্বারা ভারতীয় বাহিনী থেকে পাঞ্জাব ও সীমান্তপ্রদেশের অধিবাসী ছাড়া সমগ্র ভারতবর্ষের অন্যান্য প্রায় সব দেশের লোককে সম্বলিত করে রাখা হয়েছে। অথচ ইতিহাসে যাদের কিছুমাত্র দখল আছে তাঁরাই জানেন ভারতে ইংরেজের রাজ্যবিস্তারের এক প্রধান অংশ সম্ভব হয়েছিল বর্তমানে 'অসামরিক' জাতি বলে উপেক্ষিত বাংলা ও মাদ্রাজের সিপাহি সান্ত্রিদেরই বাহুবলে। বর্তমানে অত্যন্ত সহজবোধ্য কারণে যে-সকল ইংরেজ রাজনীতিক মুসলমানদের সামরিক কৃতিত্ব সম্পর্কে প্রশংসায় গদগদ এবং ইংরেজের অবর্তমানে ভারতে গৃহযুদ্ধ ঘটলে হিন্দুদের অসহায়ত্ব নিয়ে যারা প্রায় অশ্রুবর্ষণ করেন, সেই ভারতবন্ধুদের স্বরণ করিয়ে দেওয়া যেতে পারে যে, ইংরেজের রাজ্যবিস্তারের কালে যারা শ্রেষ্ঠ সামরিক শক্তি বলে স্বীকৃত ছিল এবং যাদের কাছে ইংরেজ সর্বাধিক প্রতিরোধ পেয়েছে, তারা মারাঠা ও শিখ। এদের প্রথমটির ধর্মমত অবিমিশ্রিত হিন্দু, দ্বিতীয়টিও হিন্দুধর্মেরই সংস্কারোত্তর রূপ। একটিও ইসলাম নয়।

পাঞ্জাব ও সীমান্তপ্রদেশের প্রতি সেনাবিভাগের এই পক্ষপাতিত্বের কারণ কী? কেউ বলেন, উত্তরভারতের লোকেরা সাধারণত দৈর্ঘ্য ও দৈহিক গঠনে দক্ষিণ ও পূর্বাঞ্চলের অধিবাসীদের চাইতে উন্নত। কিন্তু সেটাই সামরিক জাতি বলে চিহ্নিত হওয়ার পক্ষে যথেষ্ট নয়। গুর্খাদের তা হলে কোনোকালেই থাকি পরতে হত না। বিশেষ করে সৈন্যদের কৃতিত্ব যে-যুগে তাদের দৈহিক সামর্থ্যের ওপরেই নির্ভর করত, আগ্নেয়াস্ত্র উদ্ভাবনের সঙ্গে সঙ্গেই তার সমাপ্তি ঘটেছে।

কোনো বিশেষ অঞ্চল থেকে সৈন্য সংগ্রহের সুবিধা এই যে, তার ফলে একটা নতুন জাতিপ্রথা সৃষ্টি করা চলে। সামরিক বৃত্তি অনেকাংশে পারিবারিক হয়ে দাঁড়ায়। পুরুষানুক্রমে পিতামহ থেকে পিতা এবং পিতা থেকে পুত্র সেই বৃত্তি প্রসারিত হয় এবং একই বাহিনীতে বংশপরম্পরা চাকরির দ্বারা বাহিনীর প্রতি একটা কায়েমি স্বার্থবোধ জাগে। নিজকে তারা সে-বাহিনীর সঙ্গে ঘনিষ্ঠভাবে জড়িত অংশবিশেষ বলেই জ্ঞান করে। ঠিক যেমন করে কলকাতার বড় বড় বিলাতি কোম্পানিগুলির ক্যাশিয়ার, বড়বাবু বা বেনিয়ানরা। বিদেশি শাসকের পক্ষে শাসনযন্ত্রের প্রতি শাসিতের এই মমত্ববোধ সৃষ্টির সার্থকতা সামান্য নয়।

তার চাইতেও বড় কারণ আছে। সে-কারণ রাজনৈতিক। স্বীকার করতেই হবে যে, কিছুকাল পূর্বেও ভারতের উত্তর-পশ্চিম প্রান্ত ছিল রাজনৈতিক চেতনাহীন। সিপাহি-বিদ্রোহের সময় পাঞ্জাব ছিল একমাত্র প্রদেশ যেখানে ইংরেজের বিরুদ্ধে দেশীয় জনগণ অস্ত্র ধরেনি। আধুনিককালে ও ভারতের অন্যান্য প্রদেশের তুলনায় পাঞ্জাবে জাতীয় জাগরণের চিহ্ন অপেক্ষাকৃত ক্ষীণ। গদর দল ও কোমাগাটামারুকে নিয়ে যারা পাঞ্জাবের দেশপ্রাণতার প্রশস্তি রচনা করেন, তাঁদের স্মরণ রাখা প্রয়োজন যে, সে-পাঞ্জাবিরা বিদেশে গিয়েই দেশাত্মবোধের দ্বারা উদ্বুদ্ধ হয়েছিল, দেশে থাকতে নয়। সাধারণ পাঞ্জাবি সচ্ছল জীবনযাত্রা, মোটা মাইনে, অজস্র আহার ও দামি পোশাক পেলেই খুশি থাকে, দেশ নিয়ে বড় একটা মাথা ঘামায় না। ভগৎ সিং-এরা নিয়ম নয়, ব্যতিক্রম মাত্র।

ভারতীয় সেনাবিভাগে বাঙালিরাই সবচেয়ে বেশি অব্যস্তিত। আর্মির মনুসংহিতায় তারা হরিজন। আশ্চর্য নয়। বিংশ শতাব্দীর প্রথমার্ধ থেকে শুরু করে তারাই ভারতে ব্রিটিশশাসনের প্রতিবাদ করেছে অবিরত, সংগ্রাম করে আসছে অমিত তেজে। ভারতের আধুনিক জাতীয় জাগরণের প্রথম উন্মেষ ঘটেছে এইখানে। জাতীয় যজ্ঞে এখানে মায়েরা আহুতি দিয়েছে পুত্র, মেয়েরা দিয়েছে প্রেরণা, ছেলেরা দিয়েছে প্রাণ। এদের প্রভাব ক্ষুণ্ণ করতে কার্জন করেছে বঙ্গ-বঙ্গ, হার্ডিঞ্জ স্থানান্তরিত করেছে রাজধানী, ম্যাকডোনাল্ড কায়েম করেছে কমিউন্যাল অ্যাওয়ার্ড। সর্বনাশ! এদের সেনাদলে নিলে রক্ষে আছে? এইখানে স্মরণ করা অপ্ৰাসঙ্গিক নয় যে, সিপাহি বিদ্রোহের প্রথম লক্ষণও প্রকাশ পেয়েছিল বাংলাদেশেরই এক ছাউনিতে। ব্যারাকপুরে।

‘সামরিক জাতির’ প্রতি এই পক্ষপাত ব্রিটিশশাসনের পক্ষে সহায়ক হয়েছে সন্দেহ নেই। অভাব-অভিযোগের ফলে পাছে তাদের ব্রিটিশ-অনুরক্তি হ্রাস পায় সেজন্য ব্রিটিশ শাসকেরা এই ‘সামরিক জাতির’ পার্থিব কল্যাণসাধনে অনেকটা তৎপর হয়েছেন, সেকথাও সত্য। সেনাবিভাগের বেতনের হার ও পেনশন সাধারণ দরিদ্র গ্রামবাসীর পক্ষে যথেষ্ট লোভনীয়। তা ছাড়া বার্ষিক্যে অবসরগ্রহণকালে অনেকে জায়গিরও পেয়েছে।

পাঞ্জাব সেনাবিভাগের সৈন্য ও অশ্ব জোগায়, তাই পাঞ্জাব সর্বদাই কর্তৃপক্ষের অধিকতর সম্মেহ মনোযোগ লাভ করে এসেছে। কৃষির উন্নতি, স্বাস্থ্যোন্নয়ন-পরিকল্পনা

পাঞ্জাবে হয়েছে বেশি। সমবায় আন্দোলন ও কৃষিবিদ্যার গবেষণা শুরু হয়েছে সেখানে এবং ভারতে ব্রিটিশযুগের সর্বাপেক্ষা বিশ্বয়কর ও ব্যয়বহুল কৃত্রিম সেচকার্যের নিদর্শন আছে পাঞ্জাবে ও সিন্ধুপ্রদেশে। সেখানে বেশির ভাগ চাষিরই ক্ষেতে ধান, গোয়ালে গরু এবং ঘরে আর্মির মেডেল আছে। সেখানে সাহেবকে বলে হজুর, দারোগাকে বলে ধর্মান্বিতার, গভর্নমেন্টকে বলে সরকার বাহাদুর। সেখানে স্বরাজের গরজ থাকবে কার?

কিন্তু বন্যা যখন আসে, তখন তাকে বালির বাঁধ দিয়ে ঠেকানো যায় ক'দিন? সমুদ্র যদি ক্যানুটের আদেশ মেনেই চলত তবে আর ভাবনা ছিল কী? সমস্ত প্রতিষেধক ও সাবধানতা ব্যর্থ করে দেশাচ্ছবোধের ধারা এগিয়ে এসেছে ধীরে ধীরে। ভারতবর্ষের পূর্ব, পশ্চিম, উত্তর, দক্ষিণ—কোথাও কোনো প্রান্তে তার আর বাধা রইল না। পশ্চিম-সীমান্তে খান আব্দুল গফুর খান এই ভাবগঙ্গার ভগীরথ।

এই বহু অনুগৃহীত অঞ্চলের রাজনীতির সম্পর্কবর্জিত সরল অধিবাসীদেরও তাদের স্বদেশ ও স্বজাতির বিরুদ্ধে পুনঃপুনঃ ব্যবহার এখন আর আগের মতো নিরাপদ নয়। বোধ হয় অনেকেই জানেন না যে, উনিশশো ত্রিশ সালে সত্যগ্রহ আন্দোলনের কালে একদল হিন্দু গাড়োয়াল সৈন্য পেশোয়ারে মুসলিম স্বৈচ্ছাসেবকদের উপরে গুলিবর্ষণে অস্বীকৃত হয়ে অস্ত্র পরিত্যাগ করেছিল। সে-সংবাদ এদেশের খবরের কাগজে প্রকাশ পায়নি, অর্থাৎ প্রকাশ করতে দেওয়া হয়নি।

সম্প্রদায়ের দিক দিয়ে উনিশশো একচল্লিশ সাল পর্যন্ত এই সেনাদলের শতকরা ৩৫ ভাগ ছিল মুসলমান, ২৩ ভাগ শিখ ও ৪২ ভাগ হিন্দু। লক্ষ করার বিষয় এই যে, এ-হিসাব থেকেও হিন্দুদের বিরুদ্ধে বহুপ্রচারিত সামরিক অযোগ্যতার অপবাদ মিথ্যা প্রমাণিত হয়।

খুব সামান্য হলেও ভারতবর্ষের সামরিক নীতির প্রথম পরিবর্তন ঘটে প্রথম মহাযুদ্ধ অবসানের পর। একান্তভাবে যুরোপীয় অফিসার-পরিচালিত বাহিনীর সামান্য অংশে ভারতীয়করণের সিদ্ধান্ত গৃহীত হয়। ভারতীয়েরা সেনাবিভাগের কিং'স কমিশন প্রাপ্তির যোগ্য বিবেচিত হয় এবং ভারতীয় সেনানায়কদের শিক্ষাদানের উদ্দেশ্যে দেরাদুনে ভারতীয় স্যান্ডহাষ্ট-এর প্রতিষ্ঠা ঘটে।

বর্তমান যুদ্ধে এই ভারতীয়করণ দ্রুত হয়েছে। বলা বাহুল্য, ভারতীয়দের প্রতি মমত্ববোধে নয়, ইংরেজের নিজ প্রয়োজনের তাগিদে। অসামরিক জাতি বলে সেনাবিভাগে ইতিপূর্বে যাদের প্রবেশের সম্ভাবনা মাত্র ছিল না, তারাও এখন অফিসার হতে পারে। অবশ্য এই বাধা অপসারণের ফলে সেনাবিভাগে বাঙালির সংখ্যা এখনও খুব উল্লেখযোগ্য বলে আমার বিশ্বাস নেই, যদিও বিমানবহরে তাদের সংখ্যা তেমন হতাশাজনক নয়। সুদক্ষ বৈমানিকরূপে কয়েকজন বাঙালি তরুণ ইতিমধ্যেই যথেষ্ট খ্যাতিও অর্জন করেছেন।

এতকাল ভারতবর্ষে দেশরক্ষার ব্যবস্থার ভিত্তি ছিল উত্তর-পশ্চিম সীমান্তে। কমান্ডার-ইন-চিফের সবগুলি কামানের মুখ ছিল আফ্রিদিদের দিকে। একচক্ষু হরিণের মতো পার্ল হারবার বিধ্বস্ত হওয়ার পরে সেনাপতিরা প্রথম

হৃদয়ঙ্গম করলেন, বিপদ ঠিক সেদিক থেকেই উপস্থিত যেদিকে তার সম্ভাবনা তাঁরা কল্পনাও করেননি।

যুদ্ধশাস্ত্র মতে জাপানের বিরুদ্ধে ভারতের প্রথম প্রতিরোধ-ব্যবস্থা হওয়া প্রয়োজন নৌবহর। তা নেই। জলপথ সবটাই শত্রুর দখলে। ব্রিটিশ ও ভারতীয় যে পেশাদার সেনাবাহিনী ভারতে বর্তমান, তা আধুনিক যুদ্ধযন্ত্রে পুরোপুরি সজ্জিত নয় এবং তাদের ঘাটিগুলি সম্ভাবিত রণক্ষেত্র থেকে বহুশত যোজন দূরে দেশের অপর পাশে।

এই আসন্ন আক্রমণের বিরুদ্ধে ভারতবর্ষের আত্মরক্ষার উপায় কী, এ-প্রশ্ন সামরিক কর্তৃপক্ষের মনে উদ্ভূত হয়েছে কি না জানার উপায় নেই। কিন্তু অস্ত্রশস্ত্রহীন যুদ্ধবিদ্যায় অভিজ্ঞতাশূন্য জনসাধারণের মনে এ-জিজ্ঞাসা জেগেছে। অবশেষে একজন এই প্রশ্নের উত্তর নির্দেশ করলেন। তাঁর নাম পণ্ডিত জওহরলাল নেহরু।

পঞ্চাশ লক্ষ ভারতীয় সৈন্য সংগ্রহের এক পরিকল্পনা প্রস্তুত করলেন জওহরলাল। কাশ্মীরি পণ্ডিতের বংশধর তিনি। তাঁর উর্ধ্বতন পূর্বপুরুষ রাজকাউল ছিলেন প্রখ্যাতনামা পারশি ও সংস্কৃতজ্ঞ পণ্ডিত, প্রপিতামহ লক্ষ্মীনারায়ণ নেহরু ছিলেন মুঘল দরবারে নামকরা ব্যবহারজীবী। অ্যাডভোকেট জনকের সন্তান জওহরলাল নিজেও মসিজীবীরূপেই কর্মজীবন শুরু করেছিলেন। দেশরক্ষার আয়োজনে তিনিই সর্বপ্রথম পরিকল্পনা করলেন সর্বসাধারণের অসিচালনার। জনগণের কথা যিনি তাবেন তাঁকেই তো আমরা বলি জনগণ-মন-অধিনায়ক।

অস্ত্র? চাই বৈকি। অবশ্যই চাই। পঞ্চাশ লক্ষ সৈন্যের অস্ত্র জোগাতে দেশে নতুন কলকারখানা স্থাপন ও পুরাতন কলকাখানার বিস্তার প্রয়োজন। সেটা সময়সাপেক্ষ। শত্রু তো তার জন্য অপেক্ষা করবে না। পণ্ডিতজি অত্যন্ত নিকটে থেকে গভীরভাবে অনুধাবনের সুযোগ পেয়েছিলেন স্পেন ও চীনের গণবাহিনীর যুদ্ধসজ্জা ও যুদ্ধরীতি। স্পেনে চাষি-মজুরদের সমিতি থেকেই গড়ে উঠেছিল সেনাবাহিনী। তার মধ্য থেকেই উদ্ভব হয়েছে একাধিক সেনাপতির যারা প্রথমজীবনে কেউ চালিয়েছে লাঙল, কেউ বুনেছে তাঁত। চীন থেকে যুদ্ধবিদ্যা শেখাবার লোক আনার পরিকল্পনা করলেন জওহরলাল।

গতিশীলতা, ইংরেজিতে যাকে বলে মোবিলিটি, সেই হল এই বাহিনীর সর্বাপেক্ষা সুবিধা। রাইফেলের অভাবে হাতবোমা দিয়ে এর কাজ চলে। সর্বত্র এদের সহযোগিতার জন্য গ্রামবাসীরা হত ব্যগ্র। ক্ষুধায় অন্ন এবং বিপদে আশ্রয় জোগাত তারা। দেশপ্রাণতার প্রেরণায় এই বাহিনীর নিজস্ব বৈশিষ্ট্য থাকত। যুরোপীয় পরিচালনায় বেতনভুক সৈন্যদলের মতো তারা আদেশপালনের যন্ত্রমাত্র হত না!

জনশ্রুতি এই যে, কোনো কোনো ব্রিটিশ সেনাধ্যক্ষও এই পরিকল্পনা শ্রদ্ধার সঙ্গে পরীক্ষা করে দেখার পক্ষপাতী ছিলেন এবং বিলাত থেকে মেজর টম উইনট্রিংহ্যাম ভারতবর্ষে এসে এই সৈন্যবাহিনীর শিক্ষার ভার গ্রহণ করবেন এমন প্রস্তাবও শোনা গেছে। উইনট্রিংহ্যাম স্পেনে ফ্রান্সের বিরুদ্ধে যুদ্ধের সময় গণতান্ত্রিক দলের সৈন্যবাহিনীর সঙ্গে সংশ্লিষ্ট ছিলেন। কিন্তু পণ্ডিত নেহরুর পরিকল্পনা ব্রিটিশ গভর্নমেন্ট শ্রীতির চোখে দেখবেন এ-আশা যারা করেছিলেন তাঁরা যা-ই হোন মানবচরিত্র সম্পর্কে যথেষ্ট অভিজ্ঞ নন। তাঁদের জানা উচিত ছিল, ব্রিটিশ প্রস্তাবে

সৈন্যসামন্ত বা অস্ত্রশস্ত্রের কথা থাকে না। থাকে পেট্রোল, স্টেশনারি ও ক্যান্টিন। রুল ব্রিটেনিয়া, ব্রিটেনিয়া রুল্‌স্‌ দি শ্লেভ্‌স্‌।

ইম্পিরিয়াল হোটেল থেকে ফিরছি স্বস্থানে। গেটের বাইরে এলে দাঁড়াতেই দেখি হঠাৎ ব্রেক কমে সশব্দে একটি গাড়ি দাঁড়াল একেবারে ঠিক সামনে। গাড়ির ভিতর থেকে মুখ বাড়িয়ে আরোহীটি বললেন, “তাই তো, আমাদের বোঁচকা যে! এখানে কী করছিস? আয় উঠে আয়।”

বোঁচকা আমার পিতৃ বা মাতৃদত্ত নাম নয়। পারিবারিক সম্বোধনও নয়। কিশোর বয়সে সহপাঠীদের দ্বারা আবিষ্কৃত উত্যক্ত করার একটি অভিজ্ঞা মাত্র। লাটিমের অধিকার, আমসত্ত্বের অংশ ও বিষ্কুটের বন্টন নিয়ে মতভেদজনিত কলহের পরিণামে বিষ্কুট পক্ষ ঐ শব্দটির পুনঃ পুনঃ আবৃত্তি দ্বারা আমার উপরে প্রতিশোধ গ্রহণের চেষ্টা করত এবং বহুলপরিমাণে সফলকামও হত। মনে আছে, অনেকদিন খেলার মাঠে বা ক্লাসে ঐ নামটা শুনে ক্রোধে ও অপমানে প্রচুর অশ্রুপাত করেছি।

নামটা একেবারে আকস্মিক নয়। তার পশ্চাতে কিঞ্চিৎ ইতিহাস আছে।

প্রথমে যেদিন বৃন্দাবন পণ্ডিতের পাঠশালায় বিদ্যারম্ভ, সেদিন দিদিমা একখানা শান্তিপুরী জরিপাড় ধুতি ও সিক্কের জামা পরিয়ে দিয়েছিলেন। পোশাকটা গুরুগৃহগামী ব্রহ্মচারী বিদ্যার্থীর চাইতে সদ্য-বিবাহান্তে শ্বশুরালয়ে আগত জামাতা বাবাজির পক্ষেই অধিকতর উপযোগী ছিল সন্দেহ নাই। কিন্তু বিপদ দেখা দিল বস্ত্রটি নিয়েই। প্রথমত তার অবস্থান যথাস্থানে রাখা রীতিমতো আয়াসসাধ্য ব্যাপার, তার উপরে সময়ে কুণ্ঠিত লম্বমান কোঁচার প্রান্তভাগ মাধ্যাকর্ষণের ফলে কেবলই নিম্নাভিমুখি হয়ে ভূমিতে লুপ্তিত হয়। এক হাতে স্নেট ও পণ্ডিত ঈশ্বরচন্দ্র বিদ্যাসাগর মহাশয়ের বর্ণ-পরিচয়, অপরহাতে ধূত শিখিলবন্ধন বসনের প্রান্তভাগ। কোনোরকমে তালপাকানো অঙ্গুলভাগ, দেখতে পোটলা-আকৃতি।

গোঁসাইদের বাড়ির সিধু ছিল পাঠশালার সর্বাপেক্ষা বখা ছেলে। বয়সে অন্য ছাত্রদের চাইতে অনেক বড়। লেখাপড়ায় বৃহস্পতি। বার দুই ধরে এক ক্লাসেই আছে। এরই মধ্যে বিড়ি ধরেছে। কাছে এসে অত্যন্ত নিরীহের মতো প্রশ্ন করল, “হাতে বোঁচকাটি কিসের বাপু, মুড়কির না বাতাসার?” ক্লাসসুদূর সবাই হেসে উঠল। সেই থেকে শুরু হল বোঁচকা। খাতা নিয়ে, পেন্সিল নিয়ে ঝগড়া হলেই বলে, বোঁচকা। সিধুকে কত সাধ্যসাধনা করেছি। এস্তার মার্বেল, রাশি রাশি জলছবি ঘুস দিয়েছি। আর যেন কোনোদিন না বলে। পরম পরিতৃপ্তির সঙ্গে জিনিসগুলি পকেটে পুরে প্রতিশ্রুতি দিয়েছে, “খেপেছিস? আর বলি কখনো বোঁচকা? তোর ঐ লাল পেন্সিলটা কিন্তু আমায় দিতে হবে।”

কিশোর বালকের পক্ষে সেদিন ঐ লাল পেন্সিলটা দান করা কর্ণের কবচকুণ্ডল দানের চাইতে কোনো অংশে কম কঠিন ছিল না। কিন্তু তাতেও স্বীকৃত হয়েছি। অত্যন্ত অনুনয় করে বলেছি, “দেখো ভাই, অন্য ছেলেরা যেন আর না বলে, বারণ করে দিয়ে।”



সিধু পেন্সিলটার ডগায় জিভের লাল লগিয়ে কাগজে মোটা অক্ষরে নিজের নাম লিখতে লিখতে অত্যন্ত তাচ্ছিল্যের সঙ্গে মন্তব্য করল, “হু, বলুক দেখি সাহস আছে কোন্‌ শা—”

সিধুর বিবাহের নিকট বা সুদূর কোনো সম্ভাবনাই তখন ছিল না। কিন্তু তার সম্ভবপর পত্নীর কাল্পনিক সহোদরের উল্লেখ না করে কোনো একটা বাক্য সমাপ্ত এবং আরম্ভ করা তার পক্ষে কঠিন। ঐ বয়সেই ভাষায় তার এমন শব্দসম্ভার যা এ-বয়সেও উচ্চারণ করা আমাদের পক্ষে সম্ভবপর নয়।

কিন্তু প্রতিশ্রুতি দান ও তা পালনের মধ্যে সামঞ্জস্যসাধন নিয়ে সিধুর কোনো চিন্তা ছিল না। এ-বিষয়ে তার রেকর্ড প্রায় ব্রিটিশ গভর্নমেন্টের সমতুল্য। পরের দিনই ক্লাসে পণ্ডিত মহাশয়ের উপস্থিতি সত্ত্বেও পিছনের বেঞ্চি থেকে পরিচিত কণ্ঠের চাপা স্বরে আওয়াজ এল, বোঁচ্...অমনি চারিদিক থেকে অন্য ছাত্রেরা স্লেটের আড়ালে মুখ লুকিয়ে হাসি চাপতে চেষ্টা করল—হিঃ হিঃ হঃ হঃ, ফিক্‌।

কাছে এসে দেখি সিধুই বটে। যদিও চেনা খুব সহজ নয়। পরনে লাইট গ্রে রঙের শার্কস্কিনের মহার্ঘ সুট, পায়ে দামি বিলাতি জুতা যার চকমক-করা পালিশে প্রায় মুখ দেখা যায়। দুই হাতে গোটা চারেক আংটি, পকেটে পার্কার ফিকটি ওয়ান কলম ও পেন্সিলের সেট, যা একমাত্র আমেরিকান সেনানায়কদের কাছে ছাড়া এদেশে এখনও আর কেউ দেখিনি বললেই হয়। এই কি সেই সিধু যে পাঁচ বছর আগে পটলডাঙার পাইস হোটেলের নিচের তলায় এক টাকা বারো আনা ভাড়ায় আর দুজন লোকের সঙ্গে একটা অঙ্ককার কুঠুরিতে থাকত? কোন তেলের কলের বিল কালেক্টর ছিল, মাইনে আঠারো টাকা। চিবুকের নিচে কালো বড় আঁচিলটা না থাকলে সিধু বলে বিশ্বাস করাই কঠিন হত।

“তুই এখানে কেন? বিলাত থেকে ফিরলি কবে? বিয়ে থা করেছিস তো?” একসঙ্গে তিনটা প্রশ্ন করল সিধু।

“সেসব পরে হবে, তোমার খবর কী বলো দেখি?”

“আমার খবর ভালো। মিলিটারি কন্ট্রোল করছি। হাতে দুপয়সা আসছে রে।” সেকথা বিশেষ করে বলার প্রয়োজন ছিল না।

তার কাহিনী যা শোনা গেল, সংক্ষেপে তা এই : তেলের কলের সেই চাকরি ছেড়ে সে অনেক কিছু করেছে। সাবানের ক্যানভাসারি, এক টাকার ইনসিওরেন্সের দালালি, মায় কাগজের প্যাকেটে চানাচুর বিক্রি পর্যন্ত। কোনোটাতেই কিছু হয় না। মাসের মধ্যে দুবেলা দুমুঠো ভাত জোটে না অনেকদিন, এমন অবস্থা। হঠাৎ বাধল যুদ্ধ। এরোড্রাম তৈরি করে এমন এক কন্ট্রোল্লরের মধ্যে কুলি-তদারকের কাজ নিয়ে চলে গেল আসামের কোন জঙ্গলে। সেখানেই কপাল ফিরল। কিছু হাতে নিয়ে এসে বসল কলকাতায়। প্রথমে ছোটখাটো জিনিস সাপ্লাই, পরে বড় বড় কন্ট্রোল্লি। এখন দিন্মিতে এসেছে ডিপার্টমেন্টের কোন-এক বড়সাহেবকে ধরতে।

পুরনো দিল্লির সুইস হোটেলে তার আস্তানা। সেখানে এসে গাড়ি থেকে নেমে নিয়ে গেল তার ঘরে। জিজ্ঞাসা করল, “থাকিস কোথায়? কুইনসওয়ে? আচ্ছা গাড়ি তোকে নামিয়ে দেবে সেখানে। এই দেখো ড্রাইভার, আভি ঠাহরো। এ সাবকো কুইনসওয়ে ছোড়নে পড়িগি।” কুলির তদারক করে হিন্দিটা রঙ করেছে সিধু মন্দ নয়।

বাধা দিয়ে বললেম, “না না, আমার জন্য ভাবনা নেই। আমি বাস নেব এখান থেকে।”

“খ্যাপা নাকি? বাসে যা ঝাঁকুনি আর যা ভিড়! ভদ্রলোকের ওঠা দায়। গাড়ি থাকতে সে-দুর্ভোগ কেন? ভাড়া তো তাকে পুরোদিনের জন্যই দিচ্ছি।”

এতক্ষণে বুঝলেম, গাড়িটা ট্যাক্সি এবং সমস্ত দিনের জন্যই ভাড়া করা হয়েছে। নয়াদিল্লির ট্যাক্সিতে মিটার নেই, তার নম্বরও ‘টি’ দিয়ে আরম্ভ নয়। না জানলে বুঝবার সাধ্য নেই যে, ভাড়াটে গাড়ি। কিন্তু বিশ্বয়ের অন্ত পাইনে। ঝাঁকুনি আর ভিড়ের জন্য সিধুর ন্যায় ভদ্রব্যক্তির বাসে ওঠা দায়! মনে আছে, পটলডাঙা থেকে দুপুর রোদে পায়ে হেঁটে একদিন টালিগঞ্জ দেখা করতে এসেছিল এই সিধু। সে খুব বেশিদিনের কথা নয়।

বয়সে হইকি হকুম করল সিধু। নিষেধ করলেম। হেসে বললে, “ভাবছিস বুঝি ‘সোলান’ কিংবা ‘মারি’? ওসব দেশি মাল ছোঁবে এমন শর্মা নয় সিধুচন্দ্র। চেখেই দ্যাখো-না! খাস স্কচ। খাসা। বাবা খাব তো খাটি জিনিস খাব, নয়তো নয়।”

“সেজন্য নয়। কিন্তু স্কচ পাও কোথায়? বাজারে তো শুনেছি—।”

“হ্যাঁ, সাদা বাজারে নেই, কিন্তু কালো বাজারে অভাব কী? ভাইরে, সবই টাকার মামলা। ঝনঝনে ফ্যালো, জিনিস দেবে না কোন শা—”

স্বচক্ষে দেখলাম কথায় এবং কাজে তফাত করে না সিধু। তিন বোতল সোডা কিনে এনে একটা পাঁচ টাকার নোটের অবশিষ্ট ফেরত দিচ্ছিল বেয়ারা। “ঠিক হ্যায়, লে যাও” বলে অত্যন্ত নির্লিপ্ত ঔদাসীণ্যে সমস্তটাই বকশিশ করল তাকে। লোকটা আত্মমিপ্রণত সেলাম করে প্রস্থান করল।

সিধু তার বর্তমান দিল্লি-আগমনের কারণ ব্যক্ত করল। কলকাতায় ছোট সাহেব নাকি তার নামে লাগিয়েছে অনেক কিছু। এখান থেকে তাই তার ফ্যাক্টরি দেখতে যাবে কোনো-একজন অফিসার। সুতরাং একটু ভাবনায় ফেলেছে।

ভাবনাটা কিসের ঠিক বুঝতে পারলেম না। দেখে আসুক-না ফ্যাক্টরি, ক্ষতিটা কিসের?

সিধু বিরক্ত হয়ে বলল, “আরে ফ্যাক্টরি থাকলে তো দেখবে! ফ্যাক্টরিই নেই যে!”

“ফ্যাক্টরি নেই, তবে মাল জোগাচ্ছ কেমন করে?”

“তুই এখনও সেই বোঁচকাই আছিস। বিলাত ঘুরেও বুদ্ধি খুলল না এতটুকু! আরে মাল জোগাবার জন্যে ফ্যাক্টরি থাকার দরকার কী? অন্য লোকের ফ্যাক্টরি নেই? সেখান থেকে তৈরি করিয়ে নিজের লেবেলে চালাতে আটকাবে কোন শা—? ছাপাখানার কিছুটা খরচ আছে। খানকয়েক চালান ফরম, লেটারহেড, রাবার স্ট্যাম্প, ব্যাস। অর্ডার কি ফ্যাক্টরি দেখে হয়? অর্ডার তো হয়” বলে মুখে-চোখে এমন একটা

ইঙ্গিত করল যে, তার অর্থ কিছুটা স্পষ্ট ও কিছুটা ঝাপসা হয়ে আমার কাছে একটা প্রহেলিকার সৃষ্টি হল!

জিজ্ঞাসা করলেম, “মাল জোগাচ্ছ এত দিন, এর মধ্যে তোমার ফ্যান্টরি আছে কি নেই সে-খোঁজ হয়নি?”

“হবে না কেন? তিন-চার বার ইন্সপেকশন হয়ে ভালো রিপোর্ট চলে গেছে। এবারও কি যেত না? শা—ছোট সায়েব ব্যাটার খাঁই বেড়েছে এত যে, আর মিটাতে পারছি নে। তাই-না এ-ঝামেলা। যাক, পরোয়া করিনে। জানতে পারব সবই।”

“কেমন করে?”

“কেন, আপিসের কেরানিরাই খবর দেবে। দেবে না? আরে ভাই দেবে কি আর অমনি? সংসারে বিনিয়সায় পরহিতার্থে আর কাজ করে কোন শা—? আশি টাকার কেরানি, একসঙ্গে পাঁচশো টাকা দেখেছে এর আগে? খবর তো খবর, দরকার হলে ফাইলকে ফাইল গাপ করিয়ে দেওয়ার দাওয়াই পর্যন্ত জানি। এই যে মধুবাবু, আসুন, আসুন। কী খবর? আচ্ছা এক মিনিট বোস ভাই, ঐর সঙ্গে একটু প্রাইভেট—চলুন মধুবাবু বারান্দায়।” সদ্য-আগত আগন্তুককে নিয়ে বাইরে গেল সিধু।

প্রায় মিনিট কুড়ি পরে ফিরে এসে বলল,—“মোটা হাতে কিছু ঢালতে হবে দেখছি। যাক পরে পুষিয়ে নেব।”

বিস্মিত হওয়ার পালা শেষ হয়ে গেছে অনেকক্ষণ আগেই। শুধু জিজ্ঞাসা করলেম, “আচ্ছা এসব কি শেষ পর্যন্ত চাপা থাকে? ডিপার্টমেন্টের অন্য লোকেরা কি জানতে পারে না?”

“কেমন করে জানবে? এই যে এসেছিলেন ভদ্রলোক, খবর দিয়ে গেলেন কোন সায়েব যাচ্ছে এখান থেকে তদন্ত করতে, কবে যাচ্ছে ইত্যাদি। আপিসে যখন যাব তখন উনি কি আমার সঙ্গে কথা কইবেন, না কিছু? এমন ভাব দেখাবেন যে, জীবনে এর আগে কখনও আমাকে চোখেও দেখেননি। ব্যস, তা হলেই হল। সব কাজেরই সিস্টেম আছে তো!”

একজন বেয়ারা গোটা দুই বিরাট প্যাকেট নিয়ে এসে বলল, “ফেল্লস্ কোম্পানি পাঠিয়েছে।” সিধু বললে, “ঠিক হয়। কাল দোকানে সওদা করেছে কিছু। তা-ই পাঠিয়েছে। দ্যাখ তো জিনিসগুলি। তোরা মডার্ন টেস্টের লোক, আপ-টু-ডেট ফ্যাশানের খবর রাখিস। হ্যাঁ, শার্ট। এক ডজন। ছাব্বিশ টাকা পনেরো আনা করে একটা। ওদের সেই পনেরো আনার কায়দা জানিস তো? পুরা সাতাশ টাকা লিখবে না কিছুতেই। রুমাল! হ্যাঁ, পিরামিড। ডজন সত্তর টাকা। পাওয়া যে যাচ্ছে এই ঢের, সত্তর হলেই কী, আশি হলেই কী? এটাকে কী বলে রে? দেখছি আজকাল আমেরিকান সাহেবরা পরে খুব। ডার্কিন? ডার্কিন নয়? তবে কী? জার্কিন? বর্গীয় জয়ে আকার তো? দোকানে তো আর জিনিসের নাম জিজ্ঞাসা করতে পারিনে। ভাববে কী? কিনলেম তো, কখন পরব সে পরে দেখা যাবে। দাম বেশি নয়। দুশো আশি টাকা। চামড়াটা ভালো কোয়ালিটির।” বিল দেখলাম, আরও খুঁটিনাটি অনেক কিছু মিলিয়ে

সাতশো টাকার উপরে। সায়েব তার ওয়ালেট খুলে দুখানা পাঁচশো টাকার নোট বেয়ারার হাতে দিল দাম চুকিয়ে দিতে।

চুপ করে স্বরণ করতে চেষ্টা করলেম, এর আগে ঠিক কখন সিধুর গায়ে তালিহীন জামা দেখেছি।

প্রচুর আদর-আপ্যায়ন করল সিধু। বাল্যবন্ধুর প্রতি তার এই সহৃদয়তা দেখে মুগ্ধ হওয়া উচিত। তার চালচলন দেখে বুঝতে কষ্ট হয় না যে, আমাকে দশ বছর মাইনে-করা কর্মচারী করে রাখার মতো অর্থ আছে তার ব্যাঙ্কে। কিন্তু কর্মচারীর বদলে অংশীদার করতে চাইল। বললে, “আরে ব্যারিস্টার হবি যখন হবি। এখন খবরের কাগজে রিপোর্ট লিখে আর ক’টাকা আসবে? তার চেয়ে আমার সঙ্গে জুটে যা, নেহাত মন্দ হবে না। আমারও সুবিধে হবে, চিঠিপত্র লেখা, সায়েবসুবোর সঙ্গে কথাবার্তা বলা তো আমার আসে না।”

হেসে বললেম, “তার দরকার কী? তুমি যা বলছ তাতে কন্ট্রাস্ট পেতে ওসবের যে কিছু দরকার আছে তা তো মনে হয় না। তোমার হয়ে তোমার টাকাই কথাবার্তা কইবে।”

“নেহাত মিথ্যে বলিসনি। যে-পূজার যে-বিধি তা না হলে কিছুই হয় না। তবে হ্যাঁ, ইংরেজি বলতে কইতে পারে, লিখতে পারে এমন লোক থাকলে আরও সুবিধে। তোকে পেনে আমি এখন যা পাচ্ছি তার ডবল আয় করতে পারি। বলেছিলাম নিত্যানন্দকে। মনে নেই তাকে? সেই যে পুরুতর্গাকুরের ছেলে নিতাই রে! পাঠশালায় একদিন তার পৈতে হিঁড়ে দিয়েছিলাম। আর কথা কইতে পারে না। কেবলই হাত দিয়ে ইশারা করে জবাব দেয়। শেষে পণ্ডিতমশায়ের কাছ থেকে পৈতে ধার করে কথা বলল। নালিশের ফলে শাস্তি পেলাম দু-ঘণ্টা দুই কানে ধরে বেঞ্চির উপরে দাঁড়িয়ে থাকা। সেই নিত্যানন্দ এখন ডেপুটি হয়েছে। মাঝে ক’দিন সাপ্লাই’র কাজে ছিল। রাস্তা বাতলে দিলেম, কী করলে দুপয়সা হবে। বলে কিনা, ‘সিধু, ছেলেবেলায় ইঙ্কুলে অনেক অকাজ কুকাজ করেছিস, বড় হয়ে এখন আর করিসনে।’ শোন কথা একবার! টাকা উপায় করতে আমি করছি ঠিকাদারি, তুই করছিস চাকরি। যাতে দুপয়সা উপরি আসে তার চেষ্টা করব, তাতে কুকাজটা কোনখানে? হরিনাম জপতে তুইও বসিসনি, আমিও বসিনি।”

যাক, তবু ভালো। সংসারে তা হলে দু-একটা লোক এখনও আছে যারা ব্যাঙ্কের পাশবই’র উপরে দৃষ্টি রাখাটাই জীবনের চরম মোক্ষ মনে করে না।

সিধু বলল, “হ্যাঁ লাভটা কী হচ্ছে? ওর সঙ্গে কাজ করত আর-এক অফিসার, সে লেক রোডে বাড়ি কিনেছে দুখানা, গাড়ি কিনেছে। তার বউ-এর গায়ে হীরার গয়না। আর আমাদের নিত্যানন্দ রামকৃষ্ণ পরমহংস হয়ে বসে আছেন। বাদুড়-ঝোলা হয়ে ট্রামে চেপে আপিসে যায়, ওয়াহেল মোল্লার সুট পরে। আহাম্মুক এক নম্বরের।”

তাতে আর সন্দেহ কী!

জিজ্ঞাসা করলেম, “আচ্ছা ভাই, যুদ্ধের বাজারে কি অনেস্টি বলতে কোথাও কিছু আর অবশিষ্ট নেই?

“অনেষ্টি? তার মানে সততা? ভায়া হে, ওসব ভালো ভালো কথা যা আমরা ছেলেবেলায় কপিবুকে লিখেছি—না, লিখেছি বলা ঠিক নয়; আমি তো লেখাপড়ার ধার ধারতেন না, কেবল মাষ্টারের বেতই খেয়েছি—তোরা লিখেছিস। ওসব ছাপার বইতে থাকে—ছেলেবেলায় মুখস্থ করতে মন্দ লগে না। কিন্তু সংসারে ওসব ফালতু। এই বুকে হাত দিয়ে বলছি বোঁচকা, জানবি, এমন কোনো লোকই নেই যাকে কেনা যায় না। দামের কমবেশি নিয়ে কথা। কেরানিবাবুকে দিতে হয় দশ, বড়বাবুকে পঁচিশ, সুপারিন্টেন্ডেন্টকে পঞ্চাশ, ইন্সপেক্টরকে একশো। যত বেশি মাইনের অফিসার, তত বেশি তাঁর দক্ষিণা। টাকায় না হয় এমন কাজ নেই। তবে হ্যাঁ, কেউ-কেউ হয়তো সোজাসুজি টাকাটা নিতে ভয় পায়। তাদের বেলায় বিলাতি হলে পাঠাবে এক কেস ‘হোয়াইট লেবেল’, দেশি হলে মেয়ের বিয়েতে দেবে বেনারসি শাড়ি।”

সিধুচন্দ্রের ওখানে ডিনার খেয়ে তারই ভাড়া-করা ট্যাক্সি চেপে বাড়ি ফিরলাম অনেক রাতে। অনেকগুলি সিগারেট ভরে দিয়েছিল আমার সিগারেট-কেসে। ‘ব্র্যাক অ্যান্ড হোয়াইট’। সাদা আর কালো। সাদাবাজারে তার দর্শন এখন দুর্লভ! কিন্তু কালোবাজারে অভাব কী? দেশে অভাব কী সিধুচন্দ্রের?

## এগারো

শাস্ত্রকারেরা বলেছেন, রাজদর্শনে পুণ্যলাভ। অমাত্যদর্শনেও পুণ্য আছে কি না জানি না। বোধ হয় আছে। নইলে এক্সিকিউটিভ কাউন্সিলরদের বাড়িতে প্রত্যহ ভিড় জমে কেন? ভিড় জনতার নয়, আই.সি.এস.-এর।

এক্সিকিউটিভ কাউন্সিলরদের সুদৃশ্য বাংলার সম্মুখে তৃণাচ্ছাদিত বিস্তীর্ণ অঙ্গনে অপরাহ্নে গৃহস্বামী বসেন বিশৃঙ্খলাপে। হাতের কাছে ছোট টিপাই’র উপরে টেলিফোন, সুদীর্ঘ তারের সাহায্যে প্রাইভেট সেক্রেটারির কক্ষে প্রাণ-পয়েন্টের সঙ্গে যুক্ত। সেখানে সুইচ আছে। কে কথা বলেন এবং কী কথা বলেন তার গুরুত্ব বিচার করে সেক্রেটারি সুইচের দ্বারা মনিবের টেলিফোনের সঙ্গে যোগাযোগ সাধন করেন। খান দশ-বারো চেয়ার। বেতের। সবুজ রঙের ভালস্পার এনামেলে স্প্রিং-পেইন্ট করা। বাগানে কাঠের চেয়ার ব্যবহার অভিজাত্যের চিহ্ন নয়। সূর্যকে কেন্দ্র করে গ্রহ-উপগ্রহ সমন্বিত সৌরমণ্ডলের ন্যায় আই.সি.এস.-পরিবৃত এক্সিকিউটিভ কাউন্সিলরের সাক্ষ্য সভাতল। অমাত্যের প্রাত্যহিক আসর। সে-আসর গুণিজনের নয়, ধনীজনের।

পরিধানে সাদা সাটিন জিনের ট্রাউজার্স ও হাতকাটা হাফশার্ট। টাই নেই, কোটও না। নয়াদিল্লিতে গ্রীষ্মকালে ঐটেই রীতি। আপিস থেকে ডিনার পর্যন্ত ঐ পোশাকই সর্বজনগ্রাহ্য। যাঁরা বয়সে তরুণ, তাঁরা শার্টের বদলে পরেন স্পোর্ট শার্ট। সেটা আরও বেশি শার্ট। মোজাহীন চরণে সাদা কাবলি চপ্পল। আর্মিতে খাকির মতো সিভিলিয়নদেরও যুনিফর্ম আছে। সে-যুনিফর্ম লিখিত অনুশাসনের নয়, অলিখিত ফ্যাশনের। ঠিক যেমন বিয়ের বরযাত্রীদের গিলে-কোঁচানো ধুতি আর সোনার

বোতামওয়ালা পাঞ্জাবি। মদ্রাজি, পাঞ্জাবি, বাঙালি, সিঙ্কি—সব আই.সি.এস.-এরই এক বেশ, এক ভাষা। বলা বাহুল্য, দুটোর একটাও তাদের স্বজাতীয় নয়।

যে-বন্ধুকে কাগরি করে এই সভার্ণবে প্রবেশ করা গেল তিনি গভর্নমেন্টের একজন পদস্থ অফিসার। প্রৌঢ়, অপট্টক এবং অত্যন্ত সদাশয়। বহুপরিচিত ব্যক্তি। এমন গৃহ অল্প যেখানে তাঁর গতি নেই, এমন গৃহিণী অল্পতর যার ডিনার পার্টিতে তাঁর নিমন্ত্রণ নেই।

পুরুষমাত্রেরই বউ না থাকলে বাতিক থাকে। কারও তাস, কারও থিয়েটার, কারও দেশোদ্ধার, আর কারও-বা সাহিত্য কিংবা স্বামীজি। এ-ভদ্রলোকের বাতিক পোশাকের। সবচেয়ে ভালো পোশাকের সাহেব—বেস্ট ড্রেসড ম্যান—বলে নয়াদিল্লিতে তাঁর পরিচিতি। গল্প আছে যে চারদিনের জন্যে একবার হঠাৎ তাঁকে ট্যুরে যেতে হয়। তাড়াতাড়িতে জামাকাপড় বেশি সঙ্গে নেওয়ার অবকাশ না-পাওয়াতে মাত্র দুটো ওয়ার্ড্রোব ট্রান্স ও একটা সুটকেস নিয়েই নাকি তাঁকে বেরিয়ে পড়তে হয়। সেগুলির গর্ভে শুধু গোটা পনেরো সুট, দেড় ডজন শার্ট, দশটা টাই ও কুড়িখানা রুমাল ছিল। ভাঁজভাঙা শার্ট, বা ক্রিজহীন প্যান্ট পরতে দেখেনি তাঁকে কেউ কোনোদিন। সকালবেলা গয়লা, খবরের কাগজওয়ালায় মতোই তাঁর বাড়িতে প্রত্যহ নিয়মিত ধোবা আসে বালিশের ওয়াড়, বিছানার চাদর, স্লিপিং সুট ও জামা-কাপড় প্রেস করে দিতে। বন্ধুরা ঠাট্টা করে পরামর্শ দেন, আপিসে একটা ইলেকট্রিক আয়রন রাখতে—বড় সাহেবের ঘরে ঢুকবার আগে একবার তাড়াতাড়ি গায়ের জামাটা ইস্তিরি করে নিতে পারবেন।

জামাকাপড়ের প্রতি ভদ্রলোকের মনোযোগ আছে, কিন্তু আসক্তি নেই। সুদৃশ্য টাই, মনোরম মাফলার অকাতরে দান করেন আপন বন্ধুদের। গৃহে সর্বদা আতিথ্যের অকৃপণ আয়োজন। এমন অমায়িক প্রকৃতির লোক বেশি চোখে পড়ে না।

ইনি হচ্ছেন সেই স্বল্পসংখ্যক ভারতীয়দের অন্যতম যাদের সাহেব সম্পর্কে কোনো দুর্বলতা নেই। একবার বিশ্বের পথে মাঝরাত্রিতে এক স্টেশন থেকে ট্রেনে উঠেছিলেন। প্রথম শ্রেণীর কামরায় এক সাহেব দরজা-জানালা বন্ধ করে নিদ্রা দিচ্ছিলেন। হাঁকাহাঁকিতে অত্যন্ত বিরক্তির সঙ্গে দ্বার খুলে দেখলেন কালা আদমি। ‘ভাগো’ বলে সশব্দে দ্বার রুদ্ধ করলেন। কিন্তু এ-কালা আদমিটি অন্য জাতের। সাহেব দেখেই পশ্চাদপসরণের পাত্র নন। স্টেশনমাস্টার এসে অন্য গাড়িতে তাঁর জন্য জায়গা করে দিতে চাইলেন। কিন্তু তিনি নাছোড়বান্দা। সাহেব তো গোটা কামরাটা রিজার্ভ করেনি, সুতরাং ঐ কামরাতেই তাঁর যাওয়া চাই।

এতে সাহেবের ধৈর্যচ্যুতি ঘটী অস্বাভাবিক নয়। একটা নেটিভের স্পর্ধা দ্যাখো একবার! না-হয় টাকা আছে, ফাস্ট ক্লাসের টিকিটই কিনেছে। কিন্তু তা বলে একবারে একজন খাস বিলাতি সাহেবের সঙ্গে এক গাড়িতে! মাই গড, ইন্ডিয়ান হল কী? সেই আধন্যাংটো নেংটি ইঁদুর গ্যাভীটা কি দিল্লিতে ভাইসরয় হয়েছে? উইলিংডন কি নেই? সাহেব তাঁর চাবুক হাতে নিয়ে গাড়ির দরজা ঝুঞ্জে দাঁড়িয়ে বললেন, “দেখছ চাবুক?”

ভদ্রলোক তাঁর পকেট থেকে রিভলবার বের করে বললেন, “দেখছি পিস্তল?”

সাহেব মিনিটখানেক হাঁ করে তাকিয়ে রইলেন তাঁর পানে, তার পরে আস্তে আস্তে দোর খুলে দিয়ে নিজের বার্থে গিয়ে শুয়ে পড়লেন।

এ-জাতের লোকদেরই সাহেবরা পুলিশের কর্তা হয়ে লাঠিপেটা করেন, হাকিম হয়ে পাঠান জেলে, কিন্তু মনে-মনে করেন গভীর শ্রদ্ধা। এঁদেরই জন্য বিদেশে নিজেকে ভারতীয় বলে পরিচয় দিতে পারা যায় অকুণ্ঠিত চিত্তে।

আর্মির এক কর্নেল কিছুকাল এই ভদ্রলোকের উপরওয়ালা ছিলেন। পাঞ্জাবি হাবিলদার ও সিপাহীদের ধমকিয়ে তিনি চুল পাকিয়েছেন। জানেন ভারতীয়দের দিয়ে কাজ করাবার ঐ একমাত্র উপায়। সে-উপায় প্রয়োগ করলেন একদিন এঁর উপরে। ভদ্রলোক অত্যন্ত ধীর ও শান্ত স্বরে বললেন, “কর্নেল, একজন অফিসারের সঙ্গে কথা বলার রীতি এটা নয়। মনে রেখো, তুমি চোখ রাঙালে আমিও পালটে চোখ রাঙাতে পারি—ইফ ইউ শাউট লাইক দ্যাট, আই ক্যান শাউট ব্যাক্ টু।” শুনেছি এই কর্নেলই পরে এঁকে নিজের বাড়িতে ডিনার খাইয়েছেন বহুদিন। অসুখ হলে নিজে বাড়ি এসে আরোগ্য কামনা জানিয়েছেন এবং রিটায়ার করার কালে প্রমোশন সুপারিশ করেছেন উচ্ছ্বসিত প্রশংসায়।

এক্সিকিউটিভ কাউন্সিলরের সাক্ষ্যভায়ে আলোচনার মধ্যপথে রঙ্গস্থলে প্রবেশ করলেম আমরা দুজনে। বন্ধুর সহায়তায় যথারীতি পরিচিত হলেম গৃহস্বামী ও উপস্থিত পারিষদবর্গের সঙ্গে। সুদৃশ্য গ্রাসে সুস্বাদু পানীয় পরিবেশন করলে উর্দি-পরিহিত বেয়ারা। রূপার সিগারেট-বাক্স থেকে সিগারেট। গৃহস্বামী নিজে বিরামহীন ধূমপায়ী, ইংরেজিতে যাকে বলে চেইন-স্মোকার। একটা নিঃশেষ হতেই বাক্স থেকে আর-একটা তুলে নিয়ে ঠোঁটে চাপেন। কে আগে তাতে দেশলাই জ্বেলে আগ্নেসংযোগ করতে পারেন, তাই নিয়ে কাড়াকাড়ি।

বিলাতপ্রত্যাগতদের একটা বিশেষ মর্যাদা আছে এদেশে। তার উপর বিলাতি সংবাদপত্রের সঙ্গে সংশ্লিষ্ট হলে তো কথাই নেই। মহামান্য বড়লাট বাহাদুরের এক্সিকিউটিভ কাউন্সিলের মাননীয় সদস্য মহোদয় অমায়িক আচরণ ও অজস্র ধন্যবাদের দ্বারা প্রচুর আপ্যায়ন করলেন।

খণ্ডিত আলোচনার সূত্র অনুসরণ করে বোঝা গেল, বিষয়টি নয়াদিল্লির গ্রীষ্মাধিক্য-ঘটিত। জগন্নাথদেবের রথযাত্রার ন্যায় ভারত গভর্নমেন্টেরও বার্ষিক শৈলযাত্রা আছে। এপ্রিলের গোড়াতে দপ্তর স্থানান্তরিত হয় সিমলা পাহাড়ে। শরৎকালে উল্টোদিকে প্রত্যাবৃত্ত হয় দিল্লিতে। বছরে দু’বার করে সিমলার কার্ট রোড আর নয়াদিল্লির পাহাড়গঞ্জের পথে গোকুর গাড়ি বোঝাই বাক্স-পেটরা, লটবহরের মিছিল দেখা যায়। এই প্রথম শৈলবিহার স্থগিত হয়েছে সরকারি হুকুমে।

নবনিযুক্ত অস্থায়ী সেনাপতি জেনারেল মোলসওয়ার্থ দাবি করেছেন, এবার সিমলা যাওয়া চলবে না। গরমে জাপানিদের সঙ্গে সৈন্যেরা বর্মার বনে-জঙ্গলে লড়াইতে পারে,

আর সেক্রেটারিয়েটের সিভিলিয়ন সাহেবরা একটু গরমও সহিতে পারবেন না? এত বাবুয়ানায় যুদ্ধ জেতা যায় না।

আর্মির প্রয়োজনের উপরে কথা নেই। সুতরাং সেইটেই শিরোধার্য করতে হয়েছে নিতান্ত অনিচ্ছুক চিন্তে। সেক্রেটারি সায়েবরা বিচলিত—উহঃ বাবা মার্চের শেষেই যা গরম, মে-জুনে না জানি কতই বেশি হবে!

ডেপুটি সেক্রেটারিরা বেশির ভাগই ভারতীয়। কাজেই তাঁরা এক ধাপ উপরে উঠে বলেন, “বেশি? মে-জুন মাসে মেডিক্যাল লিভ নিয়ে পালাতে হবে।”

তাঁদের স্ত্রীরা আরও সাংঘাতিক। স্বামীরা আপিসে চলে গেলে দুপুরবেলা পরস্পরের মধ্যে বলাবলি করলেন, “গুনেছ ভাই, নতুন কমান্ডার-ইন-চিফের কীর্তি? গরমে নাকি এবার দিল্লি থাকতে হবে। মাই গুডনেস। তার চেয়ে চলো আমরা মেয়েরাই না-হয় সিমলাতে গিয়ে মেস করে থাকি, ওঁরা থাকুন দিল্লিতে গরমে সেদ্ধ হয়ে মরতে!”

এক্সিকিউটিভ কাউন্সিলর জিজ্ঞাসা করলেন, “গরম কি এখানে খুব বেশি হয়?”

একজন অমনি বললেন, “ভয়ানক! থাকতেই পারবেন না এখানে।”

আর-একজন বললেন, “গরমে গায়ে ফোষ্কার মতো হয় অনেকের।”

তৃতীয় ব্যক্তি বললেন, “এপ্রিল থেকেই তো লু চলবে।” ‘লু’ মানে গরম হাওয়ার ঝড়।

এক্সিকিউটিভ কাউন্সিলর বললেন, “তা দেখুন, সেক্রেটারিয়েটের ঘরগুলি সবই এয়ারকন্ডিশন। দুপুরবেলা সেখানেই থাকব। একরকম করে কাটিয়ে দেওয়া যাবে বোধ হয়।”

চতুর্থ জন, যিনি এতক্ষণ কিছু বলার সুবিধা না-পেয়ে অস্বস্তি বোধ করছিলেন, তৎক্ষণাৎ সায় দিয়ে বললেন, “তা নিশ্চয়ই যাবে। গরমে কি আর দিল্লিতে লোক থাকে না?”

এক্সিকিউটিভ কাউন্সিলর তাঁর দিকে তাকিয়ে বললেন, “আর রাত্রিতে তো লু বইবে না।”

তিনি উৎসাহিত হয়ে বললেন, “যা বলেছেন সার, রাত্রিগুলি সবসময়েই ঠাণ্ডা থাকে। তা ছাড়া এইচ.এম.দের বাংলোতে একটা করে ঘর এয়ারকন্ডিশন করে দেওয়া হবে। এমন কিছু কষ্ট হবে না।”

‘এইচ.এম.’ মানে—অনারেবল মেম্বর বা মিনিষ্টার। এক্সিকিউটিভ কাউন্সিলরদের ঐ সংক্ষিপ্ত নামেই উল্লেখ করা হয় সরকারি মহলে।

প্রথম বক্তা, যিনি গরমের আতিশয্য নিয়ে এতক্ষণ বাগ্‌বিত্তার করছিলেন, অত্যন্ত ক্ষুণ্ণ হলেন। চতুর্থ ব্যক্তির কথাগুলি তাঁরই বলা উচিত ছিল। না-বলতে পারায় মনে তীব্র অনুশোচনা ঘটল। চতুর্থ ব্যক্তি বলেছেন বলে, তাঁর ওপরে রীতিমতো ক্রুদ্ধ হলেন। মনে-মনে বললেন : কেবল খোশামুদি! এইচ.এম. যেই বলেছেন, গরম একরকম করে কাটিয়ে দেওয়া যাবে, অমনি একেবারে প্রমাণ করার চেষ্টা যেন গরমটা কিছুই নয়! হামবাগ কোথাকার! নিশ্চয় জানি, এইচ.এম.



দিল্লি থাকা অপছন্দ করলে উনি তখন উলটো সুর গাইতেন! লোকটা যে একেবারে মোসাহেব প্রকৃতির এবং তিনি নিজে যে কোনোকালেই এমন নির্লজ্জ চাটুকারিতা করতে পারতেন না, এ-বিষয়ে মনে-মনে নিজেকে আশ্বাস দিয়ে অনেকটা আরাম বোধ করলেন।

গরম থেকে প্রসঙ্গ পরিবর্তন করে এইচ.এম. শুরু করলেন সরকারি কাজকর্মের কথা। কাউন্সিলের কাহিনী। কীভাবে ইংরেজ সহকর্মীদের ব্রিটিশ স্বার্থরক্ষার প্রয়াস তাঁর প্রচেষ্টায় প্রতিহত হয়, তাঁর প্রখর দূরদৃষ্টির ফলে কোথায় কখন গভর্নমেন্টে দেশের স্বার্থ সুপ্রতিষ্ঠিত হচ্ছে তারই সালঙ্কার বর্ণনা।

দেখা গেল, এ-বিষয়ে শ্রোতাদের কাছে অধিক বলার প্রয়োজন ছিল না। তিনি না বলতেই তাঁরা এ-ব্যাপারে সম্পূর্ণ একমত। এইচ.এম. না থাকলে অভাগিনী ভারতমাতার যে কী দারুণ দুর্গতি ঘটত সেকথা কল্পনা করে দু-একজন গভীর উদ্বেগ প্রকাশ করলেন। প্রায় অশ্রু-বরিষণের উদ্যোগ।

কান টানলেই মাথা আসে। দেশের কথা তুলতেই কংগ্রেস। এইচ.এম. কংগ্রেস- নেতৃবৃন্দের নিষ্ফলা নীতির তীব্র নিন্দা করে বললেন, “শুধু জেলে গেলেই দেশ স্বাধীন হয় না।” কী করে হয় তা স্পষ্টত না বললেও সংশয়ের অবকাশ রইল না যে, এক্সিকিউটিভ কাউন্সিলরদের প্রচেষ্টা দ্বারাই তা হয়। এ-বিষয়েও পার্লামেন্টের মধ্যে বিন্দুমাত্র মতদ্বৈধ নেই।

এইচ.এম. বললেন তিনি এত ভাবনাচিন্তার ধার ধারেন না, মুহূর্তে মনস্থির করেন। অমনি অনুমোদন শুনলেন, “সার, ভাবনাচিন্তা দেশে অনেক হয়েছে, এখন ঝাঁপিয়ে পড়াই দরকার।”

এইচ.এম. সংশোধন করলেন, “অবশ্য আগেভাগে না-ভেবেচিন্তে হঠাৎ একটা-কিছু করে বসাও আবার ঠিক নয়!”

“তাতে আর সন্দেহ কী সার, না-ভেবে কাজ করার নাম তো হঠকারিতা,” একই ব্যক্তি বলেন অম্লান বদনে।

পরবর্তী সপ্তাহে এক ডিনারের নিমন্ত্রণ স্বীকারান্তে এইচ.এম.কে বিদায়-সম্বাষণ পূর্বক নিজস্ব হলেম পথে। সঙ্গী ভদ্রলোক জানালেন তাঁর এক বন্ধু নাকি চমৎকার চাটুচাতুর্যপরায়ণ এই পার্লামেন্টের নব নামকরণ করেছেন ‘হেইং সংঘ’। নামটা সার্থক সন্দেহ নেই।

আসল কথাটা বোঝা কঠিন নয়। এঁরা আই.সি.এস.। দেশীয় সংবাদপত্রের ভাষায় যাকে বলে স্বর্গোদ্ভূত চাকরে—হেভেনবর্ন সার্ভিস। সিজার-পত্নীর সতীত্বের মতো এঁদের যোগ্যতা প্রশ্নের অতীত। ভবিষ্যৎ অব্যাহত এবং ক্ষমতা সীমাহীন। এঁরা সর্ববিদ্যাবিশারদ। তাই আজ যিনি বিহারের অখ্যাত মহকুমার অ্যাসিস্টেন্ট কালেক্টর, কাল তিনি করাচি পোর্টট্রাস্টের চেয়ারম্যান, পরশু তিনি কন্ট্রোলার অব ব্রডকাস্টিং, পরদিন ডিরেক্টর-জেনারেল অব আর্কিওলজি এবং তার পরের পরদিন গভর্নমেন্টের অ্যাগ্রিকালচারেল কমিশনার। তাঁরা জানেন, এক্সিকিউটিভ কাউন্সিলরকে খুশি রাখতে পারলে পদোন্নতি দ্রুত হয়। তাই কেউ সন্তীক এসে এইচ.এম.কে নিয়ে যান

সিনেমায়, কেউ নিমন্ত্রণ করেন ডিনারে, কেউ সকালে বিকালে হাজিরা দিয়ে প্রত্যেক কথায় করেন হেঁ হেঁ, হেঁ হেঁ। 'হেঁ হেঁ সংঘের' সদস্য হতে চাঁদা দিতে হয় না, শুধু যথাস্থানে হাজিরা দিতে হয়।

ইন্ডিয়ান সিভিল সার্ভিস ভারতে ব্রিটিশশাসনের অপূর্ব সৃষ্টি। এর মোটসংখ্যা এগারোশোর কাছাকাছি, তার মধ্যে প্রায় অর্ধেক ভারতীয়। পরাধীন জাতির মধ্যে থেকেই সাম্রাজ্যবাদের সমর্থক সংগ্রহ করার প্রকৃষ্ট দৃষ্টান্ত এই সার্ভিস। ক্ষীণ বেতন এবং লোভনীয় পেনশনের আকর্ষণে বিশ্ববিদ্যালয়ের মেধাবী ছাত্র আকৃষ্ট করেন ব্রিটিশ গভর্নমেন্ট। তরুণসম্প্রদায়ের সর্বোত্তম নিদর্শন বেছে নিয়ে নিয়োজিত করেন শাসনকার্যে, যে-শাসন দেশের দাসত্বকে করে দৃঢ়মূল; দারিদ্র্যকে করে ক্রমবর্ধমান এবং জাতীয় আন্দোলনকে করে বিঘ্নসঙ্কুল।

অসাধারণ মোহ আছে ইংরেজি বর্ণমালার তিনটি অক্ষরে। I. C. S. নামের পিছনে তাদের অবস্থিতি দ্বারা সাহেব হলে বোঝায় যে, লোকটা পাবলিক স্কুলের ছাত্র, অক্সফোর্ড কিংবা কেম্ব্রিজের পাশ এবং কঠিন কম্পিউটিভ পরীক্ষায় উত্তীর্ণ। একটি ভারতীয় ভাষা শিখেছে, ওভারসিজ অ্যালাউয়েন্স পায়, চাকরি শুরু করেছে অ্যাসিস্টেন্ট কালেক্টররূপে এবং শেষ করবে এক্সিকিউটিভ কাউন্সিলর বা প্রাদেশিক গভর্নর হয়ে। পাঁচশো টাকায় আরম্ভ, ছয় কিংবা আট হাজারে শেষ। ষাট বছর বয়সে এক হাজার পাউন্ড পেনশন নিয়ে ইংল্যান্ড বা রিভেরারাতে বাড়ি, নিশ্চিন্ত অবসর এবং ভারতবর্ষের প্রতি প্রবল বিতৃষ্ণা।

ভারতীয় হলে বোঝাবে—উচ্চবংশ, কলেজে ভালো ফল, পুলিশের সন্দেহাতীত, স্বদেশীর স্পর্শলেশশূন্য নিষ্কলঙ্ক ছাত্রজীবন, বিলাতের প্রতি ভক্তি এবং চাকরিতে বিচারবিভাগের বদলে এক্সিকিউটিভ বিভাগে কায়েমির জন্য আশ্রয় চেষ্টা। এঁদের জন্যই বারোয়ারি পূজার মণ্ডপে চেয়ারের ব্যবস্থা, বিদ্যালয়ে পুরস্কার বিতরণী সভার সভাপতিত্ব, মাসিক পত্রিকায় অপাঠ্য গল্প রচনার সুযোগ এবং অনুঢ়া বয়স্কা কন্যার উদ্ভিগ্না জননীর আকুলবিকুলি।

চলতি কথায় এঁদের বলা হয় ভারতে ব্রিটিশশাসনের কাঠামো—স্টিলফ্রেম। এঁদের মধ্যে এমন দুচার জন লোক ছিলেন এবং এখনও আছেন যাঁরা পাণ্ডিত্যে, প্রতিভায় ও কর্মশক্তিতে যে-কোনো ক্ষেত্রে শীর্ষস্থান গ্রহণের অধিকারী। তাঁরা ঋগ্বেদের অনুবাদ করেছেন, ব্রিটিশ-ভারতের অর্থনীতি আলোচনা করেছেন, ভারতবর্ষের প্রথম পূর্ণাঙ্গ ইতিহাস রচনা করেছেন, সার্থক সাহিত্য সৃষ্টি করেছেন, সমবায় আন্দোলন প্রবর্তন করেছেন এবং সর্বাপেক্ষা স্মরণীয় ঘটনা—ভারতীয় জাতীয় মহাসভা কংগ্রেসের গোড়াপত্তন করেছেন! জাতীয়তাবাদের গুরু সুরেন্দ্রনাথ, ঋষি অরবিন্দ এবং বিদ্রোহী সুভাষচন্দ্র এই সিভিল সার্ভিসের অন্তর্ভুক্ত হয়ে বা হতে হতে ছিটকে পড়েছিলেন।

কিন্তু ব্যতিক্রমের দ্বারাই তো নিয়মের প্রমাণ হয়। বেশির ভাগ আই.সি.এস.-ই নিতান্ত সাধারণ, ইংরেজিতে যাকে বলে মিডিওকর। তাঁরা লেখার মধ্যে লেখেন ফাইল, পড়ার মধ্যে পড়েন গেজেট এবং আলোচনা করেন ফার্লো, প্রমোশন বা

রিটায়ারমেন্ট। অন্তিমে নিজের জন্য নাইটহুড, স্ত্রীর জন্য বুইক গাড়ি ও ছেলের জন্য ইম্পিরিয়াল সার্ভিস তাঁদের চরম উচ্চাভিলাষ।

ইংরেজিতে বলে, কামানের চাইতে সোনার দাম কম। বৈদেশিক শাসনের বিরুদ্ধে শিক্ষিতদের অসন্তোষ ঠেকিয়ে রাখবার অমোঘ অস্ত্র, তাঁদের শাসনযন্ত্রের অঙ্গীভূত করা। সে-তথ্য জানা আছে ইংরেজের। এগারো শো আই.সি.এস.-এর জন্য ভারতের রাজস্ব থেকে খরচ হয় বছরে আড়াই কোটি টাকা। প্রতি আড়াই লক্ষ ভারতীয়ের মাথার উপরে আছে একজন আই.সি.এস. প্রতি ৮৬৮ বর্গমাইল এলাকার আধিপত্যে। প্রচুর অর্থ, প্রভূত প্রতিষ্ঠা এবং বৈদেশিক পরিবেশের ফলে একটি বিশেষ শ্রেণীতে পরিণত হন তাঁরা। দেশের দায়বিমুক্ত, দেশের থেকে বিযুক্ত। আই.সি.এস. একটা পেশা নয়, আই.সি.এস. একটা জাত। হোলি রোম্যান এম্পায়ার যেমন না ছিল হোলি, না ছিল রোম্যান এবং বলা যায় না এম্পায়ার; ইন্ডিয়ান সিভিল সার্ভিস তেমনি ইন্ডিয়ান নয়, সিভিল তো নয়ই এবং সার্ভিসের বাম্প মাত্র নেই তাতে।

## বারো

সার স্ট্যাফোর্ড ক্রিপস্ দিল্লি পরিত্যাগ করলেন।

আগের দিন সন্ধ্যায় দিল্লি বেতার-কেন্দ্র থেকে ভারতীয়দের উদ্দেশে এক বেতার-বক্তৃতায় তিনি ক্রিপস্-দৌত্যের ব্যর্থতা ও কারণ বর্ণনা করলেন। বেতার-বক্তারূপে একমাত্র লন্ডন টাইমসের ভূতপূর্ব সম্পাদক উইকহ্যাম স্টিভ ছাড়া সমগ্র ব্রিটিশ সাম্রাজ্যে বোধহয় ক্রিপসের জুড়ি নেই। অপূর্ব তাঁর বাচনভঙ্গি, অসাধারণ তাঁর কণ্ঠ। পরিতাপের কথা, সে-দক্ষতা তিনি প্রয়োগ করলেন ভারতবর্ষের, বিশেষ করে কংগ্রেসের অযথা অপবাদকীর্তনে। ইচ্ছাকৃত সত্যগোপন বা সত্যের বিকৃতিসাধন, ভিত্তিহীন অভিযোগ, পরস্পর-বিরোধী উক্তি এবং কুযুক্তির দিক দিয়ে তাঁর এ বেতার-বক্তৃতাটি রাজনৈতিক অপভাষণের একটি প্রকৃষ্ট উদাহরণ হয়ে থাকবে ইতিহাসে।

সমগ্র বক্তৃতাটি এক ক্ষমতাগর্বিত ব্যক্তির আহত অভিমান ও দুর্বলের প্রতি অবজ্ঞার অভিব্যক্তি। আত্মসম্মানজ্ঞানসম্পন্ন দরিদ্র ব্যক্তি ধনী আত্মীয়ের কৃপামিশ্রিত মুষ্টিভিক্ষা প্রত্যাখ্যান করলে দাতার মনে যে-ক্রোধের সঞ্চার হয়, সার স্ট্যাফোর্ডের কণ্ঠে তারই পরিচয় ছিল।

ক্রিপস্ বললেন, ভারতবর্ষের বিভিন্ন দলের মধ্যে যে প্রবল মতবিরোধ বর্তমান, একজন নিরপেক্ষ মধ্যস্থ ব্যক্তির ভূমিকা নিয়ে ব্রিটিশ গভর্নমেন্ট তার একটা সমাধান করতে চেয়েছিলেন। শ্রোতারা বিশ্বয়ে চক্ষু মার্জনা করে তবল : এডলফ্ হিটলারের বক্তৃতা শুনছি না তো? তিনিও তো বলেন, তিনি চিরকাল শান্তি চেয়েছিলেন!

চাকরিবন্টন, পৃথক নির্বাচন, রাজনৈতিক সুবিধাদান প্রভৃতি একাধিক উপায়ে এদেশে সাম্প্রদায়িক বিভেদ সৃষ্টি করেছেন এবং মতবিরোধকে সময়ে বাঁচিয়ে রেখেছেন যাঁরা, তাঁরাই নাকি মধ্যস্থতা করতে চান। পরিহাস আর কাকে বলে?

ক্রিপস্ বললেন, যুক্তিশীল ব্যক্তিরাই স্বীকার করবেন যে, যুদ্ধের এ-দুঃসময়ে নূতন শাসনতন্ত্র রচনা সম্ভব নয়। যেন ভারতীয় নেতৃবর্গ একথা স্বীকার করেননি। তাঁরা চেয়েছিলেন শুধু প্রকৃত ক্ষমতাবিশিষ্ট একটি সাময়িক জাতীয় গভর্নমেন্ট, যুদ্ধের এ-দুঃসময়ে যার প্রয়োজন সবচেয়ে বেশি। দেশের নেতৃস্থানীয় ব্যক্তিদের সহযোগিতায় সে-গভর্নমেন্ট গঠিত হবে, সে-গভর্নমেন্টকে একটি স্বাধীন দেশের মন্ত্রিসভার সমমর্যাদা দান করা হবে এবং অলিখিত চুক্তি অনুযায়ী বড়লাট একজন নিয়মতান্ত্রিক শাসনকর্তার ন্যায় এ-গভর্নমেন্টের সিদ্ধান্ত স্বীকার করতে বাধ্য থাকবেন, নিজ বিশেষ ক্ষমতাপ্রয়োগের দ্বারা তাকে অগ্রাহ্য করতে পারবেন না—এই ছিল জননেতাদের দাবি। নূতন শাসনতন্ত্র রচনার কোনো কথাই ছিল না।

কংগ্রেসের প্রতি ক্রোধটাই সবচেয়ে বেশি। বললেন, জাতীয় গভর্নমেন্ট গঠনের দাবি দ্বারা কংগ্রেস সকল ক্ষমতা আত্মসাতির প্রয়াসী, দেশের ডিস্ট্রিক্টের হওয়ার বাসনা সংখ্যাগরিষ্ঠদল কংগ্রেসের। অথচ এগারোই এপ্রিল তারিখের লেখা চিঠিতে মৌলানা আজাদ ক্রিপস্কে লিখেছিলেন, কংগ্রেস দেশের অন্যান্য রাজনৈতিক দলের সহযোগিতায় জাতীয় গভর্নমেন্ট গঠনে ইচ্ছুক। এ-ধারণার উপরে ভিত্তি করেই সমস্ত আলোচনা-আলোচনা চলছে। জাতীয় গভর্নমেন্টের সদস্যসংখ্যা, বিভিন্ন দলের অংশ ইত্যাদি প্রশ্ন পরে নিশ্চয়ই আলোচিত হত। কংগ্রেস নিজে ক্ষমতালভের জন্য ব্যাকুল নয়, কিন্তু ভারতীয় জনসাধারণের হাতে প্রকৃত ক্ষমতা ন্যস্ত হোক, এই তার দাবি।

দেশরক্ষার দায়িত্ব ভারতীয়দের হাতে দেওয়ার আপত্তি সম্পর্কে ক্রিপস্ বললেন, ভারতবর্ষ রক্ষার দায়িত্ব ব্রিটেনের এবং মিত্রশক্তি আমেরিকার প্রতি ব্রিটেনের যে-কর্তব্য তা পরিহার করা সম্ভব নয়। যুদ্ধের সময় প্রধান সেনাপতির কর্তৃত্ব কারও হস্তক্ষেপ যুদ্ধজয়ের অনুকূল নয়। কংগ্রেস-সভাপতি স্পষ্ট জানিয়েছিলেন, প্রধান সেনাপতির যুদ্ধ পরিচালনা-ব্যবস্থায় হস্তক্ষেপের কোনো অভিপ্রায় ছিল না কংগ্রেসের। বরং সমরমন্ত্রী হিসাবে তাঁর হাতে আরও অধিকতর কর্তৃত্ব অর্পণে তাঁরা প্রস্তুত ছিলেন। কিন্তু দেশরক্ষার চরম দায়িত্ব থাকবে দেশেরই একজন প্রতিনিধির হস্তে। তা না হলে স্বাধীনতার কোনো অর্থ থাকে না।

জাপানিদের বিরুদ্ধে যুদ্ধ পরিচালনার সর্বময় কর্তৃত্ব মার্কিন সেনাপতি জেনারেল ম্যাকআর্থারের হাতে। তা সত্ত্বেও অস্ট্রেলিয়ার দেশরক্ষা সচিব অস্ট্রেলিয়ানই; মার্কিন বা ইংরেজ নয়—এ-দৃষ্টান্ত উল্লেখ করলেন কেউ-কেউ। কিন্তু ব্রিটিশ গভর্নমেন্ট যুক্তিকে শ্রদ্ধা করেন এমন নজির নেই।

সবচেয়ে হাস্যকর উক্তি করলেন সার স্ট্যাফোর্ড জাতীয় গভর্নমেন্টের দায়িত্বশীলতা সম্পর্কে। তিনি বললেন, “কংগ্রেস এমন একটি জাতীয় গভর্নমেন্ট

গঠন করতে চায়, যার উপরে বড়লাটের বা ব্রিটিশ গভর্নমেন্টের কোনো ক্ষমতা থাকবে না। একবার ভেবে দেখা যাক তার মানে কী। অনির্দিষ্ট কালের জন্য ভারতের গভর্নমেন্ট এমন কয়েকজন ব্যক্তির দ্বারা গঠিত হবে, যারা কোনো আইনসভা বা নির্বাচকমণ্ডলীর কাছে দায়ী নন, যাদের কেউ কখনও নাড়াতে পারবে না।” কী সাংঘাতিক কথা! সত্যি তো! এ তো কোনোমতেই হতে দিতে পারা যায় না। আইনসভা, নির্বাচকমণ্ডলী এবং জনসাধারণের কাছে দায়ী ও পরিবর্তনযোগ্য গভর্নমেন্টের একমাত্র আদি ও অকৃত্রিম নমুনা তো আছে আমাদের বর্তমান বেহুল-ম্যাক্সওয়েল-নুন-ওসমান-রামস্বামী-পরিবৃত্ত পরম করুণাময় লর্ড লিনলিথগোর গভর্নমেন্টে!

বেতার-বক্তৃতার উপসংহারে ক্রিপস্ জাপানের বিরুদ্ধে ভারতীয়দের প্রতিরোধ-শক্তিকে উদ্বুদ্ধ করার উদ্দেশ্যে অনেক উদ্দীপনাময়ী উক্তি করলেন—“ঝুঁকি নিতে হবে, নতুন পরীক্ষা করতে হবে, পুরাতন মনোভাবের উর্ধ্বে উঠতে হবে” এমনি সব ভালো ভালো কথা।

অপ্রতিদ্বন্দ্বী ব্যারিস্টার বলে সার স্ট্যাফোর্ডের খ্যাতি আছে। কিন্তু আশ্চর্য এই যে, এ-সকল উক্তির অন্তর্নিহিত দুর্বলতা ও অসঙ্গতি তাঁর মতো ব্যবহারজীবীর দৃষ্টিতে ধরা পড়েনি। “ঝুঁকি নিতে হবে।” ঠিক কথা। তবে সেটা ব্রিটিশ গভর্নমেন্টকে নয়—নিতে হবে পদানত নিপীড়িত ভারতীয় জনসাধারণকে। “নতুন পরীক্ষা করতে হবে।” অথচ ভারতবর্ষে বহাল থাকবে সেই সনাতন স্বৈরশাসন। “পুরাতন মনোভাবের উর্ধ্বে উঠতে হবে।” শুধু ভারত সম্পর্কে নয়! এই হল ব্রিটেনের সর্বাপেক্ষা প্রগতিশীল সমাজতান্ত্রিক ভারতবন্ধু সার স্ট্যাফোর্ড ক্রিপস্-কথিত সুসমাচার!!

বিলাতের ন্যাশনাল গভর্নমেন্টের অনুরূপ অস্থায়ী যুদ্ধকালীন গভর্নমেন্ট গঠিত হবে, এই ভিত্তিতেই মৌলানা আজাদ ও পণ্ডিত নেহরু ক্রিপস্-প্রস্তাবের আলোচনা করেছেন। পরে দেখা গেল, ভাইসরয়ের এক্সিকিউটিভ কাউন্সিলেরই দ্বিতীয় সংস্করণ ছাড়া আর কিছুতেই রাজি নন ব্রিটিশ কর্তৃপক্ষ। কখনও কোনো আলোচনায় ক্রিপস্ যে ন্যাশনাল গভর্নমেন্টের আভাসমাত্র দিয়েছেন এমন কথাও স্বীকার করলেন না তিনি। অথচ এক্সিকিউটিভ কাউন্সিলের পুনর্গঠন বা তাতে যোগ দেওয়া না-দেওয়া নিয়ে তিন সপ্তাহ আলোচনা করবেন মৌলানা আজাদ বা পণ্ডিত জওহরলাল, একথা একমাত্র উন্মাদ বা বিশেষ অভিসন্ধিপূরণ ব্যক্তি ছাড়া নিশ্চয়ই আর কেউ বিশ্বাস করবে না।

কংগ্রেসের পক্ষে থেকে রাষ্ট্রপতি জোরের সঙ্গে বললেন, ক্রিপস্ ক্যাবিনেট গভর্নমেন্টের আশ্বাস দিয়েছিলেন। ক্রিপস্ তা বেমানুম অস্বীকার করলেন। যদিও সাংবাদিকদের মধ্যে যারা ২৩ মার্চের প্রেস কনফারেন্সে উপস্থিত ছিলেন তাঁরা সবাই সাক্ষ্য দেবেন যে, সেখানেও ক্রিপস্ এই ন্যাশনাল গভর্নমেন্টের কথাই বলেছিলেন।

কংগ্রেস-নেতৃবর্গ একটি অতি মারাত্মক ভুল করেছেন। তাঁরা ক্রিপস্-আলোচনার কোনো লিখিত ও অবিসংবাদিত দলিল রাখেননি। বিলাতে ব্যবসায়ীদের দেখেছি, কোনো বিশেষ লেনদেন বা চুক্তি সম্পর্কে দুই ব্যক্তির মধ্যে আলোচনার একটি

পরস্পর অনুমোদিত লিখিত বিবরণ থাকে। আলোচনার পরে একজন আলোচনার সমুদয় বিবরণ একটি পত্রে লিপিবদ্ধ করে অন্যজনের কাছে পাঠিয়ে দেন। তিনি হয় ঐ পত্রে বর্ণিত বিবরণ যথার্থ বলে অনুমোদন করেন, নয়তো ভ্রমনির্দেশ করেন। এ-ব্যবস্থায় দুইপক্ষের মৌলিক আলোচনায় কোনো সময় একে অন্যের উক্তি বা মনোভাবকে ভুল বুঝলে অবিলম্বে তার সংশোধন হয়। চল্লিশ কোটি নরনারীর ভাগ্য নিয়ে যেখানে আলোচনা চলছে, সেখানে কংগ্রেস-কর্তৃপক্ষ এরূপ কোনো সাবধানতা অবলম্বন করেননি—এ শুধু আশ্চর্য নয়, বালকোচিত অদূরদর্শিতার পরিচায়ক। প্রত্যেক দিন সন্ধ্যায় সেদিনকার আলোচনার ধারা একটি পত্রে গ্রথিত করে তাতে ক্রিপসের অনুমোদন-স্বাক্ষর রাখলে পরে পরস্পরের প্রতি এই অসত্য ভাষণের দোষারোপ করার অবকাশ ঘটত না।

মৌলানা আজাদ তাঁর শেষ দীর্ঘ চিঠিতে বলেছেন, দেখা যাচ্ছে কংগ্রেস ও ক্রিপসের মধ্যে আলোচনা যতই এগিয়ে চলেছে, ব্রিটিশ মনোভাবের ততই ক্রমিক অবনতি ঘটেছে। এ-মন্তব্য অহেতুক নয়। ব্রিটিশ প্রস্তাব নিয়ে ভারতে আগমন ও ভারত-পরিভ্রমণের মধ্যে ক্রিপসের চরিত্রে অভাববীণীয় পরিবর্তন ঘটেছে।

ক্রিপসের এই ব্যর্থতার এবং পরিবর্তনের কারণ কী, তা নিয়ে বহু অনুমান, বহু সংশয়, বহু গবেষণার অবকাশ আছে। ব্যর্থতার সমুদয় দায়িত্ব ক্রিপসের নয়।

লর্ড লিনলিথগো ক্রিপস-দৌত্যের সাফল্য কামনা করেননি, একথা অনুমান করা কঠিন নয়। যুদ্ধের প্রারম্ভ থেকে একাধিকবার ভারতীয় জনসাধারণের সমর্থন সংগ্রহের তিনি ভার নিয়েছিলেন। ব্যর্থ হয়েছেন। সুতরাং তাঁর দ্বারা যা সম্ভব হয়নি, অন্য কোনো ব্যক্তির প্রচেষ্টায়, বিশেষ করে একজন শ্রমিকদলের সদস্য দ্বারা তা সম্ভব হবে এটা তাঁর পক্ষে ঝুঁকির নয়। ব্যক্তিগত মতবাদে লর্ড লিনলিথগো যে একজন কন্সার্ভেটিভ ডাইহার্ড সেকথা অবিদিত নয় কার কাছে।

জঙ্গিলাট আর্চিবল্ড ওয়েভেল একজন ভারতীয় দেশরক্ষা সচিবের অধীনে কাজ করতে ইচ্ছুক ছিলেন কি না তা-ও জানার উপায় নেই। ওয়েভেল বর্তমানে ব্রিটনের শ্রেষ্ঠ সেনাপতি, তার সমরনৈপুণ্যের ওপরে ব্রিটিশ গভর্নমেন্টের অবিচলিত আস্থা। ভারতবর্ষে, বিশেষ করে তাঁর সামরিক ব্যাপারে ওয়েভেলের অনুমোদিত কোনো ব্যবস্থায় সম্মত হওয়া তাঁদের পক্ষে সম্ভব নয়।

সাধারণের ধারণা এই যে, লন্ডন থেকে টেলিফোনযোগে সার স্ট্যাফোর্ডকে সতর্ক করে দেওয়া হয়, তিনি যেন ওয়ার ক্যাবিনেটের লিখিত প্রস্তাবের বাইরে আর এক পা-ও না যান। ভারতবর্ষ সম্পর্কে চার্চিল ও এয়ারির মনোভাব এতই সুপরিচিত যে, এ-অনুমান একেবারে অমূলক মনে হয় না।

দ্বিতীয় মহাযুদ্ধের গোড়াতে ইংলন্ডের রাজনৈতিক গগনে ক্রিপস ছিলেন একান্ত নিপ্পভ। শ্রমিকদলের সঙ্গেও সে-সময়ে তাঁর সম্পর্ক ছিল্ন হয়েছিল। উনিশশো ঊনচল্লিশ সালের শেষভাগে তিনি ভারতবর্ষে এলেন। বিভিন্ন স্থান পরিদর্শন করলেন, বিভিন্ন ভারতীয় নেতৃবৃন্দের সঙ্গে ঘনিষ্ঠভাবে মিশলেন, পণ্ডিত জওহরলালের

অতিথিরূপে পুজ্ঞানুপুজ্ঞরূপে অনুসন্ধান করলেন এদেশের জাতীয় আন্দোলন ও তার ধারা সম্পর্কে।

ভারতবর্ষ থেকে ক্রিপস্ গেলেন চীনে। চীন থেকে রাশিয়া হয়ে ইংলন্ডে যখন প্রত্যাবর্তন করলেন, চেম্বারলেন গভর্নমেন্টের তখন পতন ঘটেছে, প্রধানমন্ত্রীরূপে চার্চিল গঠন করেছেন নতুন কোয়ালিশন গভর্নমেন্ট। রাশিয়া ও ব্রিটেনের বৈদেশিক সম্পর্ক সে-সময় মধুর নয়, অথচ একমাত্র রাশিয়ার সঙ্গে মিতালির দ্বারাই তখন যুরোপে হিটলারের প্রতিরোধ সম্ভব। কে ভার নেবে রাশিয়া ও ব্রিটেনের মধ্যে মৈত্রীসাধনের? ক্রিপসের নাম কে প্রস্তাব করেছিলেন তা জানার উপায় নেই। কিন্তু আইনব্যবসায়ে প্রচুর অর্থোপার্জন পরিত্যাগ করে রাজনীতিক্ষেত্রে বিস্তৃতপ্রায় ক্রিপস অকস্মাৎ একদিন প্রবেশ করলেন দশ নম্বর ডাউনিং স্ট্রিটে। প্রধানমন্ত্রী চার্চিল বোধ হয় বললেন—মস্কো পছন্দ করো তুমি, সেখানে ব্রিটিশ রাজদূত হয়ে যাও। ব্রিটেন ও রাশিয়ার মধ্যে মিত্রতার সম্বন্ধ স্থাপন করা চাই। এখনই রওনা হও। ফর্ গডস্ শেক।

ক্রিপস্ রাশিয়ায় গেলেন এবং অসাধ্যসাধন করলেন। ব্রিটেন ও রাশিয়ার মধ্যে তিনি হৃদ্যতার সৃষ্টি করলেন, যা ইতিপূর্বে প্রায় অসম্ভব বলে গণ্য হয়েছে। মস্কো ও কুইবাইসেভে নিজ কর্তব্য সমাধান করে উনিশশো বিয়াল্লিশ সালে যখন ইংলন্ডে ফিরলেন ক্রিপস্ তখন তাঁর খ্যাতি ও জনপ্রিয়তা দুই-ই অপরিসীম। চার্চিল তাঁকে আপন মন্ত্রিমণ্ডলে গ্রহণ করলেন।

ভারতীয় সমস্যার তিনি একটা সম্ভাবজনক মীমাংসাসাধনে সক্ষম হবেন, এ-বিশ্বাস ক্রিপসের ছিল। ওয়ার ক্যাবিনেটের প্রস্তাব যে ভারতীয় জাতীয় আশা-আকাঙ্ক্ষা পূরণে অক্ষম, একথা কি তিনি বোঝেননি? তা হলে তাঁর বহু-বিজ্ঞাপিত তীক্ষ্ণবুদ্ধি সম্পর্কেই সন্দেহ জাগে। প্রচলিত জনশ্রুতি এই যে, গান্ধীজি প্রথম সাক্ষাতের দিনে ক্রিপস্কে জিজ্ঞাসা করেছিলেন, “এই প্রস্তাব নিয়ে তুমি ভারতবর্ষে এলে কেন?” উপদেশ দিয়েছিলেন, “এর বেশি আর কিছু যদি তোমার দেবার ক্ষমতা না থাকে, তবে ফিরতি বিমানে দেশে ফিরে যেতে পারো।”

ক্রিপস্ নিশ্চয়ই জানতেন ওয়ার ক্যাবিনেটের প্রস্তাবগুলি যথেষ্ট নয়। কিন্তু তাঁর আশা ছিল, ভারতীয় জননেতাদের সঙ্গে তাঁর যে ব্যক্তিগত সৌহার্দ্য বর্তমান, তারই সহায়তায় তিনি তাঁদের সম্মতিলাভ করবেন। কিন্তু কংগ্রেস-নেতৃবর্গ শিশু নন; ব্যক্তিগত বিরাগ-অনুরাগের প্রশ্নকে তাঁরা জাতির ভাগ্য নিয়ন্ত্রণ-ব্যাপারে প্রভাব বিস্তার করতে দেননি।

বোধ হয় ক্রিপসের আশা ছিল, অকুস্থলে অবস্থানকারী—ম্যান অন দি স্পট—হিসেবে তিনি প্রস্তাবগুলির কিছু-কিছু সম্প্রসারণের ক্ষমতাও প্রয়োগ করতে পারবেন ব্রিটিশ গভর্নমেন্টের পক্ষে। চার্চিল তাঁকে নিরাশ করলেন। দুদিক দিয়েই তিনি বিফল-মনোরথ হলেন।

নিজের মতবাদের অবিচলিত ও সততায় একনিষ্ঠ ব্যক্তি এমন ক্ষেত্রে মন্ত্রিসভা থেকে পদত্যাগ করতেন। প্রকাশ্যে ঘোষণা করতেন, ভারতীয়দের দাবি ন্যায্যসঙ্গত। ব্রিটিশ গভর্নমেন্টের মনোভাব আপোসের অনুকূল নয়, তাঁদের আন্তরিকতা

সন্দেহজনক। ক্রিপস্ তা করলেন না। তিনি ব্রিটিশ গভর্নমেন্টের সমর্থন করে কংগ্রেসের প্রতি কটুক্তি করলেন। ব্রিটিশ গভর্নমেন্টের এই চরম সংকটকালে ক্রিপস্ ন্যায়-নীতি অপেক্ষা মন্ত্রিসভার নিজ সহকর্মী ও প্রধানের প্রতি আনুগত্যকেই শ্রেষ্ঠ আসন দিলেন। ব্রিটিশজাতির প্রয়োজনে তিনি অপভাষণের আশ্রয় নিলেন। সাম্রাজ্যের প্রয়োজনে সমাজতন্ত্রী সার স্ট্যাফোর্ড ক্রিপস্ আত্মহত্যা করলেন।

চার্চিল জয়লাভ করলেন। শুধু ভারতবর্ষকে পরাধীন রাখার প্রচেষ্টায় নয়, নিজ সম্ভবপর রাজনৈতিক প্রতিদ্বন্দ্বীর ধ্বংসসাধনেও পরিপূর্ণ সফলতা লাভ করলেন তিনি।

ইংলন্ডের জনসাধারণ চার্চিলের প্রধানমন্ত্রিত্বে সুখী ছিল না। বিভিন্ন রণাঙ্গনে একটির পর একটি করে পরাজয় পার্লামেন্টের সদস্যদের বিচলিত করে তুলেছিল। তাঁরা তীব্র ভাষায় চার্চিলকে গভর্নমেন্টের অক্ষমতার আলোচনা করেন, কিন্তু চার্চিলকে অপসারিত করেন না। তার কারণ চার্চিলের প্রতি শ্রদ্ধা বা আস্থা নয়। একান্ত নিরুপায় তাঁরা, প্রধানমন্ত্রী হওয়ার যোগ্য দ্বিতীয় ব্যক্তি নেই ইংলন্ডে।

রাশিয়ায় অভাবিতপূর্ব সাফল্য ক্রিপস্কে যে-সম্মান ও খ্যাতি দিয়েছিল, তাতে জনসাধারণের দৃষ্টি আকৃষ্ট হল তাঁর প্রতি। কেউ-কেউ বলতে শুরু করল, ইংলন্ডের ভাবী প্রধানমন্ত্রী সার স্ট্যাফোর্ড ক্রিপস্। ভারতীয় সমস্যার সন্তোষজনক সমাধান করতে পারলে ক্রিপসের যোগ্যতায় ব্রিটিশ সর্বসাধারণের আস্থা গভীর হত, চার্চিলের প্রবল প্রতিদ্বন্দ্বীরূপে রাজনীতিতে ক্রিপসের প্রভাব হত অনন্যসাধারণ। ওয়ার ক্যাবিনেটের এক শূন্যগর্ভ প্রস্তাব দিয়ে চার্চিল ক্রিপস্কে ভারতে পাঠালেন, কারণ তিনি নিশ্চিত জানতেন, গান্ধীজি, আজাদ ও নেহরু কখনও গ্রহণ করবেন না এ-প্রস্তাব।

ক্রিপস্ ব্যর্থকাম হলেন। চার্চিলের প্রধানমন্ত্রিত্ব নির্বিঘ্ন হল। রাজনীতিতে প্রতিদ্বন্দ্বীদের অপসারণের একাধিক উপায় আছে। স্ট্যালিন তাদের হত্যা করেন বন্দুকের গুলিতে, চার্চিল তাদের নিঃশেষ করেন কূটনৈতিক চালে। সোশ্যালিস্ট ক্রিপস্ ইম্পিরিয়ালিস্ট টোরিদের সঙ্গে হাত মিলিয়ে ব্রিটিশ রাজনীতিতে নিজহাতে নিজ মৃত্যুদণ্ড স্বাক্ষর করলেন নিজেরই অজ্ঞাতসারে।

রাজিতে আহারের নিমন্ত্রণ ছিল এক বন্ধুগৃহে। ভদ্রলোক কলকাতার এক নামজাদা সাহেব কোম্পানির কভেনান্টেড সার্ভিসের লোক, স্বৈরাচার পরিচালকগোষ্ঠীতে একমাত্র বাঙালি অফিসার। প্রচুর বেতন, প্রভূত প্রতাপ। যুদ্ধের প্রয়োজনে গভর্নমেন্ট সাপ্লাই ডিপার্টমেন্টে নিয়ে এসেছেন আরও বেশি পারিশ্রমিক দিয়ে। নিজের কোম্পানিতে 'লিয়েন' আছে। যুদ্ধ শেষ হলে সেখানে ফিরে গিয়ে পুনরায় স্বপদে প্রতিষ্ঠিত হবেন পূর্বগৌরবে।

নিমন্ত্রিতের সংখ্যা জন-দশেক। একমাত্র আমিই একক। বাকি সবাই যুগলে—মিস্টার অ্যান্ড মিসেস। ডিনার ন'টায়, কিন্তু নিমন্ত্রিতেরা সাড়ে সাতটার মধ্যে সবাই উপস্থিত। ড্রয়িংরুম তাঁদের হাস্য, পরিহাস ও আনন্দকলরবে মুখরিত হয়ে উঠল।

আমাদের প্রাচীন ভোজসভাগুলির সঙ্গে এই ডিনার পার্টিগুলির প্রভেদটা সুস্পষ্ট।



তফাতটা শুধু আসন পেতে আহার ও ছুরি-কাঁটায় খাওয়ার মধ্যে নয়। আমাদের ভোজন-আয়োজনগুলি মূলত সামাজিক ক্রিয়াকর্ম-সম্পর্কিত। মেয়ের বিয়ে, ছেলের উপনয়ন, নাতনির ভাত কিস্বা ব্রত, পার্বণ উপলক্ষ করে আমাদের নিমন্ত্রণ। তাতে লোক ডাকতে হয় আত্মীয়তা ও কুটুম্বিতার সূত্র ধরে, হৃদয়তার বিচার করে নয়। সুতরাং সংখ্যা হয় অপরিমিত। ছাদের উপর শামিয়ানা টাঙিয়ে তার নিচে একসঙ্গে আসন পড়ে সন্তর কিস্বা আশি। মেয়েদের জন্য শয়নগৃহে খাট-পালঙ্ক বের করে খাবার জায়গা। এতেও একেবারে সমাধা হয় না সমুদয় নিমন্ত্রিতের আহার। বাড়ির সিকি মাইল দূর থেকে টের পাওয়া যায় কলকোলাহল।

ইংরেজি ডিনারের বিশেষ কোনো উপলক্ষের দরকার নেই। নেই কোনো নির্দিষ্ট দিন। কোনো বিশেষ ব্যক্তিকে ডাকার অলঙ্ঘনীয় দায় নেই গৃহকর্তার। গৃহকর্ত্রী বলাই ঠিক—কারণ নিমন্ত্রণ করেন গৃহিণীরা।

এক টেবিলে বসে খাওয়ার রীতি স্বভাবতই নিমন্ত্রিতের সংখ্যাকে পরিমিত রাখে। বেশির ভাগই ছ'জন; উর্ধ্বে বারো। তা-ও গৃহকর্তা ও গৃহিণীকে নিয়ে। বাড়ির গৃহিণী এখানে ভাঁড়ারে ময়দা মাখানো নিয়ে ব্যস্ত নন, ড্রইংরুমে আর পাঁচজন নিমন্ত্রিতার ন্যায় আলাপ-আলোচনায় তাঁরও যোগ আছে। তাঁর বসন হলুদের চিহ্নদ্বারা লাক্ষিত নয়, আনন উনানের আঁচে বিশীর্ণ নয় এবং দেহ পরিবেশনজনিত ক্লাস্তিতে পীড়িত নয়। তিনিও সুবেশা, সুসজ্জিতা। তিনি সমুদয় অভ্যাগতদের আহারান্তে অপরাহ্ন-বেলায় সর্বশেষে আহারে বসেন না, তাঁদের সঙ্গেই আহার্য গ্রহণ করেন। গৃহকর্তা কোমরে গামছা জড়িয়ে জলের জগ বা নুনের হাঁড়ি-হাতে ছুটোছুটি না করেও অতিথিদের আদর-আপ্যায়নের প্রতি দৃষ্টি রাখেন, তাঁদের সঙ্গে বসেই আহার করেন।

খাওয়াটাই ইংরেজি ডিনারের মূল কথা নয়। সেটা বন্ধুজনের একত্র মিলনের একটা উপলক্ষ মাত্র। তাই আহারের আয়োজন পরিমিত। সুক্ত থেকে অম্বল পর্যন্ত দশটা তরকারি এবং দরবেশ থেকে রাবড়ি পর্যন্ত পাঁচটা মিষ্টান্ন'র আয়োজন না হলে সেখানে কেউ ছি ছি করে না। পাত্তুয়া গেলার কৃতিত্ব নিয়ে প্রতিযোগিতা নেই ইংরেজি ডিনারে। আমাদের আধুনিক সমাজের ইস-বঙ্গের ক্রটি অন্বেষণে যাদের কখনও ক্লাস্তি নেই, এই একটি ব্যাপারে অন্তত তাঁরা যেন আমাদের কাছে কৃতজ্ঞ থাকেন।

আমাদের নিমন্ত্রণকর্তা মজলিশি ধরনের লোক। আসর জমাবার দক্ষতা আছে তাঁর। এককালে শিকারে শখ ছিল। বিহারের জঙ্গলে সম্বর শিকারের গল্প করলেন, আসামের অরণ্যে নেকড়ে।

শুধু গল্প নয়, তাসের ম্যাজিক জানেন অনেক রকম। চোখ বুজে প্যাকেটের মধ্য থেকে চিড়িতনের গোলাম বের করে দিয়ে বিস্থিত করলেন সবাইকে, হরতনের নওলাকে হাত ঘুরিয়ে নিমিষের মধ্যে বানিয়ে দিলেন গোলাম এবং এক মহিলার শাড়ির ভাঁজ থেকে ইচ্ছাবনের সাহেব বের করে তাঁর কাছে কপট তাড়না এবং আর সবার কাছে উচ্ছ্বসিত সাধুবাদ লাভ করলেন। গল্পগুজব ও হাস্য-পরিহাসের মাঝে মাঝে শীতল পানীয় এবং ককটেল গ্রাসে টোমাতোর রস পরিবেশন করল বেয়ারা।

আহারের ব্যবস্থা পাশের কক্ষে। বুফে ডিনার। একটা টেবিলের উপরে বিভিন্ন পাত্রে সাজানো সমুদয় আহাৰ্য। রোস্ট, স্যালাড, চপ, আবার তার সঙ্গেই পরোটা বিরিয়ানি, পটলের দোলমা। পুডিং আছে, রসগোল্লাও আছে। অবাক হওয়ার কিছু নেই। ইঙ্গ-বঙ্গের ছাপ থাকে আমাদের অশনে, বসনে, চিন্তায় ও কর্মে। হাতে দশগাছা জলতরঙ্গ চুড়ির সঙ্গেই আমাদের মেয়েরা পরেন রিস্টওয়াচ; কোঁচানো ধুতির উপরেই ছেলেরা পরেন ডবল কাফের শার্ট।

সাইডবোর্ডে স্তরে স্তরে একদিকে সাজানো আছে প্রেট, অন্যদিকে চামচে, কাঁটা এবং ছুরি। সবাই প্রেট নিয়ে স্বহস্তে নিজ-নিজ অভিরুচিমতো আহাৰ্য তুলে নেন। ছেলেরা বেশির ভাগ টেবিলের চারপাশে দাঁড়িয়ে দাঁড়িয়ে খান। মেয়েরা কেউ বসেন চেয়ারে, কেউ-বা ছেলেদের অনুসরণে দাঁড়িয়েই। গৃহকর্ত্রী খেতে খেতেই তদারক করেন অতিথিদের। বলেন, “এ কী ভাই, মিলি তুমি কিছু খাচ্ছ না যে? মিষ্টার সেন, আর একটা চপ নিন। মিসেস দেশাই, রোস্ট নিয়েছেন তো?”

মিসেস সাহার নাম শোনা ছিল ইতিপূর্বে, চাক্ষুষ পরিচয় ঘটল এই ভোজসভায়। অতিশয় স্ত্রীণাসী, সাধারণ বাঙালি মেয়েদের তুলনায় যথেষ্ট ফর্সা কিন্তু পাউডার-আধিক্যের দ্বারা গণ্ডের স্বাভাবিক বর্ণকে এমনভাবে ঢেকে রেখেছেন যে, কাগজের মতো সাদা মুখ দেখে মনে হয় বুঝি-বা কোনো কঠিন অসুখের পর ভাওয়ালি বা মদনপল্লি স্যানিটোরিয়াম থেকে সদ্য উঠে এসেছেন! পরিধানে সাদা ধবধবে শিফনের অতি মহার্ঘ শাড়ি; প্রায় কাচের মতো স্বচ্ছ। তার মধ্য দিয়ে সুস্পষ্ট দৃষ্টিগোচর ঈষৎ হালকা রঙের অন্তর্বাস। শাড়িতে পাড় থাকাটা আজকাল যথেষ্ট মডার্ন নয়। ঘটি-হাতা ব্লাউজের মধ্যে থেকে লম্বমান বিশীর্ণ বাহুদ্বয়। ‘ভি’ আকৃতি সম্মুখভাগে মর্যাদিকরূপে উন্মোচিত গ্রীবার দুই পার্শ্ববর্তী উদ্ধত দুটি কণ্ঠা! গলায় মুক্তার একটি মালা। কানে সর্ষপাকৃতি ক্ষুদ্র মুক্তা গাঁথে গাঁথে একজোড়া দুল, প্রায় কাঁধ অবধি ঝোলানো। বাম হাতের দীর্ঘ সরু অনামিকায় তারই সঙ্গে ম্যাচ-করা মুক্তা-বসানো মস্ত একটি আংটি। সবুজ, নীল, মেরুন, ভায়োলেট প্রভৃতি বিভিন্ন রঙের শাড়িপরিহিতাদের মধ্যে মহিলা আপন বেশভূষায় সম্পূর্ণ বিশিষ্ট। যেন শীতের দিনে বর্ণাঢ্য মরসুমি ফুলের বাগানে রজনীগন্ধার উদ্ধত বৃন্তটি।

মহিলা টেবিল-স্পুনের আধ চামচে বিরিয়ানি নিয়েছিলেন, তাই যেন শেষ করতে পারেন না! হোস্টেস একটু রোস্ট তুলে দিতে যাচ্ছিলেন তাঁর প্রেটে। “পারব না ভাই, পারব না, দিয়ো না, প্লিজ” বলে চেষ্টা করে উঠলেন। অনেক সাধ্যসাধনার পর একটা চপ নিলেন এবং ম্যানিকিউর করা দুই আঙুল দিয়ে অতি সন্তর্পণে তার সিকি ভাগ ভেঙে খেলেন। কেবলই বলেন, “ভয়ানক পেট ভরে গেছে। আর পারছিনে।”

একটা ঝালের চচ্চড়ি ছিল টেবিলে, তাই একটু নিলেন মিসেস সাহা। এটাই চলতি। মিষ্টার সাহা বাধা দিয়ে বললেন, “খেয়ো না, এত ঝাল খেলে অসুখ করে মরবে।” এতেও নতুনত্ব নেই। স্বামীরা লঙ্কা খেতে বারণ করেন এবং স্ত্রীরা তা অগ্রাহ্য করে বেশি করে লঙ্কা খান, এইটে প্রমাণ করাই হল আধুনিকাদের আহাৰ-সম্পর্কিত আধুনিকতম ফ্যাশান।

ভোজনপর্বের শেষে মহিলাদের প্রতি অনুরোধ হল গানের। কেউ গাইলেন। কেউ “অনেকদিন ছেড়ে দিয়েছি” বলে এড়িয়ে গেলেন। গৃহকর্ত্রী মোটামুটি রকম গাইতে পারেন এবং তাঁকে অনেক সাধ্যসাধনা না করলেও চলে। একটি গুজরাটি মহিলা তাঁর স্বদেশীয় সঙ্গীত শোনালেন। তার মধ্যে একটি ভক্ত কবি নরসিংহ মেহতার রচনা। তাঁর রচিত “বৈষ্ণব জনতো তেঁনে কহি” বলে একটি গান এককালে গান্ধীজির প্রিয়রূপে খুব প্রসিদ্ধি লাভ করেছিল।

মিসেস্ সাহার সদাশয়তা আছে। অনেক রাত্রিতে ডিনার পার্টি ভাঙল। নিজ মোটরে পৌছে দিতে চাইলেন আমাকে আমার আবাসে। মিস্টার সাহাকে বললেন, “বীরেন, মিনি সাহেবকে নামিয়ে দিতে হবে কুইনসওয়াতে।”

অতি-আধুনিকারা স্বামীকে নাম ধরেই ডাকেন। ওটা ইংরেজির নকল। আমি সনাতনী নই। স্বামীর নাম করতে নেই, এ-অনুশাসনের শাস্ত্রীয় ব্যাখ্যায় আমার বিশ্বাস নেই। কিন্তু ইংরেজি জন, আর্থার, সিরিলের কায়দায় আমাদের স্ত্রীরাও আমাদের সুধীর, বিকাশ বা উপেন বলে ডাকতে শুরু করলে পুলকে রোমাঞ্চিত হয়ে ওঠারও কোনো কারণ দেখি না।

মানুষের নামের যদি কেবলমাত্র শনাক্তকরণ ছাড়া আর কোনো প্রয়োজন না থাকত, তবে নামের বদলে সংখ্যা ব্যবহারের দ্বারাই তা অনায়াসে চলতে পারত। তা হলে মেয়ের জন্মাত্রেই মেয়ের মা তার নামনির্বাচন নিয়ে ভাবনায় পড়তেন না। নিত্যনতুন নামকরণের অনুরোধ জানিয়ে রবীন্দ্রনাথের কাছে চিঠি আসত না।

জড়বস্তুর পক্ষে নাম একটা অভিধামাত্র। গোলাপকে ঘেঁটু আখ্যা দিলে তার গন্ধের তারতম্য ঘটে না, একথা শেক্সপিয়রের মতো অন্য পাঁচজনেও জানে; যদিও একথা ঠিক যে, কাব্যের সীমানা থেকে শুধু ঐ নামের জন্যে তার চির-নির্বাসনের সম্ভাবনা ঘটে।

কিন্তু মানুষের পরিচয় তো কেবল কোনো বিশেষ একটি সত্তার দ্বারা নয়। বিভিন্ন পরিবেশে, বিভিন্ন কারণে, বিভিন্ন ব্যক্তির কাছে তার বিভিন্ন রূপ। তাকে প্রকাশ করার জন্য তার বিভিন্ন নাম। আপিসে কেরানিবাবুর কাছে যিনি মিস্টার মুখার্জী, পাড়ায় বন্ধুজনের কাছে তিনি বিনোদবাবু, বাল্যের সহপাঠীদের কাছে বিন্দে, বাড়িতে মায়ের কাছে খোকন এবং কোনো বিশেষ একটি মাত্র লোকের কাছে তিনি ‘ওগো’ কিম্বা ‘সুন্দহ’ নয়তো শুধুমাত্র ‘এই’। সেগুলি তো কেবল নাম নয়—সেগুলি নির্দেশ। সংজ্ঞা নয়, সংকেত। সেই বিশেষ ব্যক্তিটির কাছে সেগুলি বিশেষ অর্থ বহন করে, বিশেষ কানের ভিতরে বিশেষ সুর। এবং অভিজ্ঞ লোকেরা জানেন, এই ছোট্ট দুই অক্ষরের সংকেতের দ্বারাই যে পারে সে আপনি পারে, পারে সে ফুল ফোটাতে!

## তেরো

প্রত্যেক মানুষের জীবনেই বোধ হয় এমন কতকগুলি দুর্বল মুহূর্ত আসে যখন সে মস্তিষ্ক অপেক্ষা হৃদয় দ্বারা বেশি চালিত হয়। সে-মুহূর্তগুলি অতর্কিতে দমকা হাওয়ায় মতো এসে অতিসাবধানী লোকদের স্বেচ্ছের বন্ধন ছিন্নভিন্ন করে দেয়। তখন সংযমী

যোগী পুরুষেরা লক্ষ্যভ্রষ্ট হন, হিসেবি মহাজনেরা গরমিল করেন জমাখরচের খাতায় এবং স্বভাবত চাপা প্রকৃতির স্থিতধী ব্যক্তির বিচলিতচিত্তে মনের কথা ব্যক্ত করেন অন্য লোকের কাছে। এমনি এক দুর্বল মুহূর্তে আধারকারের পূর্ব-ইতিহাস উদ্ঘাটিত হল একান্ত অপ্রত্যাশিতরূপে। ক্লান্ত সমাহিত নয়ন এবং নিঃসঙ্গ জীবন-যাপনের অন্তরালবর্তী রহস্য শোনা গেল তারই নিজ বর্ণনায়।

অপরাহ্নবেলায় ঈশান-কোণে মেঘ দেখা দিয়েছিল। বৃষ্টি প্রত্যাশা করেছিলাম গ্রীষ্মপীড়িত হতভাগ্যের দল! বৃষ্টি এল না, এল আঁধি! ধূলির ঝড়। না দেখলে কল্পনা করা শক্ত এর রূপ। বাংলাদেশে কোনোকালে দেখা যায় না এ-জিনিস। আকাশ-ভুবন আঁধার করে প্রবল বেগে কোথা থেকে আসে এত বিপুল ধূলিরাশি তা ধারণাতীত। মেঘের চাইতে ঘন তার আচ্ছাদন সূর্যকে আবৃত করে। ঘরের মধ্যে আলো জ্বালতে হয় দিনের বেলায়। দোর জানালা নিশ্চিদ্ররূপে বন্ধ করলেও কিছু ধূলা প্রবেশ করে নাকে, মুখে, চোখে, এমনকি বাস্তব-পেটরার মধ্যস্থিত জামা-কাপড়ে। বৃষ্টির ফোঁটা মাত্র নেই; শুধু গুরু ধূলির ঝড়। কিন্তু এই আঁধির ফলেই উত্তাপ-হ্রাস পায় অভাবনীয় ভাবে, ধরণী হয় শীতল। উত্তরভারতের এক বিশ্বয়কর প্রাকৃতিক বৈশিষ্ট্য এই আঁধি।

রুদ্ধদ্বার কক্ষে বসেছি দুজনে মুখোমুখি। 'শৌ-শৌ' শব্দে বাইরে বইছে আঁধির ঝড়ে হাওয়া, আলোড়িত হচ্ছে ধূলির পাহাড়। ধীরে ধীরে অনুচ্চকণ্ঠে বিবৃত করলেন আধারকার আপন জীবন-ইতিহাস।

আধারকারের কুলগত পেশা যুদ্ধ। তাঁর পূর্বপুরুষেরা লড়েছে মুঘলের সঙ্গে, লড়েছে যশোবন্ত সিংহের বিরুদ্ধে। তাঁর প্রপিতামহ বিষ্ণুদত্ত পেশোয়া বাজিরাওয়ের অন্যতম সেনাপতি ছিলেন। আসাই'র যুদ্ধে পেশোয়ার দক্ষিণপার্শ্ব থেকে শত্রু নিপাত করেছেন অমিতবিক্রমে। নিহত হয়েছেন বৃকে গুলির আঘাতে। আধারকার বালক বয়সে দেখেছেন তাঁর রুধিরাক্ত লৌহবর্ম, পরিবারের সযত্নে রক্ষিত গৌরবময় উত্তরাধিকার। বীরের রক্ত আছে তাঁর ধমনিতে।

পরিবারে বিত্ত ছিল প্রচুর, বীৰ্য ছিল বিখ্যাত, কিন্তু বিদ্যা ছিল না আধুনিক। আধারকার পিতার একমাত্র সন্তান, শিক্ষা লাভ করেন পুণার এক ইংরেজি স্কুলে। এলফিনস্টোন কলেজ থেকে পাশ করে গেলেন ম্যাগেস্টারে। বয়ন-বিদ্যা-বিশেষজ্ঞ হয়ে যখন ফিরলেন স্বদেশে, যুরোপের প্রথম মহাযুদ্ধ তখন স্ফাণ্ড হয়েছে। বস্বেতে স্থাপন করলেন এক কাপড়ের কল, অসুরের মতো খাটতে লাগলেন তাকে সাফল্যমণ্ডিত করতে।

বছর পাঁচেক পরের কথা। এক সন্ধ্যায় এক বন্ধুর আগমন-সম্ভাবনায় এসেছেন দাদর স্টেশনে। বন্ধু এলেন না। ফিরে আসছেন এমন সময় কানে এল এক নারীকণ্ঠ। সে তো কণ্ঠ নয়, সে সুর। ভাষা বুঝলেন না, পিছনে তাকিয়ে দেখলেন, প্র্যাটফরমে দাঁড়িয়ে এক তরুণী, সঙ্গে একজন মধ্যবয়সী ভদ্রলোক। সামনে স্টেকেস, হোল্ডঅল, বেতের ঝুড়ি ইত্যাদি মালপত্র। উভয়ের মুখে উদ্বেগের ছাপ সুস্পষ্ট। বস্বেতে তখন সাম্প্রদায়িক দাঙ্গার তাণ্ডব চলেছে সাজ্জাতিক। স্টেশনের ভিতরে কুলির অভাব, বাইরে যানবাহনের। সন্ধ্যার পরে ঘরের বাইরে যাওয়া নিরাপদ নয়।

আধারকার জিজ্ঞাসা করলেন, “আপনারা কি বস্বেতে এই প্রথম এলেন?”

ভদ্রলোক বললেন, “হ্যাঁ, আমার এক আত্মীয় থাকেন এখানে। তাঁকে টেলিগ্রাম করেছিলাম স্টেশনে হাজির থাকতে। আসেননি দেখছি। বোধ হয় টেলিগ্রাম পাননি।”

“পেলেও আসা কঠিন। শহরে দাঙ্গা বেধেছে, খুন-খারাপি চলছে বেপরোয়া। আপনারা কোথায় উঠবেন?”

“তাই তো ভাবছি। কাছাকাছি কোনো হোটেলের সন্ধান দিতে পারেন?”

“তা পারি। কিন্তু জায়গা পাবেন না সেখানে। বেশির ভাগ হোটেলের চাকর, বেয়ারা, রাঁধুনি পালিয়েছে প্রাণের ভয়ে; সেখানে বাসিন্দা যারা আছে, তাদের অন্ত্রজলের অভাব, নতুন লোক নেয় না আর।”

“তবে তো বড়ই মুশকিল” বলে ভদ্রলোক সঙ্গিনীর দিকে তাকালেন। ভয়াব্র্ত ভাব সঞ্চারিত হল তরুণীর মুখমণ্ডলে। স্টেশনে ওয়েটিং রুমে চেষ্টা করে ফল হল না। সব আগেভাগেই দখল হয়ে আছে দূরগামী যাত্রীতে। পরম অসহায় দৃষ্টিতে তাকালেন মহিলা তাঁর স্বামীর দিকে।

আধারকার প্রস্তাব করলেন, “যদি আপত্তি না থাকে, চলুন আমার ফ্ল্যাটে। কাল প্রাতে খোজ করা যাবে আপনাদের আত্মীয়ের। আমার সঙ্গে গাড়ি আছে।”

ভদ্রলোক তাকালেন স্ত্রীর পানে। তিনি একটু সঙ্কুচিত হয়ে ইংরেজিতে বললেন স্বামীকে, যদিও উজ্জ্বল লক্ষ্য যে আধারকার তাতে সন্দেহ রইল না। “রাত্রিবেলা হঠাৎ বিনা খবরে আমরা গিয়ে উঠলে গুঁর স্ত্রীকে খুব বিব্রত করা হবে।”

আবার সেই সুর। বোধ করি, এ-সুর ছিল ভীমসিংহপত্নী পদ্মিনীর, যা দিয়ে তিনি রাজপুত্র যুবককে উদ্ধৃত করেছিলেন যুদ্ধে প্রাণ দিতে, হয়তো ছিল হেলেন অব ট্রয়ের, যার জন্য সহস্র রণতরী ভেসেছিল সাগরে!

আধারকার বললেন, “এক রাত্রির জন্য নিরুপায় অতিথিদের গৃহে আতিথ্য দিলে স্ত্রীকে বিব্রত করা হয় কি না জানি নে, হয়তো হয়। কিন্তু আপনারা নিশ্চিত হোন আমার স্ত্রী মোটেই বিব্রত হবেন না, কারণ আমার স্ত্রী নেই।”

“স্ত্রী নেই? ওহ্, তা হলে—” বলতে বলতে থেমে গেলেন মহিলা।

আধারকার বললেন, “তা হলে কী?”

“আপনাকে ধন্যবাদ। আমরা কোনোরকম করে রাতটা প্ল্যাটফর্মেরেই কাটিয়ে দেব।”

“ও, ব্যাচিলরের বাড়িতে অতিথি হওয়াটা সামাজিকতায় বাধে বুঝি? মনে ছিল না। বেশ, প্ল্যাটফর্মেরেই থাকবেন। ভয় নেই। গোয়ানিজ কুলিগুলি দেখছিলেন বটে এখন, তবে আছে কাছাকাছিই। জড়োয়া গয়না আছে গায়ে, সুটকেসগুলির ভিতরেই—বা না কোন শ’ কয়েক টাকার জিনিসপত্র হবে। আশা করি, তাদের আসতে বিলম্ব হবে না। কাল মৃতদেহ শনাক্ত করার দরকার হলে খবর দেবেন। আচ্ছা, চলি, গুড্ নাইট”— বলে দ্রুতপদে নিভ্রান্ত হলেন আধারকার। স্বরে তার অপমানিতের ক্ষোভ এবং উদ্ভা।

কিন্তু মিনিট পাঁচেক পরেই আবার দেখা গেল আধারকারকে ফিরে আসতে। বললেন, “দেখুন, একটা উপায় মাথায় এল। আমার ফ্ল্যাটেই চলুন। আপনাদের

পৌছে দিয়ে আমি বাড়ির কাছাকাছি আমার কেরানির বাড়িতে গিয়ে বরং শোব। তা হলে বাড়ির দোষ থাকবে না ব্যাচিলরত্বের। ভিতর থেকে আগল এঁটে দেবেন ভালো করে, আর যা-ই হোক, প্ল্যাটফর্মের চাইতে আশা করি সেটা নিরাপদ হবে।”

গোয়ানিজ কুলির নামে মহিলাটির মনে তখন যথেষ্ট ভয় ধরেছে। স্বামীটিরও প্ল্যাটফর্মের রাত কাটানোর কল্পনাটা খুব প্রীতিপদ মনে হচ্ছিল না। সুতরাং আধারকারের প্রস্তাবে সম্মত হলেন। কুলির সন্ধান পাওয়া গেল না। আধারকার নিজে দুহাতে অবলীলাক্রমে দুটো বড় সুটকেস বয়ে নিয়ে গেলেন গাড়িতে।

ছোট ফ্ল্যাট। একটিমাত্র শয়নকক্ষ। আহারাদির পর আধারকার প্রস্থানোদ্যোগ করতেই মহিলাটি পরিষ্কার ইংরেজিতে জিজ্ঞাসা করলেন, “ওকি, কোথায় যাচ্ছেন?”

“আমার কেরানির বাড়িতে?”

“কেরানির বাড়িতে? সে কত দূর?”

“মাইল পাঁচেক হবে।”

“এত রাত্রিতে সেখানে? কোনো বিশেষ দরকার আছে কি?”

“দরকার রাত্রিটা কাটানো।”

“কেন এ-বাড়ি দোষ করল কী?”

আধারকার এর জন্য প্রস্তুত ছিলেন না। বললেন, “দোষ নয়, মানে আপনাদের অসুবিধে—”

বাধা দিয়ে মহিলাটি অসহিষ্ণু স্বরে বললেন, “আমাদের অসুবিধার কথা আপনাকে কে বলেছে? আর যদি হয়ই অসুবিধা; আপনি দয়া করে আশ্রয় দিয়েছেন, আর আপনাকেই এই দাঙ্গা-হাঙ্গামার রাত্রিতে বাড়ি থেকে তাড়িয়ে নিজেদের সুবিধা করব, আমাদের এতখানি জংলি ঠাওরালেন কেন? তার চেয়ে বলুন, আমরা আবার সেই স্টেশনের প্ল্যাটফর্মের ফিরে যাচ্ছি।”

স্বামী ভদ্রলোকও জোর দিয়ে বললেন, “খেপেছেন মশাই, এই রাত্রিতে যাবেন বাইরে!”

কিন্তু আর-এক দফা তর্ক দেখা দিল শয়ন-ব্যবস্থা নিয়ে। একটিমাত্র খাট। আধারকার চান সেটি দখল করবেন অতিথিরা, তিনি ড্রয়িংরুমের মেঝেতে ঘুমাবেন। অতিথিদের ইচ্ছা ঠিক তার বিপরীত। কিন্তু এবারেও মহিলাই জয়লাভ করলেন।

নিজের ঘরে শুতে যেতে যেতে আধারকার বললেন, “এ ভারি অন্যায় হল। মনে-মনে নিশ্চয় ভাবছেন, লোকটা সুবিধের নয়। নিজে আরাম করে খাটে নিদ্রা দিচ্ছে, আর অতিথিদের ভূমিশ্যা।”

মৃদু হাস্যে মহিলাটি বললেন, “লোকটি আপনি সুবিধের নন, তা টের পেয়েছি! অত্যন্ত ঝগড়াটে।”

“ঝগড়াটে? বাঃ ঝগড়া করলেম কখন?”

“করলেন না? সেই যে প্ল্যাটফর্মের কী বলেছি, তা নিয়ে কত কথা শোনালেন, কেরানির বাড়ি শুতে যেতে চাইলেন! যান, আর কথা নয়। রাত হয়েছে। এখন, লক্ষ্মী হয়ে শুয়ে পড়ুন গে।”

পরদিন আধারকারের ঘুম ভাঙল অনেক বিলম্বে ভূত্যের ডাকাডাকিতে। ঘড়িতে তখন প্রায় আটটা। তাড়াতাড়ি বেশ পরিবর্তন করে এসে দেখেন, টেবিলে প্রাতরাশ প্রস্তুত। সুপ্রভাত জ্ঞাপন করতে মহিলাটি হেসে বললেন, “কাল রাত্তিরে শুতে যাবার সময় বললেন, আমাদের ভূমিশস্যার কথা মনে করে খাটে শুয়ে ভালো ঘুম হবে না আপনার। কনশেশ খোঁচা মারবে! এই আপনার ঘুম না-হওয়ার নমুনা? কনশেশের খোঁচা নিয়েই বেলা আটটা?”

আধারকার লজ্জিত হয়ে বললেন, “দেখতে পাচ্ছি, আমি ঘুমিয়ে পড়ার সঙ্গে সঙ্গে হতভাগা কনশেশটাও ঘুমে বেহঁশ হয়েছিল।”

উচ্চহাস্য উথিত হল টেবিলে। স্বামী ও গৃহস্বামীর অট্টহাস্যের সঙ্গে মিশল নারীকণ্ঠের কলধ্বনি। মহিলা বললেন, “তাই নাকের ডাকে পাশের ঘরে চোখের দুপাতা এক করা দায়!”

“নাকের ডাক? নাক ডাকে নাকি আমার? কই, আমি তো টের পাইনি কখনও।”

“এতো মজা। যখন টের পাওয়ার অবস্থা হয়, নাক তখন আর ডাকে না।” আবার সেই পুরুষ-নারীকণ্ঠের সম্মিলিত হাস্যোচ্ছ্বাস।

সন্ধ্যার কিছু আগে অতিথিরা বিদায় নিয়ে চলে গেলেন তাঁদের আত্মীয়ের গৃহে। সনির্বন্ধ অনুরোধ জানিয়ে গেলেন তাঁদের ওখানে একদিন অবকাশমতো আসবার। আধারকার প্রস্তুত ছিলেন তখনই তাঁদের সঙ্গে গাড়িতে চেপে বসতে, শুধু সেটা নিতান্ত অশোভন হবে বলেই মনকে নিরস্ত করলেন।

তাঁদের গাড়িতে তুলে দিয়ে আধারকার এসে বললেন বারান্দায়। পড়তে চেষ্টা করলেন অন্যদিনের মতো এক ইংরেজি প্রেমের উপন্যাস। এগুতে পারলেন না বেশি দূর। মন বারবার উন্মনা হতে লাগল। প্রত্যহ সন্ধ্যাবেলা বিলিয়র্ড খেলতে যান জিমখানা ক্লাবে। সেদিন কিছুমাত্র উৎসাহ রইল না তাঁর।

সুনন্দা ব্যানার্জীরা দিন-দশেক রইলেন বসে। প্রত্যহ অপরাহ্নে আপিস থেকে আধারকার সোজা এসে হাজির হতেন ব্যানার্জীদের আত্মীয়গৃহে। দল বেঁধে যেতেন কোনোদিন সিনেমায়, কোনোদিন অ্যাপোলো বন্দর, কোনোদিন মহালক্ষ্মী মন্দির, কোনোদিন-বা এলিফেন্টার কেভস্।

বসে ত্যাগ করে স্বস্থান লাহোরে প্রত্যাবর্তন করলেন ব্যানার্জী-দম্পতি। আধারকার রইলেন বসে, ফিরে গেলেন আপন রূপহীন রসহীন, বৈচিত্র্যবর্জিত জীবনের ক্লান্তিকর পুনরাবৃত্তির মধ্যে। প্রভাত আর আনে না কোনো প্রত্যাশা, সন্ধ্যায় ঘটে না কোনো প্রার্থিত সান্নিধ্য, রাত্তিতে থাকে না পরবর্তী দিবসের প্রগাঢ় প্রতীক্ষা। সুনন্দাবিরহিত নগরীর কুত্রাপি নেই কোনো আকর্ষণ, কোনোখানে নেই মধু, নেই স্বাদ।

কিন্তু বিচ্ছেদ মানেই নয় ছেদ, যতির অর্থ নয় ইতি। অদর্শনের সান্ত্বনা থাকে পত্রে, বাচনের বিকল্প লেখনে। লাহোর পৌছে সুনন্দা ব্যানার্জী লিখলেন—

“মিস্টার আধারকার, নিরুপায় নিশীথে অপরিচিত আগন্তুকদের আপনি আশ্রয় দিয়েছিলেন। আতিথ্য দিয়েছিলেন অকৃপণ ঔদার্যে—সেজন্য ধন্যবাদ। আপনার সৌজন্য স্মরণে রাখব চিরকাল।”

জবাবে আধারকার লিখলেন,—

“এক রাত্রির অবস্থিতির দ্বারা ব্যাচিলরের গুহাকে আপনি দিয়েছেন সম্মান, গৃহস্বামীকে দিয়েছেন দুর্জয় মর্যাদা। কৃতজ্ঞতা তো জানাব আমি। সৌজন্যের প্রকাশ কর্মে, সেটা সহজসাধ্য; প্রীতির প্রবেশ মর্মে, তা দুরূহলভ্য। মিসেস ব্যানার্জী, আপনার অনুগ্রহ বাচনাতীত।”

ত্বরিত উত্তর এল পত্রের। “দেখছি, আপনার কুশলতা শুধু আতিথেয়তায় নয়, পত্ররচনায়ও বটে। মশাই, আপনি তো চারুদত্ত নন, আপনি চারুবাক্।”

এমনি করে চিঠি-লেখালেখির খেলা চলে দুই পক্ষে। সে-চিঠিতে উক্তের চাইতে অনুক্তের ভাগ বেশি; শব্দের চাইতে অর্থের।

অভাবনীয় পরিবর্তন ঘটল আধারকারের জীবনে। তাঁর জীবনের প্রারম্ভ থেকে এ-পর্যন্ত কেটেছে পুঁথিপত্র আর কলকারখানা নিয়ে। পরীক্ষায় পাশ আর অর্থার্জন। সোনার-কাঠি-ছোঁয়ানো রূপকথার রাজকন্যার মতো অকস্মাৎ জেগে উঠে আজ নিজেকে তিনি প্রথম আবিষ্কার করলেন। অধীত বিদ্যার গুণ পাণ্ডিত্যের মধ্যে নয়, নয় অর্জিত অর্থের বিরাট সমুদয়স্থলীতে। আবিষ্কার করলেন আপন উপবাসী হৃদয়ের অন্তহীন শূন্যতার মধ্যে।

কর্মহীন সন্ধ্যায় নির্জন গৃহকোণে ভাবতে ভালো লাগে যে-স্মৃতি, সে সুন্দর! সুষুপ্ত রাত্রির তিমিরসত্ত্ব প্রহরে অকস্মাৎ ঘুম ভেঙে মনে পড়ে যে-প্রসঙ্গ, সে সুন্দর। প্রভাতে প্রথম জাগরণে স্মরণে আসে যে-মুখ, সে সুন্দর। এ কী বিস্ময়, এ কী রহস্য, আনন্দ-বেদনা-বিজড়িত এ কী অনির্বচনীয় অনুভূতি!

নিজের হৃদয় যতই উন্মাদিত হয় নিজের কাছে, লজ্জিত হন, অনুতপ্ত হন আধারকার। শাসন করেন দুর্বল চিত্ত। পাছে কোনোদিন কোনো অসাবধান মুহূর্তে সুন্দর কাছে ইস্তিমামাত্র প্রকাশ পায় মনোভাব, সে-দুর্ভাবনায় শঙ্কিত হন।

“তোমাকে আর একটু জিন অ্যান্ড লাইম দেবে, মিনি সাহেব?” ইঠাৎ থেমে প্রশ্ন করলেন আধারকার।

গ্রাসে তখনও অর্ধেকের বেশি ছিল। তুলে ধরে বললেন, “অলমতি বিস্তরণে।”

মিনিটখানেক চুপ করে থেকে আধারকার বললেন, “আমাকে নিশ্চয়ই একটা ভিলেন মনে হচ্ছে!”

জবাবে বললেন, “আপনি আপনার কাহিনী শেষ করুন। আমি রিপোর্টার, রিফর্মার নই। মিনি-সংহিতায় বিধান নেই কোনো প্রায়শ্চিত্তের।”

স্বল্প বিরতির পর খণ্ডিত আখ্যানের অনুবৃত্তি শুরু করলেন আধারকার।

মাস-তিনেক পরে মিলসংক্রান্ত প্রয়োজনে আসতে হল লাহোর। বলা বাহুল্য, অতিথি হলেন ব্যানার্জী-ভবনে।

অতিথিকে ভারতীয়েরা সেবা করেন পুণ্যকামনায়, তাকে যত্ন করেন ভদ্রতার খাতিরে। কিন্তু অতিথিকে আপন করা যায় একমাত্র হৃদয়তার জোরে। সে-হৃদয়তার প্রাচুর্য ছিল সুন্দর। লাহোরে আধারকারের কাজ সমাপ্ত হল তিন দিনে। কিন্তু বিনা-কাজের গ্রন্থিমোচন করে একাধিকবার বার্থ রিজার্ভ ও ক্যাম্পেলেশনের পরে



বস্বেতে প্রত্যাবৃত্ত হলেন তিন-চারে বারো দিন কাটিয়ে। কিন্তু যে-আধারকার বস্বে থেকে গিয়েছিলেন এবং যে-আধারকার লাহোর থেকে ফিরলেন তাঁরা এক ব্যক্তি নন। ইতিমধ্যে তাঁর জন্মান্তর ঘটেছে।

লাহোরে সেদিন অপরাহ্নবেলায় গিয়েছিলেন এক পরিচিত বন্ধু সন্দর্শনে, শহর থেকে অনেকটা দূরে। আশা ছিল সন্ধ্যার পূর্বেই প্রত্যাবর্তনের। কিন্তু এড়াতে পারলেন না অনুরোধ, নৈশভোজন সমাধা করতে হল সেখানে। ফেরার পথে নামল বৃষ্টি। তার উপরে বাহন হল বিকল। টাক্সার অশ্ব ও আসন দুই-ই প্রাচীনত্বে সমান, চলতে চলতে একটি চাকা স্থানচ্যুত হয়ে ভেঙে পড়ল অকস্মাৎ; আরোহী সবলে নিষ্কিপ্ত হলেন কর্দমাক্ত পথে। উত্তরভারতে শীতকালের বর্ষণ বর্ষার প্রবল বারিপাতকেও হার মানায়। জনহীন পথপাশে সিজ হলেন দীর্ঘকাল, ব্যানার্জীগৃহে যখন এসে পৌঁছিলেন রাত তখন প্রায় চারটা।

মুদু আঘাত করতেই দ্বার খুলে দিলেন যিনি তিনি স্বয়ং সুনন্দা।

“কোথায় ছিলে এই ঝড় বাদলার মধ্যে? সারা রাত ধরে আমরা উৎকণ্ঠায় মরছি” বলতে বলতে কণ্ঠ রুদ্ধ হল বাস্পে। ঝরঝর ধারায় অবাধ্য অশ্রু গড়িয়ে পড়ল দুই গায়ে। আত্মসংবরণ করতে ত্বরিত অন্তর্হিতা হলেন পাশের কক্ষে।

দোর খোলার শব্দে গৃহস্বামীর নিদ্রা ভঙ্গ হয়েছিল। তিনি দোতলার সিঁড়ি বেয়ে নেমে এসে জিজ্ঞাসা করলেন, “কী ব্যাপার! কোথায় ছিলেন এতক্ষণ? আমরা ভেবে ভেবে মরি, বিদেশে বিভূঁই এই দুর্যোগের রাত্রিতে কোথায় কী হয়। সুনন্দা তো এক মিনিটের জন্য বিছানায় যায়নি, কেবল বারান্দায় এদিক-ওদিক করেছে। একটু শব্দ হলেই টাক্সা এল ভেবে নিচে যায়।”

আধারকার বাহনবিভ্রাট বিবৃত করলেন সবিস্তারে, ক্ষমা প্রার্থনা করলেন নিজ বিলম্বের জন্য। সুনন্দা বেরিয়ে এসে গম্ভীরকণ্ঠে বাধা দিয়ে বললেন, “ভিজো জামা-কাপড়গুলি ছাড়া হবে কি? টাক্সার চাকা ক’ইঞ্চি ভেঙেছে, ঘোড়া ক’গজ লাফিয়েছে সে-সব কাহিনী কাল সকালে ব্যাখ্যান করলে কিছু মহাভারত অন্তর্ভুক্ত হবে না। মাথা থেকে এখনও জল ঝরছে, নিউমোনিয়া না বাধালে বোধহয় বাহাদুরিটা পুরা হবে না।”

বোঝা গেল, শাসনকর্ত্রী নেপথ্যেই ছিলেন, টাক্সা-দুর্ঘটনার বিবরণ শুনেছেন স্বকর্ণে।

আপন শয়নকক্ষে এসে নিদ্রার চেষ্টা করলেন আধারকার। ঘুম এল না। মুদ্রিত কমল-কলিকার পার্শ্বে গুপ্তনরত লুন্ধ ভ্রমরের মতো মন বারংবার কেবলই প্রদক্ষিণ করে ফিরতে লাগল একটি কক্ষপথে। অতিথির বিলম্ব গৃহকর্ত্রীর এই ব্যাকুল উৎকণ্ঠা, বিন্দ্র নয়নে এই সুদীর্ঘ প্রতীক্ষা, সকোপন অভিমান-জড়িত এই শাসন এবং সর্বোপরি এই অশ্রুধারা-প্লাবিত আননের মধ্য দিয়ে নারীহৃদয়ের কোন গোপন রহস্য আজ অকস্মাৎ উদ্ঘাটিত হল? শয্যা ত্যাগ করে আধারকার বাইরে এসে দাঁড়ালেন।

রাত্রি বিগতপ্রায়। তারকাহীন নভস্তল মেঘমালায় আবৃত এবং দিগন্তবর্তী তরুশ্রেণী বিলীয়মান রজনীর ঈষৎ ঘন অন্ধকারে আচ্ছন্ন। আসন্ন প্রভাতের প্রতীক্ষারত ধরণীর এই প্রশান্ত গম্ভীর মূর্তির মুখোমুখি দাঁড়িয়ে আধারকার যেন আজ

তাঁর জীবনদেবতার প্রসন্ন কল্যাণ করস্পর্শ প্রথম অনুভব করলেন ললাটে। দুই হাত যুক্তকরে প্রণাম করলেন কাকে তা তিনি নিজেই জানেন না। শুধু “আমি ধন্য, আমি ধন্য” এই বাক্য তাঁর উদ্বেল অন্তরের অন্তস্তল থেকে উথিত একটি মহান সঙ্গীতের মতো দ্যুলোক, ভুলোক পরিবাণ্ড করে বিশ্বলোকের বীণাতন্ত্রীতে অনাহত রাগিণীতে ধ্বনিত হতে লাগল।

আধারকার থাকেন বস্বেতে, সুনন্দা থাকেন লাহোরে। প্রায় এক হাজার মাইলের ব্যবধান। কিন্তু যোজনা গণনা করে নয় দূরত্ব, নৈকট্যের নির্দেশ হৃদয়ে। হৃদয়ের সে-অদৃশ্য যোগাযোগের নিবিড় বন্ধনে বহুদূরবর্তী এই দুটি নরনারী পরস্পরের কাছে রইলেন নিকটতম।

সুনন্দা একদিন কথাচ্ছলে বলেছিল, “চাকু, ইংরেজিতে কথা কয়ে সুখ নেই। আমি যদি মারাঠি বলতে পারতাম তবে বেশ হত!”

আধারকার বললেন, “পর্বত যদি মহিম্বদের কাছে না আসতে পারে, মহিম্বদ যাবে পর্বতসকাশে।”

অসাধ্য সাধন করলেন আধারকার। ছ’মাসে শিখলেন বাংলা, বৎসরকালে কণ্ঠস্থ করলেন রবীন্দ্রনাথের কাব্য, দুবছরে সাঙ্গ করলেন পঠনযোগ্য সমুদয় বাংলা সাহিত্য।

আধারকারের পরিজনেরা পরলোকগত। এক বোন স্বামী-পুত্র নিয়ে আছে কঙ্কনে। তার সঙ্গেও যোগাযোগ সুদৃঢ় নয়। এতকাল বৃন্তহীন পুষ্পের মতো আপনাতে আপনি সম্পূর্ণ ছিলেন আধারকার। কর্মে, চিন্তায়, জীবনযাপনে ছিলেন স্বাধীন। এবার সে-স্বনিয়ন্ত্রিত জীবনের ধারা হল বদল। বসে থেকে চিঠি লেখেন লাহোরে, “নন্দা, বাড়ির বেয়ারাটা ছুটি চাইছে তিন মাসের আগাম মাইনে সমেত, দেব কি না লিখো।” কিয় লেখেন, “মালাবার হিল্‌সে ওয়ালকেশ্বর রোডে একটা বাড়ি বিক্রি হচ্ছে সস্তায়। কিনব কি?”

নিজের ভালো-মন্দের সমস্ত দায়িত্ব, সমস্ত ভাবনার ভার দিয়ে নিশ্চিত হলেন এক দূরবর্তিনী নিঃসম্পর্কীয়া অভিভাবিকার হস্তে, কিছুদিন মাত্র আগেও যিনি ছিলেন সম্পূর্ণ অপরিচিতা। আত্মসমর্পণে যে এত সুখ, নির্ভরতায় যে এত প্রশান্তি, তা কখনও জানেননি এর আগে।

## চোদ্দ

ব্যবসায়িক প্রয়োজনে আধারকারকে যেতে হল বিলাতে। লাহোর থেকে সপত্নীক ব্যানার্জী সাহেব এসে জাহাজে তুলে দিয়ে গেলেন ব্যালার্ড পিয়ারে।

দিন গেল, মাস বিগত, বৎসরও অতীত প্রায়। বিরহ-বেদনায় পীড়িত যে-দিনগুলি অন্তহীন মনে হয় প্রথমে, তারও শেষ আছে। আধারকার প্রত্যাবৃত্ত হলেন স্বদেশে। অবিলম্বে গেলেন লাহোরে।

অঘ্রানের প্রভাত। ট্রেনের কামরায় ঘুম ভেঙে গিয়ে আধারকার বাইরে তাকিয়ে দেখলেন, নির্মেষ আকাশে সূর্যোদয়ের স্বর্ণচ্ছটা বিচ্ছুরিত। শালতরুর কোমল

শ্যামল পল্লবদল শিশিরার্দ্র বাতাসে মৃদু কম্পিত। টেলিগ্রাফের তারের উপরে উপবিষ্ট একজোড়া খঞ্জনি পক্ষিশাবক ঘনঘন পুচ্ছ-আন্দোলনরত। অকারণ খুশিতে ভরে উঠল তাঁর মন।

অপরাহ্নে লাহোর স্টেশনে পৌঁছে দেখলেন একা ব্যানার্জী সাহেব এসেছেন অভ্যর্থনায়। বাড়ি পৌঁছে বেয়ারার হাতে পেলেন চিঠি। অতিপরিচিত অক্ষরে অনুপস্থিতির জন্য ক্ষমাপ্রার্থনা। এক বিশেষ জরুরি কাজে একটি মহিলাকে নিয়ে যেতে হল এক জায়গায়, চায়ের ব্যবস্থা রইল বেয়ারার কাছে, আধারকার যেন চা খেয়ে নেন। সন্ধ্যার মধ্যেই ফিরবেন তিনি।

গুধু চায়ের ব্যবস্থা নয়, স্নানের ঘরে বাথ-টবে ধরা আছে জল, টাওয়েল-র্যাকে ধবধবে তোয়ালে, সোপ-কেসে আছে আনকোরা সুগন্ধি সাবান। শয়নকক্ষে পরিপাটি বিছানা, খাটের পাশে ছোট টিপাই'র উপরে সুদৃশ্য টেবিল-ল্যাম্প ও খানকয়েক সদ্য-প্রকাশিত ইংরেজি উপন্যাস, মায় জয়পুরী ফুলদানিতে সযত্নে বিন্যস্ত আধারকারের প্রিয় স্বেত-করবীণুচ্ছ।

অতিথির পরিচর্যায়, আদরে, আপ্যায়নে লেশমাত্র ক্রটি নেই কোনোখানে। তবুও কেন যে অকারণ বেদনার ছায়া ঘনায় মনের দিগন্তে আধারকার নিজেই তা জানেন না। প্রবাসে কতদিন নিদ্রাহীন রজনীতে কল্পনা করেছেন আজকের এই মুহূর্তটি। কী বলবেন, তা নিয়ে মনে-মনে পর্যালোচনা করেছেন কতবার। দীর্ঘ বারোমাসের পুঞ্জীভূত কথার মধ্যে কোনটি বলবেন সর্বাত্মে, কোন প্রশ্ন, কোন সংবাদ দেবেন ও নেবেন, তা-ই নিয়ে অবসরক্ষেণে ভেবেছেন কতদিন। দেখা হলে যে-কথা ভেবে রেখেছিলেন, তা হয়তো যেত তলিয়ে, অতিপ্রয়োজনীয় জ্ঞাতব্য রইত চাপা, হয়তো গুধু উচ্চারণ করতেন ছোট্ট একটি সাধারণ প্রশ্ন : “কেমন আছ?” তার কিছুই হল না। খচ্ খচ্ করতে লাগল আধারকারের মন। হেমন্তের দিনটি যে-অপরিসীম আনন্দের অর্ঘ্য নিয়ে গুরু হয়েছিল, সে-আনন্দ নিয়ে যেন শেষ হল না।

আধারকার সাতদিন রইলেন লাহোরে। সুনন্দার সেবা, যত্ন ও অতিথেয়তায় রক্ত মাত্র রইল না কোথাও, কিন্তু তবুও যেন আগেরকার সে-সুর বাজল না আধারকারের মর্মে, রস সঞ্চারিত হল না অতিথির মনে। কোথায় রইল ফাঁক, কোনখানে ঘটল ব্যত্যয়, তার নিশানা পাওয়া গেল না। গুধু ব্যথা জেগে রইল হৃদয়ের নিভৃততম গহ্বরে। যে-অভাব চোখে দেখা যায় না অথচ বুকে বোঝা যায়, তার বেদনা দূর করার উপায় কী?

সুনন্দা কি বদলেছে? কই বোঝা তো যায় না। কিন্তু মন বলে, কী যেন নেই। অতি সামান্য বিষয় কাঁটার মতো বিধে আধারকারের মনে, কুশের অঙ্কুরসম ক্ষুদ্র, দৃষ্টি-অগোচর তবু তীক্ষ্ণতম। কিন্তু সেগুলি এমনই অকিঞ্চিৎকর যে, তা নিয়ে নালিশ করতে গেলে হাস্যকর ঠেকে। আধারকারের কোটের যে একটা বোতাম ছিঁড়েছে তা যদি একদিন সুনন্দার চোখে না পড়ে থাকে তাতে বিশ্বাসের কিছুই নেই। একটা মস্ত সংসারের সমস্ত পরিচালনভার যে-গৃহিণীর মাথায়, তার পক্ষে সেটা অস্বাভাবিক নয়। এটা যুক্তির

কথা। কিন্তু মানুষের মন তো ইভাক্টিভ লজিকের পাঠ্য কেতাব নয়। সে ফস করে পালটা প্রশ্ন করে বসে : কই, আগে তো এমন চোখে না-পড়তে দেখিনি কখনও।

লাহোরত্যাগের দিন আধারকার বিদায়-সম্ভাষণ জানাতে গেলেন ব্যানার্জিদের এক বন্ধু-পরিবারে। সে-গৃহে আধারকারের সম্প্রীতি জন্মেছিল সুনন্দাদেরই বন্ধুতাসূত্রে। গৃহস্বামীর কন্যা বললেন, “আজই যাচ্ছেন কীরকম? এলেন তো এই সে-দিন!”

“সে-দিন আর কোথায়, দিন-দশেক তো প্রায় হল!”

“দশ দিন? কখনো নয়, আমি বলছি অনেক কম। সাত দিন। আচ্ছা বাজি রাখুন? আপনি এসেছেন গেল শনিবারে, সেই যেদিন সুনন্দাদি, রাণু মাসিমা, আমরা সব সিনেমায় গেলাম।”

“সিনেমায় গেলে?”

“হ্যাঁ, রাণু মাসিমা এসেছিলেন এখানে বেড়াতে। তিনি সেন্ট এন্ড্রুজে সুনন্দাদির সঙ্গে এক ক্লাসে পড়তেন তো? তিনি ধরলেন সিনেমায় যেতে হবে। টিকিট কেনা হয়ে গেছে পরে খবর এল আপনি আসছেন ঐদিনই বিকালে। সুনন্দাদি তাই যেতে চাইছিলেন না, কিন্তু রাণু মাসিমা চলে যাবেন পরদিন সকালে। কাজেই শেষটায় অনেক বলাতে রাজি হলেন। কই আপনি শুনছেন না তো, কী ভাবছেন? বাজি হেরেছেন কিন্তু।”

আধারকারের মুখে-চোখে যে বেদনার ছাপ সুস্পষ্ট হল, তাকে বাজিতে হেরে যাওয়ার শোক মাত্র বলে গণ্য করা কঠিন। কিন্তু বাড়ি ফিরে এ-প্রসঙ্গ উত্থাপন করলেন না একটুকুও।

আধারকারকে ট্রেনে তুলে দিতে সেদিন সন্ধ্যায় যথারীতি স্টেশনে এসেছিলেন স্বামী-স্ত্রী। ওয়েটিং-রুমের একান্তে সুনন্দা জিজ্ঞাসা করলেন, “তোমাকে আজ সারাদিন এত আনমনা দেখাচ্ছে কেন? কী এত ভাবছ বলো তো?”

আধারকার চমকে উঠে তৎক্ষণাৎ আত্মসংবরণ করে বললেন, “কই, না তো!”

ট্রেন ছাড়ল। প্র্যাটফরমের উপর রুমাল সঞ্চালনরত বান্ধববান্ধবীদের মূর্তি দূর হতে দূরতর, ক্ষীণ হতে ক্ষীণতর হয়ে অন্ধকারে মিলিয়ে গেল। ডিস্ট্যান্ট সিগন্যালের লাল আলোটা ধীরে ধীরে চলে গেল দৃষ্টির অন্তরালে।

বার্থে ক্রান্ত দেহ এলিয়ে দিয়ে আধারকার ভাবতে লাগলেন সেই একই কথা যা আজ সকালবেলা থেকে কিছুতে তাড়াতে পারছেন না মন থেকে। কেমন করে সম্ভব হল তার আগমন-দিনে সুনন্দার পক্ষে বান্ধবীসঙ্গ? প্রিয়-সান্নিধ্যের চাইতে বড় হল সিনেমা? টিকিট কেনা ছিল? কত লক্ষ টাকা দাম সে-টিকিটের? কথা দেওয়া হয়েছিল বান্ধবীকে? কথা কি ভাঙা যায় না কিছুর জন্যই? কই আধারকার তো কল্পনা করতে পারে না এমন কোনো এনগেজমেন্ট যা সুনন্দার অভ্যর্থনার জন্য সে অগ্রাহ্য না করতে পারে অবহেলে। এক বছর পরে সুনন্দা যদি আসত লন্ডন থেকে পুনায়, কিম্বা ধরো লাহোর থেকে বসে, আধারকার কি তার নিকটতম বন্ধুর অনুরোধ এড়াত না, মাথাধরা বা শরীর খারাপের কল্পিত অজুহাত দেখিয়ে? প্রিয়জনের জন্যে মিথ্যা-ভাষণেও কি নেই সুখ?

বেশ তো, না-হয় ধরে নেওয়া গেল, বাল্যবন্ধুর কাছে প্রতিশ্রুতি ভঙ্গ করা সম্ভব ছিল না। আগেভাগে টিকিট কেনা ছিল, যেতে হয়েছে সিনেমায়। এতে দোষ কিছুই নেই। কিন্তু তার জন্য গোপনীয়তার আবশ্যক ছিল না, ছিল না জরুরি কাজের দোহাই দিয়ে এই মিথ্যা ছলনার!

বসেতে মন বসল না কাজে, তিষ্ঠিতে পারলেন না দীর্ঘকাল। আবার গেলেন লাহোরে। কিন্তু খণ্ডিতলয় খেয়ালগানের মতো কিছুতে পৌছতে পারলেন না আর সময়ে, বেতলা বেসুরো বাজতে লাগল জীবনের রাগিণী। ভরকেন্দ্র থেকে যেন চ্যুত হয়ে পড়ল এই দুটি অনাখ্যীয় নরনারীর তিন বছর ধরে দিনে-দিনে গড়া হৃদয়সৌধ। ফিরে গেলেন বসেতে। এমনি করে বারংবার যাওয়া-আসা করলেন বসে থেকে লাহোর, লাহোর থেকে বসে।

অবশেষে অত্যন্ত অপ্রত্যাশিতরূপে এই অস্থির ব্যাকুলতার একদিন ঘটল অবসান।

আধারকার আবার লাহোরে। সংশয় বেদনায় বিচলিত। অথচ প্রকাশ্য অভিযোগের নেই উপলক্ষ। কারণ সুনন্দার প্রতি আধারকারের দাবি তো অধিকারের নয়, অনুভূতির। দাবি হৃদয়ের। সে-হৃদয় যুক্তিজ্ঞানহীন শিশুর মতো বারংবার কেবলই অশ্রুভারাক্রান্ত হয়ে ওঠে। দুপুরে আপিসের কাজে বের হওয়ার কালে সেদিন সুনন্দা কাছে এসে দাঁড়ালেন না, আগের মতো এগিয়ে দিলেন না রুমাল, ফাউন্টেন পেন, হাতের ঘড়ি ও পকেটের পার্স। ঝি বললেন, “মেমসাব রসুইমে আলু বনাতী হৈঁ।” পরদিন সন্ধ্যাবেলা আপিস-প্রত্যাগত আধারকার কাউকে প্রতীক্ষমাণা দেখলেন না দোতলার বারান্দায়। শুনলেন ধোবার কাপড় মিলিয়ে নিতে ব্যস্ত আছেন মেমসাব।

রাগ করার কিছুই নেই এতে। কিন্তু অভিমানাহত মন বলে : কই ইতিপূর্বে কখনও তো ঘটেনি এমন দুর্ঘটনা। আধারকারের নির্গমন-আগমনক্ষণে কোনোদিন দেখা যায়নি রন্ধনশালায় আলু-কর্তনের প্রতি গৃহিণীর এই অপ্রতিরোধ্যানীয় অনুরাগ এবং রজকের অপহরণপ্রবণতার বিরুদ্ধে মেমসাহেবের এই সতর্ক পাহারা।

ব্যানার্জীর আপিসে কাজের চাপ ছিল বেশি, প্রত্যাগমনে ঘটবে বিলম্ব। সন্ধ্যার প্রাক্কালে আধারকার প্রস্তাব করলেন, “চলো বেড়িয়ে আসি সাহদারা গার্ডেনস্।”

সুনন্দা বললেন, “না।”

তবু পীড়াপীড়ি করলেন আধারকার।

“কেন, চলো-না।”

“না, একা তোমার সঙ্গে দেখলে লোকে কী বলবে?”

বিশ্বয়ে হতবাক হয়ে রইলেন আধারকার। সুদূর অতীতের কথা নয়, স্মৃতিকে করতে হবে না মন্থন। এই তো বিলেত যাওয়ার আগেও কতদিন দুজনে গেছেন সালিমার বাগে, সিনেমায়, জুহুর সমুদ্রতীরে, বসের রেষ্টোরাঁয়। সুনন্দা নিজে উদ্যোগ করে নিয়ে গেছেন অমৃতসরের স্বর্ণমন্দির দর্শনে, ব্যানার্জী রয়েছেন লাহোরে।

সে-দিন কোথায় ছিল লোকেরা, কোথায় ছিল তাদের মন্তব্যের প্রতি সহচারিণীর এই অসাধারণ শ্রদ্ধা?

লোকে দেখলে কী বলবে? হয়রে, এ-প্রশ্ন যে আধারকারই আগে ভুলেছিলেন একদিন অতীতে!

বসন্তে সেবার শীতের শেষে বসন্তরোগের প্রাদুর্ভাব হল মহামারিরূপে। আধারকারের গায়ে বেরুল গুটিকা। কী জানি কেমন করে খবর পৌঁছল লাহোরে। পরদিন সন্ধ্যাবেলায় সুনন্দা এসে হাজির হলেন আধারকারের ফ্ল্যাটে। আধারকার বিস্মিত হয়ে বললেন, “তুমি!”

শ্রদ্ধা, স্নেহ ও অভিমানজড়িত কণ্ঠের উত্তর শুনলেন, “তা ছাড়া আর দুর্ভোগ আছে কার? ক’দিন হয়েছে?”

“দিন চারেক, কিন্তু আমি তো খবর দেব না বলেই ঠিক করেছিলাম।”

“তা করবে না? তা না হলে আর আমাকে ভাবিয়ে মারবে কেমন করে?”

আধারকার উৎকণ্ঠিত কণ্ঠে বললেন, “এই ছোঁয়াচে রোগ, এর মধ্যে আসবার মন্ত্রণা দিল কে তোমাকে?”

ক্রুদ্ধ হয়ে সুনন্দা বললেন, “দ্যাখো, আমাকে রাগিও না বলছি। মন্ত্রণা দিয়েছে কে? মন্ত্রণা দিয়েছে আমার অদৃষ্ট।” খানিক থেমে জিজ্ঞাসা করলেন, “চাকর-বাকর হতভাগাগুলো গেছে কোন চুলোয়?”

“বাবুর্চি আর বেয়ারাটা পালিয়েছে ভয়ে; মাদ্রাজি ড্রাইভারটা আছে। সে-ই ওষুধপত্র আনে।”

“খাসা ব্যবস্থা, শুধু খবরের কাগজে ‘শোক সংবাদ’ ছাপাটুকুই যা বাকি,” বলে সুনন্দা গেলেন ড্রাইভারের সন্ধানে। তাকে নিয়ে ট্যাক্সি থেকে মালপত্র আনলেন উপরে। ঘরদোর করলেন আবর্জনামুক্ত, ধূলিহীন। বিছানা ঝেড়ে মুছে নতুন করে রচনা করলেন, স্বহস্তে রোগীর পথ্য তৈরি করলেন পরম নৈপুণ্যে।

আধারকার জিজ্ঞাসা করলেন, “ব্যানার্জীকে দেখছি না যে?”

“তিনি তো আসেননি।”

“আসেননি? তুমি এসেছ কার সঙ্গে?”

“কারও সঙ্গে নয়, একা।”

“মানে?”

“মানে আবার কী? উনি গেছেন ট্যুরে; ফিরতে দেরি হবে দিন-পাঁচেক। তোমার লাহোরের এজেন্টের সঙ্গে পরশু সকালে দেখা হয়েছিল এক দোকানে। তার কাছে খবর পেলেম অসুখের। বাড়িতে তালো এঁটে দুপুর সাড়ে এগারোটার ট্রেন ধরেছি ছুটতে ছুটতে। ওঁকে টেলিগ্রাম করে দিয়ে এসেছি এখানে রওনা হতে।”

বিস্ময়ে অভিভূত আধারকার বললেন, “ব্যানার্জী রাগ করবেন না?”

“হয়তো করবে।”

কিছুক্ষণ চুপ করে থেকে আধারকার বললেন, “লোকেই-বা বলবে কী? ব্যানার্জী ফিরে না-আসা পর্যন্ত অপেক্ষা করলে না কেন? একা চলে এলে কেন?”

বিরক্তকণ্ঠে সুনন্দা বললেন, “এসেছি আমার ইচ্ছে। লোকের ভাবনা ভেবে তোমার মাথা গরম করতে হবে না। তুমি চুপ করে ঘুমাও তো এখন।” বলে শয্যাপার্শ্বের চেয়ার ছেড়ে উঠে জানালার কাছে গিয়ে দাঁড়ালেন।

ঘরের মধ্যে আলো বেশি ছিল না, রোগীর দৃষ্টি থেকে আড়াল করার জন্য টেবিল-ল্যাম্পের একটা দিক খবরের কাগজ দিয়ে ঢাকা। পঁচাত্তর থেকে সুনন্দার মুখের অংশমাত্র দেখা যায়। কিছুক্ষণ পূর্বে সুনন্দা স্নান করেছেন। আর্দ্র কুণ্ডলদল পিঠের উপর অযত্নবিস্তৃত। পরিধানে দেশি তাঁতের একটি শাড়ি। বামস্কন্ধের উপর তার অবিন্যস্ত বক্ষিম অঞ্চলপ্রান্তের অন্তরাল থেকে নিটোল সুকুমার বাহুটি অনবদ্য ভঙ্গিতে লম্বিত। উন্নত গ্রীবার নিকটে সূক্ষ্ম একটি স্বর্ণহারের একটুখানিমাত্র আভাস। মৃদু দীপালোকিত কক্ষে বাতায়নবর্তিনীর এই মৌন মূর্তিটি রোগশয্যাশায়িত আধারকারের কাছে একটি পরম নিশ্চিত আশ্বাসের মতো প্রতীয়মান হল। দুজনের কেউ আর কোনো কথা বললেন না। শুধু উভয়ের উদ্বেল হৃদয়ের গভীর ভাবাবেগ সমাজ-সংসারের সমস্ত ক্ষুদ্রতা ও কলঙ্কের উর্ধ্বে দেবমন্দিরের পবিত্র হোমাগ্নির মতো যেন জ্বলতে লাগল একটি অনির্বাণ অদৃশ্য শিখায়।

পরের দিন ব্যানার্জীও এসে পৌঁছলেন। আধারকারের বসন্ত আসল নয়, চিকেন। কিন্তু রোগমুক্ত হতেই সুনন্দা জোর করে নিয়ে গেলেন লাহোরে এবং পক্ষাধিককাল পূর্বে আধারকার ছাড়া পেলেন না বসন্তে ফিরতে।

সেদিনের সুনন্দার দৃষ্টি ছিল না বাইরে, গ্রাহ্য ছিল না লোকাপবাদের, মন ছিল ইতরজনের নিন্দা-প্রশংসার অতীত। সংসারে ছিল না আসক্তি, গৃহকর্মে ছিল না আকর্ষণ, স্বামীতে ছিল না মনোযোগ। কতদিন আধারকার স্মরণ করিয়ে দিয়েছেন সুনন্দাকে, “এই ব্যানার্জী এসেছে আপিস থেকে। যাও, দ্যাখো গে তার কী চাই।”

সুনন্দা বলেছেন, “আচ্ছা, হয়েছে হয়েছে। তোমাকে আর গিল্পিপনা শেখাতে হবে না। তুমি ব্যানার্জীর দ্বিতীয় পক্ষের স্ত্রী কিনা?”

সেদিনের সুনন্দা নহে মাতা, নহে কন্যা, নহে বধূ। সে শুধু প্রণয়িনী। সে তো সুনন্দা ব্যানার্জী নয়, সে-সুনন্দা প্রিয়দর্শিনী।

সুনন্দারা হিন্দু নয়, খ্রিস্টান। বহু বর্ষ পূর্বে তাঁর পিতামহ এসে স্থায়ী আবাস গড়েছিলেন লাহোরে। সুনন্দা মানুষ হয়েছেন যুরোপীয় আবেষ্টনে, বিদ্যাভ্যাস করেছেন স্বেতাঙ্গদের কনভেন্টে, পরিণীতা হয়েছেন খ্রিস্টীয় প্রথায়। তাঁদের সমাজে তরুণীরা অবগুষ্ঠনবতী নয়, স্ত্রীরা নন অন্তঃপুরিকা। পুরুষের অবাধ সাহচর্য সেখানে নিন্দনীয় নয়, বাইরে বন্ধুসঙ্গ নয় নিষিদ্ধ। এমনকি বিবাহবিচ্ছেদ এবং পুনর্বিবাহেও সামাজিক অন্তরায় ছিল না সুনন্দার।

কঠোর তিষ্ঠ সত্য হৃদয়ঙ্গম করলেন আধারকার। মোহভঙ্গ হয়েছে সুনন্দার। সুধার পাত্র হয়েছে রিক্ত! মন্বন করলে আর উঠবে না মধু, উঠবে হলাহল।

সেদিন অপরাহ্নে বাড়ি ফিরবার উৎসাহ ছিল না আধারকারের। টেলিফোন করে জানিয়ে দিলেন ফিরতে বিলম্ব হবে তাঁর। বহুক্ষণ লক্ষ্যহীনভাবে ইতস্তত পরিভ্রমণ করে অবশেষে উপস্থিত হলেন ম্যালের পাশে সিনেমাহলের সম্মুখে। কী যেন কী

খেয়াল হল, টিকিট কিনে প্রবেশ করলেন ভিতরে। ছবি তখন শুরু হয়ে গেছে। অন্ধকার ঘরে টিকিটচেকার বসিয়ে দিয়ে গেল একটি আসনে। নির্বাক চিত্র। কিড্ডা শব্দে প্রজেক্টরের আওয়াজ শোনা যায় স্পষ্ট। দর্শকদের আলাপ, আলোচনা, মন্তব্যেরও বাধা থাকে না।

হঠাৎ নিজের নাম কানে আসতে চমকে উঠলেন আধারকার। সামনের সারিতে কারা বসেছেন অন্ধকারে তা দৃষ্টিগোচর নয়, কিন্তু তাঁরা যে পুরুষ নন সে-বিষয়েও সন্দেহ থাকে না। আধারকার উৎকর্ষ হয়ে শুনলেন।

“যাই বলিস ভাই, এড্‌মায়ারার-এর সংখ্যা আর বাড়াসনে। আধারকার বেচারী তো মরেছে তোর হাতে, আর কেন?”—চাপাকণ্ঠে বললেন একটি মহিলা।

উত্তর হল, “হ্যাঁ, বলেছে এসে তোর কানে-কানে।”

আধারকার আসন থেকে প্রায় পড়ে যাচ্ছিলেন মাটিতে। ভুল করার সাধ্য কী ও কণ্ঠ? এ-কণ্ঠ যে তাঁর জীবন-ইতিহাসের সঙ্গে জড়িত হয়ে আছে অচ্ছেদ্য বন্ধনে। প্রথম শুনেছিলেন তিন বছর পূর্বে দাদার স্টেশনে।

সখীদ্বয়ের পরিহাস পরিবাদ চলতে লাগল মৃদুকণ্ঠে, কিন্তু আধারকারের শ্রুতির অগোচর রইল না এক বর্ণও।

প্রশ্নকর্তী বললেন, “কানে-কানে বলতে হবে কেন? আমাদের কি চোখ নেই? স্পষ্ট দেখতে পাচ্ছি, আর কোনো আশা নেই লোকটার।”

“ইশ, বড় যে দরদ দেখছি! ওগো করুণাময়ী, তবে তুমিই ত্রাণ করো-না কেন তাকে!”

“বলিস কী! সইতে পারবি? তা হলে যে তোর মুখচন্দ্রমা অমাবস্যার অন্ধকারে ছেয়ে যাবে, বন্ধুবিচ্ছেদ ঘটবে আমার!”

“একটুও না। দিবি্য করে বলছি, আমার তাতে কী আসে যায়? বরং ছাড়া পেলে হাঁপ ছেড়ে বাঁচি।” কণ্ঠ পরিহাসতরল নয় এবার।

প্রশ্নকর্তী নিজেও বোধ হয় কিছুটা বিস্মিত হলেন। কৌতুক পরিহার করে বললেন, “কেন ভাই, আধারকারকে তো বেশ ভালো লোক মনে হয়। ভদ্র, শিক্ষিত, বিত্তশালী অথচ স্নব নয়—বেশ সিম্পল।”

“সিম্পল নয়, সিম্পলটন। কাণ্ডজ্ঞান নেই এতটুকু। সব জিনিসই অত্যন্ত সিরিয়সলি নেবে। কবে কখন fun করে কী বলেছি, কী করেছি, সেটাকেই মনে করে বসেছে, আমি ওর প্রেমে পড়েছি। ইডিয়ট! সত্যি বলছি তোকে, আমি ক্রমশ যেন টায়ার্ড হয়ে উঠছি।”

হঠাৎ ছবির স্পুল ছিঁড়ে গিয়ে ছবি হল বন্ধ, আলো জ্বলে উঠল প্রেক্ষাগৃহের। সে-আলোতে দেখা গেল আলাপ-আলোচনারতা বান্ধবীদ্বয়কে অদূরবর্তী আসনে।

মিনিট-পাঁচেকের মধ্যে জোড়া-দেওয়া ফিল্ম শুরু হল। আবার অডিটরিয়ামের বাতি দেওয়া হল নিভিয়ে।

ছবির আখ্যান-ভাগ এক তরুণী শ্রেষ্ঠিকন্যার প্রণয়কাহিনী। তাঁর দরিদ্র প্রেমাস্পদ চলে যাচ্ছেন দূরদেশে জীবিকার প্রয়োজনে। সন্ধ্যাবেলায় পরিজনের অলক্ষিতে উদ্যান-বাটিকায় তরুণী সাক্ষাৎ করলেন তাঁর সঙ্গে। পিতৃগৃহ পরিত্যাগ করে সঙ্গিনী



হতে চাইলেন দয়িতের। কিন্তু তরুণ চায় না ধনিকন্যাকে দারিদ্র্যের মধ্যে টেনে আনতে। বলে : আমাকে ভুলে যেও। মনে কোরো—এক সন্ধ্যায় অপ্রত্যাশিতরূপে দুজনে দেখা হয়েছিল এক পাছশালায়, রাত্রি প্রভাতে যাত্রীরা চলে গেছে নিজ-নিজ বিভিন্ন পথে। আর দেখা হবে না কোনোদিন।

শ্রেষ্ঠিকন্যার প্রেম গভীর। ঐহিক সুখ-স্বাস্থ্যের প্রশ্ন তাঁর কাছে তুচ্ছ, দৃষ্টি নেই মণিমুক্তা বিলাসোপকরণ বা ঐশ্বর্যসম্ভারে। যাকে প্রাণ সমর্পণ করেছেন, তাঁর বিহনে প্রাণ ধারণ করবেন কেমন করে? হে নিষ্ঠুর যদি ফেলে যাও এ-অভাগিনীকে, পায়ে দলে যাও কোমল হৃদয়, তবে জেনো মৃত্যু তার অবধারিত।

দর্শকগণ রুদ্ধশ্বাস প্রতীক্ষায় সম্মুখের পর্দায় নিবদ্ধদৃষ্টি।

প্রণয়ব্যাকুলা রমণীর এই আত্মসমর্পণে কী করবে তরুণ নায়ক? প্রচুর পাউডার-প্রলিণ্ড নায়িকার গওদেশে ঠাস করে একটি সবল চপেটাঘাত করলে আধারকার সবচেয়ে খুশি হতেন। কিন্তু তা কেমন করে হবে? ছবিতে দেখা গেল, আকাশে উঠেছে পূর্ণিমার চাঁদ, মাধবীলতায় ফুটেছে গুচ্ছ গুচ্ছ ফুল, পরস্পরের চক্ষুতাড়না দ্বারা প্রণয় নিবেদন করছে তরুণশাখে উপবিষ্ট ক্রৌঞ্চমিথুন এবং উদ্যানের সরোবরে দুটি প্রস্ফুটিত পদ্ম হঠাৎ দুদিক থেকে ভাসতে ভাসতে এসে মিলল একসঙ্গে। ভারতীয় সিনেমার এই চিরপরিচিত পারিপার্শ্বিকে ছায়াচিত্রের নায়কেরা চিরকাল যা করে থাকে তা-ই করল তরুণ। বাহুবৈষ্টনে আবদ্ধ করল নায়িকাকে। দুজনে হাত ধরাধরি করে রওনা হল। কোথায়, তা অবশ্য একমাত্র চিত্রপরিচালকই জানেন! বিমুগ্ধ দর্শকবৃন্দের সঘন করতালি-ধ্বনিতে মুখরিত হয়ে উঠল প্রেক্ষাগার। শেষ হল নাটিকার।

সকলের অলঙ্কিতে আধারকার নিস্তান্ত হলেন প্রেক্ষাগৃহ থেকে। মনে-মনে বললেন, একমাত্র নাটকের মধ্যেই সম্ভব এই অবাস্তব কাহিনীর অবতারণা। সেখানে তো সত্যিকার জীবন্ত মানুষের মুখোমুখি হওয়ার দায় নেই। তাই তার কল্পিত নায়িকার পক্ষে কোনো অসম্ভব আচরণ বা কোনো অস্বাভাবিক উক্তি করতেই বাধা নেই। তা শুনে আমরা বিমুগ্ধ দর্শকরাও ‘এস্কেয়ার’, ‘এস্কেয়ার’ বলে চৈঁচিয়ে উঠি। আমরা তো জানি নে শ্রেষ্ঠিকন্যার যে-প্রণয়নিবেদন দৃশ্য দেখে আমাদের চক্ষু অশ্রুসজল হয়ে ওঠে তার ষোলো আনাই স্টেজ-ম্যানেজ্‌ড, ষোলো আনাই ফান। সমস্তটাই ফাঁকি। হতভাগ্য নায়ক সে-তথ্য জানতে পারে দুদিন পরে। কিন্তু সে তো দর্শকের দেখার উপায় নেই। রচিত কাব্যের বহির্দর্শে, অভিনীত নাটকের নেপথ্যে সে থাকে চিরকাল লোকলোচনের অন্তরালে। নাটকের যেখানে শেষ, জীবনের সেখানেই তো শুরু!

সেই রাত্রেই লহোর পরিত্যাগ করলেন আধারকার।

রাত বারোটায় ট্রেন। খোয়া-বাঁধানো পথের উপর দিয়ে মন্তুর গতিতে চলেছে টাঙ্গা। এপথে কতবার আসা-যাওয়া করেছেন আধারকার। কিন্তু আজকের যাত্রা তো অন্য আরবারের মতো নয়। তখন যাওয়ার মধ্যে থাকত অদূরবর্তী পুনরাগমনের আশ্বাস, থাকত পুনর্মিলনের সত্য প্রতীক্ষা। আজ সে-আশা রইল না এতটুকুও।

যে-গৃহদ্বার এইমাত্র অতিক্রম করলেন, যে-পথ রাখলেন পশ্চাতে, কদাচ তা পুনর্স্মরণের আর সম্ভাবনা রইল না।

যুদ্ধক্ষেত্রে দেখা যায়, বোমার আঘাতে আহতের একটি বাহু দেহ থেকে বিচ্ছিন্ন হয়ে পড়ে আছে অদূরে, অথচ তার সংজ্ঞা হয়নি বিলুপ্ত। অ্যান্থ্রলেস-বাহিত সে-আহত স্পষ্ট দেখতে পায়, ফেলে রেখে যাচ্ছে সে আপন খণ্ডিত বাহু। আধারকার অনুভব করলেন সেই অনুভূতি! আপন চোখে দেখতে পেলেন পশ্চাতে ফেলে রেখে যাচ্ছেন—বাহু নয়, শতধাবিদীর্ণ হৃদয়।

ফানই বটে! স্নেহ নয়, শ্রীতি নয়, শোভা-গন্ধ-বিমণ্ডিত হৃদয়াবেগের বাষ্পমাত্র নয়, শুধু কৌতুক। নিষ্ফল প্রণয়ের উপশম আছে করুণায়, কিন্তু উপহাসিতের নেই সান্ত্বনা। তার লজ্জা দুঃসহ।

এই হৃদয়হীন নারীর ছলনাকেই সত্য কল্পনা করে বিভ্রান্ত হয়েছিলেন আধারকার—একথা ভেবে নিজের উপরে গভীর বিতৃষ্ণা জন্মাল তাঁর। কতদিন প্রমত্ত প্রগল্ভতায় হৃদয়ের কত দুর্বলতা ব্যক্ত করেছেন তাঁর কাছে, কত স্বপ্ন গড়েছেন তাঁকে কেন্দ্র করে, সেসব স্মরণ করে বারংবার নিজেকে ধিক্কার দিলেন আধারকার।

গভীর বেদনা ও অপরিসীম লজ্জা নিয়ে আধারকার ফিরে চললেন স্বস্থানে। অনন্ত আকাশে লক্ষ কোটি যোজন দূরের যে-তারকাশ্রেণী অনিমেষ নয়নে এই বিপুলা ধরিত্রীর পানে তাকিয়ে আছে, তারা সাক্ষী রইল আর-একটি সঙ্করুণ কাহিনীর। যুগায়ুগান্ত ধরে এমন কত শত অশ্রুসজল বেদনাবিধুর নাট্য অভিনীত হয়েছে তাদের পলকহীন নয়নের অকম্পিত দৃষ্টির সম্মুখে। কত খেলা গেছে ভেঙে, কত ফুল ঝরেছে ধূলায়, কত বাঁশরি হয়েছে নীরব।

এই স্বল্পপরিসর জীবনের প্রায় সমুদয় অংশ আধারকার কটিয়েছেন একা। এই তো সেদিন পর্যন্ত চাকর বেয়ারা মাত্র সম্বল ফ্ল্যাটে আপনাকে নিয়ে আপনি ছিলেন মগ্ন। আজও আবার সেই নিঃসঙ্গ একাকিত্বের মধ্যেই প্রত্যাবর্তন করলেন। অথচ এ-দুয়ের মধ্যে কী অপরিসীম প্রভেদ! আকাশ আজ নিঃশেষে শূন্য, বাতাস আজ নিরর্থক, এই জনাকীর্ণ পৃথিবীর সমাজ ও সংসারের যাবতীয় কর্ম বিশ্বাস ও ক্লাস্তিকর।

নিজের অতীত, বর্তমান ও ভবিষ্যতের দিকে চেয়ে দেখলেন আধারকার। একটা বিরাট মরুভূমির মতো সর্বত্র উষর। কোনোখানে নেই একটু ছায়া, একটু শ্যামলিমা, একটু আলোক-আঁধার-বিজড়িত স্নিগ্ধতার চিহ্ন লেশ।

আধারকার মূর্খই বটে। কাচকে ভেবেছিলেন হীরা, সদ্য টাকশাল থেকে নির্গত উজ্জ্বল তাম্রখণ্ডকে ভ্রম করেছিলেন গিনি বলে। গান্ধীজির একটি লেখা চোখে পড়ল একদিন, আধুনিকাদের সম্পর্কে। তারা নাকি প্রত্যেকেই নিজেকে ভাবে একটি জুলিয়েট, একসঙ্গে আধডজন রোমিও'র প্রণয়িনী। আধারকারের মনে হয়, এতদিনে যেন অর্থ পেলেন।

কিন্তু নিশ্চিত হতে পারেন না একেবারে। আবার সংশয় জাগে চিন্তে। একাধিক রোমিও'র জন্য কি দুর্যোগের রাত্রিতে উৎকণ্ঠায় বিন্দ্রি রজনী যাপন করা যায়?

সম্ভব হয় তাদের অসুখের সংবাদে স্বামী-সংসার ফেলে একাকী একহাজার মাইল ছুটে যাওয়া!

বসেতে ফিরে মাসকয়েক বিপুল উদ্যমে চেষ্টা করলেন আপনাকে সম্পূর্ণ বিলুপ্ত করতে কর্মের মধ্যে। মিলের কাজে খাটতে লাগলেন সকাল থেকে সন্ধ্যা। ভুলতে প্রয়াস করলেন বিগত তিন বৎসরের স্বপ্নাশু স্বপ্নলোক। করতে চাইলেন নতুন করে জীবনারম্ভ। কিন্তু মন তো শিশুদের আঁক কষার স্লেট নয় যে, ইচ্ছামতো পেনসিলের আঁচড় মুছে নতুন করে সংখ্যাপাত করা যাবে। নিজের সঙ্গে দিনের পর দিন অবিরাম যুদ্ধ করে ক্ষতবিক্ষত হলেন আধারকার। তারপর জলের দামে একদিন হঠাৎ মিল দিলেন বিক্রি করে। অন্তর্হিত হলেন বসে থেকে।

গেলেন মালয়া, রবারের বাগানে হলেন ম্যানেজার। ভালো লাগল না বেশিদিন। গেলেন সিলোনে এক কফি কোম্পানির কর্তারূপে, টিকতে পারলেন না দু'বছর। বুয়েনস এয়ার্সে কাজ করলেন মদের কারখানায়; সেখানেও বিরক্তি ধরল। পরিব্রাজক হয়ে দীর্ঘকাল পরিভ্রমণ করলেন, দেশ-দেশান্তর। নানকিং, ক্যানবারা, টরোন্টো, ওয়াশিংটন, লাইপৎসিগ, ব্রাসেলস। তবু ভুলিল না চিন্ত।

নিউ ক্যাসেলের এক ইংরেজ কোম্পানি থেকে এককালে নিজের মিলের জন্য আধারকার কিনেছিলেন কিছু সাজসরঞ্জাম। তাদের ভারতীয় শাখার ম্যানেজাররূপে অবশেষে আধারকার এলেন দিল্লিতে। এখানে আছেন আজ এগারো বছর। যে-মিল তিনি বিক্রি করে দিয়েছেন কুড়ি বছর আগে, তার ম্যানেজিং ডিরেক্টর আজ কোটিপতি। সেখানে এক ডজন কর্মচারী আছে যারা আধারকারের চেয়ে বেশি মাইনে পায়।

বছরের পর বছর হয়েছে গত। জীবনের আজ অপরহবেলায় এসে পৌঁছেছেন আধারকার। দেহে স্পষ্ট থেকে স্পষ্টতর হচ্ছে বার্ধক্যের আক্রমণ-আভাস। হৃদযাবগের যে-তীব্রতা যৌবনের লক্ষণ, আজ তা স্তিমিততেজ।

যে-সুনন্দাকে আধারকার ভালোবেসেছিলেন, সে তো শুধু ঐ রক্তমাংসের মানুষটি নয়। প্রেম আপন গভীরতায় নিজের মধ্যে একট মোহাবেশ রচনা করে। সেই মোহের দ্বারা যাকে ভালোবাসি তাঁকে আমরা নিজের মনে-মনে মনোমতো করে গঠন করি। যে-সৌন্দর্য তাঁর নেই, সে-সৌন্দর্য তাতে আরোপ করি। যে-গুণ তাঁর অভাব, সে-গুণ তাঁর কল্পনা করি। তাই কুরুপা নারীর জন্য রূপবান, বিস্তবান তরুণেরা যখন সর্বস্ব ত্যাগ করে, অপর লোকেরা অবাক হয়ে ভাবে, “আছে কী ঐ মেয়েতে, কী দেখে ভুলল?” যা আছে সে তো ঐ মেয়েতে নয়—সে ভুলেছে তার বিমুগ্ধ মনের সৃজনধর্মী কল্পনায়। আছে তার প্রণয়জ্ঞানলিঙ্গ নয়নের দৃষ্টিতে। সে যে আপন মনের মাধুরী মিশায়ে করেছে তাহারে রচনা।

আধারকারের দৃষ্টি থেকে সে-অঞ্জন আজ বিলুপ্ত, মন থেকে সে-মোহাবেশ অপসৃত। একদিন জগতের সমস্ত কবিকুলের কল্পলোক থেকে আহৃত যে-সৌন্দর্য, যে-সুখমা, যে-বর্ণসম্ভার দ্বারা সুনন্দাকে তিনি রচনা করেছিলেন তিলে তিলে, আজ তার লেশমাত্র নেই। প্রবঞ্চিত আধারকারের কাছে সুনন্দা আজ একজন অতি

সামান্য রমণী মাত্র। কোনোখানে তার এতটুকু অনির্বচনীয়তা, এতটুকু বিশেষত্ব অবশিষ্ট নেই।

কিন্তু কী আশ্চর্য মানুষের মন! আজও ক্ষতের মূল রয়েছে গভীরে যদিও চিহ্ন গেছে মিলিয়ে। অসাবধান মুহূর্তে ছোঁয়া লাগলে আজও কেন টনটন করে ব্যথায? কেন নিঃশেষ হয় না স্মৃতি?

আধারকারের কাহিনী শেষ হল।

বাক্যহীন নিস্তব্ধতায় বসে রইলেম খানিকক্ষণ।

“হুজুর, টাঙ্গা ল্যান্ডে পড়েগা?”

চমকে চেয়ে দেখি আধারকারের ভৃত্য। কখন আধারকার উঠে চলে গেছেন নিঃশব্দে, টের পাইনি একটুও। আপন জীবনের নিগূঢ় গোপন কাহিনী ব্যক্ত করেছেন আজ এক অতি অল্পদিনের পরিচিত অসমবয়সী বন্ধুর কাছে। যখন বলে গেছেন, তখন অবগাহন করেছেন স্মৃতির ধারায়। কাহিনী সাস্র হতেই সে-মোহজাল ছিন্ন হয়েছে, নেমে এসেছেন বাস্তবের প্রত্যক্ষ ভূমিতে। সঙ্কোচ দেখা দিয়েছে সেই মুহূর্তে, যেই হয়েছে চোখাচোখি। তাই অদৃশ্য হয়েছেন নিঃশব্দে। সুতরাং বিদায় নেওয়ার চেষ্টা থেকে বিরত হলেম। ভৃত্যকে টাঙ্গা আনতে করলেম বারণ। পদব্রজে নিষ্ক্রান্ত হলেম পথে।

গুরুপক্ষের অষ্টমীর চাঁদ উঠেছে মেঘশূন্য আকাশে, তার জ্যোৎস্না ছড়িয়ে পড়েছে দুপাশের বাংলাগুলির বিস্তীর্ণ অঙ্গনে। পথ জনশূন্য, ধ্বনিবিরল। কাছাকাছি কোথায় যেন হাসনুহানার ঝাড়ে ফুটেছে ফুল। তার তীব্র মন্দির সুবাসে বাতাস হয়েছে উতলা আকুল, রজনী হয়েছে গন্ধবিস্মল।

চলতে চলতে ভাবছিলাম আধারকারের কথা। কানে বাজতে লাগল সঙ্কল্প স্বীকারোক্তি, “মিনি সাহেব, আমি ইডিয়টই বটে! পরিহাসকে মনে করেছি প্রেম; খেলাকে ভেবেছি সত্য। কিন্তু আমি তো একা নই। জগতে আমার মতো মূর্খরাই তো জীবনকে করেছে বিচিত্র; সুখে দুঃখে অনন্ত মিশ্রিত। যুগে যুগে এই নির্বোধ হতভাগ্যের দল ভুল করেছে, ভালোবেসেছে, তারপর সারা জীবনভোর কেঁদেছে। হৃদয়নিংড়ানো অশ্রুধারায় সংসারকে করেছে রসঘন, পৃথিবীকে করেছে কমনীয়। এদের ভুল, ত্রুটি, বুদ্ধিহীনতা নিয়ে কবি রচনা করেছেন কাব্য, সাধক বেঁধেছেন গান, শিল্পী অঙ্কন করেছেন চিত্র, ভাস্কর পাষাণখণ্ডে উৎকীর্ণ করেছেন অপূর্ব সুযমা। জগতে বুদ্ধিমানেরা করবে চাকরি, বিবাহ, ব্যাঙ্কে জমাবে টাকা, স্যাকরার দোকানে গড়াবে গয়না; স্ত্রী, পুত্র, স্বামী, কন্যা নিয়ে নির্বিঘ্ন জীবনযাপন করবে স্বচ্ছন্দ সচ্ছলতায়। তবু আমরা মেধাহীনের দল একথা কোনোদিন মানব না যে, সংসারে যে বঞ্চনা করল, হৃদয় নিয়ে করল ব্যঙ্গ, দুখ বলে দিল পিটুলি—তারই হল জিত আর ঠকল কেবল সে, যে উপহাসের পরিবর্তে দিল প্রেম।”

অতি দুর্বল সান্ত্বনা। বুদ্ধি দিয়ে, রবি ঠাকুরের কবিতা আবৃত্তি করে বলা সহজ—“জীবনের ধন কিছুই যাবে না ফেলা, খুলায় তাদের যত হোক অবহেলা।” কিন্তু জীবন তো মানুষের সম্পর্ক-বিবর্জিত একটা নিছক তর্ক মাত্র নয়। শুধু কথা গেঁথে গেঁথে ছন্দ রচনা করা যায়, জীবনধারণ করা যায় না।

আধারকার হচ্ছেন সেই শ্রেণীর পুরুষ, যারা কিছুই হাতে রাখতে জানেন না। এঁদের কপালে দুঃখ অনিবার্য। পলিটিক্সের মতো মানুষের জীবনও হচ্ছে অ্যাডজাস্টমেন্ট আর কম্প্রমাইজ। এ দারুণ ইনফ্লেশনের বাজারেও সংসারে শুধু হৃদয়ের দাম খুব বেশি নয়।

সুনন্দার পক্ষে সম্ভব ছিল না আধারকারের গতিতে তাল রেখে চলা। সে নারী, প্রেম তার পক্ষে একটা সাধারণ ঘটনা মাত্র। আবিষ্কার নয়, যেমন পুরুষের কাছে। মেয়েরা স্বভাবত সাবধানী, তাই প্রেমে পড়ে তারা ঘর বাঁধে। ছেলেরা স্বভাবতই বেপরোয়া, তাই প্রেমে পড়ে তারা ঘর ভাঙে। প্রেম মেয়েদের কাছে একটা প্রয়োজন, সেটা আটপৌরে শাড়ির মতো নিতান্তই সাধারণ; তাতে না আছে উল্লাস, না আছে বিস্ময়, না আছে উচ্ছলতা। ছেলেদের পক্ষে প্রেম জীবনের দুর্লভ বিলাস, গরিবের ঘরে বেনারসি শাড়ির মতো ঐশ্বর্যময়, যে পায় সে অনেক দাম দিয়েই পায়। তাই প্রেমে পড়ে একমাত্র পুরুষেরাই করতে পারে দুরূহ ত্যাগ এবং দুঃসাধ্যসাধন।

আধারকার নিজেই একদিন বলেছিলেন, “মিনি সাহেব, জগতে যুগে যুগে কিং এডওয়ার্ডেরাই করেছে মিসেস সিম্পসনের জন্য রাজ্য বর্জন, প্রিন্সেস এলিজাবেথেরা করেনি কোনো জন, স্মিথ বা ম্যাকেক্সির জন্য সামান্যতম ত্যাগ। বিবাহিতা নারীকে ভালোবেসে সর্বদেশে সর্বকালে আজীবন নিঃসঙ্গ জীবন কাটিয়েছে একাধিক পুরুষ; পরের স্বামীর প্রেমে পড়ে কোনোদিন কোনো নারী রয়নি চিরকুমারী।”

কোমলহৃদয় বলে আমার খ্যাতি নেই। কিন্তু আধারকারের জন্য সত্যিকারের বেদনা বোধ করলেম হৃদয়ে। সুনন্দা ব্যানার্জী আজ কোথায় আছেন জানিনে। অনুমান করছি, এতদিনে তাঁর যৌবন হয়েছে গত, দেহ বিগতশ্রী, দৃষ্টি বিদ্যুৎহীন এবং কপোলের রেখাগুলি প্রচুর প্রসাধনপ্রলেপের দ্বারাও আজ আর কোনোমতেই গোপনসাধ্য নয়। কোনোদিন কোনো অবকাশ-মুহূর্তে বহুবর্ষ আগেকার এক মারাঠি ব্রাহ্মণের চরম নির্বুদ্ধিতার কথা স্মরণ করে ক্ষণেকের জন্যও তাঁর মন উন্মূনা হয় কি না, সে কথা আজ জানার উপায় নেই। অথচ তাঁরই জন্য আধারকার দিলেন চরম মূল্য। নিজেকে বঞ্চিত করলেন সাফল্য থেকে, খ্যাতি থেকে, ঐহিকের সর্ববিধ সুখ-স্বাচ্ছন্দ্য থেকে! সবচেয়ে বড় কথা, নিজেকে বঞ্চিত করলেন সম্ভবপর উত্তরপুরুষ থেকে, বংশের ধারাকে করলেন বিলুপ্ত।

কোনোদিন সন্ধ্যাবেলায় তাঁর কুশল কামনা করে তুলসীমঞ্চ কেউ জ্বালবে না দীপ, কোনো নারী সীমন্তে ধরবে না তাঁর কল্যাণ-কামনায় সিন্দূরচিহ্ন, প্রবাসে অদর্শনবেদনায় কোনো চিত্ত হবে না উদাস উতল। রোগশয্যা ললাটে ঘটবে না কারও উদ্বেগকাতর হস্তের সুখস্পর্শ, কোনো কপোল থেকে গড়িয়ে পড়বে না নয়নের উদ্বল অশ্রুবিন্দু। সংসার থেকে যেদিন হবেন অপসৃত, কোনো পীড়িত হৃদয়ে বাজবে না এতটুকু ব্যথা, কোনো মনে রইবে না ক্ষীণতম স্মৃতি।

প্রেম জীবনকে দেয় ঐশ্বর্য, মৃত্যুকে দেয় মহিমা। কিন্তু প্রবঞ্চিতকে দেয় কী? তাকে দেয় দাহ। যে-আগুন আলো দেয় না অথচ দহন করে, সেই দীপ্তিহীন অগ্নির নির্দয় দাহনে পলে পলে দগ্ধ হলেন কাণ্ডজ্ঞানহীন হতভাগ্য চারুদত্ত আধারকার।

চিরায়ত গ্রন্থমালা  
এবং  
চিরায়ত বাংলা গ্রন্থমালা  
শীর্ষক দুটি সিরিজের আওতায়  
বাংলাভাষাসহ পৃথিবীর বিভিন্ন দেশ  
ও ভাষার শ্রেষ্ঠ রচনাসমূহকে  
পাঠক সাধারণের কাছে সহজলভ্য করার লক্ষ্যে  
বিশ্বসাহিত্য কেন্দ্র  
একটি উদ্যোগ গ্রহণ করেছে।  
এই বইটি ‘চিরায়ত বাংলা গ্রন্থমালা’র  
অন্তর্ভুক্ত।  
বইটি আপনার জীবনকে দীপান্বিত করুক।



বিশ্বসাহিত্য কেন্দ্র